



MS-2



John Cranford,

M. D.





ANTONII DE HAEN,

CONSILIARII AVL. ET MED. PRACT. IN HAC ALMA ET
ANTIQUISSIMA VNIVERSITATE PROFESSORIS
PRIMARII

PARS QUARTA
RATIONIS MEDENDI
IN NOSOCOMIO PRACTICO;
QVOD IN GRATIAM ET EMOLUMENTVM
MEDICINAE STVDIOSORVM
CONDIDIT

MARIA THERESIA,
AVGVSTISSIMA ROMANORVM
IMPERATRIX,
HVNG. BOHEM. &c. REGINA &c. &c.



VINDOBONAE,

TPIS, JOANNIS - THOMÆ TRATTNER, CARIS. REG.
APOST. MAIEST. AULÆ TYPOGR. ET BIBLIOPOLÆ.

M. DCC. LIX.

19304



Crawford

SACRAE CAESAREAE, REGIAE, APOSTOLICAE,
MAJESTATI,
AVGVSTISSIMAE ROMANORUM
IMPERATRICI,
HVNGARIAE, BOHEMIAE, DALMATIAE,
CROATIAE, SCLAVONIAE, &c. &c.
REGINAE,
ARCHIDVCI AVSTRIAE, &c. &c.
MARIAE THERESIAE,
DOMINAE
SVAE CLEMENTISSIMAE,
ANTONIUS DE HAEN.



*En jam quartum Tomum
annui laboris ad MA-
IESTATISTUÆ
pedes devolutus, humillime depono. Ob-*

*servata continet numerosa , quæ par-
tim Nosocomium TUUM , partim
Urbs Regia TUA , partim denique
finitimæ TUAE urbes , ac regiones ,
suppeditarunt : observata eum unice in
finem collecta , ut calamitatibus subdi-
torum TUORUM tum averrun-
candis , tum mulcendis , tum denique
auferendis , inservirent. Eo enim , ut
sane debuit , omnis diurna mea , omnis
nocturna tetendit vigilantia. At neque
hic*

hic metam fixi laboribus. Quantum enim legendo assequi poteram, quidquid celebres per Europam Eruditorum Societates variae, quidquid solertes in Arte Viri, quidquid demum privatum Literarum Commmercium, sive insolitum, sive plane novum, ad miserias humanas mitigandas auferendasque evulgarant, id omne ad experimentum in Nosocomio revocatum est; ut nimirum Populi tui salus, commissa nobis

nobis , eo cuncto gauderet auxilio , quo
& alias terrarum Gentes gaudere intellexeram. Necdum tamen omni debito satisfactum. *Vetus Adagium fert Amicorum omnia communia esse : porro universæ Telluris incolas amicos nostros, nostros proximos , reputamus ; eorum ergo in gratiam publicæ lucis ea facere tenebar , quæ nobis recenter detecta , alicubi forte adhuc ignorarentur. Hisce,*
**AUGUSTISSIMA IMPE-
RA-**

RATRIX, *si quo sereno vultu præcedentibus conatibus meis annuere solebas, etiam num annuas, erit quod exsultem vehementer, quod gratissimo recorder animo, quod ad cursum sequentem alacrius absolvendum me potenter exstimulet.*

Dabam 31. Octobris
1759.

ELEN.

ELENCHUS

CAPITUM.

CAPUT I.

De Febribus Malignis Dictis. Pag. 1.

CAPUT II.

De Aneuryfmate. Pag. 8.

CAPUT III.

De Tympanitide, & Hydrope Cystico varia. Pag. 58.

CAPUT IV.

De Coxario Morbo. Pag. 125.

CAPUT V.

De Apoplexia, & Nervorum morbis. Pag. 162.

CAPUT VI.

De Sanguine & calore humano. Pag. 200.

CAPUT VII.

De Singulari quorundam Medicamentorum virtute. Pag. 223.

CAPUT VIII.

De Viribus Electrinis. Pag. 240.



C A P U T I.
D E
FEBRIBUS MALIGNIS
DICTIS.

§. I. *Malignitatem de morbi cujusquam acuti essentia non esse, sed modo accidens quoddam, probatur exemplo variolarum.* §. II. *Cortice Peruviano plurimo qui olim a morbo maligno curati, valent pulcre omnes.* §. III. *Exempla duarum feminarum, quarum alteram Cortex servavit uberri- ma cum Petechiarum expulsionem; alteram, cum earundem præmatura retropulsionem.* §. IV. *Cortex serius datus, malignitatem non curat.*

§. I. **Q**uæ anno proxime elapso adeo fuse de Febribus, quas malignas vocant, disserui, ea præsens annus confirmavit abunde; tum quantum ad ge-
A nium

nium earum adtinet, tum quantum ad curam.

Quippe *Tom. 3. cap. 1.* frequentia observationum suffultus, conclusi Malignitatem haud esse, quod in scholis medicis ita vocant, de essentia Morbi, sed quoddam potius Accidens; quod nimirum alienis illum stiparet symptomatibus, quod Artis potentiae illum subtraheret. Id, nisi me animus fallit, manifestum est. Variolas v.g. descripturi Autores, haud solent ab illis, malignas quas appellitant, exemplar, normamve, desumere, sed a communi illarum genere. Quo facto, primo eam addere speciem consuevere, qua, licet genuinâ, qui laborant, tamen vix lectum petant, non ægrotent fere, & præter manifestam papularum expulsionem, maturationem, exsiccationem, aliud fere morbi hujus signum non habeant. Secundo pessimum istud genus adjiciunt, quod symptomatum numero, ac sævitie; quodque pertinaci adversus omnem

Ar-

Artis operam resistantia, ita sua malignitate ab illa prædefinita communi specie ablutit, quam benignissimum illud bonitate, ac lenitate sua, ab eadem differebat. Ut itaque & dicta illa Malignitas æque parum in vera idea, ac definitione Variolarum includatur, quam miranda illa Mitissimarum Benignitas.

Quod si ita cum Variolis est, eo magis id cum Petechiis, cum albis, rubrisque Miliaribus, se sic habebit. Examine ritè instituto, Efflorescentiæ hæ binæ 1^{mo} ut morbi primarii producuntur : id vero rarius, & ad certas potissimum Epidemias duntaxat. 2^{do} ut Acutorum Crises : quod etiam raro admodum ; nec nisi Regiminis errore frequentius. 3^{tio} ut ἐπιγενομενὸι plerisque morbis acutis, puerperio ; quæ duo posteriora de Variolis affirmari nunquam possunt. Porro quæ tria hic dixi, audacter assevero, cum sexto jam anno huic Nosocomio præpositus, innumeros

acutos morbos hic jam demonstraverim, tractaverim, & ter modo quaterve primum invenerim, semelque modo epigenomenon. Quotiescunque vero morbum hunc primum in Urbe, suburbiisque, inveni, Epidemico id tempore fuit, nisi semel forte iterumque sporadice. Cæterum vero, experientia multiplici fretus, repeto id, quod *Tom. I. & 3. Rat. Med.* fat superque, ni fallor, evici, Morbos hosce a malo potissimum regimine proficisci, & hinc Germanis, Hungaris, Bohemis, Sclavis, Styris &c. tanta frequentia ac malignitate infames esse.

§. II. Ad relatas *Tom. 3. cap. I.* curationes, id modo addendum habeo, quod omnes illi, quos Cortice Peruviano abundantissimo usos ibidem enarravi, hucusque perbelle, cujuscumque demum temperamenti sint, valeant; & quibus mobilior Nervus imbellem olim valetudinem conciliaffet, jam longe valentiore sanitate fruantur.

§ III.

§. III. Pulcras hoc anno hujus morbi curas vidi. 30. annorum fœminæ, petechiis adeo scatenti, ut Medici alii mecum testarentur repletioem iis se neminem vidisse, jamque maligne ab ipso principio decumbenti; consueta methodo Corticem dedimus, corticis usum a curato morbo dudum protraximus. Læti contemplantur postquam aliquot diebus eo remedio usa esset, vires increscentes, ægramque cum abundantissima efflorescentia vix ægrotantem, & firma valetudine brevi potitam.

Contra vero æque fortunatum exemplum, cum retrocessione petechiarum, Juvencula dedit, quæ sex septimanarum spatio febrium insultu vago, universaque artuum lassitudine, suum inter famulatum vexata, febrim deinde continuam putridam, (incertum quot diebus, octo tamen ad minimum) perpeffa, ad nos adferebatur, multa jam scatens Petechia. Postridie iisdem repleta omnino fuit. Eo usque nec

vires, nec pulsus, nec febris, nec pravam quodquam symptomata, ullam faciebant Malignitatis suspicionem. At vero post meridiem, ex maligna quæque symptomata, cum introcursu macularum, turmatim accesserunt. Cortex igitur ilico datus, ad-mota Vesicantia, Paregorica per vices sunt porrecta. Hinc sequenti quidem die paucus Macularum reditus, copiosior post meridiem, tertio autem die vix ullus; nisi quod eorum loco decem forte Miliaria alba in jugo colloque comparerent. Interim quæ paucæ superfuerant petechiæ latecebant; quæ pauca Miliaria comparuerant, mox opaca fiebant, quarto die evanida. Vomitus eodem tempore primo æruginosus, deinde frequenter flavus, insigni aderat levamine. Porro febris, postquam integro octiduo sub tanto corticis usu perseverasset, cessavit, integram sanitatem post se relinquens.

In penultimo exemplo corticis sub usu confertissimæ , quæ præextiterant , petechiæ , adhuc augebantur , & extantibus hisce sanitatem jam afferri cortice lætabamur ; id quod in his morbis solenne esse *Tom. 3. cap. 1.* pluribus exemplis demonstraveram. Ultimum exemplum omnium primum est , quod observavi , Petechiarum introversarum , nec Cortice , nec Opio , redeuntium , Miliariumque numero tam paucorum , & quarto jam die evanidorum. Æque tamen & cita , & integra , huic , quam illis , salus rediit. Nunquid introversus humor vi corticis ad systema cæliacum determinatus , & sic vomitu eliminatus fuerit ? Credibile.

§. IV. Quamvis porro hæc Methodus tum mihi felicissime cedere soleat , aliisque in Nosocomiis impense laudetur ; est tamen quod fero adhibita mortem non averruncet. Puella 17. annorum , cujus historia *capite de sanguine* habebitur , primis decem ægri-

tudinis diebus penitus neglecta, ad nos adfertur, Petechiis in pectore plena. Con-
suetam quidem Methodo Petechiæ pulcre
per sex integros dies persistere, attamen
febris continua remittens, eaque valida,
die decimo ab ingressu ejus in Nosocomium,
sustulit illam. Quippe inertiores Corticis
vires, quam ut humores, jam intime hac
malignitate penetratos, & infectos, repur-
gare emendareque possit.

C A P U T II.

DE ANEURYSMATE.

§. I. Cum nullus fere locus humano in corpore sit,
qui *Aneurysmati*, interna de causa genito, se-
dem non præbeat, loca præcipua enarrantur.

§. II. *Varia circa Aneurysma*: unicum existens
duplex potest apparere; intus sæpe osseum est;
loco potest mutari; est simplex ejus, & multi-
plex saccus.

§. III. *Anatome Aneurysmatis cor-*

dis. §. IV. *Solutio problematum, a* Cur unum
Aneurysma simplicem modo tunicam, eamque
tenuem, habeat? aliud crassissimam? aliud de-
nique & pluribus, & sæpe concentricis sibi la-
mel-

mellis , compositam ? β Cur manu frequentius
 examinare haud tutum ? γ Cur saepe non pul-
 set ? δ Cur locum mutet ? ϵ Cur licet semper
 praesens , tamen nonnunquam absens videatur ?
 η Quare tremit aliquando ? §. V. Curatio pal-
 lians , & curans. §. VI. Bini notabiles casus
 Aneurysmatum , quæ idiopathica haberi poterant ,
 & modo sympathica , aut deuteropathica , erant.
 §. VII. Datur aneurysmatica totius fere corpo-
 ris Diathesis. §. VIII. Biga Aneurysmatum a
 male administrata venæ sectione ortorum. §. IX.
 Aneurysmatis ejusmodi externi curatio , quando-
 quidem Compressione , & Interceptione perfici-
 tur , præprimis differitur de Compressione ; tam
 ea , quæ , apertura facta , Arteriæ immediate
 incumbit , quam illa , quæ externe tantum , citra
 aperturam , adhibetur. Prior harum , usitata ve-
 teribus , postmodum neglecta , a Germanis pri-
 mum , dein & a Gallis , in usum revocata est ,
 ab ultimis præterea Fungo Agarici decorata.
 §. X. Curatio in Nosocomio , apertura loci ,
 adplicatione Fungi , compressione externa , feli-
 citer peracta est. §. XI. Tentamen curæ per
 solam externam compressionem. §. XII. Fouberti
 sententia circa spuriorum Aneurysmatum duplex
 genus. §. XIII. Responsum ad tria problemata.

§. I. **C**um nullus fere in corpore hu-
 mano locus sit , in quo Aneu-
 A 5 ryf.

rysmatis sedes inventa non fuerit ; cum idem Aneurysma sub larva aliorum tumorum haud raro apparens , turpiter fallat incautos ; cumque demum praesens creditum , nihilominus aliquoties minime adfuerit : frequentia observationum , qua instructus sum , me adigit ut de hac materie fusius agam. Ac primum quidem dico Aneurysma ubicumque inveniri locorum ; externa sive causa , sive interna , genitum fuerit.

I^{mo}. In Cubito , seu Brachio , frequenter observatur a male administrata venæ sectione.

2^{do}. Circa Talum a causa interna , ut videtur , ortum , vidit , descripsit , *Ruischius* Obs. anat. 38. „ Si sanguis in Aneurysmate coagulatur , nulla percipitur pulsatio. Hoc olim decepit Chirurgum expertissimum , mihi , dum viveret , „ amicum familiarem ; qui circa talum „ Aneurysma , nucis juglandis magnitudine , „ dine ,

„ dine , aperiebat , nesciens tamen tumo-
„ rem dictum Aneurysma esse , quia omnis
„ pulsatio deerat. Aperto tumore , & fan-
„ guine coagulato expresso , tanta suborta
„ est hæmorrhagia , ut vix esset sistendo.

3^{to}. In genu vidit clariss. *Boerhaave* in
Studioso germano , quem serio monuerat ,
ne unquam , quod non pulsaret , cuiquam
aperiundi facultatem faceret. Fecit tamen,
& periit.

4^{to}. In Arteria Poplitæa horrendum
vidi , a saltu verosimiliter natum. Crus
amputandum fuit.

5^{to}. In Art. Femorali terribile , letale ,
vidi in orphanotrophio Hagano , vulnere
ortum.

6^{to}. In Art. Iliaca , *Lancisus*.

7^{mo}. In Aorta mox supra illius in Iliac-
as divisionem vidit *Fantonus* Tom. 3. *Se-
pulcr. Boneti*, pag. 556.

8^{vo}. In Cæliaca Art. *Lancisus*. Studio
omitto Aneurysma ter quater in Art. Me-
sente-

fenterica Equi a *Ruifchio* inventum, cum hic de humano corpore tantum differitur.

9^{no}. In Intercoſtali Art. exili *Ruifchius* ter quater vidit Aneurysma, ovi gallinaei magnitudine. Vulneri originem aliquando id debet, paſſim vero cauſis internis.

10^{mo}. In Subclavia, a contuſione natum, vidit Illuſtr. Baro *van Swieten*, Com. Tom. I. pag. 228. Subclaviæ Aneurysma homini mortem tuſſi, & hæmoptyœ, conſciſcit. Anatome detexit Aneurysma hoc Aſperæ arteriæ accreviſſe, ſpatium intercartilagineum eroſiſſe, & omnem vitalem ſanguinem hinc profuſiſſe. vid. *Hiſt. Acad. Reg. Sc. Par.* anni 1733.

11^{mo}. In Aorta inter primas ejus diſiſiones, & Cor. *ibid.* ann. 1712. Etiam illud monſtroſiſſimum *Ruifchii* Obſ. anat. chir. n°. 38. incipiebat digitis tribus ſupra cor.

Et mox ſupra cor incipiebat *compoſitum* illud Aneurysma, cujus hiſtoriam brevi dabo.

12^{mo}. In curvatura Aortæ. *Hist. Acad. Reg. Sc. Par.* an. 1707. Aneurysma nascitur homini in collo, post enormem 5. dierum vomitum, quem Agyrta, Rheumatismi discutiendi gratia, excitaverat, produxerat. *Littræus* in cadavere ejus invenit Aortam sua in curvatura in saccum dilatatam, qui media sui parte in thorace locatus, caviem ossibus creaverat; dein alia sui parte superiora conscendens, totum latus colli, ad usque maxillam, expleverat. Multos polypos, & sanguinis, tum fluidioris, tum coagulati, duas eduxit pintas. Videatur simile *ibidem* anno 1700. natum a subito flexu colli in venatu.

13^{tio}. In Arteria Epicrania Aneurysma vidi ovo gallinaceo magnitudine par, Felici interceptioni interfui. Contusione natum erat.

14^{to}. Cæterum Aneurysmata inventa sunt Arteriæ temporalis, Arteriæ in Naso externo, aliis corporis partibus, ut passim inve-

inveniri potest in Sepulcreto *Boneti*, in Biblioth. Med. *Mangeti*, &c.

15^{to}. Aneuryfmatica datur plurimarum eodem in corpore arteriarum Diathesis, ut §. VII. patebit.

Unde conclusio hæc firma fit, quod in tractandis hisce summa fit prudentia opus, cum ubique locorum existentia, pathognomicis signis aliquando careant, facillimeque aliis cum tumoribus commisceantur.

§. II. Atque hæc de varia ejus fede sufficiant; considerata nunc veniunt observata quædam de Aneuryfmate in genere; ac primo quidem observamus illud duplex quandoque adparere, cum tamen vere unicum sit. Egregius *Morand*, *Hist. Acad. Reg. Sc. Par.* ann. 1721. tumorem aneuryfmaticum detexit alteram inter tertiamque Costam; alium iterum tumorem similem inter tertiam & quartam. At in cadavere unicum modo esse deprehendit, sed a costa tertia intro-

intropressum , & vi sanguinis protrusum infra , supraque eandem.

Secundo , Aneurysmata inveni bis intus ossæa , non quidem continuitate , sed veluti per insulas difformes. Magni *Wepferi* Aorta sic inventa est , ut Tabula vitæ ejus præfixa exhibet. Plurimi alii id ita invenerunt.

Tertio , Aneurysma loco mutari potest , ut disparuisse quis crederet , nisi revera adesse symptomata demonstrarent. En notabile Exemplum ! Subtilissimus Anatomicus , præstantissimus Medicus , candidus Amicus meus , C. H. *Velfè* , egoque , anno 1753. quinquagenariam mulierem sæpius examinavimus , cui citra manifestam causam inter 2. & 3. costam , ad læva ster-
ni , Aneurysma aderat. Id tamen integro ante mortem mense penitus delituit , ut videretur disparuisse. Symptomata tamen continuabant. In Cadavere Aneurysma inventum , quod angulum Aortæ dictum oc-
cu-

cupans, tres forte pugnos magnitudine æquaret. Tunicas habebat haud crassas, sed veluti lamellas albicantes, haud cohærentes inter sese, sed quasi alias ad alias adpositas, quò magis internas, eo magis fuscas. Nucleus sacci, grumofus sanguis erat, ita tamen ut nonnihil spatii in eo pervium effet, quo sanguis, corde missus, per Aortam descendentem transflueret.

Quarto, sunt aliquando Aneurysmata composita, ut haud ita pridem publice demonstravi. In Nosocomio dicto *Becken-hausel*, in Viri cadavere invenerat mirum hoc spectaculum expertissimus ibidem Physicus *A. Störck*, vir ad illustrandam sectionibus anatomicis Medicinam natus; dumque rari, utilisque, quiddam invenerit, quo universum studium medicum inde promoveatur, id intactum ad me mittere solitus. Porro Aneurysma istud erat in Aorta ab ipso corde inchoans, & ultra curvaturam pergens, ossis insulis crassioribus instructum.

ctum. Ubi nunc Aorta ex curvatura in rectum esset abitura, removebatur sensim a dorso, ita ut demum inde ad duos pollices latos aberraret. In causa erat faccus, ex postica parte ejusdem Aortæ descendens enatus, orificio pollicis diametrum habente. Porro ex hoc orificio crescens faccus, habebat quatuor pollicum longitudinem, crassitiem vero binorum, explebatque accurate cavum id, quod dorsum inter Aortamque interesset. Quod vero adhuc mirabilius, inter quartam ac quintam Costas idem ille ingens faccus primo removerat, valido pulsu suo, hasce a se mutuo costas, intercostales musculos deleverat, tumque inter remotas ad sesquipollicem a se mutuo has costas transeuns, mox supra easdem explicaverat se in faccum manui integræ magnitudine parem. Neque vestigia invenire fuit musculorum dorfi secus spinam, & ultra; crassa demum substantia, eademque fungosa hunc faccum externum

demum terminabat. Ipse vero faccus, dudum ante mortem haud pulsans, cruore grumoso atro, tum intra, tum extra thoracem, totus infarctus fuit. Haud multum dissimilem casum doctissimus *Noordwyk* habet in Præfatione ad *Francisci Solani Obj. de Pulsu*.

§. III. Ut Arteriarum, & Cordis Aneurysmata dari, tum passim Scriptores Medici, tum præprimis *Lancisius*, & denique Ill. noster Præses in *Comm. Tom. 1.* ad §. 176. pluribus evicere exemplis. Ad dam quæ viderim ipse. Nauta, vir mediæ ætatis, levi sarcina onustus, iter unius horæ pedis confecerat, indeque perceperat Cordis palpitationes. Venæsectio interim, lenia solventia, blanda neurotica, effecere, ut conscendere denuo, ac gubernare Navim posset. Ter quater in Anno recrudit quidem Paroxysmus, sed ad eadem auxilia iterum conticuit. Intermedio vero tempore, atque id quidem integri quadriennii
spa-

spatio, ab omni incommodo immunis fuit; levissima mali admonitione, ad majores animi corporisque motus, tantummodo percepta. At vero quinto demum anno continuarunt Insultus. Quum igitur tribus ferme mensibus vix remisissent, Exp. *Velfe*, ordinarius ægri medicus, qui suis in difficilioribus me, ut ego illum, amice consulere solebat, ad ægrum me adduxit. Horrui sane hominem videns, lividum, anxium; inæqualem habentem, ac tremulum, pulsum. Et si ipsi manus ad Præcordia, ad sternum, ad 7. & 8. sinistri lateris costam, præcipue vero earum ad arcus, admovebatur, percipiebamus inæqualem, tremulum, ingratumque penitus motum: exceptis sex ultimis vitæ diebus, quibus nullus unquam pulsus observari potuerat.

Cadaver lustrantes multam invenimus in cavo pectoris dextro, putremque, aquam, ac pulmonem, medio lobo excepto, totum fere purulentum; in sinistro vero cavo pulmo-

nem a Corde maximo ita compressum, ut aëra ægerrime capere potuerit. Cor enim ad minimum triplo majus solito erat, mucrone quam basi latius. Omnium autem maximus sinister Ventriculus, ad mucronem amplissimus, at vero extenuatus adeo, ut levis modo membranula albescens, facile disrumpenda, ibidem superesset. Cæterum sanguis concretus, vehementerque tum polypofus, tum Cordis parietibus, columnisque, accretus, cavum hoc explebat. Cordis vero dexter Ventriculus, & binæ auriculæ, sinusque, Arteria pulmonalis, utraque Cava vena, polypos firmos longosque continebant.

§. IV. Sed ne longus sim, sufficiat hæc exempla attulisse, ut vera Aneurysmatum idea habeatur. Collectores casuum quidem, *Borellus*, *Schenckius*, *Paræus*, *Hildanus*, *Bonetus*, *Mangetus*, plurima exempla attulere; verum cum ad præcedentia jure referri queant, recensio eorum non usui, sed oneri,

oneri, foret. Practice modo ex iis agendum est.

Ac primo quidem quæritur, cur multa Aneurysmata tenues tunicas, alia crassiores, alia denique easdem lamellatim dispositas habeant? Polypofus sanguis ejus est naturæ, ut ejusdem adplicatione tunica arteriosa adpareat longe crassior. Deinde ipsæ Arteriarum tunicæ a se mutuo discedere queunt, geruntque nonnunquam inter sese sanguinem in lamellam compactum. Tandem in degeneratione partium, ut alibi, ita & hic, novæ membranæ ex veteribus enascuntur, ejusdem fere cum naturalibus substantiæ. Vesicam felleam inveni in septem loculos membranofos divisam, quorum quisque magnum gereret Lapidem. In antiquis Herniis vidi Operatores sudantes, dum 10. 12. 20. & plures, membranas solvere deberent, priusquam verum Peritonei faccum attingerent. Ubi vero sanguis modo in sacco grumescit, vel potius

paulo tantum spiffior fit, tunicam mole non auget, sed extendit duntaxat, idque nonnunquam adeo, ut ruptura subsequatur letalis.

Secundò. Cur haud adeo tutum est Aneurysma frequentius tractare manibus, & curatius examinare? Pluribus de causis. 1^{mo} Quia eo modo reprimimus sanguinem versus cor, caput, &c. unde haud raro ingentes anxietates, suffocationes, vertigines. 2^{do} Quia filamenta, ac fragmenta polyposa, pressione ad arteriæ axin ducta, impetu sanguinis facile abripiuntur, inque vasa minora impulsa, circuitum humorum in iisdem intercipiunt. 3^{tio} Quia sic tunicæ teneriores solvi queunt, letalemque hæmorrhagiam producere.

Tertio. Cur sæpe non pulsat Aneurysma? 1^{mo} Quia ita ejus tunicæ incrassari possunt, ut impulsu cruoris effectus exterius non percipiatur. 2^{do} Quia tanta tunc adest in ejus sinu grumosi sanguinis copia, ut

ut pulsus suffocetur. 3^{tio} Quia sensim impellentis cordis vires minuuntur ; unde licet reliquis in arteriis pulsus quisquam percipiatur, vires tamen cordis debiliores sunt, quam ut per incrassatas tunicas, sanguinemve concretum, pulsus exterius percipiendum producerent. Jam simile quid suspicatus *Paræus* erat.

Quarto. Undenam Aneurysma ita loco mutari possit, ut antiqua in sede ultra non inveniatur ? An non ubique Ligamentis enatis ad vicinas se partes annectat ? Aneurysma, ita loco mutatum, internum fuit, ut pag. 15. patuit. Hinc magnum illud, ac ponderosum, dum in parte aversa ponderis forsitan augmentum fit, eo versus tota mole propendeat, antiquæ sedis ligamenta elonget, eamque vacuum relinquat, oportet. Casum hunc novisse juvat, ne forsan relationem manifesti Aneurysmatis dubiæ fidei habeamus, illud ultra non invenientes. Quanquam symptomatum per-

severantia cum Anamnesi priore conjuncta, Aneurysmatis præsentiam abunde demonstrat. Mutatione autem loci hoc Aneurysma fæminæ multo molestius fuit, cum moles quondam foras extans, jam vero introversa, reliqua magis premeret, angereque vitalia. Qua ipsa de causa compressio artificiosa mortem acceleravit Canonico, de quo *Lancisius* part. 1. Lib. 1. cap. 2. prop. 28. Quare cum eodem autore concludimus quascumque externas Aneurysmatum compressiones fatales esse, nisi osse probe sustineantur: tum quod hinc cavum internum angustetur, tum quod Aneurysma interius nunc minus suffultum, facilius findatur.

Quinto. Quæ causæ, quod Aneurysma cordis aliquo tempore Nautam vexaverit? & notabili iterum tempore non vexaverit? Cur iterum elapso quadriennio continuo ipsi molestum fuerit, ac mortem tandem intulerit?

In-

Inchoans cordis debilitas, principium Aneurysmatis illius ponens, venæ sectione, diluentibus, paregoricis, & quiete, emendata fuit, ut jam inter vim impulsorum humorum, & contrahentis se cordis, æquilibrium restitueretur. Plethora post aliquot menses elapsos renata, superabat denuo debilioris cordis vires: hinc renata sensim Aneurysmatis symptomata. Cura autem eadem æquilibratam potestatem restituens, symptomata abegit. Ita potuit hac cura palliante homo ille quatuor annos illos fat commodè transigere: *palliante*, ajo; cum cor semper debilius existens, quam ut aliquam plethora promoveret, proegumenam causam futuri Aneurysmatis perpetuo in se gereret. Demonstrabatque hanc ipsam proegumenam causam, levior ille morbi reditus, ad rarefactos, adeoque spatium sibi amplius poscentes, in animi ac corporis validiore motu, humores; rarefactione cessante denuo pacatus. Ultimis

vero tribus vitæ mensibus debilitas hæc cordis tantopere increvit , ut ultra contrahere se non valuerit , sed amplificari sese , extenuarique , vi , & pondere sanguinis , permiserit ; unde vitæ perfecta est orta quies.

Quinto. Undenam tremor explorante digito perceptus , & , si aliquantum continuatur , ingratus , Aneurysmatis , præcipue ejus quod in Brachio est ? Isque tamen in uno , quam in alio , major ? Difficilis est problematis solutio : sed ad finem , enarratis primo aliquot practicis casibus , facilius forte patebit responsio.

§. V. Morbi atrocis nunc proponenda Cura est , eaque sive perfecta , curatoria dicta , sive pallians tantum. Ac primo quidem ea Aneurysmatis interni.

Si undique colligamus observata , & omnia unquam data remedia ; si quæcumque dicta specifica ; si successus bonos , tam celebratos Antiquis , quam nobis obfer-

fervatos , expendimus ; clare comprehendimus cardinem rei versari in eo totam , ut quod solida inter fluidaque desideratur , æquilibrium restituatur. Dum id restituit Medicina , vel *curative* id facit , vel *palliative*. Palliative , si , restituto æquilibrium , Cor , Arteriave , debilis esse perseveret , ipsumque æquilibrium restitutum non sit , nisi copia imminuta humorum , ac morbus actutum redeat , dum vel copia , vel rarefactio , molem humorum iterum auget. Cura vero curatoria sive integra fit , si restituto palliative æquilibrium , Ars noverit debilitatis solidis priscum robur restituere , amplificatis pristinam reddere Diametrum. Id & possibile esse , & nonnunquam præstari , tum ratio suadet , tum experimentum confirmat. Facta enim ejusmodi evacuatione , quæ æquilibrium ita reddit , ut quod olim ratione solidorum deficiebat , nunc potius ratione fluidorum aliquantis-
per desideretur ; fieri posse id videtur ,
ut

ut solida, contractilitate adhuc sua donata, in priscam se formam restituant: præsertim si & copiose, & assiduo, tam alimenta quam medicamenta ingerantur, quæ spissitudini polyposæ, in dilatata parte hospitanti, diluendæ, apta nata sint. Curæ feliciter peractæ jubent hæc aliquando fieri credamus. Cæterum pallians cura, fatis abundeque fortunatam seipsam existimaret, si nossset humores & paucitate, & tranquillitate perpetuo ineptos reddere, ad tollendum æquilibrium. At vero, quandoquidem ita cum Mortalibus est comparatum, ut sex rerum non naturalium usus nequeat semper æque moderatus manere; hinc cum redintegrantibus paroxysmis toties hi ægri luctantur, donec demum suffocati, fatis cedant.

Sed in ipsa cura magna differentia. In Nosocomio habemus, qui in antiquiore morbo, insigni levamine gaudeant; habemus, qui in recenti vix gaudeant ullo. Ratio videtur suadere hos longe citius ad
imme-

immedicabilem conditionem adolevisse. Dantur enim, quibus malum incredibile quantillo creverit spatium ! Ipse *Lancisius*, cum examinaret cadaver Vestiarii, quem Aneurysma, a sterni contusione oriundum, intra anni spatium e vivis eripuerat, detexit Anguli Aortæ Aneurysma, Punicum malum magnitudine æquans, quod os sterni elevaverat, & carie penitus excavaverat.

Cæterum si utcumque medicabile malum est, Humorū repetitæ evacuationes, Saponēs acidī, ut *Tamarindus*, variorum fructuum acido Saponaceorum Rob dicta, Nitrum copiosum, Cremor tartari; & quia id hominum genus spasms admodum torqueri solet, Gummi ferulacea, & Opium; Dioeta cæterum blanda ex jure carniū tenuiore, carnibus tenerioribus, fructibus horæis, oleribus saponaceis; tum denique magna animi corporisque quies, calamitosum hunc morbum ad tempus notabile, sæpe etiam per annos, tolerabilem reddunt.

§. VI. Sed est alia adhuc ratio, hic necessario memoranda, cur in suscipienda horum ægrorum cura minus desperare debeamus. Quippe plures morbi hunc ipsum ita simulant, ut sæpe protopathicus esse credatur, quem vel ipsa curatio, vel cadaverum ad alias morborum causas rimandas examen, deuteropathicum duntaxat vel sympathicum esse demonstrent. Adeo quippe facile hic morbus ludit medentes. En quæ ipse expertus!

Ætatis Centurio florentis, temperiei biliosæ, illibatæ quondam sanitatis, sed a triennio ad Melancholiam ex animi ægritudine dispositus, cepit demum, anno 1757. ineunte, cordis palpitationibus vexari: quas eo tempore tamen Venæsectio, ac Purgans, brevi, & integre, sedabat. Æstate idem malum passus, eodem sanatus auxilio fuit: labente demum anno repetens illud nulli auxilio cessit. Operam navantes peritissimi Medici inanem, jure suspicantur vel

Aneur

Aneurysma cordis , Arteriarumve majorum , vel Polypos iisdem innatos , vel & geminum hoc malum , adeoque difficulter sanabile , hic adesse.

16. Jan. 1758. in consilium vocor ; quo die perbelle se habebat , sed animo corporeque adeo mobilis , ut a meo , quem anhelus expectabat , introitu , & adspectu , gravissimum mox paroxysmum pateretur. Cor percipiebamus horrende palpitans , Pulsum parvum , & admodum inæqualem , tussim cum sputo mucoso , lotium lateritio cum sedimine. Profecto teterrimi mali jam annosa diuturnitas , sed amen intermedium olim quidem habens , jam vero perennis , pessimisque stipata symptomatibus , ideam , quam præstantissimi viri de eo formaverant , omni ex parte confirmare videbatur.

Nihil enim mutare hanc ideam poterat immunitas aliquoties observata morbi , cujus causa mechanica crederetur perpetuo adesse. In Lienis , Hepatis , Ventriculi ,

Cerebri, morbis, intervalla optima observamus, dum interim in cadaveribus causam mali perpetui magnam, sufficientem, eamque diuturnam detegimus. Imo in Nauta de quo antea actum, pag. 18. præsentem perpetui mali causam a morte deteximus, cum tamen causa hæc toties in vita effectibus caruisset. Nec tussis, Pulmonis affecti symptoma, huic ideæ contraria fuit, imo potius confirmabat eandem; 1^{mo} quia in Aneurysmate circa Vitalia tussis ejusmodi frequens nobis observatur. 2^{do} Quia ejusdem dudum meminerat in hoc morbo *Lancisius*; eamque validæ Pulmonum compressioni & irritationi, tumentibus Vitalibus oriundæ, adscripserat.

At vero cum in his decipi facile, praxisque nos doceat, Vitalia nonnunquam tam valide secundario affici, quam si primario afficerentur; cum præterea *Boerhaave* §. 826. & seqq. *Inst. Med.* notasset Palpitationes cordis violentas originem spas-

mis

mis aliquando debere, vel etiam „ irrita-
„ tationi fibrarum cordis, ab acri quodam
„ stimulo factæ, ut in cacochymica mate-
„ rie mota „ sententiam aliquo modo le-
nivimus, dubiam protulimus, abjectumque
ægri animum aliquantula spe ereximus.

Impugnare igitur malum iis intendimus,
quæ cuicumque proforent causæ ; saponi-
bus acidis, nitro, neuroticis, opio. Quibus
equidem proderamus utcumque, lucida ta-
men intervalla diris exacerbationibus tur-
bari sæpe dolebamus. Quin imo ruit in pe-
jus malum. Pulsabant haud Vitalia modo,
sed & Abdominis viscera. Interim mira-
mur insolitum phænomenon. Vomitus enim
violentus, qui ex natura sua hic letalissi-
mus videri debuisset, palpitationem feda-
vit, pulsum æqualem reddidit, & transpi-
rationem dudum absentem restituit ; non
ea die duntaxat, sed sex integris postmo-
dum septimanis. Interea tamen male ipsi
fuit a tussi violenta, sicca, rebeli ; a re-

spiratione laboriosa ; a pulsu, citra palpitationem, inæquali, & nonnunquam, rarius licet, intermittente. Sputa tandem crassa, flavo-viridia prodire ; a quibus tussis quidem mitior, sed notabilior languor, horror, frigus extremorum, & calores nocturni, anxietatesque enormes. Tussi demum cessante mobilis materiæ strepitus in pulmone exaudiebatur, perseverabat anxietas. Kermes minerale, & quotidianum clyfma, hic proderant.

Martii 10. expectoratione sponte cessante, dirus rediit, qui a 24. Januarii siluerat, Palpitationis paroxysmus ; quem denuo vomitus, ut olim, sed non tam integre, solvit. Vehementissimus autem Paroxysmus decimo ex illinc die recrudit. Epigastrium quoque ab aliquot retro septimanis intumuerat, jam vero totus venter tumidus, tensusque, deprehenditur. Cataplasma emolliens 3. Aprilis impositum profuit, successitque alvus flava quidem, sed mul-

multo glutine, multisque duris, & ex flavo viridibus, facibus referta. Idem & 4. Aprilis contigit; sed eo cum eventu, ut vera jam accederet mortis imago: cordis pulsatio, virium collapsus, pulsus debilis, intermittens, atque omni modo inæqualis, frigus extremorum. 5. Aprilis Respiratio parva, inæqualis; pulsus exilis, intermittens, tremulus, facies vere Hippocratica. Dumque jam mors adstare præ foribus videbatur, alvus prodiit libera, foetidissima, nunc nigra, nunc viridescens; idque ea nocte octies. En vero ejus stupendos effectus! Mox cessarunt quævis symptomata, vires ad horam crevere, & sanitas tam cito rediit, ut 4^{to} Maji gratias Deo acturus, Templum adiverit, meque postera die cum suo ordinario Medico *Störck* inviserit, perfectam suam valetudinem testatus, nec a conscensu 46. graduum, quibus ad me conscenditur, vel nihilum defatigatus, aut anhelus. Mansit ipsi integra sani-

tas , donec hyemali tempore , Milite ad bellica exercitia coaptando , in Hungaria sese defatigans , ægrotaverit , perierit.

Luculentiusne exemplum haberi potest deuteropathici morbi , tam perfecte protopathicum æmulans ? Atra bilis per vices mota varios hos paroxyfmos excitaverat. Atra bilis tota in motum ducta , mortis ad limina hominem duxit ; integre tamen expulsa , corpus reliquit sanum. Partitim mota , vomitu expulsa est ; mota integre , alvo.

Est igitur exemplum ejus , quod laudato mox loco optimus *Boerhaave* de cacochymica materie mota dixerat : sed cum deuteropathicum , vel etiam sympathicum morbum hunc , protopathici adeo æmulum , a miris nervorum affectibus deducit , ejus quoque manifestum exemplum !

Juvenula foemina ad Nosocomium nostrum accessit , multis ab annis vehementi cordis palpitatione , anhelitu , anxietate præ-

præcordiorum , tussique vexata frequenti ; artis interea opem frustra eo usque experta. Cum alvo ab octiduo careret , enema immitti jubeo , alia interim paraturus. Sed interim moritur. In cadavere publice examinato vitales partes sanitatem illibatam adeo referebant , ut nihil illibatius. Neque quod toto corpore tam in solidis , quam in fluidis accusaretis , quidquam erat ; præter geminam , sed leviusculam , Pulmonis ad Pleuram adhæSIONem , & tres lumbricos teretes in Ileo intestino. Porro & cum his lumbricis , & cum longe latioribus Pulmonum adhæSIONibus millenos homines sanissime vivere , Anatomicis compertum est. Ut proinde cum *Boerhaavio* §. 826. concludamus : „ Causa ejus plerumque est , „ inordinatus , & violentus spirituum vitalium in cordis villos impetus , &c.

§. VII. Porro morbi hi aneurysmatici , eorumve simillimi , hic loci frequentissimi sunt , multamque horum varietatem exhibent.

Sunt duo in Nosocomio homines qui, omnibus rite perpenſis, protopathica vitalium affectione laborare videntur, quibus tamen a validiore motu nec intermit- tat, nec remittat, nec inæqualis ſit pul- ſus. Alterique horum, qui 17. annos na- tus, ex Hortorum forte cultura hunc mor- bum contraxit, jamque triennem habet, ve- hementiſſima cordis adest pulſatio, ut viſu, audituque, percipiatur; Præcordiorum præterea, & ad arcus potiſſimum 3. & 4. coſtæ, ardor continuus; carotidum am- barum, totum collum concutiens, pulſus; tumor colli ingens, pulſansque; pulſatio ad ambas inguinales tanta, ut tangentium digiti vi repellantur; pulſus ad malleolos tantus, ut dormientem continuo excitet, ſomnumve præprimis impediat; idemque ad temporales arterias obſervatur. Eſt igitur univerſalis fere Aneurysmatica Dia- theſis. Egregii *Lanciſii*, aliorumque Ob- ſervatio, ponens, quo diuturniora vali-
dio-

dioraque Aneurysmata sint, eo locorum remotiorum arterias debiliores & exiliores esse, in hoc juvene proinde locum non habet.

§. VIII. Atque hæc sufficiant, ut quæ circa Aneurysmata interna nos nostra observata docuissent, communicaremus. Supereft modo Observationes itidem nostras circa Externa patefacere.

Notabilia exempla horum duo in Nosocomio prostabant hoc anno, ex imprudenti Venæ sectione, resiliente instrumento peracta, nata. Foeminæ ambæ erant, juvencula, & Vetula. Vocabo utrumque Aneurysma spurium. Præmonitos enim Lectores velim, me hic loci haud immorari iis, quæ Viri egregii *Freind*, *Monroo*, *Foubert*, alique, contra communem Aneurysmatum in Spuria, ac Vera, divisionem, haud absque aliquo Rationum pondere, scripserint: sequar modo eam utriusque definitionem, quam, post *Sennertum*,

Boerhaave, *Illustr. Præjès*, & *Heysterus*, adoptarint.

Aneurysma hoc sensu spurium, homo, minime Chirurgus, foeminæ juvenulæ conciliaverat in dextri brachii arteria humeraria, mox ante ejus in Ràdiæam, & Cubitæam, divisionem; quemadmodum in operatione patebat. Tremor modicus tangendo percipiebatur, & tumor sensim crescebat. Pulsus in carpo debilis: idque ut postea patuit, naturaliter. Cum tumor auferret, operatio concludebatur; variarumque Methodorum tum præstantia, tum periculo, rite pensitatis, Compressio debita cæteris prælata est. Arridebat equidem interceptio, quod & felix sæpe, & Optimorum in arte gauderet suffragio; verum cum nonnunquam id periculi involveret, ut circulatio sanguinis subjecta in parte aut multum læderetur, aut penitus deleretur; cumque e contrario artificiosa compressio quoad curam æque secunda esset, nec hisce
tamen

tamen fociata periculis , hanc ipsi prætulimus. Est porro paucis super illa differendum.

§. IX. Compressio Aneurysmatum , quæ ossa sibi subjecta habebant , stiptico-
rum suffulta auxilio, multo Priscis in usu ,
eviluerat ; quod inanis , quod usu cassa ,
quod etiam aliquoties damnosa esset inven-
ta. Industria vero humana ; tandem pe-
riculis edocta , & infortuniis monita , didi-
cit hanc ipsa interceptione præstantiorem
reddere.

In commercio Literario *Norimbergensi*
anni 1732. pag. 107. & seqq. optimus
Hamberger , in inclyta Academia *Fanensi*
celeberrimus , ac vere doctissimus Medi-
cinæ Professor , curationem Aneurysmatis
spurii felicissimam cum publico communi-
cavit. Aneurysma hoc ignarus omnino
Chirurgus, Venam Basilicam tundens, pro-
duxerat ; pertusæ arteriæ manifestissima
cæteroqui signa ne advertens quidem. Cu-

ratio hæc peracta est primo adpositione comprimentis arteriam humerariam funiculi, dein sufficiente dilatatione loci affecti, & denique adplicatione chartæ masticatæ, liquore stiptico Deppelii madefactæ, ad ipsum Arteriæ vulnus: ita quidem, ut chartæ masticatæ lamina prima minima esset, altera paulo major, tertia major priorre, & sic porro; donec sufficiens laminarum altitudo haberetur, quæ circumductis fasciis apte ad vulnus appressa maneret: adstringente interim pulvere totum explente vulneris cavum. Publica disputatione Doct. *Emrich Jenæ* 1734. hanc curam propugnavit.

Vir eruditus omnibus carus C. S. *Trew*, S. C. Maj. ut & S. March. Onoldino-Brandenb. Consiliarius & Archiater, Reip. Norimb. Phys. ordinarius, senior, Comes Palat. cæsareus, S. R. I. Nobilis, Acad. Cæsar. N. C. Director, Reg. Soc. Lond. & Berol. Scient. Socius, in Eph. N. C. vol. 8.

Obs.

Obf. 126. similem Hambergerianæ curam *Norimbergæ* anno 1747. exoptatissimo cum fucceſſu intra menſis ſpatium perfecit. Anno 1748. eadem cum felicitate curam hanc repetivit, & *Eph. N. C.* vol. 10. deſcripſit. Ad aneurysmatum vero imprudenti venæ ſeſſione oriundorum intellectum, & curam, egregias, atque ad ipſam Naturam expreſſas, Tabulas tres addidit, una cum nitidiſſima earum expoſitione.

Exp. Chirurgus *Foubert* Acad. Reg. Chir. Socius, dedit de Aneurysmate Diſſertationem in Tom. II. *Actorum* ejusdem Academiae, in eaque laudavit compreſſionem externam in recenti, parvoque Aneurysmate: in majore autem & utcumque vetuſtiore ſuadet, ſuoque exemplo comprobatur, operationem. Operationem autem hanc, ſi eſt Arteriæ truncus, mera compreſſione perficit, ut ita evitentur infortunia, quæ Ars aliquando poſt interceptionem luget; ſi autem vulnus in Ramo eſt,
inter-

intercipit illum , ligatque. Haud bene capio , cur Ramum etiam compressione curandum non suscipiat , si Truncum tuto noverit compressione curare ; sed hæc non sunt hujus loci. Illud autem ex hac dissertatione patet , quod Autor suam operationem primo Charta masticata peractam describat anno 1732. non adjungens quo præcise anni tempore. Porro eodem anno publicæ lucis curationem suam fecit Cl. *Hambergerus* , quam exeunte anno 1731. perfecerat. *Foubertus* vero sua non edidit nisi anno 1753.

Igitur compressio Arteriæ pertusæ , celebrata Veteribus , feliciter peracta a *Scul-teto* anno 1631. primo compressione trunci , tum spongia usta , adstringentissimo pulvere conspersa , ad vulnus Arteriæ admota , dein conveniente ligatura firmata , & denique artificiose excogitato instrumento , quod ipsum D. *Morand.* Tom. 2. *Act. Acad. Chir.* impense laudat , adpressa ; Hæc,
in-

inquam, compressio, deinde a Cl. *Hambergero* anno 1731. facta, & 1732. promulgata; anno 1732. a *Fouberto* primum *Parisiis* instituta quidem, at vero non nisi 21. postmodum annis cum publico communicata est. Interea temporis Cl. *Trem* bis hanc curam perfecit, longe antequam ille Acad. Paris. Tomus secundus in lucem prodiiit.

In hoc porro tomo duæ eruditæ Dissertationes de Aneurysmatis curatione habentur; quarum altera laudata jam sæpius illa *Fouberti* est, altera celeberrimi in arte *Morandi*: Morandiana hæc præter alia id novum habet, quod ad *Agaricum* pertinet. Nempe postquam Chirurgus *Brossard* arcano se pollere indicasset, quo Arteriarum hæmorrhagiam quamcumque tuto sisteret, tentamen ejus & adplicatio facta est finiente anno 1750. idque in arteria brachiali gladio pertusa. Arcanum suum Chirurgus adplicuit vulneri: quo facto, simplici ligatura curabatur spatio mensis id Aneurys-

ryfma. Erat autem arcanum hoc remedium *Fungus Agaricus pedis equini facie*. Ter jam sibi experimentum successisse, aliisque præterea Chirurgis, *Morandus* asserit: equidem & citra Agaricum bis sese, aliumque haud ita pridem Chirurgum, sola compressione arteriosi sanguinis impetum repressisse; Agarici tamen vires vel ideo præstantiores esse, quod compressione utcumque laxiore, Gangrænæ propterea metum nunquam faciente, curam suam perficiat.

§. X. Plures ergo claros in arte Viros imitati, curam spurii nostri Aneurysmatis Agarici applicatione, & compressione, tentavimus. Egregius chirurgiæ Doctor, curisque tum gravissimis, tum felicissimis in Austria nobilis, Dominus *Ritter*, cum aliis claris urbis chirurgis, sua præsentia, consilioque, assistebat Nosocomii Chirurgus *Leber*, qui operationem in se susceperat. Inciso cum Integumentis tumore, extravasatus humor fere omnis sponte excidit.

dit. Arteriæ vulnus, laxato instrumento tornatili, apparuit in eadem, ante ejusdem divisionem, obtinere : ut profecto hîc casus ille haberi tristissimus potuisset, in quo, post consuetam intercipiendi methodum, gangræna subsequeretur. Porro fuit & Arteriæ, & Aponeuroseos musculi bicipitis brachii, tanta cohæsiô, atque coalitus, ut corpus fere unicum esset ; sola capsula, vasa hic involvente, intermedia ; at complanata eadem, & cum subiecto vase, impositaque Aponeurosi, unita : ita quidem, ut nullo intermedio cruore, vulnus unum idemque videretur esse, quod penetraret utrumque ; utque laxata tornatili machina, per unicum duntaxat foramen sanguis videretur scaturire. Hinc, cum Aponeuroseos percussio dolorem creet, & supuratione nimia destrui possit ; cumque ii, quibus sola compressione externa Aneurysma curatur, cum mutua vasis, aponeuroseosque, concretione, brachii motum expedi-

peditè absolvant ; Aponeurosin conserva-
vimus, & communi vulneri pulverem Aga-
rici insperfirmus, Fungi ejusdem lamellas,
contusione valida complanatas, desuper po-
suimus ; eo quidem ordine, ut prima mi-
nor, altera major, tertia iterum hac major
esset, ficque ad talem altitudinem ultima
lamina emineret, ut idonea ligatura bra-
chio circumducta, totus firmaretur adpara-
tus. Ipsum vero brachium universum, ut
tunc, ita toto curæ tempore, vino aqua
mixto fovebatur. Machina tornatilis post
operationem relaxata, curam egregiam esse
monstravit. Emulsio paregorica pluribus
deinceps diebus data, & jus carnis dilu-
tum cum pane, unicum nutrimentum fuit.

Tribus elapsis ab operatione diebus, in-
cipiens vulneris ob junios calores foetor
deligationem suavit. Apparatu quamvis pru-
denter ablato, cecidere nihilominus omnes
Agarici lamellæ, ut nudus vulneris fundus
conspiceretur. Sanguinis porro nihil prodiiit.

Ergo

Ergo instrumentum tornatile suspenſa manu laxantes, dein plus, tandem integre, ne guttam quidem unicam transfudantem deprehendere potuimus. Gaudebamus ſane ; cum eo alioqui animo eſſemus, ut , operatione irrita viſa, Aponeuroſin ab Arteria ſolveremus, fungumque, ac totum adparatum, nudæ adponeremus arteriæ. Quia vero res pro votis ſucceſſerat, aponeuroſin integram reliquimus. Cur ſub ipſa prima operatione eam non læſeramus, rationem ante dedimus. Confirmabatur ea noſtra intentio obſervatione *Fouberti*, qui eorum in cadaveribus, quorum aneurysma brachii ſola externa compreſſio quondam curaverat, quoſque alii jam morbi ſuſtulerant, Aponeuroſin cum arteria coalitam invenerat. Igitur pulverem Fungi de integro inſperſimus, novas lamellas impoſuimus, & deligationem, ut antea, perfecimus. Spatio 14. dierum tota peracta cura fuit, ut modo deeſſet Epidermis, quæ

quoque intra octiduum integra comparuit. Sæpius hanc fœminam postea vidimus, eamque nullum in movendo brachio incommodum ab adhæsione Aponeuroseos pati deprehendimus.

§. XI. Altera, de qua dixeram, mulier vetula, spurium habuit, licet verum referre videretur, aneurysma; rationem mox exponam. Huic tumor longe minor, sed tremulus motus longe major, eique, qui locum diutius digito explorabat, perquam ingratus. Non video qui in externis Aneurysmatibus hujus tremoris meminerint Autores. *Paræus* fusurum, sonitumve, non tremorem, observavit. Tremor tamen iste, quo blandiore digito tangebatur, eo distinctior; quo duriore, eo confusior; si fortissime, nullus adparebat. Cum igitur intra 14. dies tumor vix augeretur, simplici tantum externa ligatura hoc Aneurysma curare annisi sumus, subere oblongo, eoque fornicato, ad tumentem arteriam adpli-

plicito, ac proba firmato ligatura. Quod ubi cum tantillo tumoris decremento spatium binorum mensium prosequeremur, tremor sensim cessavit, & corpus durum, fere rotundum, extrorsum convexum, immobile, tegere videbatur arteriam in loco vulneris: unde nullam habens molestiam fœmina, motu debito brachium exercebat.

§. XII. Cur vero spurium hoc Aneurysma vocem? Quæ origo rotundi hujus, atque immobilis, supra vulnus, corporis? Undenam tremulus ille motus?

Ad primum responsio facilis; ad alterum & tertium vix certi quidquam habeo: ut tamen verosimile quid proferam, licebit prius ex laudata *Fouberti* Dissertatione nonnulla proferre.

Dividit vir expertus spurium Aneurysma in *primitivum*, & *consecutivum*. Primitivum vocat id, in quo actutum ad pertusam arteriam tumor comparet, totum ferme brachium brevi occupans, citumque propte-

rea, ne Gangræna & mors accedant, auxilium poscens. Consecutivum autem illud, in quo quidem nullus a principio tumor, præ valida compressione, qua Chirurgus, mox ab infortunata sanguinis missione, locum firmaverit; deinde vero tumor pedetentim observatur, dum ægro, Chirurgoque, maturius ostantibus, compressio solvitur, abjiciturque, ac consueti motus brachio exercentur. Quo demum fit ut Aneurysma hoc spurium referat verum. Quo autem modo id fiat, en quî explicet.

Prima compressione, ut dictum, facta, jam & cutis, & adeps, & aponeurosis, & capsula vasa includens nervosque, & arteria ipsa, Cicatricem communem formant; arteriæ tamen vulnus, cæteris tardius coalescens, rotundam aperturam servat, in qua hæret trumbus sanguinis. Trumbus ille perfecte coalescit in unum cum arteria solidum, si adparatus sufficiente temporis spatio adplicatus fervetur; sin minus

nus, trumbus expellitur, sequitur tunc sanguis sensim tumefaciens accretas superpositasque partes. Sanguis porro ille partes hasce elevans, & in determinato quodam ambitu solvens, parvum ac circumscriptum refert tumorem. Eo rerum statu tum pulsus, tum reprimendus digito tumor, verum Aneurysma, sive Arteriam minime perforatam, mentiuntur. Pulsus porro ille manifestus hic percipitur, quia sanguis ex arteria per hoc foramen in formatum hoc cavum impellitur; tumorem autem digitus reprimat, quod fluidus medio in tumore cruor per arteriæ foramen repellatur. Censet autem autor hanc suam Theoriam anatome confirmari. Nactus enim occasiones aptas, invenit in illis quidem, qui sine perfectione integumentorum mera ambiente compressione, ab aneurysmate ejusmodi curati fuissent, dum aliis postmodum morbis periissent, arteriam, capsulam, & aponeurosin, una eademque

cicatrice coaluisse : in Operationibus vero suis , quas sæpius compressione externa haud sufficiente instituere debuerat , Sacculum detexisse se ait , pro diuturnitate mali nunc majorem , nunc minorem ; qui exterius formabatur inferiore aponeuroseos facie , intus vero variis compacti sanguinis lamellis , eo compactioribus , quo exterioribus , quique demum fluidum gerebat in medio sanguinem.

§. XIII. His ex *Fouberto* præmissis ad tria data Problemata me converto. Ad I. dico , quandoquidem ex relatis tum nostræ mulieris , tum ex pluribus apud hunc autorem historiis , arteriam totam pertusam fuisse constet ; & definitio spurii aneurysmatis id supponat ; videor merito id nostrum spurium vocasse , quantumvis veri naturam æmuleretur. Confirmant id etiam alia *Fouberti* observata , quæ in eorum cadaveribus , qui olim ab aneurysmate perperam vero dicto curati , aliis deinde morbis

bis occubuerant, demonstrarunt stigma, si-
ve cicatricem in Arteriæ pariete interno.

II^{da}. Quæstio erat, quænam rotundi,
atque immobilis, nostra in fœmina tumo-
ris origo fuerit? Videtur *Foubertus* jam
explicasse, ut responsum hic repetere sit
supervacaneum. An vero ex hujus auto-
ris theoria, anatome confirmata, responsio
quoque haberetur, ad singulare illud phæ-
nomen, quod clarissimi viri, *Hamberger*,
& *Trem*, suis in casibus observatum nota-
runt, descripserunt, sed non explicuerunt?
Prior in *Comm. Litt.* ann. 1732. sic scri-
bit: „Apparuit (in operatione) tunc glo-
„ bus ex carne membranofus, superficiei
„ inæqualis, arteriæ adhærêns, diametri
„ duorum digitorum. Hunc exploraturus,
„ digitis parum compressi, ex ægroto quæ-
„ rens num dolorem perciperet? Quod
„ cum negaret, fortius pressi, & sic non
„ solum ab arteria successive recessit, sed
„ & in tribus locis ruptus, sanguinem coa-

„ gulatum dimisit. „ Posterior vero sic :
„ Post hæc, inquit, magis magisque to-
„ tam cavitatem a grumis, digitorum ope,
„ purgabat operator, ac denique quen-
„ dam (tumorem) paulo firmitus ad locum
„ arteriæ adhærentem, & aliter conforma-
„ tum, protrahebat, illi, quem Domini
„ *Jenenses* in casu superius exposito offen-
„ derunt, valde similem, articulum digiti
„ magnitudine æquantem, sanguine con-
„ grumato pallidiorem, & quasi membra-
„ nosum, inferius præterea fulco, arteriæ
„ trunco procul dubio respondente, ma-
„ nifeste excavatum.

Igiturne in nostra scœmina, & in *Fou-
berti* ægris, & in casibus clarissimorum *Ham-
bergeri* & *Trew*, hoc modo quo dixi, na-
tum id corpusculum? An, quod cum eo-
dem nato nonnulli penitus curentur, alii
curati ad tempus habiti, tamen posthac,
tumente brachio, incisione indigeant; an,
inquam, id ideo fiat, quod in illis ita cor-
pus

pus hoc cum Arteria coagmentatum est, ut vis pellentis per foramen Arteriæ sanguinis nequeat illud ullibi, toto in ambitu solvere; in his vero illud alicubi solvit, ita ut per rimas has toto brachio longe lateque diffundatur? Videretur certe ex omnibus his observatis quid simile concludi oportere.

Ad III. problema, quod tremoris rationem poscebat, responsio difficilis mihi videtur. Expositum mox corpus, immediate, firmissime, & calli veluti ope cum arteriæ corpore coadunatum, utique motu arteriæ in Diastole ac Systole afficitur, sed cum obsequiosum præ duritie non sit, fortassis ideo tantummodo tremit, non autem manifeste expanditur contrahiturque: Jamque novus sanguis assiduo ex arteria in hoc cavum impulsus, & a tremente hoc operculo repulsus, videtur quoque hinc tremorem augere. Binæ enim causæ continuo agitant hoc corpus superpositum, quod

sua duritie non nisi levissime reagere, agique, possit.

C A P U T III.

D E

TYMPANITIDE ET HYDROPE CYSTICO VARIA.

§. I. *Examen Tympanitidis.* §. II. *Historia Hydro-
pis Cystici, sive saccati, numerosis cadaverum
sectionibus suffulta, cum explicatione τῶν Ἑμμετῶν
Hippocratis.* §. III. *Examen Doctrinæ secundi
Tomi Acad. Chir. Paris. circa amplam ventris
dilatationem, saccique, in hac specie Hydropis:
eaque occasione cunctis emolumentis & nocumentis
hinc Methodi a Parisiensibus propositæ, illinc Pa-
racenteseos, discussis; HAEC demum ILLI, qui-
busdam exceptis casibus, præferenda forte videtur.
Simul eorum sententia de extirpando Ovario exa-
minatur.* §. IV. *Quæstiones Pathologicæ circa Hy-
dropis originem & naturam.*

§. I. **P**eculiari capite de Tympanidite egi
Tom. II. Rat. Med. In præsen-
tiarum nonnulla addere juvat, quæ ibidem
dicta

dicta confirmant ; huncque morbum , qui debitæ cognitionis defectu frequenter adesse dicitur , dum minime adest , ab omnibus aliis rite distinguant.

Puer necdum sextum ætatis annum integre explens , debilis , incedere necdum valens , a matre mihi sistitur. Narrat illa quo momento quondam huic suo infanti mammam præberet , se ex nuncio improvise nec opinatæ Mariti mortis vehementer fuisse perterritam ; observasseque paulo post flavescentem infantem , ac postliminio indies macriorem reddi : ventrem ipsi quoque intumuisse , idque ea lege , ut nunc plus , nunc minus tumeret , nunquam vero integre detumesceret ; jam vero a 30. diebus immanem excrevisse in molem , cum rara , duraque alvo ; ita ut quintus denuo dies , ex quo eam non exonerasset , laberetur. Examinavimus tunc puerum. Facie excepta macerrimus , ventrem adeo tumens gerebat , ut superius vix spatium pro

Tho.

Thorace relinqueret , inferius vero super femora propenderet. Haud æquabiliter tamen extendebatur , utpote eminentiis pluribus , iisdemque globosis & oblongis , inæqualis : parte nimirum dextra , eaque superiore , eminentior , inde depressior , in medio denuo elatus ; mox inde iterum planior , in sinistra vero regione tum media , tum infima , vehementer extuberans. Percussus nihil undulationis , sed obscurum tympani sonum , unde totus morbus nomen habet , referebat.

Quam verissime igitur *Boerhaave* post veteres docuerat *Inst. Med. §. 817.* ex *Ictero Tympanitidem* facile nasci ! Bile intra sanguinem refusa , Intestinis deest necessarius , quo & agant & exonerent se , stimulus. Ergo expanduntur ; & perseverante , aut continuo repetente , eadem expansione , fibræ eorum demum fere paralyticæ fiunt , nec nisi duplicata vi respirationis , aut validiorum purgantium stimulo , commoven-
tur

tur ad evacuationem. Evacuata autem hæc Intestina vix concidunt, quum vi contractili amissa, mox aëre extendantur, fæcibus dein tempore accumulatis, immanius turgeant, atque ita, ad exonerandum sese, vi indigeant validiore quam antea. Cum paralyseos hujus origo annosior esset, tristem prognosin dabat morbus. Cura tamen tentanda erat, eaque primum evacuando pallians, deinde roborando curans. Sed ferro venimus. Eodem die fatis cessit.

Inciso abdomine, tumoris causam videbamus nec aëri deberi, nec aquæ, verum unice expansis Intestinis crassis, & quemadmodum figura externa designaverat, hinc plus, illinc minus, dilatatis & impletis. Aëris porro immensa copia, multumque durarum fæcum, eadem explebant. Hocque jam tempore & multa, & profunde tincta, Bilis in vesicula fellea aderat, ut stimulare intestina potuisset; sed dudum nata, & inveterata paralyfis, suborto

orto atque agente posthac stimulo, emendari nequivit.

Externa igitur, inæqualis ea, & tortuosa ventris facies, sedem Tympanias ostenderat in Intestinis esse; sed non in quibusnam proprie esset? Hic Anatome crassa Intestina, aliis in cadaveribus cum crassis & tenuia ostendit nobis inflata. Quin & præternaturalis crassorum decursus, & flexura, omnem genuinæ Morbi sedis determinationem a priore, ut ajunt, negabat. Quippe in cadavere vidimus faccum cæci vix pollices duos capientem, suo cum appendiculo, non fede consueta, sed aliena, versus medium abdomen, locari. Colon inde assurgens, mox amplissimum, ad Lienem vergebat, indeque retro, versus umbilicum reflexum, & hinc iterum viam ad sinistrum Ileum petens, denuo oblique dextrorsum amplitudine stupenda assurgens, tandem facci ingentis, potius quam intestini forma, ad anum descendebat.

Si

Si jam vetabamur ab externa ventris forma locum proprie affectum, vivente ægro, determinare; nonne eandem ob causam idem in aliis abdominis morbis, ut puta in colica dicta, vetamur? Etenim pluribus in cadaveribus coli figuram minime naturalem deteximus: ita quidem ut in nonnullis ad Hepar affixum, mox vel ad umbilicum, vel ad imam pelvim descendat, indeque assurgens Lienem petat, postea autem cursum consuetum absolvat. In aliis iterum alio atque alio invenitur hæc forma tortuosa modo. Ita ut dolor versus umbilicum tenuibus inesse creditus, haud raro ipsum colon occupet. Et Experimentum capientes, inflando fortiter intestinum animalis, evidenter cernebamus illud & amplitudine & longitudine augeri, si determinato in spatio coarctabatur; nova in omnem modum, omnem in formam, volumina tunc producens. Qua etiam de causa toties in iis, qui calculo vesicæ perierant,

rant , & longiffimos , & ampliffimos , & maxime tortuosos , ureteres invenimus , & jam in prioribus descripfimus ; eo quod urina , fecreta renibus , intrare veficam prohibeatur. Elongat quippe illa , ampliatque ureteres ; & cum hi elongati nequeant amplius in longitudinem porrigi , coguntur hinc inde in latus fecedere , formare volvulos , elongantes , vel lacerantes , quæ ipfos involverat , cellulofitatem. Itaque protrufo cum Peritonæo deinceps , in remotiore longe plaga , nova productione cellulofa vicinis affigunt fe , ac fi perpetuo ibidem hæfiffent : quemadmodum plura nobis exhibuere cadavera.

Sed ut ad rem ; Proſpectus anatomicus hujus tympanitici confirmat eam , quam Tom. 2. cap. 5. ideam ejus dedi. Sedes mali eſt in ipſo inteſtinorum cavo ; materies , cum copioſis excrementis , Aër eſt. Si in cavo abdomine aqua ineſt , ea a cacochymia corporis univerſa producitur ;
fi

fi aer, ab eroso intestino. Causam remotam in hoc ægro, Bilis defectum cum *Boerhaavio* agnovimus, in aliis, iteratas Colicas, Ileumque, deteximus. Quippe in Colica clausa dicta, & Ileo, intestina materie chylosa, ac stercorea, tum & aëre copioso, amplificantur, & elongantur, ita ut figura, decursuque, mutantur. Repetitis his morbis tandem fit, ut licet homines posthac ab iisdem curentur, intestina tamen pristinam figuram nondum recuperent, atque ita causa prædisponens ad Tympaniam maneat. Si Intestinorum Nervis supersit nonnulla adhuc contractilitas; si etiam diæta talis sit, ut non ingerantur alimenta, quæ multum aëris factitii, aut *Gas Helmontii*, in ventre generent; si nec duri cibi assumantur, nec segnis sit alvus; Tympania non formabitur: sin vero ita perierit vis intestinorum contractilis, ut plane sit iners; si continuo a prava diæta intestina distendantur, distentaque maneant; erit demum,

E

ex

ex proegumena & procatarctica causa combinata, causa proxima nata, nempe ipsa Tympanitis. Ex iisdem simul intelligitur, quod si omnis aer, ac faculenta materies, expulsa fuerit, Curatio tamen mali impossibilis fit, si Nervorum Mesentericorum ac Mesocolicorum paralyfis fit irreparabilis. Causa enim procatarctica assiduo renascens, dat, cum hac perseverante proegumena, semper novam causam proximam.

Atque hæc dixisse de Tympanitide sufficiant. Sequitur nunc consideratio morbi, qui multa sæpe habeat cum illa communia; Hydropis scilicet abdominis, ejusque potissimum, quem *Cysticum*, sive *Sacatum*, adpellare solemus. Hic sane Hydrops inæqualitate notabili & miranda ventris fere Tympaniam æmulatur; caretque ille fluctuatione aquarum in multis, ut hinc eo sit Tympaniæ similior. Attamen Resonantia non adest: unde hinc hic ab illa internosci potest. Sed si collectores casuum

con-

consulamus, dantur casus rariores, ubi Tympanitidi Hydrops dicitur comitatus esse, aut saltem supervenisse : si id verum, & multis in cystis ille Hydrops colligitur, poterit resonantia aëris suffocari ab aqua utriculis contenta, atque ita tota morbi alioqui clara idea, penitus confundi. Anamnesis bona, & exacta utriusque morbi cognitio, poterit hanc confusionem utcumque emendare. Ut ergo utriusque morbi Diagnosin illustretur, juvat casus plures miserandos Hydropis recensere, & practice de eo disferre.

Fœmina 30. annorum quartum infantem 21. Nov. 1758. feliciter enixa erat, sed tertio a partu die lecto imprudenter surgens, frigus suscepit: horrore inde atque ardore correpta, mox suppressa sibi lochia percepit, ventrisque deinceps tumorem, atque dolorem. Dolor quidem post aliquot dies remisit multum, tumor vero magna cum ventris gravitate perseveravit. Ac-

cessit me mense Aprili 1759. Quo quidem tempore cujuspian liquidi fluctuationem, tum ipsa corpus finistrorsum vertens percipiebat, tum nos percutiente ventrem manu evidenter deprehendebamus. Sed, ut decursus morbi docebit, omnis posthac fluctatio cessavit. Conquerebatur autem dum me primum accederet, molestissimam sibi mansisse dextro in inguine duritiem, quam pugno magnitudine parem deprehendere potui.

Diagnosıs ergo evidenter docuit Uterum a suppressis lochiis inflammatum, suppuratumque fuisse; ac forte ipsum, vel Tubam Falopii, vel Ovarium, pure tumidum, inguini accubuisse, accrevisse. Quam sententiam immobilitas tumoris, quodcumque in latus se foemina verteret, confirmabat. Prognosis tum ex hac ipsa foemina, tum ex multis aliis, quas habueramus, mulieribus, multiplex erat: vel puris intra sanguinem timenda resorptio, quo demum
san-

sanguis totus corrumpatur, ac ferius ocyus foemina pereat : vel absorpti puris per alia viscera speranda excretio ; unde perfectam consequi sanitatem notabilibus videram exemplis : vel etiam exitus puris in ipso accretionis loco per inguen prævidendus, cujus quoque exemplum habueram : vel denique, ut pus introrsum erumpens, in cavum ventrem effunderetur, omniaque ibidem viscera corrumperet.

Hunc ultimum eventum, quod frequens sit, quodque eum tam graphice *Hippocrates* descripserit, paulo attentius hic contem-
plemur. Ulcera demum hæc sunt, quæ *Ἐμμοτα Hipp.* adpellavit. Ita ut talia interna ulcera intelligenda sint, de quibus agit in *Aphor. 47. sect. 5.* *Ἦν ὁσέρη ἐν τῷ ἰσχίῳ ἐγκλειμένη, διαπύνη, ἀνάγκη ἔμμοτον γενέσθαι.* Quod *Almeloveen*, post plerosque interpretes sic reddidit „ si uterus coxæ „ incumbens suppuratus fuerit, necesse est „ medicamentum in linteo carpto adpli-

cari. Hoc sensu *Oedipo* opus est, qui explicet. Nemo ex omnibus Interpretibus rectius *Prospero Martiano* verum sensum *Hippocratis* reddidit. Videatur is comm. pag. 460. Ita ut vera Aphorismi interpretatio hæc sit: „Si uterus suppuratus ad coxam, „ vel inguen, accubuerit, necesse est cava „ ulcera interna fieri.

Ac primo quidem ipse uterus brevi a partu sanguine turgens, magnæque adhuc existens molis, si inflammatur ac suppuratur, mole adhuc crescit, fitque gravis, ac facile alterutrum in latus cadit, & inguini, ac versus coxam, accumbit, accrescitque. Tuba Fallopiana, ipsumve Ovarium, eadem de causa pure tumens, facile cum inguine, ac margine toto Musculi obliqui externi concrescit. Rebus sic se habentibus, periculum est, secundum & *Hippocratis*, & omnium observata, ne hic fiant **Εμμοτα*, ulcera cava interna. Hinc *Hipp. Libr. de Nat. mul. cap. 6. 684. apud Chart.*

*Hv

Ἦν αἱ μῆτραι ἄψονται, πρόσκεινται· καὶ ἢν
 ἄψῃ, ὅψει σκληρὸν ὑπὸ τὸν κενεῶνα· καὶ ὁδύ-
 νη λαμβάνει τὴν νεύαιραν γαστέρα, καὶ τὰς κε-
 νεῶνας, καὶ τὰς ἰσχύας. καὶ ἐς τὸ σκέλος ὁδύ-
 νη ἐπίπτει, καὶ ἐκτείνειν ἔδυνανται· πολλάκις
 δὲ καὶ ἐκπυῖσκονται ἔμμοτοι γενομένοι, καὶ
 ῥέόμεναι ἀποθνήσκουσιν, ἢν μὴ καύσης, ἢ τὰ-
 μης. „ Si adhæserint uteri, incumbunt. Et
 „ si attigeris, durum quid sub ilibus (sub
 „ laterum mollitudine, sub vacuitatibus ab-
 „ dominis) deprehendes; dolor imum ven-
 „ tremprehendit, & ilia, & lumbos; &
 „ dolor in crus incidit, ut illud extendere
 „ nequeat. Sæpius vero uteri suppuran-
 „ tur, in ulcera cava interna mutati, &
 „ fluentes moriuntur, nisi locum vel usse-
 „ ris, vel secueris; „ ut nimirum pus ad ex-
 „ teriora alliciatur. Videte hæc omnia con-
 „ firmata notabili Historia *Maliensis* Epid. 5.
 pag. 1149. Libr. de Artic. pag. 817. &
 822. Edit. Foës. Deinde etiam Tom. VII.
 Chart. Hipp. pag. 684. 690. 740. 767.

813. Sed legendus ubique græcus modo textus ; nam versiones hic loci nihil valent. Vidi in cadavere puellæ , quæ clam pepererat , neglectaque fuerat , suppuratum uterum cum omento primo coaluisse in dextro latere , omentum hoc mire degenerans & incrassatum coivisse cum ligamento rotundo uteri , cum vasis nervisque cruralibus ; ut longa patientia opus esset , antequam partes concretæ probe distinguerentur : fistulis , & ulceribus , massa tota penetrabatur.

Hiscæ ita consideratis , casum nostræ mulieris incipimus intelligere. "Εμμοτα quippe , ulcera cava , fistulosa , interna , ipsi aderant , unde pus cavum ventrem occupabat ; cujus forte tantillum , a vasis bibulis resorptum , quotidie in Urina adparebat. Attamen solum pus non adesse , sed etiam magnam aquæ copiam , fluctuatio docebat ; id quod inde natum facile intelligitur , quod vasis Lymphaticis & Uterus , & Tubæ ,
&

& Ovaria, undique scateant ; quæ vicino pure erosa ventrem facile colluvie aquarum inundant. Suppurato utero plus simplici vice aquam cum pure in abdomine effusam vidi.

Vires ergo optime cum adessent , Paracentesin 24. Aprilis instituimus , eduximusque liquidi subviridescentis, turbidi, inodori, Libr. 27. Venter videbatur jam integrè evacuatus. Constringens ventrem machina post meridiem paululum laxanda fuit, cum Respiratio, mox ab operatione liberior, nunc impeditior fieret. Bene se postmodum per omnia habuit ; somno, viribus , adpetitu. Eductus porro liquor , in 14. magnis vitris collectus, intra 8. horas cepit floccos oblongos, albosque, a superficie deorsum versus formare , & seq. die pus in fundo exhibere. Liquor tenuior ad ignem coagulabatur. Servavi hanc suis in vasis materiem a 24. Apr. ad 5. Maji , & publico examini denuo subjeci. Nullus

aderat fœtor, viridis, crassa, flocculenta esse perseverabat, ponens in fundo gelatinam spissam, nonnullis in vitris sanguine, pure in aliis, mistam. 9. Maji, 15. proinde die a paracentesi, phænomena omnia eadem manebant. Tenuior effusa pars colorem syrapi violarum minime mutavit, iterato licet sæpius experimento. Cum aceto non efferbuit. Spiritus nitri affusus nullam effervescentiam, sed insulam coagulatam, ad quamlibet portionem affusam, producebat. Portio vero alia in cochleari igni imposita, mox abivit in coagulum. Serum ergo, seu Lympha coagulabilis, eros vas Lymphaticis, maximam partem abdominis explevit, pus reliquam.

Ablatis tandem quæ abdomen per aliquot dies constrixerant fasciis, Tumor in inguine dextro apparuit, & 18. Maji jam percipiebatur ab inguine sursum crescere, & versus medium abdomen pergere, tactu durus, & plane immobilis. Simulque adeo
tumi-

tumidus venter, quam ante Paracentesin adparuisset. Augusti autem 10. durities toto fere abdomine, excepta regione iliaca sinistra, percepta est, supra umbilicum jam eminens, immobilis, inæqualis; sed nec fluctuans, nec resonans. Diuretica & purgantia mensibus Junio, Julio, Augusto, data, eo usque profuere, ut res domesticas suas, multorum liberorum mater, sufficienter peragere posset. Septembri vero mense tumor totum ventrem medium, ad cordis scrobem usque implet, ibidem capite adulti hominis major, & in latere sinistro ad inguen usque porrectus; durus ubique, decem forte in locis globosior, & depressior; nec fluctuans, nec resonans.

Interim observamus, quod in primo Hydrope non fuit, Musculos abdominales adeo molles ac flaccidos, ut supra enormes hos tumores prehendi plicarique possint. An igitur, a prima ventris extensione, musculi hi, totumque peritonæum, vim
con-

contractilem irreparabiliter amiserint, & in perfectam paralyfin degenerarint? Plausibile hoc argumentum destruit sequens observatio. Tumores cysticos fœmina quæpiam habere a quinque mensibus cepit, prima vice vitæ suæ, ante id tempus perfecte sana; quæ tamen, tumidissimo cum ventre, flaccidissimos habeat Abdominis musculos. An ergo Nervi dorales & lumbares ab internis tumoribus ita comprimerentur, ut Musculi abdominales hinc paralytici redderentur? Sed paralyfis ejusmodi adesse nequit, nisi simul & alias partes afficiat, quæ hic non afficiuntur. Ad nodum hunc solvendum plures primo casus observandi erunt, pluresque cadaverum sectiones faciendæ; unde eum nunc in medio relinquam. Id modo addendum habeo, quod in utraque hac fœmina Umbilici regio arcte videatur cum cystico tumore connexa.

Gravem nunc ordimur quæstionem, qua
peti-

petitur 1^{mo}. An nostra mulier novam subire paracentesin debeat ? 2^{do}. An dictis cum remediis sibi sit relinquenda ? 3^{tio}. An vero methodum minus palliantem, tutius curantem, qua illi succurri possit, possideamus ?

Intricata quæstio responsum suspendit, quum illud totam, qua late patet, quæstionem, coram cernere debeat, cum omni ea varietate, quam varii casus ejusdemmet morbi exhibent. Igitur plures primo recensebo, ut responsio ad omnes adæquate adornetur.

Fœmina 50. ann. ritè perpetuo, dolorem ad instantia catamenia si exceperis, valens, anno 1758. finiente Septembri, cecidit ab altitudine 12. pedum ; ita quidem ut toto sinistro ventris latere impingeret in ligneum sepimen horti, deinde, gravitante corporis trunco, hinc in terram infiliret. Doluit inde venter, &, dolore mitigato, duri quidquam habuit, sensim crescens, immobile, explens demum præcipuam ventris partem,
dolo-

doloremque medio in epigastrio creans. Altero mense post casum circiter elapso, fœmina terrore valido, ac mœrore de incarcerato marito afficiebatur, ex eoque tempore ventrem universum tumere sibi percepit, durum, quod antea, corpus ultra non animadvertens. Toto Aprili 1759. vix horæ spatio somnum oculis videns, nihil appetens, & si forte quid appeteret, illud compresso ventriculo non admittens, ægerime respirans, ad nostrum Nosocomium ducta est, in eoque suscepta. Examine instituto, nullum deprehendimus durum in abdomine corpus, sed æquabilem distensionem, & manifestam aquæ fluctuationem. Parvus ipsi, & celer, & inæqualis pulsus.

Quærebatur num præsentī in periculo versanti mulieri instituenda Paracentesis foret? Remedia diuretica mox ipsi exhibens, inutilia prorsum vidi, & è contrario vires indies minui, omnemque fere respirationem suppressi. An ergo certo interitui relinquer.

quenda ? Paracentesis hic damnari solet, meritoque condemnabatur olim, quando Ars in debitam abdominis compressionem nondum satis intenta, respirationem, effluentibus aquis, suppressam cerneret, vitamque abeuntem in auras. Jam vero ars pro ratione effluentis Lymphæ arctans abdomen, ac vasa non sustentata fulciens, comprimensque, supplet functioni muscutorum abdominalium, qui jam otiantur; impeditque ne humores per vasa olim compressa ægerrime, jam aquis prementibus libera, impetuose ruentes, haud sufficienter ferantur ad Encephalum. Quo igitur modo jam instituitur Paracentesis, licet parum nonnunquam juvans, tamen vix unquam funesta, & sæpe vitam reddens ad tempus tolerabilem, præferenda certæ perniciiei videbatur: maxime eâ si fieret cautione, ut aquæ haud plus una vice demeretur, quam viderentur vires commode ferre.

Itaque octiduo integro bene apud nos
enu-

enutrita, ac viribus aucta, operationem subiit 9. Maji, & ingenti suo commodo 35. aquæ Libras amisit; ventre ita detumefcente, ut nihil Lymphæ superesse videretur; quantum nempe fasciato ventre deprehendi potuerat. Aqua Limpida, sed flava, erat, ad ignem coagulata, fyrupum Violarum plane viridem reddens, cum aceto mista minime effervescens, cum spiritu falis albescens, & in coagulum abeuns. Effectus habuit operatio omnes, quas à palliante cura expectare potueramus; respirationem sensim expeditiorem, appetitum redivivum, prudentis alimentorum ingestionis tolerantiam, doloris absentiam, copiosiore urinam, naturalem, liquidiores tamen, alvum, placidos, reficientesque somnos, demum auctas indies vires. Flatus modò molestos, ut prior illa, ut omnes quibus unquam Paracentesin institueramus, etiam & hæcce est conquesta, idque jam mox ab operatione instituta. Opium hos
flatus

flatus multum moderabatur. Quippe Intestina olim ab accumbente aqua vehementer compressa, jam eâdem educâ longe minus a constringente ventrem machina comprimuntur; adeoque ab alimentis, & ab aëre potissimum, extenduntur; debilitata vix reniuntur. Sanguis autem spiritusque in vasa nervosque commodius influunt. Cum tamen Intestina aërem & alimenta, præ debilitate sufficienter propellere nequeant, variis in plagis necessario extendantur, & in locis, ubi illa extensio non adest, spasmodice contrahantur, necesse est. Opium datum spasmos solvit, efficitque ut contenta hæc per universum intestinorum tractum æquabilius distribuantur.

Attamen debuit ligatura, sensim jam laxata, 18. Maji auferri, cum recrescentes aquæ respirationem fere suffocarent. 21. Maji dimidiam partem antiquæ molis venter jam erat adeptus. Et ipse tumor, quem illa ante hydropem perceperat; quemque,

hydrope formato, nec ipsa, nec nos, ullo modo deprehendere potueramus; laxata prius ligatura, utcumque, ablata eadem manifestus adparuit, superiora medii abdominis, dextrumque ejus latus occupans; haud ita tamen deorsum vergens, ut Uterum, aut Ovarium, affectum esse suspicareris. Immobilis plane idem, haud tamen peritonæo accretus; aqua ad digiti lati distantiam inter hoc & illum manifesto, sæpiusque, deprehensa. Atque ita sensim increvit abdomen ad eandem, ad quam olim, molem, imo ea majorem; cum jam ensiformis cartilago extrorsum a tumido corpore incurvaretur. Voluit tamen ad maritum, liberosque, redire, atque ibidem, me infcio, mortua est: ut aperiundi, quod doleo, cadaveris facultatem non habuerim.

Vidua 48. annos nata, plurium infantum mater, abdomine tumere cepit anno 1757. sed 25. Dec. ejusdem anni tota detumuit, enormi Lymphæ copia pleno rivo de

de pudendis profiliante. Unde Hydrops uteri fuisse videtur, qui sic sponte curatus. Attamen rursus tumuit, tantam demum in molem, ut hujus, quem vivimus, anni Majo mense finiente, distantia a scrobiculo cordis ad umbilicum 4. pedum esset, ab umbilico vero ad pudenda 2. pedum. Umbilicus in genu altitudine inveniebatur. Ut longitudo, ita monstrosa plane ventris amplitudo fuit. Unde nec ipsa movere sese, nec ultra fere a suo famulatio verti, attollique, posset. Consilio indicto Medicorum, & ego rogabar. Fluctuationem manifestam immensæ aquarum molis percipiebamus omnes. Quærebatur modo, qua illam methodo juvaremus. An medicamento evacuan- te? Sed & moles major erat, quam ut hinc sufficiens evacuatio speranda foret; & Medici hisce dudum oleum luserant operamque. Quin imo ab aliquot diebus Respiratio suffocationis metum incutiebat, ut celeri auxilio opus esset. Num ergo para-

centesis instituenda ? certe permittebant eam ætas, viresque ; suadebat suffocationis periculum ; nec scirrhi forte præsentis suspicio dehortabatur, cum aquarum evacuationem palliantem, ut ajunt, tantum intenderemus : eductis nimirum aquis homines suos scirrhus tolerabilius gerere, toties experti. Voce una ergo Paracentesin, qua unice imminens suffocatio averruncaretur, suavimus, laudavimus. Sed vero in Paracentesi ligandus venter est, & pro ratione effluentis laticis constringendus. Qualisnam machina, loris ac fibulis instructa, ad id apta erit ? Et si apta, nonne flaccido jam tantæ molis ventre, inepta erit, quæ sufficienter adducatur ? Itaque unam communem ejusmodi machinam primo apponendam esse ; & monstroso corpori aliam etiam monstrosam machinam, quæ ilico parari posset, circumdandam esse ; ea quidem intentione, ut si flaccido ventre major machina inepta, quæ sufficienter adduceretur, foret,

foret, minor supposita ventrem constringeret. Quod si commode liberaliorem aquæ educationem non ferret, parcior desistendum esse conclusum fuit.

Igitur in inferiore parte, eaque dextra, ventris, facta apertura, 37. aut 38. Libræ effluxere liquoris non foetidi, sed fusci, turbidi, amurcam plane referentis. Substitit tunc fluxus omnis. Percipiebaturque canula in corpus durum impingere. Penetrandumne per illud esset? Negabatur: ignorabamus enim an id non foret quodpiam scirrhosum viscus, quod pertusione malignum fieret. Sed quid si faccus durus, ac semiscirrhosus ingentem liquidi seu boni, seu corrupti, copiam contineret? Nonne pertusus evacuaretur? Evacuaretur quidem, sed primum in abdominis cavum; remotus enim ille a peritonæo erat, cum inter hoc & illum tot Libræ amurcarum jam effluxissent. Ponamus ergo sacco pertuso liquorem effluere putidum, ichoro-

sum, faniosum, cancrosum : nonne illè, alluens ad intestina, cæteraque viscera abdominis, corrumpere eadem, mortemque, quam procrastinare animus erat, acceleraret ? Sed contra : Instrumento trifulco in saccum adacto, an cannula non clauderet foramen ; ita ut, quemadmodum ex externo abdomine liquor copiosus cannula effluxisset, ita etiam ex sacco efflueret ? Ita ; sed considerabamus, amurcam quæ effluerat intuiti, improbable non esse, quod spissus, si quem durum hoc corpus gereret, amurcosusque humor foret, per cannulam minime profiliturus, &, eadem ideo extracta, in cavum ventrem effluxurus. Saltem maturius super hoc deliberandum esse, & jam corpus refocillandum, ac quieti tradendum fore. Levamen ab operatione nullum percepit, nisi 12. postea horis ; jam, inquiebat, me bene habeo, simulque expirabat. Mole cadaver vix imminutum, terribili mephiti totas explevit ædes : ita ut

ve-

veniam ejus aperiundi 2¹/₂ a morte diebus nacti, re infecta aufugerimus, ne curiositatis poenas, ut olim egregius Anatomicus *Cantsius*, infontes lueremus.

Homo 49. ann. Hydrope ascite, ac simul anafarka laborans, in Nosocomio dicto *Becken-bausel*, mense Octobri 1758. ab optimo ibidem Physico *Störck*, vino squillitico curabatur, ut suos denuo labores perficere posset: superstitite tamen tumore duro, immobili, in Epigastrio. Curando illi varia quidem moliebatur Medicus, sed æger, victus prolibus quæritandi desiderio actus, curam sui neglexit. Unde denuo eundem in morbum relapsus, idem repetiit Nosocomium. Cum jam incassum quævis remedia adhibita essent, Paracentesis instituta est, & centum aquæ turbidæ, ac rubræ, libras eduxit.

Evacuato ventre, qui olim in Epigastrio perceptus tumor, is jam longe extensior deprehendebatur. Dabantur selecta re-

media, sed in cassum. Crevit enim ita Hydrops, ut exacto a prima Paracentesi mense, altera institueretur, ne suffocaretur, similemque & natura, & copia, materiem educeret. Id quod deinceps quovis mense septies repetitum. Post septimam Paracentesin videbatur 14. diebus belle se habere, postquam iterum, immane quantum ! intumuerit. Virium projectio, appetitus prostratio, febres, ac sudores, octavam dissuadebant : sed veritus homo, ne aut venter sibi finderetur, aut respiratio plane deficeret, octavam voluit subire : eductisque iterum 100. propemodum aquæ Libris, multum levaminis percepisse sibi visus est. Attamen collabascentibus pedetentim viribus undecimo ab illinc die periit.

Cadaver exhibuit omentum in pelvim usque propendens, mutatum in crassum atque membranaceum Marsupium, anteriore facie peritonæo, posteriore hinc inde intestinis accretum. Nulla in cavo abdomine
aqua,

aqua, in sacco vero Omenti copiosissima, rubraque eadem, & foetida. Ipse porro faccus ille crassus, steatomatosum tumorem gerebat, massæ informis, 33. Libras medicas pondere æquantem. Nonnihil aquæ & Thorax habebat. Similem fere casum *Horstius* habet, Op. Med. Lib. 2. Tom. 2. obs. 4.

In eodem Nosocomio fœmina circiter quadragenaria, enorme gerens, mole aquarum, abdomen, atque ob eam fere suffocata, amisit paracentesi 60. circiter Libr. medicas aquæ subrubellæ ac glutinosæ. Sublevabatur inde. Sed quod antea nunquam experta erat, jam in pectoris sinistrum latus, citra intentatas suffocationis minas, ultra decumbere non potuit. Signa præsentis fors hydropis pectoris ejus paracentesin postulassent, ni & ipsa eandem formidasset, & vires dissuasissent exiguæ. Porro a Ventris paracentesi primis 14. diebus venter haud multum crevit, sed duros modo in toto Epigastrio tumores exhibuit :

elapsis vero hisce diebus tumor ventris universi denuo crevit, viresque ita projectæ sunt, ut ægra bimestri posthac spatio elapso interiret.

In cadavere plurima aqua explebat abdomen, Hepar omnino scirrhusum, ac sinistro lobo suo farciminis instar productum, splenique accretum. Ovarium dextrum, ut publica demonstratione Auditoribus exhibui, in duo magna, eademque rotunda fere, corpora formatum, puriformi materia plena. Cavum dextrum Thoracis admodum Hydropicum.

§. III. His variis historiis relatis ad quæstionem paulo ante pag. 77. propositam; utrum nempe Paracentesis nostra in foemina sit repetenda, an vero Ars nostra aliquid possideat, quo vel constantius solamen, vel integram conferat sanitatem? ad hanc, inquam, quæstionem responsum nunc adornare convenit.

Si *Tomum alterum Acad. Chir. Reg. Par.*
con-

consulamus, viderentur efficaciora iis, quæ
 nos adhibuimus, auxilia modernis inno-
 tuisse Chirurgis, ac pulcris confirmata ex-
 emplis fuisse. Referunt hæc *Acta VII.* hi-
 storias Hydropis, ut ajunt faccati, nec
 non scirrhusi Ovarii. Habetur deinde eru-
 dita Epicripsis clari in arte chirurgica *Mo-
 randi*, qua impense laudat chirurgorum co-
 namina, qui Paracentesi minime contenti,
 Abdomen lata plaga vulnerarent, faccique,
 tum membranosi; tum etiam jam scirrhusi
 facti, in quo inclusum liquidum, integram
 hoc modo evacuationem, collapsum, con-
 sumtionem, efficere annisi essent; imo qui
 in posterum scirrhusum ovarium, quod
 cystici hydropis frequens sedes, veluti ca-
 strando essent exempturi. Tandemque finiens
 in hæc verba errumpit „La Chirurgie mo-
 „ derne est capable de grandes entrepri-
 „ ses; on ne sauroit lui ouvrir trop de
 „ viës pour guerir.

Sane si omnes faccati Hydropes in ova-
 rio

rio essent , iidemque perpetuo , lateque , peritonæo accreti ; vel si essent inter Peritonæum & musculos abdominales ; si præterea ipsi sacci membranosi tantummodo , non vero crassissimi & valde scirrhusi essent ; si denique in eodem homine saccus duntaxat unicus , & non , ut sæpe fit , multiplices essent ; laudaremus cum *Morando* hæc molimina : sed haud videmur certi semper esse de parte affecta , de natura affectionis , de numero loculorum , qui humores includunt. Si enim propriam meam experientiam mente recogito ; si ingentem illam observationum sylvam apud Collectores casuum revolveo ; si denique ipsa Academiae chirurgicæ exempla examino : jure videor dubitare an cura ibidem commendata sæpius non frustranea , imo & periculosa foret ? Unde juvat accurate rem totam examinare.

I^{mo}. Sacci hi peritonæum inter , musculosque abdominales , reperiuntur. Ita in iisdem Actis casus Chirurghi *le Dyan* , n^o. I.

ille

ille Domini *Mouton* n°. 3. & Domini *la Cbaud* n°. 4. Quod enim ultimus faccum inter Peritonæi duplicaturam formatum dixerit, id, inquit, *Morandus*, ex veterum opinione, postmodum correctâ, proficiscitur : unde idem sic concludit : „ Ce n'est „ pas la première fois qu'on a tenu ce lan- „ gage ; mais les Anatomistes ne l'admet- „ tent point : & je crois que cette Hy- „ dropisie prétendue entre les deux La- „ mes du Peritoine, n'est autre que celle, „ de l'espèce rapportée par Mr. *Mouton*, „ nempe inter Abdominis musculos & pe- ritonæum. Eratque eadem de sede hujus Hydropis sententia magni *Ruyschii* Obs. anat. chir. n°. 45. Videantur hic *Douglas* & *Winslow* de Peritonæo.

2. Saccati Hydropes fluctuant nonnunquam in abdomine, nullibi accreti. Ipse *Morandus* talem communicavit cum *Acad. Reg. Sc. Par.* ann. 1718. Cujus sacci particula, in ipsa paracentesi lacerati, claud-
bat

bat cannulam , extractaque cannula , vulnere prodibat , & ad duas ulnas extrahebatur , postquam demum abundantissima aqua effluxit. Addit oblongas has lacinias laceratam membranam vere retulisse. Atamen aquas , cito renatas , alteram , & tertiam paracentesin , unius mensis spatio singulis interposito , postulasse. Jam vero in *Act. Acad. Cbir.* addit in ejusdem hominis denati cadavere detexisse se hujus sacci reliquias , libere in abdomine , nulla facta adhæsione , hærentes.

3. Tumores hydropicis in corporibus reperire est , qui Peritonæo non accreti , imo ab eodem remoti sunt , & suo nihilo minus loco fixi , immobilesque. Fœmina in Nosocomio nostro , cujus Historia pag. 77. relata , gerebat tumorem maximum , durissimum , ad digiti lati distantiam a Peritonæo remotum ; ut interposita aqua manifesto docebat. Tumida ejusmodi corpora , a peritonæo multum remota , variis visceribus ,

ribus , seu radicibus inhærere , sequentia probabunt.

4. Nonnunquam facci Hydropici , tumoresve purulenti , steatomatosi , scirrhusi , a scirrhuso Hepate , Liene , Mesenterio , Omento , Utero , Ovario &c. proficiscuntur , tenuiore , ampliore , pedunculo inde penduli ; iidemque aut libere fluctuantes , aut lapsu temporis demum tum vicinis partibus , tum peritonæo , affixi.

A. Ita inveni in Septuagenaria Ovarium stupendæ molis , totum fere abdomen explens ; aqua , ichore , pure , infarctum , undique liberum ; simulque veram præterea Asciten.

B. Marsupialis figuræ ingens Omentum , faccum Hydropicum fecit ipsum , tota facie anteriore cum Peritonæo , posteriore multis in locis cum intestinis connatum , in Viro cujus historia habetur pag. 87.

C. Tumores universi abdominis , inæquales , compositi ex meris Hydatidibus ,
in-

integrum ventrem replentibus, extendentibusque, in faccis quamplurimis Lympham continentibus, *Ruischio* comparebant *Obs. anat. ch. n° 46.*

D. Hydrops abdominis datur cum tumētissimo, & inæquali Hepate, in Hydatidas toto converſo. *Ruiſch. ibid. n° 45.* Et iterum n° 65. ubi pertuſio ejus letalis fuit.

E. Venter in Hydropico inæqualis, inventus a morte fuit pluribus, iisdem mole prægrandibus, in Meſenterio deberi tumoribus. *Blanckard Cent. 2. n° 30.*

F. Idem n° 25. detexit, præter caſum *Ruiſchii* ad Lit. C. ſimul veram Aſciten. Hæc ipſa foemina initio ab Hydrope curata videbatur, remanente duritie lapidea in abdomine; recrevit poſtea malum.

G. Geminum ventris tumorem Virgo gerens, falſo creditur ab obſtetricibus paritura gemellos. moritur. Meſenterium exhibet duo ingentia ſteatomata, quorum alterum

terum pus, ac faniem, in cavum ventrem effuderat, ipsum uterum eroderat. *Tulp. Lib. 2. n° 33.*

H. In Mesenterio Tumor reperitur 20. Libr. pondere, extrinsecus membranaceus, intus hydatibus refertus; sed præterea & Hydatides aderant Ascitin facientes. *id. ibid. n° 34.*

I. Tumor Pancreatis ac Mesenterii 10½ Libras ponderans, invenitur cum enormi Ascite *Blanck. Cent. 1. n° 37.*

5^{to}. Ipse uterus immane quantum aquis possit extendi! Fluctuationis perceptionem percussio abdomine exhibet, mentiturque Asciten. *Blanckard Cent. 2. n° 29.* Uterus hic continebat ichoris, ac materiæ oleaginosæ, 85. Libras mercatorias.

6. Ventriculus in Hydropici cadavere invenitur sedes esse Hydropis, ulnæ magnitudinem habens, peritonæo firmiter accretus: ita ut sectio, quæ puncto abdomine aquæ 90. Libras eduxerat, reperire-

tur eam ex cavo eduxisse ventriculo. *Idem Cent. I. n^o. 84.*

7. Hydatidas multas in cavo abdominis extendi posse, in punctis contactuum mutuo inter se agglutinari, alia sui parte cum peritonæo coalescere, in cadavere Quiaquagenariæ inveni: ita quidem ut clarus apud Haganos *Velfius*, egoque, pertundentes Abdomen, inveniremus forte 20. & plura conceptacula aquæ, singula mediam, integram nonnulla Libram aquæ continentia, concreta tum inter se in punctis contactuum, tum cum peritonæo. Ovarium finistrum caput infantis recens nati referebat; dextrum, biennis: hydatibus utrumque cinctum.

8. Actis *Edimburg.* part. 2. n^o. 30. refertur mira prorsum historia juvenis hydro-pici, ei, quæ pag. 77. ex Nosocomio nostro recensebatur, simillima, ortu, progressu, figura, symptomatibus. Paracentesi 12. Libris viridescentis Lymphæ educ-tis,

ctis, æger postridie moriebatur. Triplici causæ hîc fuit ventris adscribenda moles. Primo Asciti. Secundo Hydropi Lienis, qui supernumerariam tunicam a Peritonæo, qua parte Diaphragma succingit, accipiens, inter hanc, & propriam suam tunicam, aquæ limpidæ, inodoræ, non coagulabilis, sed admodum muriaticæ, sex Libras continebat. Tertio, immani Vesiculæ felleæ amplitudini, quæ in concentricos loculos, singulos bilem continentes, divisa, octo libras bilis spissioris gerebat. Porro neque vesica fellea, neque lien, deprehendebantur peritonæo connati.

9. Datur ventris tumor enormis, durus, æqualis, in corpore summe cachectico, ubi omnis suspicio enormis hydropis faccati adest, maxime cum abdomen totum expleat, excepta infima hypogastrica regione; ubi tamen monstrosa abdominis moles unice debebatur sanissimis, &, citra notatum Anatomicis exemplum, mole im-

menfis, Hepati, & Lienî; ut 2. jan. 1759. publice demonſtravi in cadavere adoleſcentis 14. annorum, ſpina ventofa, omnes dorſi ac lumborum vertebraſ, etiam os ſacrum, exedente, enecti.

Sufficiunt, ni fallor, hæc, tam clariſ deſcripta Autoribus, quam obſervata nobis, exempla, ut varietas pateſcat cauſæ, ſedis, phænomenon, in Hydrope abdominis. Quærebatnr modo num certius, tutiusque, adplicatis hucuſque, auxilium noſſet Ars noſtra, ad curandum hunc morbum?

Intentio expertorum *Acad. Gall.* Chirurgorum ea demum eſt, ut in Hydrope ſaccato foramine Paracenteſeos non contenti, idem inſigniter dilatent, latamque aperturam diutiſſime apertam ſervent; ut haud modo is, qui in ſacco cavo eſt, efluat humor, ſed etiam ille qui poſthac aliunde in eundem influit. Quippe ſaccum, foramine paracenteſeos clauſo, a vaſis in illum hiantibus denuo impleri, idque citius
quam

quam prius, tertia citius, quam altera vice, & sic porro : lata vero apertura facta, quod in faccum de integro perpluat, transfudetve, exstillare id foras : facci latera, haud extensa amplius, concidere, corrugari, condensari : hinc exhalantia in illum vasa sensim arctari, minui, deleri, in fibras fere abire : hac lege demum tam parum in sacco colligi debere, ut totum facile apertura effluat, & faccus concidat totus. Id vero totum quo rite fiat, Artificem oportere maturius advocari, quam ut ingens jam factus sit faccus. Opus hoc facilius promoveri continuis injectionibus, v. g. Decocti hordei, mellis &c. Imo eo pervenerunt, ut statuant quamprimum percepto Ovarii Scirrhi, & nondum prodigioso sacco inde producto, Ovarii ipsius extirpationem indicari : quod illibata vita, illibata sanitate, effici posse quibusdam alatis testimoniis statuminare satagunt. Finemque demum his omnibus *Morandus* im-

ponit exclamatione superius citata. „ Effe
„ ita cum Moderna Chirurgia comparatum,
„ magna tentare ut aufit : nimium fore nun-
„ quam , qui ipfi proponatur , curandi
„ fcopum.

Nequeo non laudare , fummisque cele-
brare encomiis , qui artem promovere no-
ftram generose annitantur. Plurimis enim
adminiculis jam gaudemus , quæ difficilia ,
imo quæ impoffibilia ætas remotior credi-
derit. Industria humana nullis addiæta hy-
pothefibus , folis innixa obfervationibus ,
Artis noftræ pomeria indies extendit , eo-
rumque , qui id perfecerint , nomen æter-
num cluet. Hinc cum reliquis publicis Ac-
tis , quibus numerosæ Eruditorum Sodali-
tates , ut cæteras artes , ita & noftram ,
perpoliant , illuftrent , extendant , hæc chi-
rurgiæ *Parifinæ* Acta per omne ævum cla-
rebunt. Sed antequam egregia hæc cona-
mina , quæ Theoria formavit , unum quo-
que alterumve experimentum fuggeffit ,
ftabi-

stabilem praxeos legem forment, perpendendæ primum erunt, quæ in eadem exsequenda occurrant, difficultates.

Primum itaque, ut a Castratione exordiar, si eam in avibus, pecudibusque, homines instituant, non inde datur ad castrandas mulieres argumentum. Nam primo in brutis nihil periclitamur si inde pereant, ut quædam inde perire certum est; in homine homicidium, si inde periret, foret. Secundo, non habemus, qui affirmant, scriptores, inter humanas femellas inculpate id tentatum esse. Videtur equidem a *Morando* autoritas *F. Plateri*, ac *Diemberbroeckii* laudari; verum, ut mihi saltem videtur, minus convenienter. *Plateri* locus est *Libr. I. Obs. pag. 261. 262.* Totum quod dixit, meræ speculationis est: imo quo sermone ad finem utitur, eo aperte testatur & sine vitæ periculo aliquo institui non posse, & nondum se legisse quod a quopiam id tentatum fuerit. Et quid hic *Die-*

merbroeckii autoritas ? Diferte condemnat ille *Plateri* speculationem, statuitque citra summum vitæ discrimen, & citra summum Christianorum dedecus, id nunquam posse fieri, *Anat. Libr. I. cap. 24.* Igitur haud oportuiffet, ut mihi videtur, hos binos laudare autores, qui nihil minus, quam quod egregius Vir velit, statuerint. Quod *Hesychius*, & *Athenæus*, & *Alexander ab Alexandro*, de barbararum Gentium nefando, aliumque in scopum intento, aufu meminerint, etiam nullius effe ponderis mihi adparet. Quid enim nobis, cum gentibus efferis, qui mancipiorum vitæ se arbitros crederent ? Et si *Franckenau* casu femel viderit in vivis mansiffe foeminam, cui in vulnerato abdomine simul ovarium periret, quid inde ad praxin ? Si per momentum supponeremus fani ovarii exsectionem nefandam salva vita fieri nonnunquam posse, an ideo concludemus Ovarii degenerascentis, vasaque diametri ingentis habentis, exsectionem

nem

nem etiam sine periculo fieri ? Id mox patebit.

Sed secundo dico & rationi adversari.

1° Scirrhum Ovarium est, quod integrum excindere est animus. Scirrhum porro Ovarium & ego, & mecum plures, multoties in cadaveribus deteximus undiquaque connatum, scirrhosisque annexum productionibus. Ut periculum ingens tunc esset, ne vel Tuba Fallopii, vel Fimbria ejus, imo ne vel ipsa læderentur intestina, aliæve nobiles, quibuscum connatum sit, partes.

2. Scirrhusa pars, ut mole crescit, ita & vasorum diametro : abscindendo igitur Ovarium, poterit Chirurgus hæmorrhagiam, cui sedandæ impar sit, producere ; modo v. g. spermatica arteria ad suum, in Ovarium, ingressum, diametro multum amplificata sit.

3. Non semper ovarium est, quod durum extensumque in laterali Hypogastrio detegimus, verum aliquando tuba degerans, ipseque

uterus, ut pag. 70. advertimus ex *Hippocrate*. 4. Ipsa vulneris consideratio in corpore Cachectico, ut passim hæ mulieres id habent, quod hic latum esse oportet, hanc operationem condemnare videtur, ratione eorum, quæ sub ipsa, postque ipsam, generalis vulnerum historia docet. Consultum igitur mihi videtur, hanc Operationem haud ita promovere, ne forte temerarii nonnulli chirurgi eadem in humanam perniciem abutantur.

Jam ipsam sacci hydropici dilatationem examinemus.

1^o Sacci hi habentur tantæ sæpe molis, ut integrum ferme expleant abdomen, cohæreantque cum Peritonæo, & Visceribus abdominalibus. Apertura igitur lata, diuque servata aperta, poterit sacci quidem minuere profunditatem, vix vero ejus aut latitudinem, aut altitudinem. Ergo vasa liquorem in cavum faccum instillantia vix contrahentur; & quia prementis liquoris
refi-

resistentia ablata est, copiosius jam fundent humores suos : quæ ratio primaria est cur etiam post Paracentesin Hydrops longe citius quam antea recrescat. Etenim incipiente primum Hydrope, vasa in initio minima sunt, parumque transmittunt. Extendente se sacco, amplificantur & vasa illius. Quandiu magna est resistentia a liquidis sacco contentis, vasa lente, quavis sensim jam amplificata, novum liquidum stillant, adeoque primum Hydropem lente producant. Dum vero distentissimus faccus, humoribus evacuatis nullam in sua cavitate resistentiam habet, vasa amplissima vacuata, aliunde valide implentur, & intra mensem forte plus liquidi suum in faccum effundunt, quam triennii olim spatium. Igitur in dato hic casu corpus totum extenuetur oportet, derivatione humorum undique facta in cavum faccum. Sed & aer, vulneribus adeo perniciosus, latissima superficie vulnus, totumque hunc faccum alluens,

alluens, idque in Cacochymico corpore , putredinem brevi inducere potest.

2. Sacci hi & a me, & a claris, quos citavi, Autoribus , & a plurimis aliis, aliquando inveniuntur digitum, duosve digitos crassi: ita ut licet humor lato vulnere assiduo effluat, iidem tamen contrahere se nequeant. Unde vasa in faccum se evacuantia, si jam intus nullam resistantiam offendant, copiam certe longe majorem aquæ dabunt, cum diametro aucta maneant.

3. Iidem facci sæpius reperiuntur postica facie cohærere cum Intestinis. In his hominibus sensim ac lente comprimuntur Intestina, & tandem difficulter, & cum dolore, exonerant sese. Hinc male habent. Ubi vero faccus evacuatus est, idemque durus ac crassus est, Intestina illi nonnullis in plagis connata, vehementer dolere atque inflammari possunt, cum aquis sublatis minus pressa, liberius agant, moveantque sese, connata sacco duro tamen. Et hinc
forte

forte pro parte dolores illi , ac spafmi , quos primo a paracentefi tempore conqueri homines folent.

4. Neque crassæ duntaxat substantiæ nonnunquam hi facci sunt , verum etiam ingentibus obsita scirrhis ; ut iidem illi , quibuscum nunc agitur , fatentur autores. Scirrhi hi , præfente aqua sustinebantur , fulciebantur : jam vero iisdem elapsis , faccoque concidente , se mutuo fricant , dirosque minitantur Cancros.

Oggeret forfitan quispiam tum hanc , tum n° 3. allatam difficultatem , æque in paracentefi obtinere , quam in dilatato vulnere facci ; adeoque si ratiocinium hoc quid valeret , etiam paracentefin ultra instituendam non esse. Sed huic respondeo primò , Paracentefin in his desperatis casibus modo institui , ut certa alioqui pernicies procrastinetur. Secundo subitum aquarum a Paracentefi reditum hunc motum , hunc impedire affricum. Unde nullius vis hæc objectio est.

5. In

5. In ipsa hac dilatatione, quæ ad 3. 4. 5. digitos lata sæpe fieri debeat, oportebit sæpe ipsos transcindere faccos. Præterquam quod scirrhus sic vehementer irritetur, vasa sanguinea in scirrho magna, nec duris in his massis facultate se retrahendi gaudentia, hæmorrhagiam letalem producere poterunt ; quemadmodum Scirrhi & Cancri Mammarum toties ostendunt. Video equidem sapientem *Morandum* n° 8. testari :
„ Il m'est arrivé plusieurs fois de porter
„ le Trois-quarts dans ces masses (Skirreuses) il en sortoit du sang ; je reportois le Trois-quarts en d'autres points,
„ l'eau sortit, & il ne résultoit de la fausse ponction d'autre accident, que la douleur passagere d'une piquure. ” Verum primo, lata sectione longæ plures arteriæ perscinduntur, quam in punctura *Morandi*. Secundo, ipsa scirrhi natura docet ejusmodi puncturam haud semper impune patrari. Tertio in relatione hujus Autoris non notatur

tatur eas, quibus punctura talis inutilis facta esset, ad sanitatem rediisse.

6. Sæpius tumores reperire est in Mesenterio, in Hepate, in Ovario, in faccis ab ovario, aliisque visceribus, productis; qui, ut exempla allata docuere, peritonæo nullibi accreti sunt. Ita in binis nostris in Nosocomio scæminis, hydropico maxime abdomine nullus tumor percipiebatur, quia tumorem inter peritonæumque moles aquarum. Vacuo autem abdomine, & maxime recrefcere ceptis aquis, digiti aut pollicis distantia interesse clare deprehendebatur. Si hoc in casu lata plaga abdomen, faccumque perfcindam, effluent quidem ex utroque aquæ, ichor, sanies, pus, quodcumque demum in eodem continetur; sed ex sacco simul aliquid in cavum ventrem effluet, ubi ille evacuatus fuerit: & quandiu illa lata apertura patebit, semper plus in cavitatem peritonæi stillabit, quam extra illud, cum nulla hic adhæsiō sit. Porro
fi

si aqua pura exstillat, erit Hydrops perpetuus ventris; si liquor putridus, brevi abdominis ac pelvis viscera pessundabuntur, mortemque accelerabunt.

7. Nonne latum hoc abdominis vulnus inutile videtur, imo noxium, in Casibus n°. 4. Lit. G. & I. n°. 5. 6. 7. 8.?

8. Quod jam supra innui, si quis velit vulnus 3. 5. 6. & ultra, digitos latum, abdomenque penetrans, semper omni prorsum periculo carere; eique hoc per momentum concedamus; haud tamen illi concedemus Vulnus tantum, in Corpore cachymico & cachectico, ut ejusmodi homines passim sunt, vacare periculo. Vulnera in sanis periculo vacua, solent haud raro in morboſis periculum inferre; ut toties in Relationibus ad Judices Medici ac Chirurgi testantur.

Has utique nunc enarratas difficultates lubens fateor me hucusque impedivisse, quo minus optimorum Virorum *Acad. Reg. Par.*
tum

tum amplexus sententiam fuerim, tum executus : certiora prius observata, numerosioraque experimenta, in subsequenter Acad. Tomis, antequam imitari ausim, expectaturus.

Paracentesin interim præfero hucusque, quia in saccato Hydrope vitam alioqui suffocandam protrahit, & intolerabiles minuit anxietates. Si pluribus utriculis liquor contineatur, vix juvabit; sed neque tunc utilis incidendi methodus erit. Si Scirrhi adsunt viscerum, neutra methodo curabuntur, sed educitio aquarum per paracentesin Scirrhis minus nocebit, quam incidendi methodus, ut ad n°. 4. ostendi. Si vero unus alterve casus extat, in quo Paracentesin mors brevi sequatur, ut erat monstruosus ille hydrops pag. 82. oportet hosce desperatos cæteroqui existimare, ita ut etiam citra Paracentesin mors subsequuta fuisset. Porro agitur hic tantum de Paracentesi in cystico hydrope instituenda; si enim vera ascites est,

H

eaque

eaque recens, & corpus cæterum bene habet, paracentesis simul & semel Hydropem non raro curat integre.

Est nihilominus, ubi Natura ipsa exceptionem faciat, & abdominis latam aperturam indicet. Aug. 22. nos fœmina accersit, quæ 5. Junii pepererat. Hæc a dextro umbilici latere dolorem tempore graviditatis perceperat, a partu vero tuberculum; quod sensim crescens tandem in tumorem durum abiit, qui plusquam 5. pollices utraque diametro referebat, eo dolentior, quo mole majorem. Utrumvis in latus illa decumbebat, hic tumor plane immobilis erat, peritonæo proximus, & verosimiliter eidem accretus. Mensibus a partu carebat. Apposui emolliens atque discutiens cataplasma, remediaque solventia interna præscripsi; attentus in eventum, quem tumor hic dolens, nullam febrim comitem habens, esset habiturus. 29. Aug. dolor, tumor, rubor, externo jam abdomine obser-

ab-

tur;

tur; quare emolliens, & maturans cataplasma adhibitum est. Postera die, copioso pure fluctuante, apertura lanceola facta est; exivit puris dimidia libra, ut & die sequenti, reliquis quidem diebus minus, quo tempore deligabatur vulnus, sed continuo tamen hucusque pure locus totus madet. Injections cum aqua hordei & melle bis die fiunt, & aperturam, sat latam, diutissime apertam servare animus est. Tumor minuitur, totusque emollescit. Dolor vix observatur. Stylus ductilis reperit faccum undique clausum, sed sensibilissimum. Hic nunc casus est, Natura monstrante viam, in quo *Parissima* Methodus juxta perpetuas Naturæ leges usui veniat; alias ineluctabilibus difficultatibus, ut mihi saltem videtur, plena.

§. IV. Superfunt quædam Problemata solvenda. I. Quid causæ, quod facta Paracentesi sæpe longe citius renascatur Hydrops, quam primum natus esset? Re-

spondi jam pag. 107. ad hanc quæstionem. Ponamus Hydropem cysticum primum nasci in parva cujusquam visceris Hydatide. Lente admodum Membrana continens a mole minima in majorem extenditur, ut femianno, biennio, quadriennio, decennio, & quod plus est, indigeat, antequam verum referat Asciten. Facta jam paracentesi Membrana maxima, intus cava, Lymphaticis osculis pertusa millenis, mox de novo repleatur necesse est; cum nulla intus resistentia sit, & in inania spatia humores undique veluti attrahantur.

II. Undenam Hydropici aquam nonnunquam citissime colligunt? Ita ut a Paracentesi elapso vix octiduo nonnulli 50. Libras aquæ recolligant, interea temporis vix potantes? Idque ad singulas paracenteses? Cur in relatis Historiis vix poti homines, singulo mense 100. Libras paracentesi evacuarint?

Cum neque ore liquor corpus intraverit,

rit, neque ipso corpore suppeditari potuerit, necesse est ipso in aëre causam quæri. Adverterat sua in Chemia Clarissimus *Boerhaave* aëra, etiam ficcum, aqua saturum esse, inde corpora humescere, & si apta, quæ veluti attrahant, corpora inveniat, aquam inibi deponere suam. Ita Cap. de Theoria Aëris, explicans quomodo uncia una salis tartari ficcissimi tandem uncias quatuor olei tartari per deliquium, aëri tantummodo exposita, exhibeat; credit 1^o hoc fieri vi, ut dictum est, attractrice inter aquam aëris, & alcalinum sale. Vel 2^{do} ex eo quod in loco quieto, clauso, subterraneo, ubi hoc experimentum fiebat, aër perpetuo moveatur, & sic suam aquam successive ad salem adplicet. Vel 3^{tio} ex eo, quod aquæ partes ita moveantur per aëream molem, ut jam in hac, jam in alia parte spatii aërei sint, atque ita tandem omnes concurrant cum illo sale, qui intra hunc aëra est positus. Addit demum:

„ Verum credibile est omni de genere Ex-
 „ perimentorum, quod omnes illæ causæ si-
 „ mul concurrant ad eundem effectum pro-
 „ ducendum. Ne quis autem credat experi-
 mentum in humido subterraneo aëre modò
 succedere, haud vero in ficcissimo, addidit
Boerhaave experimenta ficcissimo hyemali
 aëre facta, quibus evicit etiam ultra tertiam
 ponderis salsi accrevisse spatio 14. dierum.

Quæ cum ita se habeant, credibile ad-
 modum Hydropicis corporibus latentem
 dispositionem inesse, qua aëris aquam con-
 tinuo imbibant. Et si intra paucos dies ex
 ficcissimo sale tartari nascatur oleum tarta-
 ri per deliquium, id est, si sal tartari
 ex aqua aëris tribus quartis partibus
 pondere intra paucos dies crescat; haud
 ita mirabimur hominem 150. Librarum,
 paucos intra dies, Libris 50. & pluribus
 graviolem fieri, & nova paracentesi toti-
 dem aquæ Libras emittere, licet toto eo
 tempore vix liquidi quidquam hauserit. An
 facci

facci hydropici post paracentelin Vacuitas in omnibus aquam aëris attrahat, & sic una cum data antea causa hydropem renovet actutum? Intelligitur hinc humida Atmosphæra, humidis ædibus, Hydropem in Prædispositis nasci facilius, renascique.

III. An credendum cum doctissimo *Bianchi* quod Bilis defectus causa Hydro-
 pis sit, aut ejusdem saltem effectus? Ita
 nempe egregius vir scribit Hist. Hep. pag.
 147. „ Pallida igitur occurrit *ordinario* ad
 „ Cystin suam Bilis in Delicatulis, in
 „ Chlorosi, pallidior in Cachexia, fluxi-
 „ busque Cæliacis, *pallidissima*, & fere
 „ absque ulla flavedinis tinctura, ac tantum
 „ non aquea, in Hydrope, aliisque morbis diu-
 „ turnis, in quibus sensim deperierit emica-
 „ tio in sanguine: in hisce *interdum* affectio-
 „ nibus albescens observatur, & candida;
 „ ut vidit *Diemerbroeck*. ” Quantum ad
 bilem inspidam. „ In Cachecticis, ait p.
 „ 170. præcipue mulieribus, aliisque len-

„ te ægrotantibus, delinquentem hoc ritu
„ bilem *ordinario* videmus.

Antequam respondeam, examinandus est, qui ex *Diemerbroeckio* hic laudatur textus. Est ex ejus Anatome, ubi de bile agit. Invenit bilem Vesicæ post diuturnum Hydropem candidam, & utcumque viscidam. Hucusque res convenit cum observatis Cl. *Bianchi*: sequitur vero aliquid quod non convenit; nam ex Ductu Choledocho, & ex Poro Biliario, Bilem flavam versus intestinum fluentem vidit.

Ergo 1^o *Diemerbroeckii* experimentum in Hydropico factum id quidem confirmat, quod de Cystica bile *Bianchi* refert, non vero demonstrat idem, quoad Hepaticam bilem: Bilis verè flava Hepate secreta, ad intestina fluxit. Potuisset hic homo ictericus fieri, sine ulla vel minima flavæ bilis guttula in Vesicula.

2^{do}. Hoc ipso experimento intelligitur hominem & ictericotatum posse fieri, & simul

mul flava reddere alvi excrementa. Si enim ponamus hominem sanum quacumque causa obstructione in ductu cystico nata reddi ictericum, bilis flava ex poro hepatico ad duodenum fluens tingere excrementa debet.

3^{to}. Hoc eodem experimento concludimus in ictero, dum albæ fæces sunt, vel nullam bilem secerni hepate, & vesicula, vel obstructionem esse in Ductu communi, aut ad Duodenum.

4^{to}. Itidem inde apparet Hepaticam bilem in Cystim non influere, ut communiter creditur, sed totam in Duodenum abire. Neque suspicio hic haberi potest angustioris forte cystici ductûs; cum Autor dicat miratum se illius amplitudinem fuisse. Unde recte judicat Cysticam bilem peculiari fabrica tunicæ internæ Vesiculæ generari, stagnatione perfici; defectu tamen ejus flavam bilem Intestina subire, excrementaque tingere posse. Certe si pulcerri-

ma *Liberkubniana* Præparata, Microscopiis inserta, quæ Ill. *Baro van Swieten* Academiæ nostræ dono dedit, attente contemplerur, convincimur mirabilem hujus tunicæ structuram magnis usibus necessario destinatam esse. Unde cum eodem Ill. Viro, *Cap. de Hepat.* fatemur, quod „artificio summo, & penitus peculiari reptatu, arteriæ numerosissimæ decurrunt, per membranas vesicæ felleæ, uti injectiones anatomicæ docuerunt; unde admodum verosimile videtur peculiarem adeo vasorum apparatus servire hic singularis liquidi præparationi & secretioni.

Hæc nunc de *Diemerbroeckii* testimonio in quantum firmet, & non firmet Cl. *Bianchi* sententiam.

Probatur etiam *Ruiscbii* observatione, n°. 87. invenientis in cadavere Hydropici Hepar induratum, vesicam felleam sextuplo majorem naturali, sed aquosa plenam, insipidaque Lympha; in ductu vero Chole-
docho

docho calculum ciceris majoris magnitudine, omnino obturantem hunc meatum.

Convenit etiam *Bianchi* sententia cum nonnullis meis observatis.

Anno 1744. Junii 30. cum doctissimo *Velje* bimestris infantis cadaver lustrans, vesiculam felleam inveni turgidam valde, sed humore plane aquoso plenam, gustu amaritiam vix ullam referente. Post hydropem pectoris, acidum terribile, copiosamque pituitam vitream, perierat infans.

21. Dec. 1758. idem in Nosocomio publice demonstravi in cadavere Hydropici, cujus Hepar granulofum totum. Ter ego, pluresque adstantium, aquosum vesiculæ liquorem gustantes, ne minimum quidem percepimus amarorem. Nec pellucidus insipidusque modo liquor, sed gelati instar tremulus fuit, & cohærens. Portio ejus igni in Cochleari exposita nihil coagulabatur, sed avolabat in auras, tenui pellicula relicta: portio alia syrupum violarum viridem fecit. Igitur

Igitur plures casus dantur quæ idem , quod *Bianchi* voluit , posuitque , confirment ; at vero sæpe contrarium obtinet. Dedita opera rem examinans bilem flavam , amarā , pluries in Hydropicorum cadaveribus inveni , demonstravi. In Tympanitico puero , cujus morbum à defectu bilis pag. 60. deduxi , demonstravi tamen bilem vesicæ flavam , amarā , postea recrevisse ipso cachectico ejus statu. Et in *Diemerbroeckii* enarrato casu , licet cystica bilis pallida esset , aderat tamen hepatica flava. Equidem Anonymus autor in *Act. Edimb. Tom. I. Diss. 33.* statuit Hepaticam Bilem blandum humorem esse , qui parvam biliosarum particularum copiam modo haberet : ita quidem , ut dubitet num , a bile hepatica retropressa , tum profunda flavedo , tum penetrantissima amarities , tum quævis alia , quæ subito in Ictero adparent , symptomata , proficisci queant ? Attamen plus simplici vice bilem pori hepatici demonstravi flavam
admo-

admodum , gustuque perquam amaram : licet cysticæ flavedine , amaroreque , cedentem. Quis noverit an , bile cystica pallida , non frequentior contingat *Diemberoeckii* observatio? Saltem meam ejus examinandæ negligentiam in posterum emendabo.

C A P U T IV.

DE

COXARIO MORBO.

§. I. *Varia de Coxarum morbis. Cur nati hi externis de causis dubiam haud raro Diagnosin habent ; imo cur eodem in morbo juste data Diagnosis , postmodum falsa reperitur. Insignis morbi varietas demonstratur exemplis.* §. II. *Nec certior sæpe , constantiorque , ejus Natura adparet, dum internis solis , vel mistis simul internis externisque de causis , profiscitur.* §. III. *Notabilis casus juvenis feminae id demonstrans.* §. IV. *Examen quæstionis , num Coxendice affecta , tumida , præsentem testata materiem , ampla apertura facienda sit ? Negatur in genere , & in specie.*

cie. §. V. *Examen Doctrinæ Hippocratis de Coxarii morbi natura, eventu, cura; eaque occasione multorum ejus textuum expositio.* §. VI. *Curatio sequentibus Hippocraticum ævis celebrata, enarratur, discutitur.* §. VII. *Ratio eur Articulo Coxæ affecto multi non curentur? Imo cur plures inde pereant? Phthisis ischiadica.* §. VIII. *Laus Corticis peruviani cum Lactea diæta, desperatis aliquando in rebus vitam, sanitatemque, resituentis, conservantis.*

§. I. **P**ermultæ sese obtulerunt in Nocomio occasiones Coxarum morbos cognoscendi, quarum rationem jam dedi in singulis *Tomis Rat. Med.* Cum vero frequens admodum morbus sit, novas Observationes addam, quibus latens sæpe obscurusque morbus clariorem sui Diagnosin postmodum præbere, tutiusque curari possit.

Multum sæpe & acriter utrinque disputari solet, quando femur post casum laborat, sitne os femoris luxatum tantummodo, an fractum? Et si fractum, utrum ad Epiphyisin, an in cervice? Vel an in Luxatione

tione frangatur Ligamentum teres, an vero possit sufficienter extendi, ut os aberrans sequatur? &c. Non est hujus loci ea enarrare quæ *Petit*, *La Motte*, *Heysser*, alique, ad varios hos defectus internoscendos pulcra scripserint. Tractatum Chirurgicum non scribo, sed casus medico-chirurgos in Nosocomio, & alibi, mihi observatos, duntaxat communico. Hinc dixisse sufficiat vario admodum modo hæc se habere: ita ut 1^{mo}. Cervix frangatur, ossis capite in acetabulo manente. 2^{do} ut frangatur Epiphysis, & ab osse solvatur; maxime in junioribus: non tamen ita semper. 3^{tio} ut os femoris integrum luxetur, fracto ligamento tereti. 4^{to} ut illud luxetur, hoc elongato, sed integro. 5^{to} ut ipsum caput ossis cum acetabulo morbose uniatur, & perfecta fiat, eaque immedicabilis, Anchylosis.

In puero decenni, robusto, luxationem introrsum, deorsum, factam, perfectissime restituiimus; sed quo nobis curæ integritas pate-

patesceret, diuturno eum tempore in Nofocomio fervavimus. Licet forte rariore casu ligamentum fractum uniri denuo, elongatis utrinque fibris ligamentosis, possit, probabilius tamen est huic puero luxationem integro osse, integroque sed elongato, ligamento tereti, contigisse, cum debitus, ac constans articuli motus tam cito adfuerit.

Puer sex cum dimidio annorum sub ludibundo pedum exercitio dolorem percepit ad coxam dextram, cui brevi post tumor accessit. Trium aut forte quatuor mensium spatio hæc ita perseverarunt, absque eo, quod crus longius, breviusque, adparuerit. Deinde vero ad duos circiter digitos latos brevius redditum est. Vix septem mensibus ab origine morbi elapsis, diarrhæa, febre, convulsione, periit. In cadavere vidimus caput ossis femoris ad crepidinem superiorem acetabuli locatum. Ligamentum teres omnino desiderabatur. Tumida admodum glandula in cavo acetabuli, ut
caput

caput ossis femoris intra illud excipi ultra non posset. Mira igitur contorsio, & inde nata inflammatio primum adfuisse videtur, cum subsequente degeneratione *Haversiani* smegmatis, cum erosione atque consumptione tum ligamenti teretis, tum ligamenti dicti ad teretem accessorii, ex cavo acetabulo enati. (vide *Schwencke* Obs. de Lig. c. os. fem. connectente interno, ad finem *Hist. Sang.*) Unde demum caput ossis femoris ex Cotula trudi ceptum, crus sensim brevius redditum, & integra, sed extensa adhuc Capsula, idem caput ossis ad superiorem cavi acetabuli marginem applicatum.

Similem historiam in Nosocomio vidimus puellæ 16. annorum, quæ quatuor annis dolorum in coxa prægressis, utroque cum crure æquali, tandem incepit crus brevius habere, ita ut nunc ad tres digitos latos altero brevius sit.

Meritissimo ergo jure egregius *Petit*, postquam semel hinc deceptus fuisset, scri-

plit *part. I. morb. off. cap. 12.* integram luxationem natam se invenisse, ubi bimestri ante spatium signa evidentissima articuli duntaxat læsi, haud vero luxati, affuissent. Videtur eodem præcise modo id *Petito* contigisse, quo nobis nostris in casibus visum fuit.

Sed & aliud in Nosocomio observavimus. Puer duodecennus, a teneris claudicans, alio morbo mortuus, exhibuit nobis caput ossis femoris suo cum acetabulo firmissime unitum; ita ut videatur a casu, aliave violenta causa, semel nata contusio, inflammatio, suppuratio, erossisse tam caput ossis, quam cavum acetabulum: unde demum effectum, ut ambo hæc in unum corpus penitissime coaluerint. Genus igitur peculiare claudicationis, ab Anchylosi ortum, quale quid etiam *Petito*, ad finem mox laudati capitis, contigit. Simul aderat ossis Ischii versus interiora degeneratio; multum enim ibi eminebat in loco acetabuli.

Con-

Concludimus ergo in affectionibus ossis femoris, & articuli coxæ, a causis externis ortis, Diagnosin sæpe plurimum difficultatis, incertitudinisque habere; tum & inconstantem eandem ideo esse, quod lapsu temporis affectionum harum tota natura mutetur.

§. II. Verum non minorem ambiguitatem sæpe infert hujus Articuli affectio, quam vel causæ mere internæ, vel internæ cum externis combinatæ, produxerint. Mala nempe plurima hunc articulum occupant. Levior contusio, quæ forte sine accedentibus internis causis non nocuisset; Communis inflammatio; Diathesis arthritica, rheumatica, scorbutica, venerea; Metastases denique, morbos varios, teterrimosque, circa hunc locum frequenter generant. Multa exempla dedi *Rat. med. part. 1. cap. 7. pag. 129. part. 2. cap. 2. pag. 9. & ibid. cap. 8. pag. 131. Et part. 3. toto capite 5.* Hisce novam observationem adjungam, totum morbum dein dogmatice tractaturus.

§. III. Puella 14. annos nata, spatio 7. septimanarum laborans febre intermittente, aut continua remittente (id enim ex ejus enarratione ambiguum manet.) emetico tandem dato, febre liberatur; toto interea corpore intumescens, & pellucidis, ad supernos infernosque artus, vesiculis plena. Quibus citra aperturam evanidis, mansit tumidissima. Diureticis tamen & purgantibus inde ita curabatur, ut domesticos repetere quidem labores posset, sed tamen cum difficultate, ac lassitudine perpetua, utque testetur bona valetudine nunquam deinceps se usam fuisse. Transegit sic triennium. Postquam tumorem observare cepit ad externum latus femoris dextri, digiti circiter longitudine a crista ossis Ilei, versus os sacrum, & sesqui digiti longitudine exinde deorsum versus, supra Glutæum magnum. Dimissus sibi tumor sex integris mensibus, cataplasmate dein fatus, emollitur, sponte aperitur, funditque puris ferique multum, trime-

trimestri spatio ; tandem adperso ignoto sibi pulvere coaluit : sic tamen, ut perpetuo doluerit locus , ipsaque postliminio in eundem incumbere non potuerit.

Catamenia ipsi, 17. annum ætatis agentis, observari cepta, continuarunt quidem, sed & parce, & quovis alterno, tertiove mense, tantum.

Notandum porro est quod, ante tumorem primò perceptum, iratus Pater, magna vi, grave magnumque ligni frustum in illam , ab eo fugientem, projecerit, femurque dextrum percusserit, contuderitque. Quod equidem utrum immediate ante perceptum dolentis loci tumorem, an dudum antea, contigerit, haud bene meminit. Ita ut dubium supersit, sitne tumor ex relicta Cacochymia natus, an contusione? Alteram forte causam altera promovit.

Annos 19. nata, novum percepit antiquo loco dolorem , qui ignoto emplastro adposito ruptus, similem, ut olim , mate-

riem dedit. Novembri mense 1758. ann. 20. attingens, tumorem deprehendit in medio postico femore sibi nasci, findi, purisque copiam magnam ad medium Decembrem usque effundere.

Anno 1759. Jan. 5. primùm me convenit, exhibens ulcera duo; unum loco superiore antea descripto, alterum in medio postico femore. In hoc stylus ultra pollicis geometrici profunditatem fere perpendiculariter intrabat; in illud, pollicis medii. Os utriusque angustissimum, ut vix stylum admitteret: decursus totus fistulosum in profundioribus ulcus testabatur. Vagæ febres aderant.

Diagnosîs incerta. Probabile erat Cacochymiam antiquam, contusione externâ ad femur determinatam, tumorem produxisse; vel si tumor dudum præextitisset, eum contusione auctum fuisse. Quid autem proprie, quave ratione, læsum hic esset, signa non indicabant. Attamen cum omnibus suis ærumnis recta adhuc incedebat. Ut

Ut Diagnofis incerta, ita ambigua prognofis. Ut enim Tomis hujus operis anterioribus demonftratum eft, dum ad profunda Coxæ, Femorisque, ejusmodi dolores, ac tumores, dudum hæferunt, interiora paffim deſtructa ſunt, aut vehementer faltem læſa, antequam materies prorumpat foras. Ex quo id contingere ibidem conſtitit, ut Arte poſtmodum aperturam faciente, aër accedat, & homo pereat. Attamen rem ſe non tam deſperate habere ſemper, imo conſequi ſalutem poſſe, etiamſi interna jam pro parte eroſa eſſent, felicia quædam exempla *Rat. Med. Part. 3. cap. 5.* enarrata demonſtraverant.

§. IV. Indicatio in hujusmodi calamitatibus parvam facere aperturam jubet : *aperturam* quidem, ut materies interiora peſſumdans foras alliciatur, expurgarique locus poſſit; *parvam* vero, quia aër multum accedens, citiore corruptione accelerare mortem ſolet. Unde aperturæ hæ &

raro, & cautè deligandæ sunt ; hic porro cum parvam aperturam Natura fecisset, de alia facienda, eademve dilatanda, cogitandum non erat.

An tamen latior apertura, arte facta, non præstitisset, præ fistulis hisce binis, quæ sponte natæ tantillum modo de mali scaturigine auferrent ?

Neutiquam. Primò repetita toties experientia nos, aliosque, nocumenta latioris aperturæ sæpe docuerat. Secundò styli sensim profundior, atque ad os demum fere penetrans ingressus, vetabat certe omnia hic perfcindere ; Vaginam femoris, Glutæum maximum, Bicipitis Cruris caput longum, sub eoque Nervum Ischiadicum, tum Arteriam venamque insignes, quæ ex magno trunco Arteriæ ac Venæ Cruralium mox antè, in inguinibus, oriuntur, deinde ad posteriora femoris penetrant ; tandem & Semitendinosum. Præterquam quod Vasa insignia ex Cruralibus sese per Ad-

du-

ductores magnos femorum penetrantes, supraque eosdem decurrentes, hic lædi possent. Anno 1756. Vexillifer in Nosocomio, suppurato femore, & crure, indigebat ad medium femur posticum apertura. Ramus autem adeo notabilis ibi decurrebat, ut sistendæ hæmorrhagiæ vix pares essemus. Metus igitur Hæmorrhagiæ, Convulsionis, Claudicationis, dilatare hic late profundeque, omnino vetuit.

§. V. Quid ergo in ejusmodi malis, ubi a causis sive internis, sive externis, coxa, viciniaque ejus, afficiuntur, agendum?

Lex Nosocomii nostri immutabilis est Medicinam Hippocraticam facere, *Hippocratem* in omnibus, maxime autem in difficilioribus, consulere, consultum sequi; nisi posteriora observata, quod tamen rarius, illum jam correxerint, & emendarint. Erat igitur denuo specimen juventuti Medicæ dandum, quo caperet, qua lege Hip-

pocratis mentem investigare , vestigia premere , deberent.

Occurrebat 1°. Aphorismus 31. sect. 4. *Τοῖσιν κοπώδεσιν ἐν τοῖσι πυρετοῖσιν* „ Lassis ,
 „ fatis per febres abscessus maxime fiunt
 „ ad articulos & circa maxillas. „ Quotidiana quippe observata docent his , qui a morbo febrili , aut acuto , haud rite judicantur , lassitudines manere , sensumque gravitatis ; a materia , quæ vel admodum morbosa , vel saltem a sanitate aliena in corpore oberrat , cum reliquis circumfertur humoribus , & per multa vasa minima penetrare se nequit. Hæc ipsa materies , quavis nonnunquam febres , sive inflammatorias , sive hæcticas , letalesque , producat , sæpe tamen ad Parotidas , Coxasve , aut ad alias partes , metastatice deferitur. Incertum porro , quandiu hæc sit oberratura in corpore materies , antequam ad loca certa deponat sese. Incertum etiam an non eos affectura sit locos , qui affecti , vel partium
 quæ

quæ afficiuntur, vel totius corporis, inferant perniciem. Possè nonnunquam diu humoribus mistam manere, cumque iisdem circumduci, & experientia pluries in Nofocomio docuit, & peculiariter de Metastasi ad Coxam observasse *Celsus* videtur *Lib. 4. Cap. 22. de Coxarum Morbis*: „Eoque id genus, inquit, difficillime curatur, quod fere post longos morbos vi pestifera huc se inclinat: quod ut alias partes liberat, sic hanc ipsam quoque affectamprehendit.

Attamen in hac incertitudine *Hippocrates* indefatigata sua observandi industria eo pervenerat, ut præsciret an non brevi tempore oberrans hæc materia ad certo determinatam partem adpelleret? *Aph. 32. Sect. 4.* „Quibus ex morbo resurgentibus, aliquid dolet, ibi abscessus fiunt. Materies quippe ad certam corporis regionem deferri cepta, quæque per minima ibidem vasa se penetret inepta, extendit eadem, ner-

nervos subiectos , interpositosque premit ; hinc tunc perceptio doloris. Porro dolor ille , descripto rerum in statu , innuit huius impulsione primordia poni , adeoque futurum monet ibidem abscessum.

Imo in his lassitudinibus post febres relictis , locum ipsum prædefinire , etiam ante natos dolores , audebat *Hippocrates* , Aphor. 33. sect. 4. „ Sed etiam si quid doluerit „ ante morbum , ibi se figit morbus „ Etenim si homini pars quæpiam ante morbum doluerat , bona Crisi ea quoque sanescebat : Crisi vero imperfecta prægressa , timendum nunc erat , ne hæterogenea materies , lassitudines post febres efficiens , eum peteret locum , qui ex antiquiore dolore jam obstructus , hincque debilitatus , crassiori morbosæ materiæ transitum necessario denegaret.

Sic. *Epid. 7. Sect. 7. apud Foës. pag. 1193.* morbos circa brumam ortos describens , Tusses nimirum , Peripneumoniam , Anginas

nas variæ speciei , & Paraplexias „ Angi-
„ næ autem , inquit , & Paraplectica mala ,
„ aut dura & ficca erant ; aut parva , &
„ raro maturum eduentia. Nonnullis ve-
„ ro etiam multum educebatur. Qui ergo
„ plus voce male habebant , aut rigore
„ corripiebantur , iis tusses in Anginas
„ potissimum desinebant. Qui vero ma-
„ nu ægre habebant , manibus tantum
„ resoluti fuerunt. Qui autem equitarunt ,
„ aut plurimum viæ confecerunt , ἢ αλ-
„ λοτι τοῖσι σκέλεσι ταλαιπωρήσαντες , τε-
„ τέρισιν ἐς ὁσφύν , ἢ σκέλεα , ἀκρασίαι πα-
„ ραπληγικαὶ , aut alioqui cruribus male
„ habuerunt , iis Lumborum , aut Crurum
„ impotentia ex resolutione obortæ sunt ,
„ & ad femora tibiasque lassitudo ac dolor.

Epid. 4. pag. 1132. „ *Apermanti* foro-
„ ris filius tumida præcordia , & Lienem
„ habuit. Crebra spiratio erat , alvi ege-
„ stio glutinosa , & biliosa , quibusdam
„ excrementis permistis. Κοπιώδης ἐξ ἔρ-
„ γων ,

„ γων , cum ex opere defatigatus esset ,
„ 20. die abscessus in pedes decubuit , id-
„ que ex judicatione , qua delassatis ejus-
„ modi , non ad oculum verbi gratia , sed
„ ad articulos , abscessus decumbat.

Idem observaverat in aliis generis me-
tastasis , v. g. iis , quæ , post immanem
tussim cessantem , partes paralyticas redde-
rent , Epid. 4. pag. 1138. „ In tussienti-
„ bus iis quidem , qui manibus laborabant
„ (male habebant) velut *puero* , qui sar-
„ menta contorquebat , & *Amynthæ* filio ,
„ ubi utrisque solius dextra resolutio con-
„ tigisset , cessabat tussis : postquam enim
„ tussiverant , hac affecti sunt. Qui vero
„ aut equitarunt , aut pedibus iter fece-
„ runt , in Lumbis & Femoribus eam sen-
„ ferunt.

Itaque , secundum *Hippocratem* , Juven-
culæ nostræ ideo ad Coxam materies decu-
buit , quod suo in famulatu pedibus , unà
cum toto corpore delassatis , multum ute-
retur ;

retur; quodque etiam contusio ad eundem locum contigisset. Atque hæc de Hippocratica Diagnosi ac Prognosi: examinanda jam ejus curatio est.

Epid. 4. pag. 1127. „ *Moscho* nono
„ die largus ex nare sinistra, paucus au-
„ tem ex dextra, sanguis effluxit. In 14.
„ diem, prout debebat, judicatio ab ini-
„ tio commovebatur. 17. die errata in
„ ciborum ratione contingebant. 19. no-
„ ctu enatum est ad aurem dextrum tu-
„ berculum parvum, intus durum, fo-
„ ris paulum molle, dolorem inferens, nec
„ remittens. Purgatione rejecta sunt ad-
„ modum biliosa, purulenta, sepiæ atra-
„ mento maxime similia. Neque fecus,
„ ac is, cui admota cucurbitula, cum do-
„ lor ad Coxendicem esset, in crus des-
„ cendit, allevatus est.

Nimirum *Moschus* acuto morbo commu-
ni laborabat, quem dies 14. pro parte ju-
dicaturus videbatur, atque dies 17. integre
forte

forte judicasset , nisi Diætæ errores hanc Naturæ intentionem & conatum interturbassent. Hinc die 19. forte finiente , aut 20. inchoante, Metastasis pone aurem contingebat ; haud tamen cum totius morboſæ massæ eo versus determinatione , siquidem constet ejusdemmet portionem intestina petivisse. Attamen *Hippocrates* curam hujus Metastaseos eodem modo perfecit , quo ejus , qui metastasin patiebatur ad Coxam ; nempe Cucurbitulis.

Et pag. 1128. „ *Qui ex figulino equo*
„ *decidit* , cui nec ilico admota est cucur-
„ bita , ἐκάλυθον ἔστω , intus uſus est , ac
„ die 20. malum recrudit : sanguinis
„ profluvia , feculenta , & erodentia , pro-
„ dierunt.

Epid. 5. pag. 1143. „ In Oeniadis
„ *Eupolemus* Coxendicis & Inguinis dolore
„ conflictabatur , ut & in toto loco propin-
„ quo Coxæ juncturæ , ab inguine , & an-
„ teriore coxendicis parte. Huic sanguis

ex

„ ex malleolo detractus est , admodum
„ multus, nigerque idem, & crassus : epo-
„ to autem medicamento alvum deorsum
„ purgante, multum purgatus est, & me-
„ lius quidem ei aliqua ex parte fuit.
„ Dolores vero non cessabant , sed tum
„ Coxendicem, tum illius juncturam, tum
„ Cochonam” (Cochone est illa pars tota
superioris femoris anterior, posteriorque ,
quæ est a crista Ilei & Pube, usque ad ex-
tremum Tuber ossis Ischii, cui infidemus.
Vid. *Goræum in Def.* & *Foëf. in Oecon.*)

„ tum etiam inguinis loca , suppuratio
„ occupabat , ibique dolor erat intensior.
„ Pus autem os, potius quam *carnem*, per-
„ vadebat , & aliquandiu sic se habere
„ ignorabatur , donec admodum debilis
„ extiterit.

„ Tandem Cruftis valde multis, iisque
„ magnis ac densis , inustus est , pusque
„ multum & crassum effluxit , ac paucis
„ post diebus interiit ; tum ex ulcerum

„ magnitudine & multitudine, tum ex cor-
„ poris debilitate. Hic videbatur fanari
„ potuisse, si unica ampla sectione sectus
„ fuisset, & si per eam sectionem pus ef-
„ fluxisset : aut si altera sectione opus
„ fuisset, amplam eam facere : & hæc
„ omnia ἐν τῇ ὥρῃ, idoneo suo tempore,
„ instituere oportuisset.

„ *Lyconi* in *Oeniadis* in reliquis quidem
„ eadem contingere, dolores tamen ad crus
„ non admodum pervadebant, neque pu-
„ rulentus extitit, verum sanus longo in-
„ tervallo. Medicamenta autem ebibebat
„ (φάρμακα, medicamenta purgantia) &
„ cucurbitulas admovebat, sanguis mitte-
„ batur, atque interea melius habere vi-
„ debatur.

„ *Larissæ Scamander* Coxendicem sy-
„ deratam habuit, ἰσχυρὸν ἐσφακέλισε, coxen-
„ dicem sphacelatam habuit, & os diu di-
„ sparatum. Hic post magnam sectionem,
„ etiam usque ad os ipsum factam, deni-
„ que

„ que iniustus est , ac tum 12^{mo}. post se-
 „ ctionem die convulsio cepit , ac magis
 „ detinuit. Convulsione autem tentabatur
 „ crus ipsum ad latera usque , quæ ad al-
 „ teram etiam partem perveniebat. Crus
 „ autem contrahebatur & extendebatur ,
 „ cæteraque membra movebat , & maxillæ
 „ riguerunt. Hic octavo post convulsionis
 „ insultum die convulsione periit. Utri-
 „ culis vero concalescentis , ex orobis , er-
 „ vis , ad curationem totum corpus fove-
 „ batur , & ab enemate paucum stercus
 „ tandem prodiit. Medicamentum sinceram
 „ bilem affatim deturbans , *φαρμακον κατα-*
 „ *κορῆς* , bibit , & repetivit. Ac secessit
 „ quidem alvus , nihil autem opis inde tu-
 „ lit. Somnus parvus venit. Rursusque
 „ epoto sub vesperam valido medicamento,
 „ sinceram bilem affatim deturbante , sub
 „ ortum solis mortuus est. *Ἐδόκει δὲ ἂν*
 „ *πλείονα χρόνον διενεγκεῖν , εἰ μὴ κατὰ τῆ*
 „ *φάρμακα τὴν ἰσχὺν*. Videbatur autem lon-

„giore tempore morbum laturus fuisse,
„nisi propter violentiam remedii periisset.

§. VI. Ex his cunctis liquet summam horum malorum curam Priscis in eo positam fuisse, ut internis externisque auxiliis materiem a coxa revellerent. Ac primo quidem sectio & ustio frequenter adhibebantur, spemque curæ ipsis semper magnam videntur fecisse. Ita ut quemadmodum pag. 146. animadvertebamus, mortem *Eupolemi* adscripserit *Hippocrates* debitæ, ac tempestivæ, simulque profundæ sectioni, neglectæ. Itidem legimus pag. 1151. *Hippocratem Cyrenii*, & *Hecasonis* mortem, tardius factæ inustioni adscripsisse. Imo utrumque hoc extremum remedium simul adhibitum fuisse docuit *Scamandri* mox data historia. Sectionem unam, latam, amplam, quandoque pluribus parvis prætulisse magnum virum, casus *Eupolemi* manifestat. Sed simul partibus jam sphacelatis hanc methodum non profuisse, nimia jam facta internorum destructione, antequam

tequam malum foras se verteret, *Scamandri*, aliorumque exempla, luculenter demonstrant.

Sectiones itidem hæ, atque inuisiones, leguntur quidem ad os usque factæ, at in sphacelo tantum, ubi vel nihil, vel profundissime secandum esset, & ubi mors cæteroqui certissima instaret. Cæterum amplæ ac latæ, haud vero nimis profundæ, instituebantur, & a subsequantium sæculorum Medicis institutæ leguntur.

Hinc *Celsus Lib. 4. cap. 22.* inuisionem duntaxat superficiariam commendare videtur: „Ultimum est, inquit, (& in uteri „ morbis quoque efficacissimum) tribus „ aut quatuor locis super Coxam Cutem „ candentibus ferramentis exulcerare.

Equidem legitur *Hippocrates Lib. de int. aff. cap. 53.* apud *Chart. tom. 7. pag. 677.* jubere Ischiadicis „ πολλὰς ἐσχάρας, καὶ „ ἑαδεῖας καὶ ὅσας, escharas & multas, & „ profundas, inurere; „ sed ideo profunditatem ad os usque intelligere non vide-

tur. In obesis certe potest profunda ustio esse, quæ tamen adipem vix omnem penetret. Imo os ipsum vitari oportere laudato mox loco innuit *Hippocrates*, jubens „Es-
„ charas multas profundasque inurere in
„ osseis quidem partibus fungis, *μύκησι*;
„ in carnosis vero, ferramentis.„ Et alio
hujus libri loco jubet inuri modo Lino crudo.

Prosper Alpinus Libr. 3. de Med. Aegypt. cap. 12. innumeras Ægyptiorum curas, cauterio plurimis in morbis peractas, enarrans „Hinc mirum, inquit, non est,
„ si prospere hoc remedium in omni-
„ bus articulorum doloribus, curatu diffi-
„ cilioribus, experiuntur; potissimumque
„ in Coxendico dolore multas ustiones,
„ non modo supra articulum, sed etiam
„ supra femur, facientes.„ Gens porro illa, ut idem refert, inustiones facit Gossypio, linteo involuto, filis cericis compresso, in conum formato, perpendiculariter perforato, cujus coni perforati basin
loco

loco inurendo apponunt, interea dum incendiant apicem. Unde etiam superficialia videtur eorum ustio esse. *Paræus Lib. 18. cap. 28.* ad digiti (lati procul dubio) profunditatem locum hunc inuri jubet, idque tribus, quatuorve, diversis per ambitum articuli plagis; cavendo, inquit, ne Nervi lædantur. Cæterum raros invenimus, qui ad os usque inuri locum jubeant, *Tulpium Lib. 3. cap. 26. Deckers Exerc. pract. pag. 34.* aliosque paucos, si exceperis.

Referenda huc famosa *Moxa*, sive *Artemisæ Lanugo*, quam Indii parent. Agit nempe, quo priora, modo. Vim enim *Artemisæ* peculiarem hic non agnoscimus. *Olaus Borrichius* dudum adverterat majorum virium in *Ischiade* curanda hanc cum *Artemisia* factam inustionem non esse, ipsis vesicantibus. Et si, quæ pro & contra scriptitata fuerint superiore sæculo, apud *Bonnetum Med. Sept. Tom. 2. Lib. 6. Sect. 5. cap. de Arthrit.* attente pervolvimus,

abunde convincimur hoc auxilium, adeo olim decantatum, tam caro pretio solutum, præ reliquis inuentionibus nihil singulare habere.

2^{do} *Cucurbitas Hippocrates* hic impense laudat; laudarunt omnes post illum Auctores. Iterata harum actione Revulsio necesse est ab interioribus versus exteriora fiat. Continuo enim magnam in molem elata integumenta, humores huc undique alliciunt: spesque sic fit, fore ut hac lege & moveatur, & attrahatur, quæ profunda in sede locabatur, morbi materies. Idque revera fieri, innumera testantur exempla.

Ad Inuentiones & *Cucurbitas*, merito referimus lata *Vesicantia* nostra. Clarissimus *Boerhaave* ajebat sæpius nobis, si vellet arcanum quoddam vendere, id fore tetras, & sub alia specie occultatas *Cantharidas*, in *Ischiadicis*. Hoc remedium Emplastri forma, palma manus majus, adplicabat *Coxæ*, & dein, post ingentem vesicam

cam contractam auferebat, vulnusque percurabat : dolore non abeunte, repetebat idem octiduo post; idque aliquoties ad tertiam, quartamve, vicem : quanvis raro id sibi contigisse testaretur, ut quarto Emplastro indigeret. Innumeri sunt, quos in Nofocomio hac Methodo ab annosioribus hisce ærumnis percuraverimus. Hæc autem cura vix obtinet ubi locus sponte exulceratur ; ut in casu Juvenculæ nostræ ; quanvis etiam in ambitu ulcerum semel iterumque explorata fuerit.

Tertio laudavit hic *Hipp. Venæ Sectiones*. Nec datur fere autor, qui eandem haud commendaverit revellendi animo, si indicatio utcumque vel juberet, vel permetteret. In initio tamen proficua magis futura, quam progressu malo, videtur.

Quarto, *Purgantia & Clysmata* adhibuit, postque ipsum omnes. Præter Revulsionis intensionem generalem, veteres videbantur quid peculiare ab his remediis expecta-

re ; saltem ab enematribus. *Dioscorides* clysmata hic adplicabat ex acerrimis omnium purgantibus. An Anatome hanc Veterum experientiam forsan confirmat ? Arteria Natium *Winslowo* dicta , producit Hæmorrhoidalem internam , aliam omnino ab iis arteriis , quas vulgo Hæmorrhoidales internas appellare consuevimus ; simulque dat ramum ad Articulum femoris ; imo dat Ramulos qui interiorem substantiam perreptent Nervi Ischiadici. Præterea Ramus primus Arteriæ pudendæ internæ dat Ramos Hæmorrhoidales internos , & Ramum antè , posteriusque decurrentem supra ceryicem ossis femoris. Atque hæc de communibus Arteriis ; si autem Nervos contemplemur , a Nervo Ischiadico , pelvi egresso , Ramus proficiscitur , qui Anum petat.

Quinto , *Cbliasmata* , sive *Fomenta tepida* , egregii usus deprehendere , cum *Hippocrate* , Medici omnes ; maxime si cum farinosis in

Cata-

Cataplasma redigerentur. Conabantur hinc omnia laxare, & per laxatos poros acres adigere stimulos. *Dioscorides* in Ischiadicis miscuit Cataplasmati Radicem scammonii, ipsamque Colocynthidem. Nullus fere Autor est, qui peculiare quoddam acre hic non commendaverit. Videte *Prosp. Alp. Med. Meth. Lib. 9. cap. 5. Forest. Lib. 29. Obs. 22. in scholio*. Ischiadis subita admodum curatio describitur a *Boneto Med. sept. Tom. 2. pag. 575*. partem affectam primo probe fricatam, igni dein expositam, fovendo hoc Linimento. \mathfrak{R} . Sapon. ven. rasi unc. i. Aq. Reg. Hung. q. s. Deinde fricando unguento, quod ex ung. Alth. Thereb. & Ol. Lumbr. pararetur. Egregium Belli Ducem *Hagæ Batavorum* iteratis vesicantibus frustra fere vexaveram. Semicuratus iter suscipere debuit. Loco, quo perrexerat, quietus, ferendo dolori non erat. Matrona consulit totum quantum femur involveret emplastro quod expulvere Mastiches cum

cum spiritus vini f. q. pararetur. Adplicuit, dolore immunis Hagam rediit, rem mihi patefecit totam. Desperatis pluribus hoc consilio profui. *Calx viva cum melle*, vel cum unguentis quibusdam mista, plures egregias curas mihi edidit.

Sexto, *Frictiones tum siccae, tum humidae*, rebus penetrantissimis institutæ, pertinaciter continuatæ, sæpius utilissimæ inventæ sunt; ut jam exemplis ad n° 5. patuit.

Septimo *Thermas* commendant, laudantque plures. His curari multos, multos minime, compertum est. Plures vidi qui Aquisgranensibus, qui Badensibus, &c. usi, vel nihil lucrati essent, vel in pejus versi. Laudat tamen *Schultetus* proprio exemplo suo virtutes Balnei *Thalsfengensis*, vulgo *Gesundbrun*, in Agro *Ulmenfi*: cujus usu Ischiadico dolore, aliis quidem remediis olim cedente, sed tamen iterum redeunte, jam a novennio carebat. *Embrode* in desperatis semper tentanda est, licet habea-

habeamus, quibus non profuerit; prodest tamen aliquando.

Octavo *Fonticulos* & Veterum multi, & usus hodiernus, sæpe salutares invenere. Irritatio est perpetua, perpetuusque revelans effluxus.

§. VII. Veruntamen in cunctis hisce tum Veterum, tum Modernorum methodis adhibendis, Prognosis fere semper incerta est: cum natura mali nos prorsum lateat; nec nisi ex effectibus, &, ut ajunt, a posteriore, nobis sæpe manifestetur. Considerentur varii tantummodo, qui afficiuntur, loci! Prava materies hæret fortassis in cute modo, vel in Panniculo adiposo, vel in Fascia lata, vel in involucris Musculorum superiorum, inferiorumve, vel in involucris Ischiadici Neryi, vel in Periosteo superioris partis ossis femoris, vel in Periosteo ossis Ischii, vel in ossea parte Acetabuli, vel in Capsa ligamentosa Articuli, vel in Cartilaginibus seu Os, seu Cavum

acetabuli, incrustantibus, vel in Glandula magna, vel in Ligamento tereti, ejusve five alterutra, five utraque origine, vel denique in pluribus harum partium simul. Deinde ad loca tam varia etiam multiplex adpellit materia. Est enim serum acre Podagricum, Rheumaticum, Scorbuticum, Venerereum; si locus primario afficiatur: vel est ichor, sanies, pus, acrimonia jam expostita, metastatice huc aliunde delata: vel est materies genita ex prægressa loci hujus communi inflammatione. Quæcumque jam materies sit, si non corrumpatur, si eliciatur extrorsum, si nova non succedat, si nihil intus destruxerit, integram potest admittere curam. Si vero expulsam priorem nova subsequatur, recidivas facit, curasque inconstantes. Sed enim vero si corrumpatur, diuque ibidem hæreat, cunctas hic partes pessumdet necesse est. Ita vidimus in Nosocomio nunc ipsos Musculos, Nervosque, putredine liquatos; nunc Os femoris
cario-

cariosum ; nunc laceram articulare Cap-
fulam ; alio tempore Acetabulum cariosum
fractum ; alia vice caput ossis totum , ero-
so ligamento , extra Acetabulum ; iterum
Acetabulum destructum totum , ita ut vel
illud solum , vel & Os Ischii , & Os Sa-
crum , & Vertebrae Lumborum , carie con-
sumerentur ; nunc iterum perfectam Ossis
femoris cum acetabulo Anchylosin &c.

His ergo omnibus , quæ ad variam mor-
bi sedem , variamque materiæ Naturam
spectent , consideratis , minus mirabimur
tam curas inconstantes , quam casus despe-
ratos. Erimusque in Prognosi cautiōres
cum morbus toties fallat nos ; quid dicam !
cum ipsum τὸ πανὸς fefellerit *Hippocratem*.
Juvat textum adducere ex Epid. 5. pag.
1151. „ *Hecafōni* in Omilo , ex Corporis
„ impuritate , & prava (seu intempestive
„ data) purgatione , gravis in Coxendi-
„ cem dolor incubuit. Quo quidem demit-
„ tente , febribus correptus est , diuque
„ Le-

„ Lectulo decumbens , neque bibebat qui-
 „ dem , neque sitiebat. Debilis quidem
 „ erat , & crebro inhorruit. Huic probe
 „ quidem , ut conveniebat , morbus sub-
 „ latus est ; corpus autem ex oblatis opem
 „ percipiebat.” Igitur videbatur laborasse
Hecason Phthisi vere coxaria, Hecticas fe-
 bres , cum frequenti horrore , & magna de-
 bilitate , inducente. Morbo liberari visus
 est , viresque deperditas belle recuperare ,
 ut jam sanescere videretur. Sed an sanus
 factus est ? „ Tandem , ait , morbus per
 „ inferiora erupit , ac totus cum multa
 „ bile secessit , & mente motus , interiit.”
 Ergo morbus lucido quodam intervallo la-
 tuerat , & veluti curatus habebatur ; & qui-
 dem ita , ut *Hippocrates* subjungat, ἐδόνεε
 „ δὲ αὐτὸ ἐκφυγεῖν τὸ νόσημα, *Hecason* vidē-
 „ batur morbo emergere , e morbo eva-
 „ dere.” Sed interea tandem morbus per
 inferiora secessit , occiditque *Hecasonem*.
 Id quod Phthificis solenne est , ut *Diarrhæa*
 colli-

colliquante pereant. Hujus *Phthiſeos Iſchiadicae* exempla plura præcedentibus *Tomis Rat. Med.* dedi, morte paſſim terminatæ. Diarrhœa hæc colliquans latenter promota *Eupolemon* occiderat, pag. 145.

§. VIII. Haud omnium tamen in hac *Phthiſi iſchiadica* fortem æque deſperatam eſſe, binis exemplis luculentis *Tom. 3. Rat. Med. cap. 5.* clare vidimus. Ipſiſſimaque juvencula, cujus caſus totum hoc caput genuit, eadem, qua illæ binæ, methodo; lactea ſcilicet *Diæta*, cum largo corticis peruviani uſu; huc uſque bene ſe habet, ulcere *Lympham* modicam exſudante. *Lymphæ* autem hujus inde revellendæ cauſa, fonticulus inciſus eſt. Hoc tempore toroſa, robuſta, duros ſuos labores indefatigata perficit, idque jam trimeſtri ſpatio. Cæterum ſapones *Herbæque ſaponacæ* atque antiſcorbuticæ dictæ, ſi largiſſime ſuman-
tur, egregium uſum habent, ubicumque ſpes reſolutionis aliqua ſupereſt.

CAPUT V.

DE

APOPLEXIA ET NERVORUM
MORBIS.

§. I. *Variae causæ remotæ Apoplexiæ unam modo eandemque causam proximam facientes, cadaveribus sectis demonstrantur; simulque præctice describitur circa Apoplexiam, sive desperatam, sive sanabilem, ex causarum expositarum contemplatione.* §. II. *Examen causæ cur toties Apoplexia aut generet paralyfin, aut ipsam sequatur? Ea occasione ostenditur Causam eandem proximam in decem v. g. hominibus, decem varios Cerebri, Nervorumque, gignere morbos. Ideoque quid iidem hi morbi commune inter se, quid diversum habeant, & quinam demum ex illa diversitate effectus diversi producantur, examinatur.* §. III. *Reperitur tamen ab omnibus hisce Catalepsis maxime abluere; cujus miræ historiæ enarrantur, examinantur, magnamque partem inexplicabiles declarantur: qua occasione etiam aliquid de somnambulis.* §. IV. *Examen quæstionis, cur Cerebro uno in latere affecto, oppositum latus Paralysis prehendant? Assertio hæc iustos intra terminos limitatur contrariis observationibus. De Lympha Cerebri non concrescibili.*

§. I. **N**onnullos morbos reperire est, qui sæpius licet visi, inspectisque demonstrati Cadaveribus, repetito tamen frequentius examine, Medicinam magis illustrent magisque: quos inter Apoplexiam eique affines morbos merito recensemus; de qua porro, ut quid digne proferamus, primo historias morborum varias, cadaverumque sectiones præmittemus.

Anni currentis 15. Aprilis, fœmina 102. annorum habita, in Nosocomio, *civico* extinguebatur. Cadaver petieram, Fati senilis prospectum Auditoribus daturus. Exp. Nosocomii illius Physicus Dominus *Erndl* sequentem primo dabat Anamnesin: Autumno elapso febrim continuam passa erat, hyeme Diarrhœam. Aptis restituta medelis, viribus tamen sensim defecit; ut lectulo perpetuo affixa, cardiacis semper fovenda esset. Brevi ante mortem, en, inquit, morior; sumto autem cardiaco, gau-

deo , ait , denuo me recolligo ; simulque desiit vivere. En jam quæ dabat Anatome!

Musculi abdominales soli quidem tenuatissimi , cæteri vero musculi omnes , tendinesque , femorum , furarum , colli , dorfi , omnino carnosi , torosi , pinguedinosi , ut in ætate media. Egregia omnia viscera ventris. In Thorace itidem boni Pulmones ; Cor , vasa majora , ut in homine sano 30. annorum se habebant. Haud igitur quod expectaveram , & demonstrare gestiveram , inveni : inveni autem quod non cogitaveram. Intra Cranium nempe , ubi cerebrum totum minime ficcum , sed maxime naturale erat , Cruor ater , spissus , effusus erat sub Pia Matre , ad lobum posteriorem finistrum ita quidem , ut cavum , pollicem capiens , in hoc lobo expleret.

Est Apoplexiæ species , solo spirituum defectu oriunda , quæ huic sceminæ jam pluries intentaverat mortis minas. Cum pauca tamen quantitate spirituum , ope Cardiacorum ,

corum, tum replentium, tum excitantium, reſecta, vitam protraxit. Jam vero effuſus cruor ſubjecta preſſit. Cranio enim ſemper exacte pleno, preſſio grumofi ſanguinis in lobo poſteriore Cerebri removebat a ſe per ambitum lobi ſubſtantiam; ea remota ſubſtantia premebat vicina ſibi, atque ita compreſſio progreſſa videtur ad ipſam uſque Medullam oblongatam: quo demum factum, ut pauca illa ſpirituum copia, qua debilis hæc vita eoſque ſuſtentata, protrac̃taque fuerat, interciperetur, eaque intercepta Mors adeſſet. Utrum nunc ſanguis ſenſim ibidem colligi ceperit, an effuſus recenter fuerit, incertum: poſſe tamen ſubito ante mortem effundi ſequentibus demonſtrabitur.

2. Die 19. Febr. ex eodem Noſocomio adferebatur mihi cadaver ſenis, qui, ſtrenuus ſemper helluo vini, eodem ſefe triduo ante mortem ita impleverat, ut in ipſa ebrietate Apoplexia *ἰχθυῖν* tactus, bi-
dui ſpatio extingueretur.

Dura Mater bona, tota vero Pia dicta Aneurysmatica, & Varicosa omnino fuit, idque non in superficie modo, sed inter omnes cerebri anfractus seu volvulos, & inter utrumque hemisphærium, potissimum vero ad Tempora. Ventriculus anterior cerebri sinister grumosi sanguinis eam habebat copiam, ut commune cochleare expleret, dexter dimidium paulo fluidioris. Cerebelli Pia Mater, maxime sinistri, ut ea cerebri se habebat.

Alcoholis est, dum sanguine susceptum circumducitur, illum rarefacere. Spatium igitur majus occupantes humores, vasa extendunt, dilatant, simulque eadem dilatata, quod vehementem stimulum circumferant, in validiorem adigunt actionem. Repetita multoties hac actione, debilitantur sic vasa, ut communi & tranquilla humorum circulatione languide tantum reagant, nec nisi stimulo repetito debite suos propellant humores. Sed demonstratum est re-
pe.

petita rarefactione humorum vasa debilitari. Ergo quo sæpius necessarius est stimulus, ut torpor vasorum excitetur, eo frequentius eadem rarefactio, vasa extendens, causam debilitatis adauget. Et hinc demum tristis illa necessitas vini, spirituumve, copiam sensim augendi, cum vasa de die in diem debiliora, a consuetis ultra non afficiantur. Hinc sensim homo ita flaccidus adparet, ut, qui DEI est imago, jam referat Bacchi simulacrum. Hinc igitur capimus cur Arteriæ Venæque Piæ Matris aneurysmaticæ ac varicosæ fiant: id quod videtur tolerari utcumque posse, absque eo quod vasa dehiscant, quia æquabiliter sustinentur; at in Ventriculis cerebri alia res est. Vasa innumera plexus Choroidei possunt pro momento sine resistantia esse, si plus Lymphæ ex iisdem resorbeatur, quam in illos influit. Vel si id non fit, saltem vasa in rore, vel liquore, perpetuo sita, debilitari, ac dilatari, prædictis internis de

causis ita queunt, ut facile dehiscant: præterquam quod acrimonia in his corporibus nata, acrem ventriculis Lympham instillet, quæ eadem vasa corrodat, facileque dissolvat. Hinc demum effusio sanguinis. Hinc ventriculi sanguine turgidi totum cerebrum ac Medullam Oblongatam comprimunt. Hinc capimus unicam unciam sanguinis, intra cranium effusam, inter Apoplexiæ causas ab Autoribus jure referri.

3. Sartor 55. ann. 9. Aug. 1757. terrore, mœrore, gravique ira correptus, cubitum sanus petit. 10. Aug. evigilans apprehendit se toto latere dextro tumidum, ac paralyticum; idque haud in crure, brachioque, solis, verum etiam in gena, & lingua; ita ut loquens non intelligeretur. Vena ipsi mox secta est, & quæ reliqua artis erant adhibita, tandem trigesies Balneo Badensi usus est. Quibus omnibus id effectum, ut tumor partium demitteret quidem,

dem, & cruri quisquam rediret motus; paralytis vero eodem perseveraret cæteris in partibus modo.

Prima vice illum vidi 9. Junii 1758. eumque ab illo die ad Machinam electream adhibere cepi. Et idem ille, de quo Rat. Med. part. 3. cap. 6. n° 11. Menſe Januario, 1759. in lecto jacens, expedite poterat brachium, digitosque, movere; extra lectum vero minus. Habent id plures Paralytici, dum incipiunt emendari. Sustentatis partibus, obscurus qui redierit musculis motus, eosdem facilius movet, quam si pendente brachio muscoli totum brachii pondus simul sustinere attollereque debeant. Junio mense vox distinctior, tantusque jam pedis motus, ut solus, sine scipione, magnam circumambulet aulam.

Nona autem Junii ad secundam pomeridianam Machinæ accedens, dixerat famulo Nosocomii quidem sibi bene non esse, nobis vero nihil, nisi ad 10. forte ictum. Du-

cebatur ilico in lectum, ut parum quiesceret, utque quid ipsi deesset examinarem. Illico magnam præcordiorum anxietatem conquerebatur, & intra dimidiæ horæ spatium mentis compos ultra non fuit. Frustra vena secta est; frustra injectum Ene-
ma, adhibitaque vesicantia. Deglutitio sublata prohibuit usum medicamentorum. Intra quadrihorium expiravit.

In Cadavere Dura Mater a latere sinistro sinus Falciformis cum cranio concreverat, ibidemque crassa ac dura erat. In sinistro cerebri hemisphærio, potissimum ad latus, varicosissima eadem erat, in dextro autem parum tantum. Eademque in plaga, qua Dura Mater cum cranio cohærebat, etiam arcte coibat cum Arachnoidæa ac Pia membranis. Sub Arachnoidæa in posterioris lobi cerebri parte priore & læva, Lympha multa splendens, hinc inde subrubella, adparuit. Eadem Lympha coagulata, tremula, conspiciebatur in lobi hu-
jus

jus posteriore plaga, maxime inter medullæ volvulos, supra Piam Matrem. Cæterum, niger sanguis videbatur omnes medullæ gyros, volvulose, per totum Encephalon sejungere; id quod adhuc adparebat profundioribus sectionibus jam Medullæ bona parte ablata. Ventriculus sinister anterior, sive superior dictus, & amplissimus omnino erat, & tum copiosissima rubella aqua, tum grumoso sanguine plenus fuit; dexter vero ejus compar suam & amplitudinem, & lympham, naturalem habuit. Ventriculus quartus, amplius, copiosus, ac coagulato sanguine, distentus erat, usque ad foramen magnum ossis occipitis.

In sinistro cerebri hemisphærio quæ enarrata vitia sunt, ad Paralyfin dextri lateris explicandam sufficiunt. Vitia Ventriculi quarti ad Apoplexiam, eamque tam cito letalem, intelligendam sufficienter quoque facere videntur. Exposueram ad ægrum II. quo pacto in plexu choroidæo vasa ro-

di,

di, rumpique possint, ac sanguinem suum intra ventriculos cerebri anteriores effundere. Eadem explicatio valet ad Ventriculum quartum, cum & speciem quandam plexus choroidei habeat. Cæterum ex historia morbi patet hanc effusionem letalem subito contigisse: an forsitan nimium repleverit ventriculum in prægresso mox prandio? Hacque lege Aorta, tumente ventriculo compressa, impetum majorem in tenera plexus hujus vasa excitasset?

4. Die Julii 6. 1759. anatomen puellæ feci, quæ jugi cephalæa laboraverat. *Jugi* dico; cum ex quo loqui potuit, eandem sit perpetuo conquesta. Præcipuam vero ejus sedem ad postica oculi sinistri potissimum indicaverat. Cætera hilaris, agilis, cursu, saltu, lusu, indefinenter se exercens, nunquam tussire, aut anhelare, nunquam defatigari, a digno parente, Vienneusi Medico, observata est. Sex cum dimidio annos nata interiit. Octiduo ante mor-

mortem stupida nonnihil, & obliuioſa, nonnunquam deprehendebatur, in reliquis tamen omnibus ſana. Quatriduo ante mortem & ipſam prehendit apoplexia, & dextrum brachium convuſio. Ultimo vitæ biduo convuſio ceſſauit, Apoplexia autem ſine notabili febre placidum vitæ finem fecit.

Dura Mater bona, Pia tota quanta varicoſiſſima utroque in cerebri hemiſphærio. In ſinu longitudinali, ab ipſo fronte, uſque dum ille in ſinus laterales abit, corpus album reperiēbatur, inſtar oblongi vermis. Sinus idem binis in locis habebat membranaceam expansionem, ab uno ejus pariete in alium porrectam, tenſam. Ad primam harum oblongum hoc corpus album duas in partes ſindebatur, quarum altera ſub hac expansione, altera ſupra eandem pergebat: emenſæ autem hæ binæ partes expansionis latitudinem, quatuor propemodum lineas habentem, denuo coibant; ita ut poſthac Solitarius veluti vermis ſupra
po-

posteriolem expansionem, sine ulla divisione, transcurreret, sinusque laterales utrinque subiret. Ex Ventriculo superiore cerebri dextro uncias duas aquæ eduximus. Limpidissima hæc erat, inodora, igni imposita non coagulabilis, fyrupi violarum colorem minime mutans. Aderat & aqua in fundo cerebri, ad usque foramen magnum ossis occipitis; sed eandem ibi in vita hæsisse affirmare non ausim. Forte enim, dum sectionem planam juxta lacunar sinus facientes, simul hunc sinum leviter læderemus, exfiliens inde Lympha undique deorsum, adeoque inter Duram Matrem cerebrumque, insinuare se potuit. Unde certe longe copiosior Lympha in ventriculo fuerit oportet, quam quæ inde collecta fuerit. Pulmo totus quantus accretus fuit Pleuræ, Pericardio, Diaphragmati; ipsique inter sese connati mutuo Lobi. Modus autem hujus mutæ concretionis non erat illi similis, qui in pectoris morbis, vel aliàs ad
lu-

luctamina mortis, a crasso sero transsudante ortus, digitis commode solvi possit : neque similis etiam illi, qui cellulosa productione, haud omnino difficulter solvenda, sæpe observatur : sed erat omni in puncto Thoracis coalitio firmissima, solidissima, cultello tantum, magnaque cum patientia, demum solvenda ; ita tamen ut nonnullis in locis pulmo facilius perscinderetur, ac laceraretur, quam a nexu sine læsione solveretur : nullibi autem id difficilius quam toto pectoris sinistro cavo.

Hæc ergo puella post perennem Cephalæam demum Apoplexia quatuor dierum moritur. Non morabor hic pessime affecti pectoris in casu quo, a longa die, ejusmodi causæ hic natæ erant, a quibus respiratio longe vitiosissima oriri debuisset ; cum de simili casu egerim *Rat. Med. part. 2. cap. 8.* Adeoque ad Apoplexiam me modo converto. Oblongus veluti vermis sinus longitudinalis merus polypus fuit. Patebat id
ma-

maxime, ubi crura ejus utrinque ex finibus Occipitalibus extrahebantur : alba polypi materies incipiebat hic rubro sanguine tingi, & sanguineas fibras a sese dimittere. Confirmabat merum modo polypum esse ejusdem in aqua dissolutio, & interitus. Nam, quo post aliquot dies eum maturiori examini subjicerem, jusseram non in spiritu, ne contraheretur, sed in aqua, fervari : quarto autem ex illinc die examinaturus, fere periisse dolebam. Porro de natura polyporum, in humano corpore genitorum, id esse, *Rat. Med. part. 1. pag. 131.* demonstravi, quod in spiritu subsisterent, in aqua vero evanescerent. An a pressione intra finum genitus polypus, ut variis exemplis ostendi *Rat. Med. part. 2. cap. 7. ?* Forte ; sed compressione sanguinis absente etiam polypos copiosos generari posthac 2. Octobris propediem elapsi in cadavere didici. Homo quinquagenarius anomala Arthritide a 13. annis in cal-

cem

cem ad articulos conversus, & dirissimis paroxyſmīs fere confumtus ; a triennio frequentibus paroxyſmīs Colicæ Piſtonum excruciatuſ ; puſ grave, copioſum a quatuor menſibus in omni Urina deponens ; lenta demum tabe in Noſocomio periit. In dilatatiſſimis Aorta, & Vena cava, in peramplis arteriis veniſque Iliacis, arteria carotide, ac vertebrali, in vena jugulari, tenuem chordam polypofam invenimus, cujuſ chordæ diameter in maxima arteria vix ultra lineam, in magna vena vix duas excederet lineas ; quemadmodum etiam ſinus falciformis exhibebat. Hic certe preſſio nulla, ſed vacuitas maxima ubique erat, cum polypo univerſo. Nec in capite preſſio ſanguinis fuerat, cum ibi nihil fere ſanguinis in vaſis, Dura Matre in ſiniſtro latere excepta, cumque etiam Ventriculi anteriores cerebri ita vacui eſſent, licet magni, ut vix dragmam aquæ, ad ignem minime coagulabilis, educere potuerim.

Hinc vel a pressione, vel a stagnatione Polypus huic de qua agimus puellæ, productus est. Cephalææ antiquæ causa venis forte tribuenda varicosis est: qualia exempla ut cephalææ causas, Collectores casuum nobis alibi demonstrant.

Intelligimus porro cur Apoplexia tam frequenter letalis sit. Si compressio ab aqua, vel a sanguine, producta, causam proximam produxerit, opus est, si Morbus curabitur, ut tum copiosum serum resorbeatur, tum sanguis effusus fotu, ac veluti coctione, aptus reddatur, qui resorberi possit. Sed ad talem resorptionem, coctionemque, certum quoddam tempus natura requirit. Si sufficiens circulatio per minus compressas partes interea temporis detur, si partes minus pressæ nimia humorum copia non obruantur, dum per compressiores transire vetantur, spes est ut homo vel sanescat integre, vel saltem necdum moriatur. Sin vero contrarium, ut pe-
reat

reat necesse est. Imo forte resorbetur materies, sed eroso de vase novus extillans liquor causam proximam redintegrat. Unde intelligitur cur nonnunquam per paroxysmos adoriatur, letalis demum Apoplexia.

Si his jungamus causas Apoplexiæ proximæ, aliunde natas, v. g. a Plethora, a serosa Colluviæ, a Contusione, &c. patet evidenter revellentem dictam Methodum a magno *Boerhaavio* commendatam, unicum fere id esse, quod in Apoplexia ejusmodi prodesse possit: sed simul ex contemplatione causarum proximarum nihil perniciosius Emeticis, (quæ utinam *Sydenhami* auctoritate minus fulcirentur!) in eadem dari posse, vel inde concludimus, quod vis humorum actione Emetici versus caput aucta, causam morbi proximam augeat, ac sæpe reddat insuperabilem.

Sed hæc methodus si integra adplicetur, bonam ægri deglutitionem supponit, quod in Apoplecticis sæpe fit;

M 2 quo

quo nempe ægri hæc Revellentia affatim hauriant. Cum vero dentur, quibus omnis omnino deglutiendi sit ablata facultas, ratio alia adparet cur fors hominis insuperabilis sit. Est malum hoc ratione causæ, & ratione effectus.

Tandem ea Apoplexiæ species, quæ oriunda ex defectu non quidem sanguinis, sed materiæ ultimo elaboratæ, unde subtilis ille liquor, spiritus dictus, parandus; tum & illa, quæ a frigido glutinoso sanguine proficiscitur; longiore tempore egent, quam ut sufficienter suis in causis emendari possint. Unde hæ species hominem e medio tollunt, antequam vel restituti spiritus, vel iners pituita soluta, mobilisque reddita fuerit.

§. II. Cur Apoplexia toties Paralyfin sive sequatur, sive generet? Resp. Paralyseos, Epilepsiæ, Apoplexiæ, Lethargi, Cataphoræ, Convulsionis, aliorumque Cerebri morborum, causæ reperiuntur eadem. Quod ita intellectum velim, ut licet frequenter

ter inveniuntur distinctæ variorum horum morborum causæ proximæ, sæpe tamen quoque confundantur: ita quidem ut serum abundans ventriculorum anteriorum cerebri, in uno Apoplexiam creaverit, in alio Epilepsiam, in tertio Paralyfin. Obstructione, seu potius Symphyssi vasorum, vehementium sanguinem ab Encephalo in Sinum longitudinalem reducem, tumque spissa Lympha sub Pia Matre effusa, vidi in jureconsulto dirissimam ortam Epilepsiam chronicam, tandem acutam, letalem: quæ causæ tamen leguntur alibi inemendabilem induxisse Apoplexiam. Legite *Boerhaavii Caput de Apoplexia*, cum *Ill. Præsidis Comm.* Videte dein *Hillanum, Borellum, Tulpium, Schenckium, Bonetum, Mangetum*; quotiesne docti hi viri describunt eandem inventam in Cadaveribus causam, quæ hos diversissimos effectus produxerit?

Quod si ita se habet, consequitur id, ut concludamus eandem Causam, v. g.

ferosam ventriculorum cerebri colluviem , ipsa pressiois differentia , vi etiam compressionis in hanc , magis quam in illam Cerebri , cerebellive plagam determinatæ , tum & majore aut minore resistentia compressæ partis ad vim pressiois , magnam varietatem habere in effectibus inde producendis.

2^{do}. Comprehendimus quoque causam eandem suis in effectibus mutabilem reddi , omninoque variam ; tum pro effusi liquidi copia aucta vel imminuta , tum pro leviori aut graviore mutatione , ac labefactione , partium compressarum , tum etiam varietate pressiois , viam sibi novam ad alias cerebri plagas molientis , tum denique variante hominis regimine & diæta. Quibus rite pensitatis non est sane , cur valdopere miremur , quod a causa , quæ nobis eadem esse videtur , diversos effectus ; & quod a diversissimis naturæ causis , eundem plane contemplemur effectum.

3^{to}. Intelligimus utcumque quamnam ob causam omnes hi morbi, humoribus geniti, etiam queant defectu oriri humorum. Dum enim ita collabitur cerebrum, ut transeat nihil, est Apoplexia ab inopia humorum. Dum plagæ quædam collabuntur, his tamen vicinæ nonnullæ sat perviæ manent, ut excipiant, transmittantque, qui circulum continuet, humorem; minæ ad Apoplexiam, vel Paralyfes, subsequuntur plus minus completæ. Denique dum uno momento vasa hæc tenera vi superstite sanguinis penetrantur, altero momento præ nimio collapsu penetrari nequeunt, convulsiones subsequantur necesse est.

4^{to}. Capitur quoque cur omnium horum morborum sive affinitas, sive disparitas, rite inter se collatæ, ideam eorundem Medicorum menti vividissimam imprimant: ita quidem, ut Apoplexia compressione nata universum Encephalum æquabiliter premat; deinde ut causa Paralyfin gene-

rans nonnullas modo fibras premat, quorundam nervorum futuras origines; tandem ut causa Epilepsiam, aut Convulsionem, efficiens, uno momento vi irruens, terribiles producat contractiones, altero momento, repleto quasi nimium cerebro, vi repellatur: unde Epilepsia vera est veluti alternans Apoplexia, & nimius motus; & cessante demum illo motu, somnus Apoplecticus fit, quo morbus veluti coquitur, si paroxysmus est curabilis: sin minus, in letalem abit Apoplexiam.

§. III. Ab his regulis sola Catalepsis ablu-
dit. Ut ejus legitima Idea habeatur, omnino
totus casus legendus est, quem *Ill. Præses*
refert ad §. 1086. *Aph. Boerb. ex Act.*
Reg. Scient. Par. ann. 1742. Primo enim
describitur Catalepsis perfecta, cum omni-
bus suis stupendis apparitionibus. Id tamen
hic notandum, quod in omnibus Catalepti-
corum historiis, quivis diversi Observato-
res distinctum quid, alii præ aliis, notent;
quod-

quodque hinc Catalepseos tam varia facies describi soleat : quanvis fateamur in omni vera Catalepsi, ipsis descripta, illud Catalepticum, *καταχρηστικῶς* ita dictum, certo morbi tempore in singulis adesse. Tum & mire mutantur ipsi hi morbi. Cataleptica, de qua textu citato, elapso aliquo tempore simul fiebat somnambula : deinde in eo etiam mutabatur morbus, quod deinceps multa garriret, inordinate loqueretur, cantaret, videret, & post deambulationes peractas iterum lectum peteret, tegeret corpus stragulis, cataleptica fieret, & post $\frac{1}{4}$ horæ catalepseos paroxysmum totum absolveret. Ut melius autem capiatur quæ morbus hic se habeat, en quæ viderim !

Puella 12. annorum frigida, mucosa tota, catalepsi bis ter nocturni spatii repente, corripitur ; idque integro ferme mensis spatii. Catalepsis quacumque corporis positione eam prehenderet, jacentem, stantem, incedentem, in manducatione ci-

bos potiusve ad os ducentem, semper illam in eadem positione servabat ; nisi forte quis alius mutaret. Vix per octiduum hic fuerat morbi status, quin ingentem subiret mutationem. Quæ enim taciturna olim in paroxysmis, jam fit garrula, tantaque cum rapiditate loquax, ut sana nunquam tam præcipitanter loqueretur ; sed distincte tamen, & ad rem. In pluribus paroxysmis præsens audiivi eam *Psalmos Davidicos* cantantem ritu Protestantium, quorum fide a teneris imbuta erat. Cantus autem ille notas musicas exacte observabat, ut asseverabant adstantes. Tum audiivi recitantem Catechismum, quem tenuerat memoriter, una cum plurimis textibus ex sacris Bibliis, ad quæstionem catechismi quamlibet adpositis. Cum ad textus hos Librum adjungeret sacri Autoris, & Caput, & Versiculum, ilico ego in catechismo id examinans ad litteram omnia prolata esse stupebam. Sed neque hic finis. In vitia hominum acriter in-

inferebatur , & occasione textuum laudatorum invehebatur in Adulteros & Impudicos homines , præprimis autem in hominem viduum , in vicinia habitantem , quod pellicem domi aleret ; qui tamen ipse , paroxysmum visurus advolaverat , atque ita præsens præsentem audiebat has diras imprecationes in sese proferentem , quanquam ipse nullatenus puellæ sub conspectum caderet. Sæpius contigit , ut tum familia , tum ego maxime , quid doli subesse suspicati , varia , explorandi gratia , tentaverimus ; sed nihil simile. Nunc unguibus teneram cutim ita vellicabam , ut multis post diebus impressa vestigia gereret ; nunc lumen ipsis fere pupillis admovi , visurus an se contraherent ; acicula varias corporis plagas pupugi , ita ut sanguis inde exfili-
ret : verum omnia incassum. Interim per totum paroxysmi tempus quotiescumque ego brachium , crus , manum , digitum , caput , situ mutabam , perfecte sic , ut posueram

fueram mansit, idque tam longo temporis spatio, quo ego sanus, partes extensas eodem in situ neutiquam fervarem. Perfecte curata est iis, quæ mucosam ac flaccidam temperiem emendarent.

In hoc igitur morbo τὸ ἄγνων adest. Ab una parte commercium corpus inter mentemque deletum adparebat, quod Nervi sentientes nullatenus viderentur affici; ab altera parte commercium id non deletum adparebat, quod sapienter ratiocinata, & memoriter multa aptissime recitans, organa vocis, (& quotuplicia hæc!) expeditissime moderaret. Sed est præterea aliud adhuc notandum hic. Nervi ad motum destinati se non ita habent, atque in Paralyticis, quando commercium Nervi cum Sensorio communi interceptum est. In Paralyfi enim affecta pars mox flaccescit, fitque immobilis, atque haud raro etiam insensibilis: in catalepsi vero corpus manet ut antea, sedentis, gradientis, stantis, comed-

den-

dentis, bibentis, figura. Haud ergo Paralysis est, sed etiam non est motus. Quid ergo est? Est continuatio ejus, quod ultimo sanitatis momento ad motum bonum requisitum aderat: id nempe in ea, quæ olim movebatur, se sustinet parte. Imo si adstantium quis situm hunc permutaverit, & in alium direxerit, ut jam cogat alios prorsum musculos ut agant, est fere idem, ac si sensorium commune novis his musculis novas vires largiretur, ad hunc situm, idque pertinacissime, conservandum.

Porro quod in corpore observamus, idem de mente cogitemus. Quoties enim observatum non est ideam ultimam verbis expressam, ante paroxysmum, ita eandem manere, ita esse immutabilem, ut denuo prima sit, quam homo habeat, verbisque enuntiet, catelepsi, quantumvis diuturna, soluta? Ut profecto, quemadmodum musculi, si ab aliis non mutantur, ita soluto paroxysmo se habent, quam immediate

ante

ante illum habebant; ita quoque maneat impressio Idearum, & consequens inde ratio-
cinium. Igitur totum illud intermedium
tempus inscia, ut videtur, mente transigi-
tur; ita ut cogitationes mentis, loquela
eas enuntians, novus ab adstante homine
musculis conciliatus motus, a mente non
videantur adverti, a memoria non notari.
Intermedium illud spatium tam perfecte de
Vita humana abscinditur, ut prima post
paroxysmum idea, primusque motus, eo
modo cohæreant cum prioribus ultimis, ac
si integrum quid, & nunquam interruptum
componerent.

Somnambuli forte quid simile habentes,
in nonnullis iterum differunt. His corporis
cum anima commercium fileat, sed non in-
ter animam, & gradatorios musculos. Imo
cum quidam studiose evitent mensas, sedes,
obstacula, in via posita, idque in tenebris,
videntur tactu valere, & mentis commer-
cio eo usque uti, ut ad latus declinantes
evitent obstacula. Sub-

Substitit hic examen physiologicum : haud enim datum est nobis miri animi nostri cum corpore commercii capere leges. Ignoramus prorsum eas, quarum ope commercium hoc peragatur, partes ; ignoramus qua se lege & tangant, & moveant, & iterum sistant. In genere novimus necessariam musculi suis cum vasīs integritatem ; boni nervi toto itinere suo aptitudinem ; integrum, quem pro sensorio communi habemus, locum : verum plures in sententias scissi, mutuam harum omnium harmoniam, agendique facultatem, minime capimus. Nervorum cavitatem, fluidi per eam transfluentis præsentiam, scholæ crepant, sed alterutrum existere nullus mortalium, optimis licet armatus microscopiis unquam demonstrare potuit : etiam videntur actiones musculosæ in corpore existere, quibus communi lege explicandis haud sufficimus. Unde ad hæc omnia sapienter Eminentissimus *De Polignac, Anti-lucretii sui* pag. 158.

Nos

Nos vero plerumque latet quænam organa
motus

In nobis vigeant ; & qua sint arte regenda :
Nec rescire juvat : fatis est nam velle mo-
veri,

Quilibet ut se moveat, rudis atque peritus.
& pag. 187.

Scilicet ignorat mihi mens, sibi credita qualis
Machina sit ; quanta momentorum arte re-
gatur ;

Quam varie compacta , & miro condita
textu.

Attamen impellit cum vult, agit atque mo-
vendo

Compagem ; ac subito flectit, prout impe-
rat, artus.

Quod moveat, planum est causam prodire
movendi

Mentis ab imperio : verum id, quod ne-
scia præstet,

(Nescia non motus, quem præcipit ipsa ,
sed Artis,

Qua

Qua fit, & elicitur, liquido demonstrat
adesse

Causam, quæ regit effectrix &c.
& pag. 358.

Denique nec per se Mensullo corpore
tangi,

Nec quocumque modo connexum impelle-
re corpus

Nostri potest. Unde est igitur, quod mu-
tua sese

Commoveant? Certisquæ in corpore mo-
tibus ortis,

Notities menti adveniat, tum certa cupido?

Atque ex notitia, certa que cupidine mentis,

Quidam enascantur motus, & corpore gli-
scant?

Naturas adeo duplices quæ fibula nectit?

Quidquid enim nectit partes, ad utramque
necesse est

Pertineat: Sic vitta manus, sic lora jugales,

Vincula sic ulmo vitem, sic stamina pannos:

At vinclum si corpus erit, qui prendere
Mentem?

Et si Incorporeum, qui prendere Membra
valebit?

Ergo INFINITI conjunxit sola VOLUN-
TAS.

§. IV. Sed antequam hanc materiem mis-
sam faciam, quæstionem circa Nervos gra-
vem movere necesse est. Cur nempe vitia
pag. 168. in sinistro cerebri hemisphærio
factoris, ut causæ paralyseos dextri late-
ris, assignentur?

Est profecto antiquissima *Hippocratis* ob-
servatio, ab aliis deinceps, præcipue ab *Hil-*
dano confirmata, quod læso, pressove, uno ce-
rebri hemisphærio, oppositum corporis latus
paralyticum fiat. Frequentissimæ ejusmodi
observationes effecere, ut jam ante 60.
annos egregius *Poupartius* in *Act. Acad.*
Reg. Sc. Par. statueret Medullares fibras
se decussare; ita ut cranio egressæ, oppo-
sitas peterent corporis plagas. Ita quoque

Peti-

Petitus in scripto dicto *Lettres d'un Medecin, Valsalva*, Aliique : sed instar omnium magnus Venetorum Anatomicus *Sanctorini* *Obs. an. cap. 3. §. 12. pag. 61. edit. Leyd.* qui apta ad id cerebrum nactus, tribus potissimum in locis hanc Decussationem demonstrare solebat : Scilicet in priore & in posteriore protuberantiæ annularis crepidine, atque maxime in imo Caudicis medullaris, qua in spinalem abit. Vide etiam *Hist. Acad. Reg. Sc. Par. an. 1742. pag. 53. in 8.* Siccius cerebrum hisce diebus nactus, idem observasse mihi videor.

Sane si morbi cerebri læsi oppositam Corporis plagam perpetua lege afficerent, omnia quæ ad hanc quæstionem spectent, exposita decussatione jam explicuissimus : verum res ita non est, unde multæ difficultates hinc exsurgunt.

1. Apud Collectores casuum sæpius jam memoratos, historias reperimus innumeras, vitiosi v. g. cerebri dextri, cum

Paralyfi lateris corporis finiftri, & cum convulfione dextri.

2. Cum Paralyfi ejusdem lateris, convulfione oppofiti.

3. Cum Paralyfi lateris ejusdem, fine ullius partis convulfione.

4. Cum convulfione ejusdem lateris, fine ulla ullibi Paralyfi, ut puella pag. 172.

5. Cum Paralyfi & Convulfione ejusdem lateris.

6. Cum convulfione univerfali, & Paralyfi dextri lateris, ubi tamen caufa videbatur cerebrum integrum occupare.

Hac occafione nuperam addam anatomicen. In pueri, cujus hiftoria pag. 128. habetur, cadavere, Pia Mater univerfa varicofa, vix ullibi cum fubjecto cerebro tam in fuperficie, quam intra ejusdem gyros, cohærens, Lympham pellucidam gelatinofam fupra fe gerebat. Hæc porro omnia in utroque Cerebri Hemifphærio ex æquo obtinebant. Equidem ventriculus dexter fupere-

superior Lymphæ , ad ignem non concre-
scentis unciam continebat ; verum incerti-
sumus , an contrectatio & compressio alte-
rius hemisphærii nondum percipisci , aquam
ex sinistro ventriculo in dextrum , quem
examinabamus , non duxerit. Flatus enim
in unum ventriculum immissus , in alterum
sæpe transit ; ita ut quo loco sese ambo
contingunt , in medio nempe , & iterum
ante thalamos Opticorum , mutuo secum
communicare videantur. Imo hac occasione
ablata resistantia in ventriculo , quem exa-
minamus , pondus relictæ supra alterum ven-
triculum Cerebri , potest subjectum ven-
triculum comprimere , premente Anato-
mici manu adjuvante , sicque subjectum ven-
triculum evacuare , dum Lympha vel ros ,
utrumque ventriculum explens , ultra non
æquilibratur. Si quisquam hic forte rege-
rat tunc nunquam posse de copia Lymphæ ,
unum ventriculum præ alio explente , ju-
diciûm formari , & ad morbi referri causas ;

huic respondeo : casus manifestos dari, qui
justum relinquant post sese, certumque ju-
dicium. Quippe ad casum pag. 171. vi-
dimus ventriculum hydropicum duplo tri-
plo ampliorem suo compare redditum fuisse;
unde certe nulla ibidem adfuisse communi-
catio videtur, & ratiocinium de hydropico
hoc ventriculo justum est. Deinde si Lym-
pha tenax valde, etiam communicatio ven-
triculorum obtinere non videtur. Hinc ca-
sus existunt unde nihil, casus unde multum,
concludi licet.

Puer porro hicce pridie ante mortem con-
vulsiones universales habuit, & perfectam
Paralyfin totius dextri lateris. Si nunc in
eodem dicamus ventriculum dextrum præ-
primis hydropicum fuisse, sui que lateris
pressisse cerebrum, tunc paralyfin offendi-
mus in eodem affecto latere : si vero nega-
mus hoc inde posse concludi, probatur sal-
tem id, quod mox ad n. 6. dixeram.

Ex omnibus autem hucusque dictis con-
cludi-

cluditur dari quidem , quæ sese decussent ,
 fibras ; hujusque decussationis effectû op-
 positi lateris morbos exponi : haud tamen
 omnes se decussare ; sed esse quæ se mini-
 me decussent , adeoque proprii lateris ner-
 vos formare videantur : unde tunc simul
 phænomena , quæ eodem in latere contin-
 gunt , explicata habentur. Sed ex omnibus
 his minime explicamus cur causa , eadem
 nobis visa , potius convulsionem , quam
 paralyfin excitet ; aut vice versa ? vel cur
 a causa iterum eadem in uno homine oppo-
 situm latus paralyfi , latus affectum convul-
 sione prehendatur , aut iterum in alio præ-
 cise contrario modo ?

Obiter monitos lectores volo me jam
 pluries deprehendisse , quod *Lympha ven-*
triculorum Cerebri ad ignem non coagule-
 tur , ut jam quatuor experimentis patuit. Con-
 firmant hæc *Boerhaavii* sententiam de *Lym-*
pha Cerebri id jam olim statuentis : ad quam
 sententiam corroborandam laudare solebat

totam octavam propositionem *L. Bellini* de motu cordis; qui & suis, & clari *Lambecbari* experimentis, id evicerat. Attamen egregius *Hallerus* ad §. 274. *Inst. Boerb.* Lympham hanc concrecibilem statuit, intèr alia etiam *Tracassati*, cujus de Cerebro Tractatus inter *Malpighiana* habetur, autoritate fretus. Respondere tamen possumus *Fracassatum* de Morbosis agere, *Bellini* vero & *Boerhaave* vel de fanis, vel de hac saltem parte non morbosis. Experimenta saltem mea idem quod *Boerhaave*, idem quod *Bellini*, evincunt, clamant.

CAPUT VI.

DE

SANGUINE ET CALORE HUMANO.

§. I. *Regule*, ponentis in acutis morbis venæ sectionem post 4. diem licitam non esse, sanguinemque in acutis malignis dissolvi, incertitudo ac fallacia experi-

experimentis demonstrantur. §. II. Ad problema, utrum oporteat foeminae, menstrua, aut lochia, habenti, venam tundere, necne? ratiocinio, experientia, & autoritate, respondetur. §. III. Arteriosus sanguis nec colore mutatur ut venosus, nec suam ita a sese serum dimittit. §. IV. Constanti lege Syrupus Violarum viridescit a sero sanguinis recentissimo, ab ovi recentissimi albumine: ita ut alcali praesentia hoc solo experimento non notetur. §. V. Calor non a solo attritu. §. VI. Defectus est in Methodo mensurandi calorem humanum, quod tempus thermometron adplicandi non definiatur: probatur experimentis quibus simul evincitur latitudinem caloris in sanis hominibus esse inter 94. & 98. gradum. §. VII. Sententia communis de differentia caloris inter homines adultos vegetosque, pueros, ac senes, multiplici experimento exploditur.

§. I. **S**anguis acutis in morbis, inflammatoriisque, vulgò scribitur phlogisticam suam naturam deponere post horum morborum diem quartum: in malignis vero dictis morbis loco vi plasticæ ac phlogisticæ dissolutionem præ sese ferre. Quam opinionem refellere, ut *cap. de morb. mal.*

tom. 3. conatus sum , ita novo , luculentoque , refellam experimento.

Juvencula in febre continua putrida , neglecta prorsum, nullam omnino artis opem experta , die undecimo morbi ad nos deferitur , toto pectore , colloque anteriore , plurimis petechiis scatens : morbo , ut illa retulit , quotidie aucto ; nullamque , ut nos judicare debuimus , sui coctionem præbente. Sanguis ipsi tunc missus , in vasculo primo & tertio crusta phlogistica tectus erat , universaque in rubra parte compactissimus. Duodecimo morbi die repetita venæ sectio , crustam dedit hesternâ densiorem. Ergo nec 12. dierum diuturnitate , nec centenarum petechiarum eruptione , sanguis inflammatoriam suam spissitudinem , sive cruditatem amiserat. Unde nemo miretur venæ sectionem , eandemque iteratam , pro vecto adeo morbo , institutam esse. Ut enim Tomo I. pag. 71. Hippocratis , in Pleuritide Anaxionis , exemplo , & experientia medi-

ca evici, Cruditas morborum non tempore duntaxat, sed conditione, cognoscitur: id quod Auditores mei centies in Nosocomio observaverunt. Quam ob causam varii textus *Boerhaaviani*, post quartum diem sanguinem mittere vetantes, ad mentem tum *Boerhaavii*, tum *Hippocratis*, intelligendi sunt: tunc nempe venam tundere post 4. diem haud oportere, quando stadium inflammatorium circa id tempus, ut sæpius fit, mutatur; cæterum vero tundere oportere.

§. II. Problema sæpius coram Auditoribus agitavi, num nimirum seu Catameniis, seu Lochiis, bene fluentibus, liceret venam secare, si interea temporis ejusmodi morbus oriretur, quem alioqui, si alio tempore contigisset, venæ pertusione confodere debuissimus? Contrarias in sententias Medici abeunt; aliis id præfractè negantibus, aliis vero in summa necessitate, cum prudentia, ac parsimonia, id concedentibus.

Bo-

Bonam Problematis solutionem experimenta sola dare poterant.

Hinc primo conabar quantitatem sanguinis, quibus linteamina commaculantur, fatis certo æstimare. Eo scopo in sanguine, determinata præcise copia misso, & adhuc calente, Linteamina submersi, magnitudinem oriundarum inde macularum examinaturus, notaturus. Iteratis hisce experimentis eo devenimus, ut sanguinis, linteaminibus excepti quantitatem, quovis deposito pretio, exacte calcularemus. Et quia plebejæ, tempore mensium, lochiorumve, mutatoriis carentes, unico linteamine toto tempore utuntur; quod, quia nunc multum, nunc parum, & iterum sæpius, postquam, silente per horas fluxu, ficcatum est, dein eodem redeunte, plurimum in ficcatis imbibit locis; eadem arte in tingendis linteaminibus nostris usi sumus. Justi ergo existimatores sic facti, linteamina, tum Menstruantium variarum, tum
Puer-

Puerperarum , exacte conservavimus , ut demum quantum singulæ toto illo temporis spatio evacuarent , iuste determinaremus.

Sic didicimus nonnullas foeminas menstruo tempore tres uncias sanguinis demittere , alias quatuor , quinque ; pauciores esse , quæ femilibram ; raras admodum quæ uncias decem evacuarent , nisi uteri quopiam defectu laborarent. Quantum autem ad Puerperas ; si prolem mox lactarent , his deprehendimus lochia passim parciora cæteris esse , adeoque Libram nonnullas , alias sesquilibram , evacuare. Casus fuere Abortuum , in quibus mihi jurarent Obstetrices plus 8. 10. Libris evacuatum fuisse , cum tamen totum fordidarum mapparum acervum examinans , vix sesquilibram evacuatam esse existimare debuerim. Cui hæc creditu difficilia videntur , hunc de veritate dictorum iterata experimenta convincere poterunt.

Si itaque Menstruantes 3. 5. 6. 8. uncias

cias evacuant cruoris, eodemque tempore morbo occupantur, cui sedando vix quatuor Libræ sufficerent, nonne evidentissimum est venæ sectionibus jam parcendum non esse? An circa Puerperas acutè laborantes non idem concludendum? Eoque magis, quo citiore Revulsione requisitâ, fluxus ordinarius passim non nisi guttatim prodeat?

Jure ergo meritissimo Ill. Baro *van Swieten* Tom. 3. *Comm. C. de Pleur. pag. 38. Sydenhami, Tulpii, La Motte*, exempla laudans, simul vituperat omnem in mittendo sanguine, dum casus urget, parsimoniam. Laudatus ibidem *La Motte Lib. 2. pag. 224.* pronuntiare ausus est venæ sectiones iteratas in puerpera unius diei, unicum fuisse, quo servari potuisset, auxilium. „Li-
„ cet enim, inquit, lochia abunde flue-
„ rent, multumque Natura ageret ipsa,
„ haud sufficienter tamen agere videba-
„ tur; cum sine iteratis venæ sectionibus,
„ bre-

„ brevi suffocata fuisset. Et quid ita ? Morbus ejusmodi erat, ut duplo copiosiorrem sanguinis evacuationem paucarum horarum spatio posceret, quam Uterus sponte sua integro stillasset octiduo. Addit idem *La Motte* plures similes Puerperarum historias, quas inter notanda cujusquam puerperæ, continuante debito Lochiorum fluxu pleuriticæ, cui novem venæ sectionibus succurrere debuerit. Equidem fæminarum temperies, idiosyncrasia, ætas, anni tempus, Regionum varietas, mutare utcumque, quem dedi, Calculum possunt; ipsam tamen rem sic se habere, constanter evincunt.

Hinc didicere Medicinæ studiosi in Nosocomio Venæ sectiones in his casibus nunquam reformidare, si alias indicarentur: ita vero eas esse instituendas, ut si nihil referret, qua vena sanguis efflueret, is semper, quo naturalis uteri evacuatio minus turbaretur, ex pede duceretur: sin vero

Mor-

Morbus ipse per se eum brachio educi postularet, ut v. g. in ea Pleuritide, quæ ab arteriarum intercostalium Aorta dicta descendente oriundarum, inflammatione proficisceretur, audacter is, feliciterque, ex brachio mitteretur.

§. III. Indoles arteriosi sanguinis quam ab ea venosi differat! Toties repetitum experimentum docuit naribus profluum cum impetu sanguinem, colore vix mutari, dum conservatur, nisi demum quando putret. Læte rubicundus ipsi color, & in superficie aëri contigua est, & in averfa, & omni denique parte, quotuplici sectione eandem diviseris. Demonstrant utique hæc justam Refutationem esse variarum sententiarum, quæ & necessariam statuerent Coloris mutationem, & mutationis ejusdem rationem exponere satagerent, in *Part. I. Rat. Med. Pag. 110. 111.* Alio modo etiam differre a venoso sanguine Arteriosum, ex eo collegimus, quod vix serum a sese se-
parare

parare soleat, diu licet asservatus; perfectiorem, intimioremque, omnium miscellam hinc demonstrans. Plura horum experimentorum ibidem communicatorum, sæpius repetita, semper eosdem, quam citato loco enarravi, produxere effectus.

§. IV. An notaverit quisquam quod serum sanguinis, recentis, tum optimi, flavescensque, tum etiam non flavi, ut quorundam hominum est, venæ sectione educi, Syrupō violarum viridem colorem constanter impertiat? Est tamen Observatio, me nunquam hucusque fallens. Communi sententia Alkali hæc nota esset: tamen hoc ipsum serum cum aceto mistum nullam gerit Alkali notam. Imo Albumen ovi, quod in multis (non in omnibus, ut *Part. I. pag. 96. 97.* evici) sero sanguinis simile est, hoc inquam, de recentissimo ovo sumtum, æruginis fere colorem huic Syrupō conciliat. Novi equidem in ovi albumine quid inesse, quod vas argenteum in quo aliquan-

tisper conservatur , fœda tingat aurigine , sed nonnisi coctum id præstat ; recens , nec igne mutatum , minime. Plus decies similia experimenta variis in subjectis iteravi , quo demum intelligerem , utrum serum Hydropicorum , si fyrupum ita tingeret , nec cum acidis tamen effervesceret , alcalinum , necne , appellitarem. Certe perperam videmur hucusque alcali præsens hac nota statuiffe.

§. V. Quæ variis in locis *part. 1. 2. 3.* de vario caloris gradu , morbo ingravescente , mitescente , finiente , protuli , horna mea experimenta confirmarunt ; quorum en pauca !

Mulier exulcerato Mammæ cancro misera , colore livida , omnino emaciata , pulsum parvum habens , tota die sedens , iterato quater spatium mensis experimento , constanter inventa est gradus tres quatuorve majoris , quam sano in homine est , caloris notare.

Sed

Sed , mirum dictu ! omnium maximus calor inventus est hominis , quo tempore cum morte luctatur , expirat , jamque aliquantum vivere definit. Ita quidem , ut deprehenderimus , in ægro , cujus calor per totum acutum morbum supra 103. gradum non adscenderat , sub mortem , perque bina a morte minuta , notari gradum caloris 106.

Vir 50. annorum , de quo pag. 176. sermo erat , lentissimo igitur morbo eneētus , notabat 9. horis ante mortem adplicato thermometro per 8. minuta 97. gradus caloris ; per 15. minuta 100. hicque fuerat in longissimo morbo consuetus explorati caloris gradus. Quo momento animam efflabat 97. gradus , idque per 7½ minuta. Deinde per 4. minuta 101. Posthac omni quarto minuto thermometer vigesies examinatum , id est per horam & 20. minuta , semper grad. 101. Dein quovis quarto minuto examinatum , 100. gradus : omni quarto

minuto quater , 99. gradus : omni quarto minuto ter , gradus 98. omni 4^{to}. minuto quater , gradus 97. omni 4^{to}. minuto septies 96. & 15. a morte horis necdum infra 85. gradum thermometron descenderat, licet aër domesticus eo tempore vix 60. gradum notaret.

Quæritur nunc an Theoria caloris , ut solo attritu geniti , satis fundata sit ? An vero in corpore animali causæ aliæ , præter attritum , necessario existant genetrices caloris ? Veteres saltem causam nativi dicti caloris diversam credidere ab ea, quæ febrile incendium faceret. Ita *Galenus in Aph.* 14. *Sect.* 1. ait : „ Alioquin febricantes dicemus plurimum habere nativum calorem ; „ qui nedum plus, sed nec priori æqualem „ habent. „ *Ευκρατος μὲν ἐστὶν ἡ ἄσπια τῷ ἐμ- „ φύτῳ θερμῷ, πυρώδης δὲ ἡ τῷ ἐπικτήτῳ.* „ Probe namque temperata est caloris nativi substantia , ignea autem substantia „ est caloris adventitii.

§. VI. *Rat. Med. part. 2. c. 10. p. 156.*
 157. 158. in caloris gradu, tam in ægris,
 quam in fanis, definiendo, conquestus sum
 justum tempus adplicationis Thermometri
 ab autoribus non determinari, cum pro
 tempore adplicationis multa ejus differentia
 esset. Plurima recentiora experimenta le-
 gitimas has querelas demonstrant. In sano
 homine thermometron spatio $\frac{1}{8}$ horæ no-
 tans 96. gradus, facile per horam ad 100.
 imo ad 102. adscendit: quantacumque
 vero temporis diuturnitate tunc adplicatur,
 non adscendit ultra. Centies iteratum ex-
 perimentum, toties idem confirmavit. Haud
 tamen ita semper adscendit. Unde cum ob-
 servatio variet, en quid pro certo commu-
 nico. Contingit nonnunquam ut ultra gra-
 dum caloris illum, qui spatio horæ qua-
 drantis notabatur, thermometrum non pe-
 tat altius; nonnunquam ut supra eum gra-
 dum haud adscendat, qui spatio dimidiæ
 indicabatur horæ; sæpius non supra gra-

dum intra tres horæ quadrantes indicatum ; frequenter tamen ad horam integram crescat. Ut ex omnibus hisce hæc sit certa conclusio, qui gradum caloris in dato homine juste determinare gestit, eum horæ integræ spatio thermometer adplicare debere. Quod si Medicus aliunde occupatior suo tempore eget, eum raro fallendum, falliturumque, si per $\frac{1}{4}$ horæ adplicans, unum alterumve gradum notatis gradibus adjece-rit : licet enim nonnunquam ultra quadrantis spatium non adscendat, licet etiam post quadrantis horæ adplicationem thermometer plusquam duos gradus ante horam elapsedam adscenderit, tamen respectu communicæ observationis adeo hæ exceptiones sunt rariores, ut qui ad gradus, spatio quadrantis horæ notatos, unum alterumve adjecerit, rarissime fallatur.

Sed & hoc addendum est. In multis sanis vegetisque hominibus ; quietis, leviter motis ; jejunis, leviterque pastis ; explo-
rari

ravi num semper calor naturalis 95. 96. graduum foret ; sed deprehendi qui constanti lege 97. rariores, qui 98. rarissimos qui 99. semper notarent. Quod ideo notatu dignum judico, ne qui sint, qui ex solo thermometro hominem febricitare pronuntient, qui forte naturaliter modo calet.

§. VII. Quæritur quid censendum sit de sententia *Hippocratis* Aph. 14. Sect. 1.

„ Quæ crescunt plurimum habent calidi
 „ innati : plurimo igitur egent alimento ;
 „ sin minus, corpus consumitur. Senibus
 „ autem paucus calor ; propterea paucis
 „ fomitibus, indigent : a multis enim ex-
 „ tinguitur. Idcirco etiam febres senibus
 „ non similiter acutæ. Frigidum enim est
 „ corpus.” Forsitan *Hippocrates* hic tantum de Calido innato ventriculi, & ne-
 tiquam de calore universi corporis, in va-
 riis hominum ætatibus egit ; & Aphorismus
 hunc proxime sequens, ut eum rem ita in-
 tellexisse credamus, nos utcumque inducit.

Tamen cum ipsum *Senum Corpus*, non fenum ventriculum, *frigidum esse* affirmet, videretur in hoc Aphorismo universi corporis calorem intueri. Quemadmodum quoque hunc ipsi sensum *Galenus* in longo hujus Aph. Commentario, & præcipue in Libro adversus *Lycum*, tribuit; qui & ipse ejusdem cum *Hippocrate* sententiæ se esse manifesto ibidem declarat. Verum necdum ideo hos veteres autores, ita de calore variæ ætatis differentes, erroris incusare licet; cum quo id sensu intelligerent, addiderint. Si enim totum *Galenum* in Libris suis de Temperamentis patienter evolvimus, inveniemus demum eum ingenue fatentem Libr. 2. cap. 2. apud *Charterium* Tom. 3. pag. 60. „ Et quid opus est in tam diffi-
„ milibus Exemplum proponam? Cum
„ ipse aër, *qui simili sit calore*, varie tan-
„ genti occurrat, prout alias veluti cali-
„ ginosus, & halituosus, alias veluti fumo-
„ sus, & fuliginosus, interdum purus om-
„ nino

„ nino est. Igitur in pluribus, iisdemque
„ differentibus, æqualitas caloris consistit:
„ *quæ inconsideratis, quasi inæqualis sit, im-*
„ *ponit* ; propterea scilicet, quod non un-
„ dequaque similis adparet. Cæterum ho-
„ mo, qui rationes, quas proposui, ex-
„ penderit, & sensum in multa particula-
„ rium experientia exercuerit, is nimirum
„ *æqualitatem caloris in pueris, florentibus-*
„ *que, inveniet* : nec eo falletur quod al-
„ ter in humida, alter in sicca substantia,
„ repræsentetur : quippe lapis aliquando
„ pari cum aqua calore esse potest, nul-
„ lum eo faciente discrimen quod lapis sic-
„ cus sit, aqua humida. Ita igitur mihi,
„ cum pueros, juvenes, adolescentes, mil-
„ lies considerassem ; præterea eundem, in-
„ fantem, puerum, adolescentemque fa-
„ ctum ; nihilo calidior visus est nec puer,
„ quam ætate florens, nec ætate florens,
„ quam puer : sed tantum, quemadmo-
„ dum dixi, in pueris magis halituosus, &

„ multus , & suavis ; in florentibus exi-
„ guus , ficcus , nec similiter suavis esse
„ caloris occurfus . . . *Itaque neuter eorum*
„ *simpliciter videtur altero calidior* ; sed al-
„ ter , multitudine ejus , quod diffatur ,
„ alter acrimonia.

Qui postremis hisce temporibus de sanguine ac calore humano scripsere , unanimiter statuunt in media ætate calorem esse maximum , eo quod vasa robustissima illis sint , densique ac compacti salubriter humores : senilem vero ætatem , quod vasa morbose rigida , glutinosaque liquida habeat ; tum & puerilem , quæ vasis copiosis sed flaccidis , humoribus vero aquosioribus componitur , calore minore gaudere. Affirmant & doctrina mechanici attritus , & experientia thermometrorum , evidentissimam hanc Thesin esse , meritoque se huic totam suam de sanguine Theoriam superstruere.

Statu quæstionis utrinque proposito , liceat , pro omni responso experimenta no-

stra

stra enarrare, quæ hac intentione institui in Nosocomio Civico, quod cum Orphanotrophium, Gerontrophium, ac Ptochotrophium simul sit, ob idque 1400. homines alere soleat, aptam mihi præbebat experiundi occasionem. Experimenta omnia capta sunt jacentibus, & bene tectis circa thermometer hominibus. Et ne quandoque thermometer a thermometro tantillum differret, unicum modo adhibitum est, ea lege, ut post singulam adplicationem calorem deponeret, antequam denuo adplicaretur; licet forte cura hæc superflua fuerit. Omnes sani erant.

Primo sumimus Infantes.

2.	Dier. per $\frac{1}{8}$ hor.			94.	Grad. per $\frac{1}{4}$ hor.			95.
3.	—	—	—	95.	—	—	—	97.
3.	—	—	—	97.	—	—	—	99.
4.	—	—	—	97.	—	—	—	99.
3.	—	—	—	97.	—	—	—	97.
5.	—	—	—	95.	—	—	—	98.
7.	—	—	—	97.	—	—	—	99.
7.	—	—	—	97.	—	—	—	99.
10.	—	—	—	95.	—	—	—	97.

21.	—	—	—	95.	—	—	—	97.
22.	—	—	—	97.	—	—	—	100.
28.	—	—	—	96.	—	—	—	98.

Ab Infantibus devenimus ad Pueros.

4 $\frac{1}{2}$. *Annor. per $\frac{1}{8}$ hor.* 95. *Grad. per $\frac{1}{4}$ hor.* 98.

5.	—	—	—	95.	—	—	—	93.
5 $\frac{1}{2}$.	—	—	—	94.	—	—	—	97.
5 $\frac{1}{4}$.	—	—	—	94.	—	—	—	97.
5 $\frac{3}{4}$.	—	—	—	96.	—	—	—	98.
5 $\frac{3}{4}$.	—	—	—	96.	—	—	—	98.
6.	—	—	—	95.	—	—	—	97.
6 $\frac{1}{4}$.	—	—	—	94.	—	—	—	97.
6 $\frac{1}{2}$.	—	—	—	95.	—	—	—	97.
7.	—	—	—	95.	—	—	—	98.
7 $\frac{1}{2}$.	—	—	—	96.	—	—	—	99.
7 $\frac{1}{2}$.	—	—	—	95.	—	—	—	98.
7 $\frac{1}{4}$.	—	—	—	97.	—	—	—	99.
9.	—	—	—	96.	—	—	—	99.
9.	—	—	—	95.	—	—	—	97.
10.	—	—	—	96.	—	—	—	98.

Aetatem mediam sive adultam opus non erat examinare, cum infinita experimenta calorem dudum determinassent ad grad. 95. 96. 97. 98. Sed senes jam erant præprimis examinandi.

66. Amor. per $\frac{1}{8}$ hor.	97. Grad. per $\frac{1}{4}$ hor.	99.
64. — — —	96. — — —	99.
69. — — —	95. — — —	97.
70. — — —	95. — — —	98.
73. — — —	96. — — —	98.
76. — — —	96. — — —	98.
79. — — —	95. — — —	97.
80. — — —	95. — — —	98.
80. — — —	97. — — —	99.
81. — — —	95. — — —	97.
82. — — —	95. — — —	98.
83. — — —	96. — — —	98.
84. — — —	96. — — —	99.
90. — — —	96. — — —	99.
91. — — —	98. — — —	100.

Ergo in omni hominum ætate calor naturalis æqualis est, & latitudinem illum poscit, quam in Adultis requiri demonstravi. Erantque omnes illi infantes, pueri, senes, utriusque sexus; nec minores gradus hic sceminam notant, cum promiscue nunc masculi, nunc femellæ, minorem notarent majoremve gradum.

Igitur vetustissimi Autores, diversitatem in varia ætate caloris statuentes, eam ita expli-

plicuere, ut cum experimentis eorum observata apprime congruant; saltem quoad infantes, pueros, juvenes, atque ætate florentes. Recentiores occasione certi experimenti gaudentes, neglexere eadem frui; quia doctrinam suam de Attritu, genitore caloris, inconcussam credentes, corollaria inde ad Senes, Infantesque, deducta, similiter adeo inconcussa autumarunt, ut vel experimentis nullis indigere sese crederent, vel iisdem. & raris & neglectis captis, abunde confirmata esse concluderent. Adeo quippe arduum est Hypotheseos amore teneri, & interim a veritate non abduci. Utinam his exemplis demum sapientes, desineremus Humano generi, nobisque ipsi, tam turpiter imponere!

C A P U T VII.

DE

SINGULARI QUORUNDAM MEDICAMENTORUM VIRTUTE;

§. I. De Multiplici Autoris Naturæ intentione in creandis, perpetuandisque, Vegetabilibus, deque necessitate explorandi eorum vires: quibus intermiscetur seria Venenatarum plantarum Contemplatio. §. II. Varia tentamina instituta cum *Lysimachia* vulgari flore purpureo, *Polygala Virginiana*, & indigena quavis, *Marrubio*, *Abiete*, *Uva ursi*. Qua occasione exhibetur *Anatomicus Cadaverum conspectus* eorum, quibus *uva ursi* frustra data: proponiturque tentamen prognoseos de *Lithotomia* instituenda in eo, cui *uva ursi* non profuerit. §. III. Laus *Plantaginis latifolii* aquatici, & *Aquæ Calcis* in hisce iisdem morbis. Laus denique *Merc. Subl. corr. in sp. fr.* ad multos morbos.

§. I. **F**uribunda modernorum Philosophorum Gens impium hoc delirium ingrato pectore fovet, quod Vegetabilia, quorum Botanici, ac Medici, 20000. fere

fere numerantes, vix $\frac{1}{50}$ partem viribus noscunt, aperte demonstrent cæco penitus materiæ impetu, casu in motum actæ, prodiiſſe cuncta: Orbemque terrarum hinc multis quidem, iisque præſtantiffimis, rebus expletum fuiſſe, ſed ſimul etiam multis inutilibus, noxiis, letiferis. Nos qui infinita DEI clementia, ea felicitate gaudemus, ut Naturæ Autorem ex ipſa Naturæ contemplatione veluti præſentem intuemur præſentes, atque ad adorandum & amandum Illum fide adducimur, move-mur, ac veluti cogimur; nos, inquam, hanc impiam gentem deteſtantes, mentemque illis ſanam apprecati, tam certum habemus, quam quod certiffimum, OMNIPOTENTEM in Vegetabilibus ex nihilo creandis, perpetuandisque, plurimas habuiſſe, ſapientiffimasque rationes; quarum nonnulla pia conjectura aſſequimur, alias demonſtratione percipimus, plures denique ignorantia involutas adoramus, oſculamur.

Fru-

Frustra enim eum nihil fecisse arbitramur, qui Sap. 11. v. 12. *omnia in mensura, & numero, & pondere, disposuit*; qui ipse quaecumque fecerat, approbavit, Gen. 1. v. 31. *Viditque Deus cuncta quæ fecerat, & erant valde bona.*

Ac primum quidem videtur DEUS Tellurem amoeno hoc adspectu ornasse, hominem recreandi, exhilarandi, seque laudandi gratia. Integer Adamus & sanctus, hunc certo inde usum habuit, virtutis Plantarum medicæ, qui illibata sanitate perpetuo fruebatur, minime indigus. Atque & ipsi nos mortales, Adami deploranda profapia, læto Plantarum adspectu, mirifice nos delectari percipimus: & si recte sapimus, si intelligimus, quid sibi benignissimus noster Servator velit, Matth. 6. v. 29. asserens ditissimum, regioque splendore fulgentem *Salomonem, in omni gloria sua baud ita coopertum fuisse, quam cooperiantur Lilia agri*, nequimus non in summas Creatoris laudes effundi.

2. Numerosam classem constituunt Vegetabilia, quæ hominem vestiant, alant, tegant, calefaciant.

3. Animalia terrestria, aquatilia, volatilia, in usum creata hominis erant, primo ad vestiendum & agriculturam; postque Cataclysmum etiam ad nutriendum. Tum & ad usus Mechanicos, Medicos. Hinc plana Tellus, & Juga montium, Mare, quoque, ac Flumina, undique vegetabilibus ornanda erant; ut & alimenta inde haberent Animalia, & in iis nidos struendi, ponendique, tum & pullos alendi, sub iisdem habitandi, similesque alios inde usus captandi, occasionem nanciscerentur.

4. Coelo decidua pluvia in Arbores, Frutices, Plantas, incidens, moram trahens, earundemque propterea viribus imprægnata, partim se in telluris, montium. que, gremium, insinuat, fertilitatem forte iisdem concilians; partim juxta declives montes, perque eorum incilia, in terram

cadens , fontes ac flumina format. Unde opertet aquas quodammodo medicatas reddi ; ad potum proinde , ad lavacrum , ad balneum , fieri salubres.

5. Athmosphæra porro tota quanto-perene debeat plantarum impleri , saturari-que effluviis ! Ut ipsi Nautæ , odore illarum percepto intelligant se continenti proximiores fieri. Estque hæc una de causis , quæ aëra rusticanum adeo salubrem reddant.

Sed ad hanc , ut & ad præcedentem rationem , forsitan de impia Gente quisquam ipsam PROVIDENTIAM de non-curantia accusare audebit ; eo quod tum aër , tum aqua , æque venenatis , quam salubribus imprægnentur effluviis , particulisque : adeoque si hinc profint , illinc noceant vehementer. Sed O minutum philosophum ! Noxias vocat plantas , venenatas vocat , letiferas vocat , quæ quid proprie sint , ne intelligit quidem. Centenæ certe venena-

tæ sunt, & quia venenatæ, ideo salubres. Ita tota plantarum classis alvum, ventriculū, urinas moventium, venenata quidem, & inimica corpori, & letalis tandem fit, assumpta si fuerit copiosius; cognita autem debitis experimentis apta earum dosi, salutifera esse hæc tota deprehenditur classis. Verum venenum est Opium; iusta autem dosi moderator dolorum est, turbarum pacator est, stator est nimix evacuationis. Asa foedida copiosius data ventriculum subvertit, rarefacit humores, febrem creat; moderate sumpta corpori prodest, solvendo, reficiendo; tandem Gentibus nonnullis patinis molliter affricta, gratiam eduliis summam conciliat. Dulco-amaræ stipites majori dosi convulsiones, & deliria excitant; moderata vero spasmos convulsionesque solvunt, humores blande attenuant.

Hinc in eam sententiam facile inducimur, quod venena plurima ideo venena sint, quia nimia copia dantur; apta si dosi da-

ren-

rentur, egregia futura Sanitatis auxilia. Id quod judicium tamen, & prudentiam, & tempus, omnino requirit. Attamen nemini mirum videri debet, si quondam nonnulli sua horum specimina, probatosque salubres effectus, publice prodant. Quid ergo ille male feriatus Sophistes mihi respondebit, asserenti venenatas plantas merito creatas esse, quod ad salutiferum usum Athmosphæræ & Aquæ, earum effluvia in universa effluviorum miscela, justa proportionem, necessario requirebantur; quodque spes sit fore, ut demum etiam interno usuplicative externo, si semel æqua earum dosis determinata fuerit, Mortalibus egregios producant effectus? Helleborus, Felandrium, Cicuta, Solana varia, Bella Donna, Hyoscyamus, & id genus alia, noscuntur interno, externove usu, noxiæ plantæ non esse, ferrique, si non internè omnes, externe saltem posse; hinc fore ut aliæ venenatæ plantæ etiam Salutares de-

mum deprehendantur , spem merito faciunt.

Hinc 6^{to}. dico, Providentiæ divinæ placuit scientiam virtutum plantarum, instinctu naturali, casu, observatione, ratiocinio, manifestare, idque ita per cuncta sæcula. *A DEO enim est omnis medela.* Eccli. 38. *Altissimus creavit de terra medicamenta, . . .* *Ad agnitionem hominum virtus illorum, & dedit hominibus scientiam Altissimus, honorari in mirabilibus suis.* Crevere hac ratione experientiæ plurimæ, multaque vegetabilia in usus patefacere humanos. Sordidiæ ergo summæ foret veterum inventis aut nova adjicere nolle, aut adjici posse diffidere. *Dies diei eructat verbum, & nox nocti indicat scientiam,* Psalm. 18. v. 3. Sed quid demum est quod scientiæ nostræ incrementa retardat? Casus fortuiti, instinctus naturales, ut olim, ita & hodie obtinunt: prisca gens, in omnia attenta notabat ea, privatos publicosque communicabat in usus :

usus : nos vago impetu ad altiora nobis volantes , ea negligimus quæ & nobis coram , & ad nostrum aptissima captum observanda dabantur. Atque utinam adhuc inventis Priscorum uteremur ! Sed proh dolor ! plurimarum herbarum vires a Dioscoride olim , recentius a Dodonæo , Clusio , aliisque , enarrantur , laudantur , exemplis demonstrantur ; quarum nos nec usum , nec ipsam mentionem facimus : atque ita ad veterum sapientiam nihil novi addimus , sed partem adhuc detrahimus , oblivioneque sepelimus , sicque in Materia Medica longe pauperiores ipsis deprehendimur. Hæc porro me impulit causa , ut dudum viribus simplicium , quas vetustas cognovit , neglexit posterior ætas , ex oblivione resuscitandis totum me dederim , & nova quædam observata iis , quæ Tomis prioribus dedi , adjecerim.

§. II. 1. Quæ de *Lysimachia vulgari flore purpureo* , anno præterito notavi in

Diarrhœis ac Dyfenteriis a laxitate oriundis; etiam in Diarrhœis & Dyfenteriis olim a causa quavis alia productis, jamque causa priore devicta, a debilitate superstite postmodum continuatis; multa nova experimenta confirmarunt.

2. Radix *Polygalæ Virginianæ*, Antidota inventa fuerat adversus morsum serpentis, dicti Boicininga. Cum porro cadavera eorum, quos morsus iste sustulerat, coagulatum phlogistice sanguinem omnino exhiberent, Medicus Anglicus periculum fecit an eadem Radix, quemadmodum inflammatum morfu serpentis cruorem curat, ita eundem spissitudine inflammatoria oblitum quoque curaret? Votis experimentum respondit. Medici Parisienses idem experti sunt quacumque Polygalarum gallicarum specie. Vide *de Sauvages* Diff. Acad. *sur l'Inflammation*. In acutis inflammatoriis experimentum facere nolui, quia voto non respondens periculosum esse potuisset: dum enim

enim experimentum fit , non est dandum aliud interea remedium , siquidem alioquin ejus , de quo quæritur , efficacia non patefiat. Hinc quatuor diversis hominibus dedi qui ex inflammatorio morbo suppurationem habentes , continuo prava de integro symptomata a phlogistica sanguinis Diathesi paterentur ; sed binorum mensium tempore in uno , quatuor in alio , in aliis duobus quinque , datum remedium non profuit : sanguine ad necessariâs indicationes postliminio sæpius misso , crustam densam ac tenacem perpetuo gerente. Lac cum melle copiosum adjunxeram duntaxat ; tum quod hoc eidem indicationi inserviens , vires medicamenti infringere non posset , tum ne , si illud ipsum medicamentum non juvaret , reliquis artis auxiliis ægri omnino carerent.

3. *Marrubium* in abscessu , maxime Pulmonum , veteribus celebratissimum , in uno alterove casu aliquantum profuit ; in cæteris minime.

4. *Abies* in Scorbuto quocumque adeo celebrata , trimestri spatio a Puella maxime scorbutica affatim epota , nihil attulit levaminis , nunquam pro ichore ulcerum verum pus produxit.

5. *Uva ursi* variæ fuit in variis efficacæ , quam expedit exacte enarrare.

Omnes , quotquot suppuratione , eaque etiam valida , diuturnaue , ac reliquis auxiliis immorigera , in-Syftemate urinofo , Renibus , Ureteribus , Vesica , Urethra , Scroto , Perinæo , nulla labe venerea sublitescente , laborarunt , idque citra evidentia præsentis calculi signa ; hi passim & integre uva ursi curati sunt , & constantiam curæ hucusque referunt.

Qui manifesto calculo , calculifve laborarunt , horum plures tam constans levamen habent , ut dudum etiam a remedio quiescentes , nec doleant , nec ullum in Urina reddenda , retinendave , incommodum patiantur. Hos inter Octuagenarium nume-

ro, qui a 40. annis parvos lapillulos, multamque arenam, mucum tenacem, frequenter minxerit, doloresque inde passus enormes fuerit: ante usum hujus remedii omnem plurimorum Europæ Medicorum opem frustra expertus. Videantur etiam exempla n° 2. & 5. cap. seq. de Electr.

Alia Classis horum est, qui remedio hoc curati visi, denuo relaberentur: repetito remedio, iterum quasi curati: idque ita per 3. 5. 6. vices. His suadeo perpetuo continuent; quod a plerisque, dum belle habent, vix obtinemus.

Tertia classis eos continet, qui vel nihil leventur, vel ad tempus modo, ita ut sub continuato remedio æque gravia symptomata patiantur, quam eodem non usi; qui-que vel ad Lithotomiam confugere debuere, vel viribus fracti, adeoque ad Lithotomiam inepti, occubuerunt.

Hos posteriores inter Puer fuit, de quo Rat. Med. part. 3. cap. 4. pag. 162. n° 3.

Huic

Huic & levamen inconstans & febris hectica aderat, hincque ad Lithotomiam destinatus. Sed Dyfenteria tenesmode cum magno Recti intestini prolapsu oborta, operatio differebatur. Dyfenteria tandem sustulit illum.

Haud fane profuturam operationem fuisse testabatur cadaver. Vesica urinaria circum calculum in substantiam densam compactamque ita contrahebatur, ut vix superesset, quod lotium exciperet cavum. Calculus ad forcipis adtactum in centena fragmenta diffiliit. Erant autem Ureteres utrinque, tota sua longitudine, digitum ampli, atque ubique, inæqualiter tamen, callosi; proindeque, qui contraherent sese, prorsum inepti. Eorum in dextro & volvulus ingens, & tota interna superficies purulenta, pusque effundens. Renes toti callosi. Ita ut omne systema ouropoieticon, adeo immedicabiliter degenerans, nullum fere levamen a sectione Calculi retulisset.

Simi-

Similem harum partium degenerationem, sed graviolem, in viri 37. annorum corpore invenimus; qui è longinquo ad Nofocomium Fr. Miseric. delatus, Lithotomiam præ dolorum immanitate enixe rogabat, eamque certo subiturus fuisset, nisi, qua erat, insignis debilitas procrastinasset eandem. Tempore igitur intermedio, quo restaurandis viribus allaborabatur, simul uva ursi, cum paregoricis, data fuit; idque eo profecto cum successu, ut per aliquot septimanas dolores admodum mites expertus, solo virium defectu periret.

Utraque hæc Historia, similesque Tom. I. pag. 134. enarratæ, ostendunt ejusmodi mirificas systematis urinofi degenerationes frequentiores esse, hominesque tales nec remediis sanari, nec sectione posse. Quid enim proderit calculo sectum esse, & interim pelvim, ureteresve, adeo & amplos habere, & tortuosos, & callosos, & purulentos? Quæ cum a priore non cognosc-

gnoscantur, patet Lithotomiam eventus incerti esse; hujusque incertitudinis ægros, dum eam rogent, rogenturve, serio monendos esse.

An passim, quos Uva urfi non juvat, suspicione laborent ejusmodi degeneracionis? An igitur ideo, qui uva urfi immedicabiles sunt, etiam ad fortunatam sectionem inepti? Saltem contrarium nondum experti sumus. Callosa penitus pelvis; Callosus, & convolutus, fedequè pulsus, atque sua amplitudine intestinum potius quam ureterem referens, ureter, urinam fuscipiunt, copiosè colligunt, nec nisi ingenti cum difficultate in callosam, contractamque, vesicam impellunt. Quin & semidigitum crassa, eove crassior, vesica, universim callosa, vulnere facto non coëuns, perpetuum urinæ stillicidium, si vita adhuc perdurat, excitat.

Cum Uva urfi adeo egregia deprehendatur in systematis urinariæ abscessibus, occupor

cupor jam viribus ejusdem explorandis in quocumque aliorum viscerum abscessu : at vero pauciora ac recentiora sunt experimenta, quam ut hucusque certi quidquam pronunciare auserim.

§. III. Amicus, Medicus celeberrimus, laudes ad me scripsit *Plantaginis aquaticæ latifoliæ*, in infuso aquoso propinatae, ad calculosos morbos, ut eam cum uva ursi viribus decertare arbitretur. Factis experimentis effectus egregios cum laudato caro, jamque celebri nomine auctoris, fore ut evulgem spero.

Curæ Aqua Calcis, & Sapone, quondam peractæ constantes manent : hocque ipso tempore eandem denuo multa cum spe instituo.

Mercurii Sublimati corrosivi, spiritu frumenti misti, usus in Nosocomio copiosissimus, perseverat miras edere curas ; quasque præcedentibus annis inde habuimus, gaudemus constantes : malo semel bene curato,

rato, nunquam, nisi ad novos errores, repullulante. Hoc currente anno Amauroses incipientes, Pannos, Albugines, Annosos narium labiorumque exesiones, &c. aliquoties feliciter inde curavimus : fatendum tamen est in quibusdam casibus susceptam curam haud successisse.

C A P U T V I I I .

DE VIRIBUS ELECTRINIS.

§. I. *Curæ hoc anno vi electrica peractæ.* §. II. *Frustranea quædam tentamina.* §. III. *Apoplexia mucosa, terribilibus symptomatibus sociata inde curatur.* §. IV. *Difficultas curæ Paralyseos & Convulsionis in facie, reliquo corpore sano: miranda Naturæ via, ad desperatissimum ejusmodi casum curandum.*

Electricitatem sexto jam anno in hoc Nosocomio profecutus, eam mihi sententiam annuatim firmiorem gaudeo, quod inter præstantissima artis auxilia jure referenda sit : licet enim multis frustra adplicetur ; pluribus tamen eam sive emendationem

nem mali, five integram curationem conferre, quam nullo alio auxilio Ars præstare pôtuisset, indies testatius redditur. En iterum Experimentorum hujus anni compendium.

1. Deauratores, quorum felices historiæ anno ultimo dabantur, partim pulcre se habere pergunt, partim ab aliquot septimanis, quod fere nunquam a Mercurii hauriendis vaporibus quiescant, in antiqua mala incidere incipiunt, ideoque nunc denuo ad Machinam accedunt.

2. *Baumgartnerin* 59. ann. maligne ante biennium decumbens, nec rite judicata, dudum languit, ac tandem eousque restituebatur, ut incedere utcunque, ægre tamen, inciperet. Verum integro eo biennio Dysuria, & Stranguria, maligno morbo ortæ, miserrime eam hucusque excruciabant, dextraque manus tota ita debilitata manserat, ut prehendere eadem, tenereque, posset nihil; ultimi autem digiti perpetuo frige-

rent. Hanc & ad Machinam admovi, & uvam urfinam ipsi dedi. Utroque hoc auxilio bimestri spatio usa, ita restituta fuit sanitati, ut post integram curationem elapso mense me adhuc adierit, Deo præprimis, tum & mihi, quod utraque hac calamitate dudum jam liberata esset, gratias actura.

3. *Adam Schneider* 47. annos natus, mense Aug. 1758. illibata valetudine gaudens, dum Cithara ludit, percipit manifestò sinistro in capitis latere frigidam veluti auram suboriri, eamque sensim descendere ad Collum, pectus, brachium, & crus, ejusdem sinistri lateris; postquam tandem totum illud latus paralyticum deprehendit, mente interim semper sibi præsens. Linguam quoque impeditam in loquelâ, totamque genam sinistram adeo paralyticam deprehendit, ut facies tota fœdo sane adspectu dextrorsum distraheretur. Oculus porro sinister a primo invadentis mali momento tantopere debilitabatur, ut postmodum

dum parum admodum eodem videret. Remediis sibi a Medico suo datis, intra XI. septimanas id lucrabatur, ut paulo expeditior fieret linguæ motus, pedique insistere per momentum, bono Scipioni innixus, utcumque valeret; in cæteris per omnia idem. 7. Nov. ad Machinam primum admotus est, & 1750. 24. Febr. oculo lucratus nihil, genam perfecte restitutam gaudet, pede apto, integroque, ita fruitur, ut genu tantisper, sed rarius, titubet, brachioque etiam emendetur. Gavissus ita hac cura est, ut integram neglexerit.

4. *Magdalena Strekerin* 40. annum agens, a sexennio catameniis caret, pectore hinc anxia, multaue pituita obfesso, ægre vitam tulit. Accessit ut ineunte hoc, quem vivimus, anno, in cubitum ceciderit; tumidumque primo brachium, ac tumore remittente frigidum, immobileque, deinceps habuerit: cunctis digitorum unguibus secedentibus prorsum, & eorum in locum

difformi cornu enato. Primo quidem labefactatæ sanitati restituendæ intentus fui, eamque consequutus, mense Majo fœminam ad Machinam electrinam admovi. Inde emendatur, sed tarde admodum; emendanda citius, si diligentius accederet: quod autem frequenter desit, id inde ortum ait, quod si 3. 4. diebus sibi subsequenteribus adfuerit, artus omnes sibi vehementer doleant; ita quidem ut quiete nonnulla indigeat, antequam ille dolor evanescat. Sanitas interim corporis integra jam adest; ut etiam Brachii cura merito speranda sit.

5. *Georgius Huber* 56. ann. 3. Mart
1759. primum ad me accedens, novendecim annos narrabat elapsos esse, quod in Lumbis, ac Perinæo, validos sit passus dolores, multosque calculos parvos eminxerit. Dolores describit sic, ut ad lumbos perpetuo oriantur, pergantque deinceps ad inguina. Decem abhinc prægressis diebus, perceperat calculum a Rene pelli, per urete-

terem premi, mingique dein ceptum, in urethra subsistere, & integro quatrIduo ibidem hære; urina interim guttatim modo, ac furtim, transfluente. Eo tempore rus sibi petendum erat. Quo carpento vectus, calculum vi emisit, urinæque simul ingens profluvium: redeuntibus tamen mox symptomatibus antiquis.

Sub ipsum hoc tempus, nempe novem abhinc diebus elapsis, contigerat, ut nocte evigilans, totum brachium sinistrum sibi paralyticum esse perciperet, sequenti autem die totum latus & linguam. Ex his omnibus sola lingua jam emendatior erat.

Primum curam systemati urinario læso adhibui, data uva ursina: a qua mox opem mirificam expertus est. Interea temporis fumo aromatico partes paralyticæ, totaque spina dorfi, egregie fricabantur. Cum spatium Mensis calculi symptomata integre sillerent, ad Electream machinam eum cepi adhibere. Quarto porro die ad ipsam Ma-

chinam sentit novum descendente a Rene calculum, qui in urethram dein pulsus, horæ spatio mox emingebatur, ubi antea urethra hoc crudeli hospite 3. 4. diebus excruciarī solebat. Cum nec doluit deinde, nec calculos ultra excrevit, licet uva urſi binis modo menſibus uſus eſſet, neglexit hucuſque totam Paralyſeos curam, licet hæc ſpem curæ minorem non daret, quam cura calculi.

6. *Benedictus Erringer*, ann. 18. moli-
tor, 5. Julii 1759. hora ſexta veſpertina,
medio in opere ſuo, vertigine & ſomno-
lencia corripitur, & retrocadit, per $\frac{1}{4}$ ho-
ræ ſibi non præſens. Poſtquam ad ſe redie-
rat, pedibus inſiſtere neutiquam potuit, uti
neque integro quatrīduo poſt. Vena 8. julii
ſecta, cepit 8. & 10. Julii pedi inniti ſen-
ſim poſſe. Quod autem notandum, ab ipſo
primō mali inchoantis momento manus dex-
tra vehementer tremuit, idque diu noctu-
que, ut eadem perficere nihil, nihil tene-
re,

re, nec cochleare ad maducandum dirigere, posset. Non enim tremor modo aderat, sed etiam digitorum perfecta Paralyfis. Sic se habens adiit 23. Julii Nobiliss. B. *van Swieten*; qui re examinata eum mox ad me misit, quo ad Machinam adhiberetur. Adhibui. Vix decem ictus sustinuerat, quin curatum se diceret. Perfectissimeque curatus manet hucusque.

7. *Marcus Krafft* somno obreptus, capite suo incumbit brachio dextro. Expergefactus deprehendit totum brachium, manum, digitos, omni prorsus motu carere. Sensus admodum paucus adest: pollex vero & index interne externeque frigidi, ne vellicati quidem quidquam sentiunt. Malo jam 19. diem numerante, ad Machinam accessit: vires ejus 19. diebus expertus, sanitatem integerrimam recuperavit.

8. *Scibaldin*, me convenit 13. Sept. 1758. Hæc dudum jam cum Marito occupabatur plumbo veteri purificando, fun-

dendo, hincque jam a dimidio anno in Colicam pictonum incidens, dolores ventris enormes patiebatur, dolores quoque ac tremores per artus universos. Dedi ipsi singulis vespers unc. vi. Olei Lini & unc. i $\frac{1}{2}$. Syrupi Diacodii, unico haustu assumendas. Unde mox levata, post decimum haustum perfectam sanitatem nacta est; solo tremore redeunte posthac, ac perseverante. Ad Machinam tunc admovi, dedique pilulas ex sap. ven. unc. $\frac{1}{2}$. gum. amm. Ter. fol. tart. Mas. pil. Ruf. a dr. i i. & Suffimigium ad fricandum abdomen & artus. Hinc spatium 2. mensium perfectissime curata est, curata mansit, donec cupro, aliisque metallis, & semimetallis fundendis, iterum occupata, veteris mali reditum animadvertat, jamque ad Machinam denuo accedere inchoet.

9. Tentavi an Experimentum Electritatis succederet in curandis colli strumis scrophylisque, quemadmodum Act. Acad.

Mon-

Monſpel. id teſtantur. Binas puellas per 8. meſes conſtanter ad Machinam adplicui, ictu ad affecta loca determinato, ſed fruſtra fui. An mala inveterata nimis ?

10. Curationes Tom. 3. cap. 6. n° 17
19. 20. 25. inceptæ, dudumque protractæ, nondum perficiuntur, ſpem jam minorem, jam majorem, facientes.

§. III. Atque hæc de experimentis noſtris ſufficiant. Addam quod de viribus electreis ad Apoplexiam mucoſam mecum communicaverit celeberrimus apud Haganos C. H. *Velfè* : „ Virgo, inquit, ho-
„ neſtiſſima 24. ætatis annum agens, te-
„ nerrima, nuper Apoplexia pituitoſa cor-
„ ripiebatur, cum palpitationibus cordis
„ tam irregularibus, itemque adeo coſtas
„ pulſantibus, ut eas manifeſto audire, li-
„ cet ſatis diſtans, poſſem ; & præterea
„ cum largiſſimo ſudoris totius corporis
„ profluvio. Hæc cum morbo Chronico,
„ diverſiſſimis ſymptomatibus corpus con-

„ terente, & sanguinis (qui missus postri-
„ die nonnunquam in ferum totus liquefce-
„ bat, vix phlogisticæ placentulæ super-
„ stite vestigio) Missiones, sexenties for-
„ san, nunquam tamen citra summam ne-
„ cessitatem intra quinquennium repetitas,
„ exigente, diu luctata, & adeo enervis
„ erat, ut (in hac Apoplexia) evacuantia
„ quæcumque vetarentur; neque robo-
„ rantibus, aut spirituosius ingerendis, ob
„ deglutitionem prorsus sublatam, & lin-
„ guam exsertam, ulla spes superesset.
„ Quamobrem actutum Electricitatis *Neu-*
„ *pertianæ* periculum feci; sed non alio
„ cum eventu, quam quod palpitatio cor-
„ dis multum remitteret, & sisteretur su-
„ doris per aliquot horas eruptio, Apo-
„ plexiæ tenore eodem perseverante: us-
„ que dum, 18. inde elapsis horis, secunda
„ vice virtutem electricam diu in Nasum
„ determinarem, atque hinc primo indi-
„ cia sensus ingrati, deinde sternutatio-
nem

„ nem frequentem , tandem media hora
„ post Apoplexiæ fanationem felicissime
„ efficerem.”

Demum & hoc addiderim. Genarum Paralyfin & Convulsionem Chronicam, rarius curare solemus, quam desperatam relinquere. Præcipue si topicum hoc faciei vitium id unicum sit, quod toto in homine accuses. Absolvi equidem hanc curam nonnunquam, sed frequentius frustra fui. Et etiamnum foemina adest, quæ a bienio fluxum puris dextra aure passa, tandem anno 1758. exeunte, paralyfin fœdæ oculi dextri, dextræque genæ patitur, fluxu purulento auris nihilominus continuante. Oâavo jam mense ad Machinam accedit; oculo multum, gena fere nihil lucrata; quanvis & ad originem Rami infraorbitalis, secundi rami Quinti paris, & ad locum ubi portio Dura Septimi paris Aquæ ductu Fallopii emergit, pedem dictum Anserinum formatura, vis electrina

peculiariter determinetur. Ut autem in topica hac Paralyfi, ita quoque res se habet in Topica hujus loci convulsione : hæc etiam artem nostram ludere solet. Anatomicorum hujus Sæculi facile Princeps *Albinus*, narrabat nobis in Collegiis ejusmodi Convulsionem quondam sibi curandam datam fuisse, eamque, ad omnia rebellem, sese, Nervo infraorbitali abscisso, percussisse. Sed en alium casum, qui doceat quam expedire nonnunquam se norit miris Natura modis ! Communicavit illum nuperrime mecum integerrimus amicus, celeberrimus apud Haganos Practicus, Abrahamus *Weslerboff*, vir, cujus consilio arduis in rebus saluberrimo sæpius me usum esse gratus recordor. Casus quippe per omnia illi Albiniانو similis, tum maxime annosus erat, tum ad quævis artis auxilia, vimque electricam, penitus immoriger. Consuluerat clarus Amicus eundem nostrum venerandum Magistrum, qui curæ tam egregie quon-

quondam a se peractæ probe memor, eam tamem hic ambiguam suspicabatur ; cum qui proprie ramus incidendus, non poterat determinare. Sed en quid tunc contigit !

„ Fit interim , inquit , ut parvus tumor
„ Cysticus , mollis , enascatur in parte in-
„ teriore labii inferioris , continuo incre-
„ scens , mobilis neque dolens. Quum ego
„ & incrementum nimium metuerem , &
„ quod spasmodica affectio ingrata illa vi-
„ ciniam constans occuparet , hinc mihi
„ persuaderem , posse aliquid inde boni re-
„ dundare , curavi excindendum integrum.
„ Effectu laudatissimo ! Sanatus homo est ,
„ manus Chirurgi tempore brevissimo mor-
„ bum sustulit , quo Vir nobilissimus per
„ annos laboraverat , languerat , quovis
„ pretio redimere curationem dudum pa-
„ ratissimus.

ERRATA.

- Pag. 5. pro fæmina , lege fœmina , licet forte præstaret feminam scribere.
- Pag. 18. Lin. 15. pedis , lege pedes.
- Pag. 29. pro Diceta lege Diæta.
- Pag. 35. pro nihilum , lege quidquam.
- Pag. 45. Lin. 1. post, Compressio , lege , a Dionisio , ab Heystero , aliisque , commendata.
- Pag. 48. post, unicum lege , Medicamentum , &
- Pag. 66. Lin. 11. præponatur §. II.
- Pag. 68. Lin. 7. lege fluctuatio.
- Pag. 70. pro 6. lege pag. 6.
- Pag. 79. Lin. 12. jam aquis , lege jam ab aquis.
- Pag. 91. Lin. 18. pro errumpit , lege erumpit.
- Pag. 148. post 1151. lege Edit. Foës.
- Pag. 158. pro Embrode , lege Embroche.
- Pag. 177. Lin. 9. pro Vertebrali , lege Subclavia.
- Pag. 209. §. IV. Sic lege. An notaverit quisquam quod Serum Sanguinis recentis , tum optimum , flavescensque , tum etiam non flavum , ut quorundam hominum est , venæ sectione eductum.
- Pag. 238. Lin. 5. lege , An passim ii.
- Pag. 240. Lin. 3. lege , Annosas.





ANTONII DE HAEN

S. C. R. A. MAJESTATIS CONSILIARII
ET ARCHIATRI,

NEC NON MEDICINÆ IN HAC ALMA ET ANTIQUISSIMA
UNIVERSITATE PROFESSORIS PRIMARII

PARS QUINTA

RATIONIS MEDENDI

IN NOSOCOMIO PRACTICO;

QUOD IN GRATIAM ET EMOLUMENTUM
MEDICINÆ STUDIOSORUM

C O N D I D I T

MARIA THERESIA,

AUGUSTISSIMA ROMANORUM

IMPERATRIX,


HUNG. BOHEM. &c. REGINA &c. &c.



VIENNÆ AUSTRIÆ,

SUMPTIBUS HERMANNI JOSEPHI KRÜCHTEN.

M. DCC. LX.



SACRÆ, CÆSARÆ, REGIÆ, APOSTOLICÆ
MAJESTATI,
AUGUSTISSIMÆ ROMANORUM
IMPERATRICI,
HUNGARIÆ, BOHEMIÆ, DALMATIÆ,
CROATIÆ, SCLAVONIÆ, &c. &c.
R E G I N Æ,
ARCHIDUCI AUSTRIÆ, &c. &c.
MARIÆ THERESIÆ,
D O M I N Æ
SUÆ CLEMENTISSIMÆ,
ANTONIUS DE HAEN.



*Postquam Medici-
nam Hypothesi-
bus innixam fu-
gare, eandem autem solis,
quoad ejus fieri possit, ex-
perimentis fundatam, cum*

ad lectos ægrorum tradere, tum pro suggestu exponere, illustrare, amplificareque, mihi, AUGUSTISSIMA IMPERATRIX, ab ipso principio mei ad TUAM Universitatem Viennensem adventus, serio mandasses, nequeo citra summum animi oblectamentum, gratitudinem-

nemque , non meminisse,
quam gratiosissimo sane vultu
varia tentaminum meo-
rum specimina contempla-
vere. Cum enim latini
sermonis haud ignara, opu-
scula mea vovere non dedi-
gnabaris, vehementer vi-
debaris laudare Ducem me
sequi Hippocratem, quem
talem ubique Virum præ-

*dicari audiveras , qui nullo
unquam systemate implici-
tus , nullo partium studio
abreptus , nulla seductus
opinione , nulla denique ar-
rogantia elatus , e contra-
rio vero fidus , & solers,
& docilis , & indefessus
naturæ minister , naturam
in prospera adversaque va-
letudine , unice consulue-
rat,*

*rat, eademque simplicitate
& candore, atque detexe-
rat illam, in seros usque
traduxerat nepotes. Ap-
probabat præterea MA-
JESTAS TUA non nisi
summos Doctrinæ Hippo-
craticæ administratores,
imitatoresque, cum in fa-
cienda Medicina me sequi,
tum & ad legendos, & imi-*

*tandos , commendare Auditoribus: hos vero inter, duo maxima fulgentissima-que Medicinæ Naturalis lumina , duos naturæ genuissimos cultores , duos alteros Hippocrates , me in ore habere perpetuo ; scilicet Immortalem Boerhaavium , qui ut ubivis terrarum , ita potissimum
apud*

*apud TE, doctrinæ limpi-
dæ, nativi candoris, sa-
pientiæ fere immensæ, in-
defessi laboris, felicissima-
rumque ea de causa cura-
rum, fama fulgebat: Vi-
rum deinde, Archiatrorum
TUORUM principem,
quem & Orbis Medicus
universus ob incomparabi-
les in Boerhaavium Com-*

*mentarios summis semper
laudibus effert; & ego ob
Tyrocinii mei partem, Eo
Præceptore transactam, sa-
pientissimæque ejus Consi-
lia, quibus a triginta fer-
me annis fruor, æternum
venerabor; &, quod cul-
men humanarum rerum est,
quem IPSA TUA MA-
JESTAS propter Medi-
ci-*

*cinæ exercitium, quod in
SESE, quod in universa
AUGUSTA FAMILIA,
quod in Nobiliorum pluri-
bus, experta felicissimum
est, tanto honore condeco-
rat, tantaque existimatio-
ne ac benevolentia comple-
ctitur, ut ille sane comple-
mentum possideat omnis hu-
manæ felicitatis.*

Quæ

Quæ cum ita se habeant,
Quintum Operis Tomum
TUÆ MAJESTATI
ad pedes eo confidentius de-
pono, quo id testetur aper-
tius, id altius clamet, quod
ad REGIAM Voluntatem
magis me magisque accom-
modem, Medicinam, Du-
cibus natura, hisque fidis
naturæ ministris, unice

co-

*colendo, colendamque mon-
strando. Idque volupe sane.
Quamvis enim sola TUÆ
MAJESTATIS Intentio
sufficiat, ut demandatam
hanc mihi Provinciam stre-
nue administrem, tamen in-
situs ad Philosophiam Na-
turalem amor ad illam gna-
viter administrandam haud
exiguum affert auxilium.*

Un-

*Unde hoc ipsum Medicinæ
Professoris munus , quo a
septem cum dimidio annis
condecorare me dignabaris,
me recreat potius quam de-
fatigat , me unice oblectat,
me rapit totum.*

*Quapropter simul hanc
occasionem arripio publice
TIBI, AUGUSTISSIMA
IMPERATRIX, gratias
te-*

testandi, quas debeo, maximas, quod dum immeritum me honorificentissimo Archiatri TUI honore beasti, id ita moderaveris, ut munus Professorium commodissime, curatissimeque, sustinere pergam.

Dabam 8. Novembris
1760.

ELEN-

E L E N C H U S C A P I T U M.

C A P U T I.

De Febribus cum Exanthematibus,
quæ Petechiæ & Miliaria vocari
solent. Pag. 1.

C A P U T II.

De Hydrope & Tympanitide. Pag.
36.

C A P U T III.

De Hydrope Pectoris. Pag. 69.

C A P U T IV.

De Epilepsia & Convulsionibus. Pag.
117.

C A P U T V.

De Calculo, Uva Ursi, Lithontripti-
cis dictis, &c. Pag. 142.

C A P U T VI.

De Aneurysmate. Pag. 185.

CA-



CAPUT I.
DE FEBRIBUS
CUM EXANTHEMATIBUS,
QUÆ
PETECHIÆ ET MILIARIA
VOCARI SOLENT.

§. I. *Historiæ XVII. Aërorum, hæc Exanthemata plane symptomatica esse probantes: ostenditurque hac occasione perfectæ criseos in Acutis certitudinem nos sæpe non habere; sanguinem in Morbis, quos malignos vocant, & crassissimum sæpe, & maxime esse inflammatum; tandemque communicatur notabilis observatio circa prædictionem in Acutis ex Pulsu intermittente. §. II. Ex omnibus horum aërorum exemplis concluditur Exanthemata similia rarius observari oportere, si legitima curandi methodus adhibeatur; eaque, si contingant, praviæ potius Medicationis.*

Pars V. A tio-

tioni, quam Aëri, aut Climati, originem debere; paucis exceptis casibus, in quibus aut sponte, aut contagione, nascuntur.

§. I. **L**icet in ultimo de Febrium Divisionibus Tractatu de Exanthematibus Petech. & Miliar. fuisse egerim, tamen cum nova exinde Observata colligere licuerit, pondus rerum tantarum me adigit, ut nova hæc cum Publico communicem, unaque ex Nosocomii Diariis, omnium illorum, qui ibidem unquam hæc passi sunt, fidelem historiam tradam; quibus eorum, quæ in eodem Tractatu posui, evidentia, ni fallor, veritasque, patefcet.

I. Hoc verno tempore proxime elapso femina 22. annorum Febre valida laborans, quinto sui morbi die ad nos delata est; extantibus jam tum Petechiis. Vere ardens Febris erat, tertiam eo die habens exacerbationem.

nem. In summa omnium cruditate Petechiæ extabant. Igiturne hæ Criticæ? Certe cum nullum symptoma mitesceret, quin ingravesceret potius, Symptomaticæ duntaxat vocari merentur. Sanguis hoc die vena missus, crustam formabat portionem rubram densitate superantem. Die septimo ad quartam, eamque prioribus longe mitiorem, exacerbationem, febris sudore & urina maximam partem judicata; ad nonum vero diem, in quinto, eoque omnium levissimo insultu, urinis ac transpiratione integre judicabatur. Novem diebus perstabant Petechiæ.

Sana octiduo vixit; die autem 17. post morbi principium, ad primas carnes vitulinae degustatas, licet tenerimas, in febrim æque vehementem incidit: cujus altero die Miliaria alba, numero pauca, comparuere. San-

guis bis missus corio densissimo tegebatur. Nec numero Miliaria augebantur, nec diu perstabant. Imperfectum judicium contigit 23. morbi die, prægresso intermittente pulsu, per alvum; integrum vero 27. die, eodem modo, eodemque pulsu.

Die 29. nova Febris vehementissima oritur, in qua sanguis bis vena missus, singulis in vasis, æque magnam, densamque habet, quam olim, crustam. Nulla vero hic Exanthemata. Die 4. & 5. judicium alvo, urina, sudore.

Ex data historia nihil evidentius est, quam utrumque hoc Exanthematum genus minime criticum fuisse. Summa morbi cruditas; ejusque, postquam hæc effloruissent, validum incrementum; critica aliunde contingens posthac evacuatio; evidenter, arbitror, hæc demonstrant.

Quod

Quod eo magis notandum, quia hic casus ex rarioribus est, in quantum nobis adparet, in quibus nulla arte producta Exanthemata erant. Frigido quippe in loco, frigida tempestate, primis quatuor morbi diebus ægra jacuerat, remediis calidioribus minime usa. Ita ut hæc ne critica quidem fuerint, licet prava arte non producta. Confirmat id sententiam, quam egregius *Paulus de Sorbait* annis abhinc 90. ex Cathedra *Viennensi* docebat, *Petechias esse motum noxium & symptomaticum*. Med. Pract. Tract. 3. pag. 541. & 545.

Advertimus quoque Exanthemata putridæ sanguinis solutioni proprie non deberi, cum post eorum exitum idem sanguis, etiam iterato missus, densissimus fuerit.

Tandem Febris tanto cum furore tertio repetens nos docet, id quod

toties ad lectos ægrorum advertimus, perfectam non haberi, judicio jam facto, certitudinem morbi ita devicti, ut non fiat recidiva. Equidem quo omnes functiones perfectius, celeriusque, in integrum restituuntur; quo motus critici diebus judicatoriis exactius fiunt; quo denique evacuationes perfectiores, constantioresque, cum virium incremento, contingunt; eo minor adest relapsus metus: at vero hucusque non habetur ejusmodi certitudo, quæ excludat omnem omnino relapsus formidinem. Vidimus fane & in hac muliere, & in pluribus aliis, nihil judicio defuisse, atamen iisdem successisse relapsum. Nisi forsitan quis novum potius morbum, quam recidivam, appellandum idem esse arbitretur: sed difficulter profecto admittetur hæc opinio, si succedentis Febris cum præcedente simi-

similitudo attentius ponderetur. Itaque merito jure Medici omnem adhibeant diligentiam, ne in sex rebus non naturalibus quid committatur, quo repetat morbus: juvatque hujus incertitudinis serio monitum esse ægrum, monitosque ejusdem familiares; ne morbo male curato adscribant, quod a quopiam regiminis errore, aut etiam absconditis plane de causis, postliminio forte contingit.

2. Juvencula 20. annos nata, tertio Hemitritææ die Petechias jam habuit, nostrumque in Nosocomium die quarto illata est. Multæ sane hoc die conspiciebantur in jugulo, pectore, humeris, dorso, lumbis, femoribus, cruribus.

Notabile porro 1^{mo}. quod hæc femina die morbi tertio, ipso Hemitritææ accessu, summo mane, in frigido ad 27. gradus aëre, extra Civitatem

pedes iverit , nec motu per horam producto ullatenus incaluerit. 2^{da}. quod post meridiem intropulsos frigore humores, eosdemque plane crudos, valido sudorifero moverit; hincque crudis hisce ad ambitum corporis pulsis, Petechias consciverit sibi. Miri ergo nihil, quod ad 5. diem, cum valida Hemitritææ exacerbatione, Exanthematis intropulsio observaretur. Quare etiam illico, maligni quidpiam hic præfagiens, Cort. peruvianum dedi. Confestim inde convaluit, extra ordinem fluentibus mensibus, mox a Petechiarum recessu.

Hæ certe pessimo more expulsæ, penitus symptomaticæ fuere; eademque suo subito recessu alioquin nocituræ, jam & dato cortice, & profluis catameniis, subitam reconvalescentiam non retardarunt.

3. Femina 39. annum vitæ agens, Cardialgia acida crudeliter per annos vexata, totaque inde cachectica, gravi demum Peripneumonia corripiebatur, & ex Nosocomio, in quo multa Exanthemata grassabantur, die morbi quinto ad nos deferebatur. Maculæ in collo, dorsoque, rubræ, æque, quod profundius hærent, quasi eruptioni impares, suspectæ; omnium cruditas; morbike augmentum; suafere venæ sectionem. Sanguis crusta facile transcendenda tectus fuit, rubra autem parte dissolutus. Crescente ad diem 6. Febre cum anxietatibus, verisque Pulmonis inflammati signis, iterata V. S. est. Sanguis eductus priori similis, nisi quod ultimo in vase, sub alba tremulaque crusta, iuste compactus cerneretur. Die 7. una pustula alba Miliaris visa ad jugulum. Febris pravis cum sym-

ptomatibus perpetuo stipata, pulsuumque exploratione Homotonos quidem appellanda fuit, sed calore ad Thermometrum mensurato minime Homotonos. 9. & 10. die pauca, die 11. copiosa, eaque alba, in pectore Miliaria. 12. die paulo minus conspicua. 13. eadem iterum, ac nova præterea, in pectore conspicua. 14. die mortua est. Febris ab initio ad finem usque horrida fuit.

Historia mali docet 1^{mo}. Petechias contagione susceptas, nec sufficienter propulsas, morbi cum augmento adparuisse. 2^{do}. Miliaria eadem origine nata, quo copiosiora, eo & graviora, & magis fuisse letifera. Unde concludimus Exanthemata hæc, non a natura, sed a contagio genita esse; eademque minime critica, sed mere symptomata habenda fuisse.

Hic in transitu noto hoc exanthematum Contagium, ut illud Variolarum, Morbillorumque, se sæpe habere, non nisi prædispositos afficiundo. Præter alia exempla, memorabile illud Ancillæ est, quam suscepimus eo momento ex ædibus eductam, in quibus cubiculo, jubente Medico, arcte clauso, calidissimoque, inservierat Patri nobili, filiabusque duabus, Exanthemate Miliari omnibus successive enectis: Febre continua hæc apud nos decubuit, & sine Exanthemate brevi convaluit.

4. Juvenculæ, mensibus terrore suppressis, ingens brachii dolor, brevique post acuta Febris oritur. Die 11. Peripneumonia adest, albaque Miliaria confestim prodeunt, continuoque augentur. Die 14. Gangræna brachii & mors. Eo tempore nondum sciveram, quod posthac exper-

pertus sum, in Febre continua non remittente, ac vere inflammatoria, si Exanthemata adsint, morbusque rebellis sit, corticem peruvianum egregie prodesse.

A resorptu Ichoris gangrænosi nata pectoris anxietas, nata copiosa Miliaria, criseos nullam, ni fallor, suspicionem faciunt.

5. Femina vehementi ira exandescens, gelidamque affatim hauriens, Febre corripitur; & continuans interim ancillares labores, vagos ejus insultus per octiduum sæpe experitur. Tandem in continuam incidit, cum gravi pectoris anxietate, vehementi cephalalgia, multa siti, prostrato appetitu, vertigine, vigiliisque continuis. Eo in statu omnis auxilii inops, calida admodum tempestate, per integram septimanam, jacuit, jure carniū, & frigida aqua usa duntaxat.

Ac-

Accessit angina biduo durans, & sic demum octavo die continuæ suæ Febris ad nos delata est. Quo ipso tempore catamenia ipsi, octiduo maturius, fluere ceperunt. Febris validos artuum dolores sibi junctos habebat, vires autem nondum prostratas. Die 11. Miliaria maximam partem alba, pauca vero rubra, apparere; signis coctionis in alvo prægressis. Ab 11. ad 14. diem bene procedente Exanthemate, vomitus glutinosus vexabat, vel copiosæ pituitæ tremulæ, pellucidæ, vitreæ, per alvum secessus, vel noctes insomnes, pectorisque anxietates, imo novi, simulque feroces, artuum dolores. Alvo cocta partim judicata est 14. die, sed eâdem demum integre ad diem 17.

Morbus neglectus per 14. dies, humores crudi, ancillaribusque laboribus intempestive moti, & cum per

angustiora vasa transadigerentur, dolores rheumaticos excitantes; deinde decubitus per tantos calores in parvo squalidoque cubiculo, vix renovata atmosphæra, corpus ad Exanthemata necessario disposuere. Morbus vero post exorta Exanthemata, cumque eorundem non interturbato progressu, diris symptomatibus, cruditatem spirantibus, increescens, posteaque demum alvo judicatus, hanc profecto eruptionem minime criticam, sed penitus symptomaticam, declaravit.

6. Juvenis Febre continua putrida, gravi cum delirio, laborans, in Nosocomium inferebatur. Diem morbi primum exacte rescire non potui, cum ex ejus incerta, ac variata, enarratione, sextusne ab illo tempore dies, an octavus esset, ambigeretur. Saltem eo tempore crudam morbi

ma-

materiem Emeticis & Purgantibus vehementer moverat, ingentem præcordiorum gravitatem, anxietatemque, perpetuo expertus.

Præterea ex Nosocomio alio, ubi Exanthemata fere perpetua erant, in nostrum ductus erat. Interim sensim ad coctionem morbus tetendit, alvoque, & leni sudore, ad judicationem pervenit: urina interim sæpe enæoremate, & nubecula, carente, nec hypostatica unquam.

Judicio prægresso, incredibile quam cito, perfecteque, fanesceret; ita ut integris noctibus, idque sponte, dormiret, belle comederet, totasque obambulet per ædes. Sed biduo post, Miliaria totum pectus obsiderunt; quibus tum prodeuntibus, tum triduo post exsiccati ceptis, mirum quam bono somno, quam grato appetitu, quam facili corporis exerci-

ci-

citio, integraque prorsum valetudine, frueretur.

Neglectus igitur, pessimeque tractatus, morbus; decubitus primo pro Patriæ more in calida atmosphæra, idque in fervida tempestate, tandem infectus priore in Nosocomio aër, labem aliquam sanguini conciliare potuerunt; quæ demum crisi prægressa, & recuperata sanitate, expulsa fuerit. Unde certe nec origine, nec effectu, hæc Exanthemata critica fuerunt.

7. Juvenis femina ex eodem Nosocomio suscepta, hanc nobis anamnesin formavit. Tribus integris septimanis lassitudine spontanea, cruribusque nonnihil tumidis, laboraverat, eamque ob causam illud Nosocomium adiverat. Ibidem porro tum præstantissima cura, tum blanda quiete, se ita refocillatam experiebatur, ut

re-

repeteret famulatum: at vero eidem sustinendo inepta, in quotidianam Febrim inciderat, ad quam curandam quendam sibi pulverem coemerat, qui decies & novies alvum, vomitum autem ter, vehementer ciebat, posteaque venam sibi tundi curaverat. Tandem in continuam acutam intermittente conversa, quarto ejus die ad prius Nosocomium, quinto ad nostrum, delata est; Petechiis, dum nobis afferebatur, jam prodeuntibus.

Septimo morbi die subito hæ evanuerunt, datoque cortice, paucæ die 8. repullularunt. Die 9. pauca Miliaria alba visa sunt. Vomuit eo die pluries cum euphoria; ut & die 10. cortice interim uti perrexit, paucisque opacis Miliaribus, quæ ad posteriora colli perennabant, exceptis, intra octiduum integre convaleuit.

Morbus dudum neglectus, contagium, intempestivus crudæ materiæ motus, ægram hanc quarto Febris continuæ die Petechiis macularunt. Crevit postea morbus. Cortice fanatus est, licet retrocedentibus Petechiis pauca Miliaria successissent. Iterum nihil hic criticum.

8. Juvenis 17. annorum in neglecta per sex dies Febre continua ad nos adfertur. Die 14. Febris alba Miliaria erupere. Crevit iisdem erumpentibus vis morbi; & qui eo usque bonus fuerat, æqualisque, pulsus, inæqualis nunc rythmo, temporeque, factus est. Unde mox cortex datus; cujus sub usu pustulæ ad 5. diem disquammari incipiebant, & integra sanitas octavo post eruptionem die succedebat.

Die quanvis critico erumpentes papulæ miliares, nullam crifeos, sed præcipuam Symptomatis notam, gesserunt; morbo tunc admodum calamitoso factò.

9. Adolescens, qui a septennio spina ventosa, fœde exulcerata, laboraverat, in Nosocomium demum susceptus, diætam lacteam, & corticem peruv. spatio bimestri, idque bono cum effectù, adhibuit: at vero ulcere tandem sponte siccato, Febris continua acuta eum aggressa est. A 4. usque ad 9. diem cutis rubebat, ac si expectanda scarlatina eruptio foret. Die autem ipso nono Milia-ria solitis in locis comparebant; unaque vehemens ac sicca tussis, quæ eo usque diu noctuque ægrum vexaverat, nunc & mitior, & pulcre humida, reddebatur. Hucusque Exanthema istud, ut criticam evacuatio-

nem, facile quis salutarer; at vero ad sequentia attentus symptomaticam audacter pronuntiabit.

Etenim 11. die observabamus 1^{mo}. eam in pulsu inæqualitatem & intermissionem, ut quandoque, sed sine ordine, per integrum unius pulsationis spatium differret, moxque insolitam repeteret celeritatem. 2^{do}. Nauseam, vomitumque. 3^{tio}. Ulcus, quod eo usque siccum fuerat, jam fluidum, suoque postmodum in fluore continuum. 4^{to}. Subito turbatas urinas, quæ pluribus diebus limpidissimæ fuerant.

Igitur iudicium proprie fiebat die undecimo. An integrum? Equidem dubitabam, propter notabilem pulsum, in diem 20. usque, intermissionem; Febris tamen acutæ absentia, ac virium reditus, citra aliam, quam ulceris, evacuationem, iudicium perfectum ostenderunt.

Quid

Quid igitur intermittens ille pulsus? Sane ex eo, & circa criticum tempus, & cum prægressis quibusdam coctionis signis, observato, sæpius, autore *Solano*, evacuationem criticam, vomitu aut alvo futuram, prædixi ad ægrorum lectos in Nosocomio; id quod etiam in hoc ægro, eodem undecimo die, exacte confirmabatur. Attamen cæteris octo diebus, cum nulla per vomitum, alvum, hæmorrhoidasve, evacuatio, pulsu continuo intermittente, contingeret, experimentum fallere visum est. An quia cocta morbi materies, in corpore superstes, & ratione intermittentis pulsus aut vomitu, aut alvo, aut hæmorrhoidibus, eliminanda, ulcere effluxerit aperto? Numquid hic pulsus, si materia per vias a *Solano* indicatas non effluit, etiam ulceris, si adest, fluorem præfagiat?

10. Adolescens 17. annorum, ob nimii ponderis gestationem febricitans, bis secta vena ad nos adducitur, finiente jam die sexto, & jam tum in pectore brachiisque variegata, præ rubedine, cute. Crevit pessimis cum signis, & symptomatica maxime alvo, morbus. Die autem 11. alvus pulti similis, ac flava; simulque ad pectus maculæ plures, ad nullum certum eruptionis genus sese determinantes, conspectæ sunt. Quæque a nocthemeri spatio defuerat urina, copiosa nunc illa, & cum enæoremate fundum brevi petente mittebatur; Febris modica; flava, pulti-que similis alvus; &, projectus qui fuerat, renatus appetitus. Die 12. perseverantibus bonis hisce signis, vires majores, lingua nitidior, nox optima fuit. Die 13. veniam per conclave ambulandi, cibosque tum
mu-

mutatos, tum copiosiores; rogavit. Die 14. vero juveni per omnia sano Miliaria alba erumpunt, paucas intra horas iterum sicca; eodemque plane modo, spatio 5. dierum, continuo renascentia, & eodem die exsiccantia sese ac disquammantia, absque ulla vel minima labe sanitatis. Ita ut brevi Nosocomio exiret, constantique postmodum sanitate gauderet.

Maculæ rubræ ad sextum diem, adeoque per morbi augmentum, adparuere: pustulæ Miliaribus formæ similes, crisi jam perfectæ, ac sanitate recuperata, effloruerunt. Criticum ergo neutrum fuit.

11. Maligna admodum Febre Juvenis decubuit, variolas nunquam passus, easdemque valde metuens. Ad sudores validos, eosdemque continuos corpus, patrio errore, dis-

posuit, quotiescunque non aderam. Hinc die 5. maculæ rubræ in collo ac manibus visæ sunt, mox vero iterum evanidæ. Itidem die sexto. Posthac illum, ægrotans ipse, non vidi. Ab aliis autem rescivi rubris illis maculis alba Miliaria sensim accessisse, profusissimosque toto in corpore sudores. Ad diem 15. totus Miliaribus scatens, periit.

Nimio athmosphæræ, parvo in cubiculo, calore, coactisque sudoribus, utrumque Exanthematum genus genitum est; neutrum sane criticum.

12. Femina 24. annos nata, nono morbi acuti die ad nos defertur, maculis rubris in collo, facie, pectore, summo humero, jam a biduo deturpata, & ab earum eruptione in pejus lapsa: Porro ipso hoc 9. die duo observabantur: 1^{mo}. Retrocessio macularum, 2^{do}. intermittens pulsus

cum

cum torminibus ventris, cum tene-
fmo, & dein cum alvo cocta, mul-
taque, ad tertiam usque vicem re-
petita. Mitis exinde illico Febris.

Judicium factum multa suadebant;
sed insolita admodum debilitas post
subitaneum macularum retrocessum,
maligni quid portendebant. Unde
corticem extemplo dedi. Mox inde
recreata bis similem alvum posuit.
Die 13. tria visuntur in collo Milia-
ria, quæ perstant triduo. Die 17.
pauca alia accedunt. Ut & die 18.
20. 21. Sed, ut dixi, mox a sumto
cortice mire recreabatur, subitoque
reddebatur sana; ut cum paucis his-
ce papulis egredi domo, si opus fuisset,
potuisset.

Enarratione tota arguitur rubras
maculas, crescente morbo natas, pla-
ne symptomaticas fuisse; Miliaria ve-
ro post crisin quandam, postque ple-

narum virium reditum, nata, Criseos certe normam non habere. Forte prius illud symptomaticum Exanthema subito evanescens, viresque prosterbens, posthac bonitate corticis, paucorum forma Miliarium, effloruit.

13. Vir 27. annorum sexto Febris continuæ die Miliaria habet, quæ nunc plus, nunc minus, extabant, usque ad 12. diem, quo nova, pelliculadaque eadem & alba, prodire. Continua Febris nunc in remittentem, bis die exacerbantem, abivit. Die autem 16. & 17. æger copiosissimis scatuit Miliaribus. Febris inde exacerbatio major, viresque projectiores. Cortex ad 20. diem dari ceptus; cujus sub usu papulæ novæ. Sanitas integra brevi sequuta est.

Prodire prima Miliaria cum morbi incremento, imo morbo posthac
in

in longe periculosiorem mutato; posteriora itidem. Nulla proinde cri-
feos similitudo.

14. Eodem tempore mulierem, ulcerosa scabie sponte fere curatam, ceterum arthriticis obnoxiam insultibus, jamque universorum pene artuum rheumatismo laborantem, suscepi in Nosocomio. Febris acuta fuit, pustulæque nonnullæ rubræ in facie, unaque insignior ad nasum, aderant. Die 13. rubra Miliaria copiosa prodire in facie, collo, brachiis, cruribusque universis; una hora conspicua admodum, hora altera vix visibilia. Die 15. & 16. bene prostant. 17. adhuc magis. 18. maxime, sed cum intolerabili cephalalgia. Die 19. ipsi pedes Miliaria habent. Die 20. Miliaria rite quidem prostant, sed magna præcordiorum anxietas adest. 21. & 22. die

die cum copiosissimis Miliaribus enormes pedem, quo præcise olim loco Podagra, excruciant dolores. Die 24. cum Miliaribus & copiosis, & magnis, valida Febris. Miliaribus jam in facie siccescentibus ad 27. diem Febris magna. Decem postmodum dies elapsi sunt, priusquam ultimæ pustulæ exsiccarentur. Rheumatici dolores, Febre & Exanthemate jam evanidis, diu adhuc perstiterunt.

Contagium hæc femina vel jam habuit, cum ad nos duceretur, pustulis in facie rubris tunc jam maculata; vel in Nosocomio, Miliaria ægro mox descripto habente, contraxit. Ceterum, nemo, credo, criticas has eruptiones esse autumabit, qui cum iisdem videt morbi durationem, Febrim validam, judicium imperfectum.

15. Mulier 27. annorum sexta die suæ continuæ ac putridæ Febris numerosas acquisivit circum labia pustulas, ut & die 7. Ad finem autem hujus diei ficescentibus illis alba, eaque copiosa, succedere Miliaria ad scapulas, humeros, faciem, ac demum ad brachia universa, die 10. ac 11. pulcre prostantia, 12. numerosiora, 13. in toto dorso atque abdomine conspicua. Die autem 14. hæc omnia rubris Miliaribus plurimis interspersa, tam in priore, quam in posteriore corporis parte, inveniebantur. Die 15. his cunctis rite extantibus valida admodum Febris cum cephalalgia per integrum diem intolerabili, ægram vexavit. Die 17. ingentes anxietates adsunt. Cum 19. die examinarem an diuturniore decubitu, licet omnis adhibita cura fuisset, postica corporis haud ex-

coriarentur, vidimus totum dorsum lumbos, nates, crura, pedes, pedumque digitos, confertissimis Miliaribus scatere. Hoc die incipiebant exsiccari, exsiccatio tota brevi successit, integraque sanitas.

Quia eodem tempore cum binis posterioribus ægris hic decubuit, natum contagione Exanthema facile credimus; symptomaticum autem fuisse dies 15. 16. 17. abunde evincunt.

16. Femina Petechiis, antequam ad Nosocomium deferretur, fere enectæ, altera die mortuæ est.

17. Peripneumonicus in Nosocomio casu & neglectu Exanthemata passus; brevique inde curatus, crisi Peripneumonix posthac rite absoluta, Tom. i. hujus operis, ut & alibi, descriptus fuit.

§. II. Ægri ergo numero septendecim spatio sex cum dimidio annorum

rum Petechias, aut Miliaria, aut utrumque, in Nosocomio practico habuerunt, adeoque quinque circiter omni biennio. Pars media horum, Exanthemata, antequam ad me adferrentur, jam habuerunt; pars altera iisdem in Nosocomio practico correpti sunt: ergo inibi spatio trium annorum Exanthemata hæc quatuor duntaxat ægris eruperunt. Omnium vero duo tantum fuere, quibus id sponte contigerit; reliquis quindecim aut contagium, aut prævum regimen, medendive methodus, aut combinatæ hæ causæ, Exanthemata produxere. In nemine vero illorum ea critica fuisse, ipsa cujusque morbi historia abunde evicit. Ad historias autem illas quod spectat, exacte profecto eas ex majoribus Nosocomii Diariis contrahere valui, quod in hisce quidquid ægris nostris omni die,

qua-

quavis hora, singulo momento, contingit, exactissime, amplissimeque, adnotetur: unde etiam fit, ut ipsa hæc Diaria basin ponant dicendorum Medicinæ Studiosis ad ægrorum lectos.

Igitur irrefragabili experientia convictus, assero nemini meorum critica hæc Exanthemata fuisse. Imo si nunquam Petechiis, Miliaribusve laborantes vidissem, & nudam modo horum 17. ægrorum historiam legissem, quo, amabo! jure criticum id vocarem, quod sæpe diebus neutiquam criticis, sed admodum infidis, contingat? quod cum morbo & multum, & diu ingravescente, auctoque proinde periculo, fiat? vel etiam quo erumpente, criticæ evacuationes, in morbis acutis citra Exanthemata consuetæ, eæque sufficientes, prodeant?

Hinc concludo 1^{mo}. Si in aëre *Viennensi*, in quo Medicinam facio, adeo

adeo rarissima mihi hæc Exanthemata sunt, ut spatio 6½. annorum vix 17. exempla coram centenis testibus potuerim producere; si præterea plerisque ægris meis, citra Exanthemata, integræ contingant, felicesque crises; tunc Exanthemata illa, aliis Medicis adeo frequentissima, critica utique appellari non posse.

2^{do}. Si iisdem acutis in morbis Exanthemata mihi rarissima sunt, in quibus alii Medici ea frequentissima vident, ea sane ab aëre, seu nostro, quod vocant climate, neutiquam generari; at vero potius a certis quibusdam causis, quas ad ea generanda ponere soleant illi, ego autem non soleam. Quænam porro causæ illæ sint, has in *Traët. de Febr. Divis.* satis superque, ni fallor, ex pluribus, imo etiam ex celebrioribus *Germaniæ* Autoribus, demonstravi.

Ut igitur multa paucis dicam, differentia exercendi Praxin tanta est, ut differentia in morbis inde necessario generari debeat. Mistura, *Hofmanniana* Practicis *Germaniæ* dicta, eive similis, nunquam adhuc cuiquam nostrorum acuto in morbo, data fuit. Deinde 2^{do}. Pulveres absorbentes, si-
ve testacei, ac præcipitantes, nec non bezoardici, & cinabarini, nunquam iisdem in morbis in Nosocomio præscribuntur; puerperas, infantes, & præterea ex centenis forte hinc inde unum alterumve, cui ab acido Febris, excipiatis. Tertio Emetica aut Purgantia nunquam adhuc debui principio Acutorum dare. Ita ut *Hippocrates* Aphor. 1 - 22. & maxime in *Libro de Purg.* si-
ve in Fragmento dicto *Heurniano*, recte monuerit oppido raros esse casus illos, in quibus aut emetico, aut purgan-
te,

te, initio Acutorum, uti oporteret. Quam utique doctrinam in *Epidemiorum* Libris, passimque alibi, exemplo confirmavit. Quarto in calida, non renovata, putridis exhalationibus inquinata, athmosphæra, nunquam ægri includuntur, & fere suffocantur, in nostro Nosocomio.

Unde tam certum mihi videtur, quam quod certissimum, Exanthematum frequentiam a quatuor hisce causis positis oriri, ac perennare; & e contrario a Medicina *Hippocratica* eorundem observari raritatem. Hujus observati veritatem partim jam confirmarunt edita, partim brevi confirmabunt edenda in lucem variorum Diaria Nosocomiorum, in quibus demum Modernorum hæresin antiqua *Hippocratis* Medicina pepulerit. Merito igitur concludere mihi videor, quamdiu Moderni morem obtineant,

eos Exanthematum perpetuare crebri-
tatem; eorumque conscientias gravi-
ter oneratas manere, tum ea majori
molestia, quam suis ægris frustra fa-
cessant; tum graviore periculo, in
quod conjiciant eosdem; tum deni-
que multorum strage, quos Exanthe-
ma, dedita opera provocatum, quot-
annis e vivis tollat.

CAPUT II.

DE HYDROPE ET TYMPANITIDE.

§. I. *Viri Hydrops ascites cum monstroso Omen-
to, ceteraque Abdominis pinguedine mire
degenerante. Varia circa ejus causas, &
effectus. Observatio pertinens ad Historiam
Vomitus, qui secundum communes Patholo-
giæ leges inevitabiliter hic adesse debuisset,
adesse tamen haudquaquam potuit.* §. II.
*Hydrops feminae cysticus, ascitesque, Abdo-
minis; una cum hydrope pectoris, & inferio-
ris corporis intercute. Saccus ex Ovario ipso,
ejusve Hydatide, ortus, ventrem explens fere*
uni-

universum. §. III. In alia muliere Hydrops & cysticus, & ascites: saccus autem tam ab Ovario, quam a toto sinistro uteri latere, natus, in eoque una cum aqua aër contentus. Parvus admodum Thorax; pulmonumque pars notabilis aquæ, in quam injecta, fundum petens. Ad trinos hos casus impossibilitas Parisinos imitandi ostenditur. §. IV. Ostendit idem historia Hydropicæ ex Tom. 4. resumta, atque in præsentem diem producta. §. V. Prosecutio alius exempli ex Tom. 4. curam cystici tumoris, natura viam monstrante, enarrantis. §. VI. Tympania improprie dici potest Aqua, & Aëre, gigni; unde Veterum quorundam, id ita affirmantium, mens intelligitur: quanvis eo in casu alio potius, quam Tympanitidis nomine, morbus insigniendus esset.

DE hoc argumento fuse egi Tom. 4. Rat. Med. cap. 3. variasque curandi methodus examinavi, ut constaret qua demum ratione ejusmodi calamitates sive percurare nonnunquam, sive saltem tolerabiliores reddere, possimus. Verum cum proxime elapsus Academicus annus novas suppeditaverit, easdemque nota-

biles admodum, observationes, operæ precium erit hasce nunc recensere, fusiusque differere super hac quæstione.

§. I. Scriniorum faber 36. annos natus, sanus perpetuo, vino licet deditus, calidissimo die 25. Julii 1759. domicilium mutans, transferenda suppellectili plurimum occupabatur, gelidam procul dubio plurimam ingurgitans. Nocte insequente collo, lumbisque, dolere, simulque tumere ventre, cepit. Variis remediis frustra usus, ad *Fratres Misericordiæ*, mense Novembri, se contulit. Hydrope intra octiduum immense crescente, libras medicas aquæ limpidæ, flavæ, utcumque flocculentæ 68. Paracentesi eduxere: renato autem subito malo, 48. libras, elapso vix a prima Paracentesi octiduo, iterum evacuarunt.

Ventre hinc egregie depleto, expertissimus hujus Monasterii Medicus D. *Guarin* minitantes morbi reditum apud semper retudit medicamentis. Interim manifesto deprehendebantur in ventre tumores, qui prominentes globos hinc inde referrent. Perpetuosque fere & dolores & ardores miser, ad umbilici regionem, conquestus est. Unde demum collapsis viribus 13. Dec. periit.

Fratres Misericordiæ Lymphæ 2. aut 3. ut putant, mensuras cavo abdomine eduxere: cum vere ceterum totum inibi confusissimum cernerent, attulere mihi exemptam totam quantum viscerum ventralium molem, coherentem ita, ut in corpore fuerat. Cujus en publice factam Anatomen!

Ingens ventriculus adparuit, lieni arcte connatus; hepar autem mediocre. A fundo autem ampli, latique,

ventriculi, durum, crassumque scutum nascebatur, universum explens abdomen, usque in latera, imaque pelvis; viscerum proinde omnium conspectum velans, peritonæo hinc inde connatum. Eodem elevato intestina nuda patebant. Ut manifesto constaret ingentem hanc molem degenerans Omentum esse. Accuratius examine patuit substantiam ejus constare tuberculis innumeris, majoribus minoribus; hinc omnino informem, & inæqualem; lamellis Omenti ambabus, intime connexis, constantem. Cartilagineam naturam plura tubercula induerant. Parvumque ita *Winslowo* dictum Omentum pariter degenerans, cum Omento magno, cum gibbo ventriculo, cum cava hepatis regione, ante sinum venæ portarum, intime concreverat. Pondus autem Omenti totius $5\frac{1}{2}$. librarum fuit.

Om-

Omnes præterea productiones ad-
posæ, quæ, totidem Omentulorum
instar, ad Colon, Rectumque, ena-
scuntur, eodem modo degenerave-
rant; ad Rectum vero adeo, ut in-
de tota pelvis repleta cerneretur.

Mesenterium, ac Mesocolon, iis-
dem quidem tuberculis scatebant, sed
aliter dispositis; ramosis nimirum,
eumque productis in modum, quo in
Fodinis, vel subterraneis specubus,
Stalactica.

Sub duro Omenti tegmine com-
pressa locabantur, interque sese li-
gamentis, facile tamen dilacerandis,
connata Intestina. Omnis pinguetu-
do, quæ tria ad hepar ligamenta co-
mitari solet; omnis ea, quæ vesicæ
felleæ, ejusque ductui, circumfusa
cernebatur, nil nisi similem indura-
tam, atque globosam, referebat sub-
stantiam. Pylorus intus bonus, ex-

terius tumorem gerebat, qui & durus, & semicircularis, & plus quam tres digitos latos crassus, inventus est. Diaphragma tota sua inferiore facie duros hos sebaceos tumores, semidigitum crassos, gerebat.

Suspicaretur fere calore nimio fusam Omenti, Ventrisque pinguedinem, subito frigore, dum vespere a laboribus quiescebat homo, ad ventrem externum admissio, frigore quoque potus gelidi intro suscepto, coaluisse, induruisse, in irresolubilem hanc massam abivisse; sensimque appulsis humoribus auctam esse; atque hinc positam demum, quod in ejusmodi degenerationibus assolet, Hydropis causam fuisse. Utique dies fuit totius æstatis calidissimus, thermometro post meridiem in loco a reflectione radiorum immuni 90. gradum notante. Si in tanto calore

pon-

ponderetur labor, quem vehementem, quem continuum, sustinuerit, & conferatur cum observatione *Ruischii* fusam a motu pinguedinem in equo describentis, conjectura verisimilitudinem adipiscitur.

Nunquam, quod notandum, homo in hoc morbo vomuerat. Attamen præter alias vomitus causas, irritatio perpetua Ventriculi, tum & Pylorum premens, arctansque, moles, vomitum frequentem, ac vehementem, ex iterata experientia anatomica, excitare debuissent. Verum in hoc homine Ventriculus & utrinque, & toto fundo suo, tam duræ, tam crassæ, tamque ponderosæ massæ, adeo intime adnatus erat, ut videretur, ne a fortissimo quidem Emetico in convulsivos vomendi motus contrahi, agitarique, potuisse. Bilis in Cystide copiosa, aurantia, tenax.

§. II. Mulier 52. ætatis annum agens, adhuc menstruans, a 12. retro annis tussi vexata, alvo perpetuo segnis, curat sibi pro consuetudine majali venam tundi; ex eoque tempore fluore menstruo caruit. Brevis postea dolorem in Hypogastrio quidem toto, sed sinistro ejus in latere intensiorem, percepit; ut ultra in illud incumbere nullatenus posset. Crevit sensim abdominis moles, ita tamen, ut cutis & muscoli semper flaccidi manerent, prehendique ac complicari, possent, præterquam ad umbilicum. Dolorem deinde in dextro hypochondrio conquesta est, versus costas ac ventriculum se extendentem; qui tamen posthac minus observabatur. Quinque septimanarum spatio ventrem ego sæpe sollicite tangens, dura omnia deprehendi, præcipue utroque Hypogastrii
in

in latere; fluctuationem vero liquoris nunquam. Tandem contigit, ut dum incederet per plateam, acutum sinistra in abdominis parte dolorem, cum quodam dilacerationis sensu, perciperet. Ex illo die manifesta humorum undulatio ab utroque umbilici latere, in Epigastrio potissimum, percepta est. Jamque integumenta, & muscoli abdominis, olim adeo flaccidi, vehementer tensi, expansique observabantur. Ventris crurumque Hydrops intercus hisce se junxit.

Qui cysticus olim Hydrops fuerat, cum nunc, dilacerato sacco, Asciten produxisse rati, ad Paracentesin devenimus, apertura solito altius facta; quia infra nulla undulatio, sed magna potius durities. Unde nobis videbatur callosus, crassusque faccus, licet infirmiore quadam plaga
cre-

crepuisset, multisque esset evacuatus aquis, tamen dura sua mole, lymphæ forte multa adhuc circa ejus fundum existente, hanc efficere Hypogastrii duritiem.

Paracentesis 7. Nov. 1759. instituta, 22. propemodum libras medicas fusci, turbidi, spissi, liquoris eduxit. Ventre inde plurimum evacuato, femina veluti reviviscere tridui spatio visa est. Verum brevi adeo tempore liquor undulans recrevit, ut propter anxietates auctas, suffocatamque respirationem, cogeremur 31. Nov. repetere Paracentesin: qua tamen haud ultra 16. libras educere potuimus.

Vix inde perceptum solamen, quod anxietatum alia longe, quam olim, se causa prodiderit. Decubitus in dextrum latus commodior, subita a primo somno excitatio, & suffocans

eo tempore anxietas, Hydropem dextri thoracis lateris innuerunt. Ita tamen, ut sinister thorax haud omnino ab aquis videretur esse immunis: diutius enim in dextrum latus jacentem suborta nonnunquam nova anxietas in sinistrum latus convertit.

Diuretica & ante, & inter, & post Paracenteses, cujuscunque generis, etiam varia Purgantia, nullam opem tulerunt. Exigua alvus, & pauca atque lateritia dicta urina, tantum prodierunt. Conamina nostra ad aquas exulceratis, aut scarificatis crucibus educendas, palliarunt quidem aliquantisper, symptomata autem non abstulerunt. Ad 15. Jan. 1760. obiit.

Cadaveris venter valide fuit, æqualiterque, tensus. Aperto prudenter Peritonæo, corpus ingens, fuscum, durum, totum quantum explebat abdo-

domen, ab ima pelvi, ad usque lienem & hepar. Idem illud, variis in locis, expansionibus firmis, membranosis, & adiposis, cum Peritonæo concreverat, præsertim circa umbilicum, & in eadem cum umbilico latitudine, sinistro in latere, idque transversim, latitudine quatuor digitorum; deinde & per tres, quatuorve digitos deorsum, ut cum prima transversa adhæsione angulum fere rectum componeret; etiamque hinc inde ad latus dextrum.

Examine eo usque producto patuit vel Ovarium dextrum esse, vel ex Ovario Hydatidem natam, quæ totam hanc expansam molem produxerat; intus plenam subrubra aqua, quæ 24. libras ponderabat, quæque igni imposita, in scissilem abibat materiem. Saccus porro totus facie sua interna mire exulceratus, & hinc tuber-

berculis, seu sebaceis, illinc ichorosis, iterumque alibi cartilagineis, aut etiam saniosis, plenus.

Quod vel Ovarium, vel ex eo natam Hydatida, hunc faccum formare dixerim, id ideo dixi, quod ambigui hæserimus utrum corpus quoddam, quod ad facci radicem inveniebamus, Ovarium ipsum, an vero separatus parvus faccus esset? Sinistrum Ovarium in varios degeneraverat tumores. Uterus mutatus fuerat in duram substantiam, eamque carnosam, & difficulter perscindendam; crassam adeo, ut vix in utero cavitas, nisi prope ejus orificium, superesset.

Univerſa pene Intestinatorum moles versus lienem trusa erat. Ventriculus pro more ingens; cum is, compressis adeo intestinis, vehementer distendi, inflarique, soleat.

In thoracis cavo dextro rubicundior adhuc aqua, quam ea, quæ in magno sacco hæserat, ad trium librarum pondus inerat, verum non, ut illa, in duram massam ad ignem mutabatur; pauca namque pellicula superstite evaporabatur tota. In sinistra thoracis camera, in qua aliquam, sed copia minorem, aquam, vivente femina, suspicati eramus, nulla aqua inventa est. Pulmo lateris dextri vix mediam ejus altitudinem occupans, adparuit condensatus, ac veluti ad ignem crispatus. Idemque inferiore sua tota media parte, dum in aquam conjiceretur, ejus fundum petebat; innatabat vero superiore. Interna pulmonis substantia sat bona, sed lata ejus in dorso cum pleura cohæsiō.

Tota superficies inferior Pulmonis, Pleura, Diaphragma, Mediastinum, id est, quævis partes aquæ

con-

contiguæ, plenæ fuere tuberculis variæ magnitudinis, semiscirrhotis, purulentisve, aut saniosis. Lien quadrifariam, profundaue incisione dentatus; durus. Hepar albescens & compactum. Vesiculæ bilis profundissime tinctæ copia duas pondere uncias superabat: ineratque vesiculæ calculus, quadrangulus fere, trium linearum diagonalem habens, spiculis innumeris, ac parvis, splendidisque lapillis concretus, exusto carboni rudioris adspectu haud absimilis. Nulla feri in encephalo redundantia, & quæ pauca aderat ventriculorum anteriorum lympa ad ignem non coaluit.

Ex historia morbi, & sectione cadaveris, id videtur colligi oportere, quod mulier ista primum Hydropem cysticum passa fuerit; quod deinde saccus parva quadam in plaga cre-

puerit, & Asciten effusis produxerit aquis; deinde quod parecenteses aquas Ascitis duntaxat eduxerint; præterea quod lapsu temporis concidentis sacci apertura, cujus vestigium invenire non potuimus, consolidata fuerit, sicque regenerata aqua sit, quæ saccum in eam, quam in cadavere deteximus, extenderit molem. Probabileque admodum, eam sacci crassitiem impedivisse, ut vel morbi principio, vel sub finem ejusdem, undulantem perciperemus Lympham. An ideo, quod femina a 12. retro annis sicca, eaque valida tussi laborasset, Hydrops thoracis eo, qui abdominis, longe annosior? Nunquid, quod posteriore anno menses adeo irregulares, ac paucos, habuerit, & tamen Plethorica existeret, uterinum systema obstructum, atque induratum, habere ceperit?

§. III. Sub idem tempus aliam, Quinquagenariam suscepi, quæ bona semper, ut ajebat, valetudine usa; nisi quod febre intermittente, seu quotidiana, seu tertiana, laborare consuevisset. Quas quidem febres largiore vini potu, quem impense amabat, semper se dispulisse asseverabat. Catamenia tarde incepta, maturius finita, pauca perpetuo & irregularia, habuit. Quinquennium elapsum esse ajebat, ex quo semel urinam mittere, præ adstantium verecundia virorum, impediretur: elapsis aliquot deinceps horis se ventre doluisse, urinam vero, quum mittere gestiret, nullatenus mittere potuisse: fomento tamen ad Hypogastrium vespere adhibito paucas reddidisse guttulas: remediisque postera die a Medico acceptis iterum guttatim eam prodiisse, postea autem sensim abdo-

minis tum tumorem tum dolorem se percepisse. Adjungebat porro elapso ab illinc mense se, vehementer sitientem, copiam gelidæ immensam hausisse; cumque tota insequente hyeme admodum siticulosa foret, plurimum bibendi necessitati parere se debuisse; nec unquam nisi stranguriose reddere potuisse urinam.

Porro ventris mole crescentis extensionem, eo usque æqualem, ut ait, perceperat; cum vero plurimorum Medicorum opem frustra esset integro triennio experta, & tandem Decoctum Juniperi diu affatimque hausisset, ventrem quidem multum concedisse, sed etiam admodum inæqualem tactu, figuraque, redditum esse deprehendebat: relicto autem eo Decocto, advertit antiquam ventri molem, antiquam rediisse æquabilitatem.

Ex hac sæpe repetita, eodemque semper modo enarrata, ac confirmata Anamnesi, conclusimus cysticum Hydropem adesse; cujusnam visceris incerti quidem, probabiliter tamen obstructione systematis uterini natum; eique demum asciten junctum esse. Quippe Catameniorum modus hoc ipsum systema dudum laborasse indicaverat nobis: annosusque vini abusus, frequentiores quoque narium hæmorrhagiæ ad causam proegumentam accedentes, morbum præsentem gignere potuisse nobis videbantur; ita tamen, ut continuus aquæ abusus eundem vehementer auxisset,

Urinosusne Hydrops forsan non fuerit si quis suspicetur, respondeo Hydropem urinosum celeriter perimere, hunc vero jam integro perstitisse quinquennio. Sed præterea Hydro-
pis causæ pridem in corpore extite-

re, antequam urinæ retentio nasceretur.

Decoctum Juniperi multam sane ascitis lympham diuresi eliminavit, quum venter ita detumesceret; sed ascite evanido cysticus Hydrops cum omnibus suis tumorum inæqualitatibus eo manifestior adparuit. Confirmavit hanc phænomenis hujus explicationem ventris renato ascite æqualitas.

6. Nov. 1759. Paracentesi eduximus 56. libras liquoris, qui fuscus, atque instar potus Chocoladæ spissus deprehensus fuit, integraque septimana asservatus non fœtuit; igni autem a principio educationis impositus, pauca sui massa coagulabatur, plurima sui parte in auras evanuit. Principio, ut fit, ab operatione recreata, viribus solito citius decrevit, perpetuisque tum anxietate, tum pertinaci diu-

diurnoque singultu , 19. ejusdem mensis obiit.

Venter monstrose inflatus. Musculi abdominales tenuatissimi. Peritonæum denso cum sacco , in cavo ventre contento , hinc accretum , illic liberum. Sacco levi vulnere pertuso , mox venter , flatu sibiloso erumpente , multum detumuit.

Saccus ex ima pelvi supra umbilicum , ac per totam ventris latitudinem adscendens , fundo suo terminabatur latis circiter quatuor digitis infra cartilaginem xyphoideam. Omentum supra saccum sub hepate locabatur , & hinc inde ad ejusdem lobi majoris crepidinem , tum & ad totius sacci fundum , adhærebat , & connatum erat. Thorax minimus fuit , nam hepar tam alte sub costis recondebatur , ut gibbo suo ultra tertiam (ducto a superioribus numero) ad-

scenderet; eodemque modo diaphragma medio fui. Cellulositate quidem facile dilaceranda faccus pluribus in locis cum peritonæo connexum; ad latera vero, & in Ilibus, ligamentosis productionibus, non nisi cultro separandis, cohæsit. Origo ejus ab Ovario sinistro, totaque uteri sinistra parte; fundi sui postica plaga cum intestinis tenuibus unitus ope ligamentorum membranorum, non tenacium, sed digito facile solvendum. Tenuia intestina omnia fere in Epigastrio sinistro convoluta: suo Colon loco. Jamque in inguine dextro, iisque cunctis in locis ubi faccus a cohæsiōe cum peritonæo liber, ac toto abdominis cavo, ascites erat. Aqua ascitis minime fœtens; ea autem facci, fusca & fœtida fuit. Ipse autem faccus inæqualiter crassus, intus tuberosus, sanio-

sus,

fus, semipurulentus, tota sua interna substantia. Aër, qui sibilo exiverat, ad anteriora facci locatus fuisse videtur, hincque, facto vulnere, exitui aptus. Substantia facci hic semilineæ, ibi lineæ, alibi 2. 3: linearum; in latere vero sinistro digiti, imo pollicis, crassitudinem inæqualem ac tuberosam, habebat.

Circa uterum nihil non confusum. Examine tamen patienter instituto, patuit. Ovarium ipsum, dum extendi inciperet, cum laterali uteri superficie cohæsisse; Tubam Fallopianam implicuisse sibi, eandemque ad sesqui spithamæ longitudinem extensam, secum duxisse, sic demum occupasse ventrem fere totum. Habebatque ad suam originem appendiculum, aqua similiter repletum. Dextrum Ovarium diametri sesqui pollicis, lympa gelatinosa repletum erat.

Igitur Paracentesi eductus fuit liquor turbidus, non foetidus, in cavo abdominis ascitem faciens; qualis etiam a morte ibidem deprehendebatur. Libere enim effluere sub Paracentesi potuit e locis a cohæsione cum peritonæo liberis. Hincque factum, ut etiam in vivente undulatio perciperetur aquarum.

Docent porro hi tres casus, me, *Tom. 4. Rat. Med. cap. 3.* haud immerito aliquas, easdemque haud leves, adnotasse difficultates, in exsequendo erudit. *Parif. Chirurgorum systemate*, quo statuerant, eductis Paracentesi aquis, vulnus insigniter dilatandum esse, apertumque servandum; ut & omnis posthac renascens liquor, abdomen alioquin iterum extensurus, inde extillaret perpetuo, & saccus ita concideret, complanaretur, convolutusque concrefceret, ut
dein.

deinceps ultra extendi nunquam posset.

In I. enim historia Hydrops renascens præcaveri quidem potuisset, lata servata ventris apertura; sed Omentum ita monstruosum non modo inde mutatum non fuisset, sed aëris allapsu in sphacelum dirum, subjecta sibi omnia destruentem, abivisset.

In historia II. & III. saccus in Paracentesi percissus non fuit; percindendus ergo fuisset. Ecquis vero pollicis forte densitatem offendens, nescius proinde quid forte perscinderet, cultro penetrare ausus fuisset? Haud enim id in vita, ut quidem in cadavere, illico patescit. Nec concidisset saccus, sustentaculis quippe & adhæsiionibus validioribus cum peritonæo cohærens. Quid vero in substantia ulcerosa, scirrhusa, saniosa, adeo crassa, vulnus effecisset?

Quid

Quid demum aër? Dira certe carcinomata, quæ mutuus binorum pendens facci laterum affriktus auxisset vehementer. Quodsi demus aperturam forte fortuna in tenuiore facci substantia, ut latis in plagis antè, postèrèrque erat, penetraturam fuisset, quid inde non timendum ab Intestinis? Compressa hæc olim, jamque libertatem naçta, & flatibus distenta, aut colicis expansa doloribus, versus locum minime resistentem, faccum, seu ejus parietem posteriorem, protrudere, extrudere, & ventrem extra ventrem, monstrosamque formare Herniam, potuissent. Mitto nunc, quæ de degenerascente Ovario exscindendo, etiam ab iisdem clàris viris proposito *Tom. 4.* dixi. Utique in tertio hoc exemplo patuit Ovaria, dum extendunt sese, quandoque uterò primum adplicari, eide-

dem.

demque arctissime uniri: Ovarii proinde extirpationem majoribus difficultatibus premi, quam quidem theoretica ejusdem contemplatio suggessisset.

§. IV. Prosecutio historię mulieris, de qua *Tom. 4. cap. 3. pag. 67.* difficultates confirmat easdem. Sic enim res nunc cum illa se habet. Tumor abdominis post Paracentesin semper recreverat, undulans nunquam. Hydragoga vitam hyeme præcedenti, bonaque veris parte, tolerabilem ipsi reddiderant. Maji vero 10. proxime elapso, motum exercens validum, pondusque elevans, crepitum in ventre percepit, veluti quid intus sibi dilaceraretur, simulque subitum ventris incrementum. Fluctuationem nunc manifestam iterum deprehendebamus.

Ut anno præterito præter cytticum tumorem habuerat asciten, Paracentesi eductum, ita etiam nunc, vel sacco ipso vi lacerato, ut in historia II., vel alio tumore hydatico rupto, asciten adesse rati, 14. Maji Paracentesi eduximus libr. 20. liquoris turbidi fusci, tenacis, haud fœtentis, vix imminuta abdominis mole. Unde potius alterum a primario sacco disruptum ea vi fuisse credimus, cum primarius ille, intra octiduum a percepta dilaceratione, æque magnus, extensusque, quam olim prehenderetur. Liquor eductus secessit in gelatum, quod lumini admotum pellucet, & in liquorem fuscum, fere limpidum, qui ad ignem omnino coagulatur. Toto eo tempore notavimus ejus urinas nunquam habuisse lateritium sedimen, ut alias id hominum genus habet; sed tale, quod

quod a bona in acutis hypostasi haud facile interstinguas.

Post hanc Paracentesin aliud quid, præter descriptam formam, extensionemque, venter notandum exhibuit. Circumscriptus quippe tumor ab Hypogastrio ad umbilicum, & ultra, extensus, durusque idem, atque ovalis, deprehenditur; haud sane aliter, ac si ultimam graviditatis metam attingeret. Maritata cum sit, graviditatis datur una cum Hydrope, tum cystico, tum ascite, possibilitas. Id vero incertum. Casus famosus *Drelincurtii*, cui similem etiam *Tom. 4.* descripsi, abunde evincit uterum posse, dum privato turgēt Hydrope, simulare graviditatem. Tempori utique hoc concedendum. Interim præter alias sufficientes rationes haud imitandi. *Parisi*nos, nova hæc nobis, eaque urgens sane ratio,

Pars V. E tio,

tio, faccum haud aperiundi, sistebatur.

Dies interim docuit diem. Elapsis nunc fere quinque mensibus, dum hæc sub prælo sudant, ex quo subdubitare ceperimus, mutatio figuræ, incrementumque abdominis, plane arguunt, personatam graviditatem fuisse. Quamvis igitur graviditatis metus haud existat ultra, subsistunt tamen graves aliæ rationes abstinendi a cura proposita.

§. V. Anno proxime præterito innueram casus nonnunquam dari, ubi id ipsa per sese natura facit, quod in proposita methodo & difficile deprehenderamus, & periculosum, & sæpe impossibile. Videatur hist. mulieris *Tom. 4. cap. 3. pag. 114. & 115.*, quæ scilicet in graviditate, præcipueque deinde a partu, ab umbilici dextro latere tumorem gerebat,

bat, qui manifestam puris, arctiore spatio contenti, fluctuationem exhibens, aperiebatur, pusque copiosum per multos dies fundebat, cum imminuta duritie, & ceteris bonis inde sequentibus signis. Quandiu potuimus, locum in illa servavimus apertum, quia purulentus faccus peritonæo accretus esse detegebatur, nec admodum magnus ille, ut stylo flexili & incurvo patebat. Mense Octob. & Nov. 1759. vulnus sponte coëuns, aliquoties dilatavimus, eo quod superstitem duritiem deprehenderemus. A partu, qui ineunte Junio contigerat, defuerant menses; finiente vero Octobri rediere; ex eoque gravida facta, mense Augusti 1760. feliciter peperit. Locus affectus sine ulla duritie relicta, aut tumore, coivit. In ejusmodi casibus verum illud Manilii: *Artem expe-*

rientia fecit, natura monstrante viam:
præter naturam magistræ, res semper periculosæ admodum aleæ.

§. VI. Antequam hoc caput finiam, unum monendum habeo. *Tom. 2. & 4.* de Tympania agens, in eorum sententiam abivi, qui aëri soli, eique intestinis cavis contento, adscribant eandem. Quippe capta in cadaveribus experimenta, præter *Dureti & Littræi*, aliorumque, auctoritatem, eo me adduxerant. Historia tamen III. hujus Capitis, pag. 57. demonstravit posse ex putrido liquore aëra in sacco gigni, pertusoque sacco exire sibilando. Ergo si Veterum nonnulli simile quidpiam forte observantes Tympanitidem dixerint aqua & aëre gigni, hancque partim aëream, partim aquosam, haudquaquam in Intestinorum cavo, sed in ventre, contineri, non est quod obloquar. Verum

CAP. III. DE HYDR. PECT. 69

rum enim vero nec in vita, nec in cadavere, hic, de quo agimus, morbus, ipso Tympanias nomine recensendus venit, si totam ejus historiam attente pervolvamus. Utique nulla in eo Hydropis ficci signa.

CAPUT III.

DE HYDROPE PECTORIS.

§. I. *Signa & Symptomata morbi ex Hipp. Sequentium ævorum Scriptores parum aut nihil ejus meminerunt.* §. II. *Sæculo autem XVII. ut & præsentī, plures de eo ex professo egerunt.* §. III. *Diagnosī & curatio ex autoribus formantur. Ea occasione Paracentesis tum in genere, tum ea Thoracis in specie, examinatur, ac remediis ceteris præstantior declaratur. Inquisitio fit quibusnam, & quandonam, profit.* §. IV. *Examen Evacuationum in Hydropicis per Cauteria, Scarificationes, Vesicentia, &c. & qua lege usui venire queant.* §. V. *Problema proponitur cur laudata in Hydrope pectoris Paracentesis adeo raro instituta fuerit, adeo raro adhucdum instituitur? Responsum petitur ab inchoantis morbi incerti-*

tudine, & a rebus ejus, dum probe cognoscitur, conclamatis. §. VI. Fallacis morbi historia practica traditur, qua dicta probentur. Incertitudo signorum ejus probatur historia Hydropicæ, multisque aliis practicis exemplis. Confirmatur ulterius alia historia notabili, & sectione anatomica. Conclusio medica.

§. I. **F**EMINA, de qua Cap. proxime superiore pag. 44. actum, præter Hydropem cysticum & asciten, Pectoris quoque Hydropem habuit. Hunc, vivente ea, dudum suspicati eramus, ut ibidem innui. Attamen quæ signa pathognomica morbi vocari solent, non aderant omnia; & quæ etiam in eadem Hydropem sinistræ thoracis cameræ indicare videbantur, nos plane fefellere. Fallacem sane morbum plura nobis experimenta jam evicerant; ita ut eum incertissimorum morborum in classe locari oportere, cum Auditoribus meis sæpius doluerim.

rim. Quum tamen adeo & frequens morbus sit, & difficulter cognoscendus, operæ precium erit eum ab incunabulis repetere, adeoque examen instituere quorumvis signorum, quibus cujusque ævi Scriptores Medici illum nobis depinxerint, cognoscendumque, ut indubie præsentem, dederint. Inquiram deinde num incipientis morbi signa propiora artis usus forte non suggerat? Ex omnibus practicas regulas deducere conabor.

Ad signa morbi tum communia, tum pathognomica examinanda ab *Hippocrate* ordiri convenit. *Lib. 2. de Morb.* pag. apud *Foëf.* 483. Tom. 1. apud *Charier.* Tom. 7. pag. 575. vocatur morbus Ὑδερὸς πλεύμονος. „ Si „ Hyderos, inquit, in pulmone na- „ scitur, febris, & tussis, vexat, „ confertim respirat, pedes intume-

„ scunt , ungues omnes contrahun-
„ tur, & iisdem, quibus suppura-
„ tus, afficitur; verum remissius,
„ ac diutius. Quod si Infusum, aut
„ Fomentum, aut Suffitum adhi-
„ beas, pus non sequitur; indeque
„ cognoveris non pus, sed aquam in-
„ tus esse. At si diutius aure ad late-
„ ra admota auscultaveris, intrinse-
„ cus velut acetum olet. Et aliquan-
„ diu his afficitur, sed postea in ven-
„ trem erumpit: confestimque fa-
„ nus, & morbo liberatus esse vi-
„ detur. Verum procedente tem-
„ pore venter incenditur, eademque
„ illa, & graviora patitur. Qui-
„ busdam etiam venter, & scro-
„ tum, & facies, intumescit. Et
„ nonnulli istud ab inferiore alvo,
„ provenire existimant, cum ven-
„ trem magnum, & pedes tumere,
„ videant. Quæ certe intumescunt,

„ ἢν ὑπερβάλλῃς τὸν καιρὸν τῆς τομῆς,
 „ si sectionis tempus oportunum præ-
 „ tervideris.

Libr. de Aff. int. apud *Foëf.* Tom.
 1. pag. 544. & 545. apud *Charter.*
 Tom. 7. pag. 655. 656. morbi
 descriptionem & curationem eodem
 modo, sed fusius, profequitur. „ Hic
 „ Hydrops, ait, ex his oritur.
 „ Quum æstatis tempore, siti præ-
 „ mente, copiosam aquam biberis,
 „ quandoquidem inde maxime gigni
 „ solet, & pulmo expletus fuerit,
 „ rursus in pectus dimittit. Quum-
 „ que in pectore extiterit, vehe-
 „ mentem ardorem excitat, ita ut
 „ pinguedinem, quæ in arteriis in-
 „ est, liquefaciat. At si semel pin-
 „ guedo multo magis liquefieri ce-
 „ perit, Hydropem brevi efficit. Gi-
 „ gnitur etiam ubi tubercula, *φύματα*
 „ in pulmone exorta fuerint, eaque

„ aqua repleta in pectus eruperint.
„ Quod etiam a tuberculis oriatur
„ Hydrops, mihi argumento sunt
„ Boves, & Canes, & Sues. In
„ his enim Quadrupedibus maxime
„ pulmonis tubercula oriuntur, quæ
„ aquam continent. Sectione nam-
„ que facta id illico cognosces; aqua
„ quippe effluit. Talia autem mul-
„ to magis in homine, quam in
„ pecoribus fieri videntur, quanto
„ morbosæ magis etiam victus ratio-
„ ne utimur. Plerique vero exor-
„ tis tuberculis purulenti etiam exti-
„ terunt.

„ Hæc igitur per initia oboriun-
„ tur morbo: tussis sicca, & fauces
„ exasperari videntur, & rigor &
„ febris succedit, & orthopnœa; cu-
„ tis totius corporis tumescit, tument
„ pedes, ungues contrahuntur; &
„ quandiu quidem in superiore ven-

„ tre

„ tre Hyderus extiterit, extat acu-
 „ tus dolor: cum vero ad ad infe-
 „ riorem ventrem devenerit, melius
 „ habere videtur: deinde progrediente
 „ tempore impleto ventre, ea
 „ quæ prius patitur. Interdum vero
 „ ad latus tumescit, & qua parte
 „ secandum sit, indicat. Quod si
 „ non indicet, multa calida lotum,
 „ humeris comprehensum, concutito,
 „ deinde quonam in latere materia
 „ magis fluctuat, auscultato.

Hippocrates igitur causam Hydro-
 pis Pectoris deducit 1^{mo}. ab aquæ po-
 tu, & nimio, & celeriter ingurgita-
 to. 2^{do}. A ruptis pulmonum tuber-
 culis, (Hydatidibus) quæ, si versus
 externam pulmonum superficiem per-
 rumpuntur, suam utique lympham
 in cavum thoracis effundunt.

Morbi signa & symptomata ait
 1^{mo}. Tussim siccam. 2^{do}. Faucium
 rau-

raucedinem. 3^{to}. Rigorem. 4^{to}.
 Febrim. 5^{to}. Respirationem citio-
 tiorem. 6^{to}. Orthopnœam. 7^{mo}.
 Totius corporis, pedumque præfer-
 tim, Hydropem intercutem, seu ἀνὰ
 σαρκὰ. 8^{vo}. Thoracis dolorem. 9^{no}.
 Hydropem ventris, cum remissione
 omnium symptomatum, quum pe-
 ctus ad tempus evacuetur. 10^{mo}.
 Recrescente pectoris lymphæ, quod
 ejus sit scaturigo perennis, tunc ascii-
 tem ultra non levare morbum pecto-
 ris. 11^{mo}. Unguium curvationem,
 qualis fieri solet suppuratis: addit &
 alia suppuratorum signa, quæ mitius
 tamen ait, & diutius, ipsis evenire.
 12^{mo}. Absentiam sputi purulenti,
 etiamsi medela ad sputum provocan-
 dum adhibita sit.

Symptomatum horum plura etiam
 signa vera morbi sunt, sed addit
Hippocrates aliud quid. Hominem
 nem-

nempe in sedili collocatum humeris valide concutit, movetque; ut sic aure mox ad latus admota, undulantem percipiat aquam. Addit pro alio signo, *Lib. 2. de Morb.* quod eadem pectoris aqua, dum sic aurem pectori admoveris, veluti acetum olet.

Errorne aliquis hic exemplariorum? *Foësius*, & *Charterius*, & *Lindanus*, hic legunt ὄζει, *Cornarius* vero ζέει, nempe, *fervet*. Juxta hoc exemplar sensus bonus est, non vero lectione alia. Nunquid enim *Hippocrates* juberet non nares, sed aurem, pectori admove, ut odorem aceti perciperemus? Sed si *fervere* intellexit, tunc aurem admove oportune præcipit.

Cum magnus *Hippocrates*, adeo in ceteris Laconicus, judicaverit hunc morbum adeo fufe describi oportere,

re, expectare quis posset *Galenum*, *Cælium Aurelianum*, *Aretæum*, posteriorumque ævorum Scriptores, & fusos, & perspicuos esse, cum de eodem agunt. Sed nihil minus. Plures in transitu meminere illius; nonnulli ne meminerunt quidem. Quo quid in obvio adeo morbo mirabilius? *Platerus*, *Hollerius*, *Goræus*, *Capivaccius*, *Hier. Mercatus*, *Salius Diversus*, *Jacotius*, *Ballonius*, *Duretus*, &c. obiter modo de *Hydrope pectoris* locuti sunt, eorumque, quæ adeo fuscè *Hippocrates*, signorum pauca modo raptim tetigerunt: unde concludere nos cogunt morbum ipsis minus in viventibus ægris, quam in denatorum cadaveribus, patuisse. Idemque judicium sit de *Cardano*, *Coïtero*, *Donato*, *Cratone a Crastheim*, *Casparo Bobino*, & reliquis omnibus, ex quibus optimus *Schenckius*,
uti-

utilissimas suas adornavit collectiones.

§. II. Ineunte autem Sæculo XVII. tres magni in arte Viri simul hoc argumentum pro aliqua ejus dignitate tractarunt. *Prosper Martianus*, Romæ; *Carolus Piso*, Nanceii; *Daniel Sennertus*, Wittenbergæ. Paulo post etiam *Lazarus Riverius* utcunque fuse de eodem egit. *J. B. Helmontius*, quanvis de eo parum habet, in *Tractatu* tamen, qui vocatur *Ignotus Hydrops*, & morbum in ægri vita præsentem cognovisse, & in cadavere demonstrasse, videtur. Post illum *Sylvius de le Boe*, & cum *Lowero Willisius*, ex professo de eodem egere. Plures tamen post illos, ut *Juncken*, *Etmuller*, &c. solo vix nomine morbum recensuerunt. Egregius *Wepferus* *Libr. de Affect. Cap. Obs. 60.* anatome potius illum, quam

agro vivente, cognovisse videtur: cumque ipsemet hoc morbo laborasse post mortem inveniretur, minus tamen id credidisse legitur apud *Brunnerum*, eo quod urinam egregie redderet, matutinisque gauderet sudoribus. *Wratislavienses N. C. Medici* ad *Ephemeridas* suas ann. 1699. - - 1702. *Tractatum de Hydrope Pectoris* adjecerunt, in quo ejusdem causas, signa, curamque, erudite tractant. Exinde *Academiæ N. C. Paris. Lond. Edimb.* varia ejus dedere exempla. *Immortalis Boerhaave* *Cap. de Hydrope* §. 1219. *Hydropem* hunc describit *Empyemati* multis signis similem, sola causæ antecessoris observatione ab illo discriminandum. *Nobiliss. Russiæ Archiater de Gorter*, in *Med. Comp. Tract.* 35. morbum obscurissimum vocat, ejusque signa ex *Hipp. Pisone*, *Sennerto*, tradit.

§. III. Porro si ex quibuscunque recensitis hisce Autoribus causas, signa tam communia quam pathognomica, diagnosin quoque, & curam, diligenter colligamus, notanda sequentia invenimus.

I^{mo}. In causarum enumeratione passim conveniunt omnes. Causas enim Hydropis generales recensent, quæ vel in aliis corporis plagis Hydropem primo conciliant, deinde pectori; vel pectori primum, deinde reliquo corpori; vel denique pectori soli. Causas præterea peculiare quædam nonnulli addidere: v. g. maturiorem vulneris in thorace curationem, rupturam ductus chylieri, dissectionem hydropici pericardii, variorum in osseam substantiam degeneraciones, &c.

2^{do}. Signa morbi multi haud alia enumerant, quam quæ *Hippocrates*;

Pars V.

F

non-

nonnulli vero singularia dedere, quæ vel pathognomica, vel illis saltem proxima appellarunt: v. g. subitaneam prima nocte excitationem, cum intentata fere suffocatione; alterutrius, vel utriusque, manus sive paralyfin, sive œdema; hypochondriorum tumorem; pulsum debilem, tardum, inæqualem, haud raro intermittentem; fœtentem animam; urinam paucam, crassam, & brevi ante fata ex atro rubentem, cum furfuraceo, aut lateritio, sedimine.

3ⁱⁱ. In Diagnosi multi, gravesque Viri, difficilem, obscurum, ambiguum, morbum esse fatentur: varii e contrario tanquam communi omnium more propriis ex signis cognoscendum, atque ab aliis insterfingendum eum describunt.

4^{to}. Curam ejus varii, vario admodum modo, auspicati sunt: *Hip-*

po-

pocrates textibus, ex *Libr. 2. de Morb. & Lib. de Aff.* supra recensitis,

„ Hunc quidem, ait, si exteriorē
 „ parte intumescit, inter costas se-
 „ ctione facta, curare oportet. Sin
 „ vero minime intumuerit, etiam
 „ multa calida lotum tunc, veluti
 „ purulentos, in fella collocato, &
 „ qua parte strepitum edet, ea feca-
 „ to: tertiam ab ultima costam ad
 „ os usque secato: deinde terebra
 „ acuta ulterius perforato: votum-
 „ que est, quo sane facile effluat, ut
 „ quam infimo loco id fiat.

„ Ubi autem secueris, oportet
 „ ulcus cavum, in interna patens,
 „ efficere, imposito lino crudo; cras-
 „ sum autem, & extremo acutius,
 „ oportet hoc linum, sive linamen-
 „ tum, facere. Quam paucissimam
 „ aquam parce emittas. Imposito
 „ igitur linamento mollem spongiam

„ supra imposito; deinde ne peni-
„ cellus decidat, deligato. Et si
„ quidem 5^{to} die pus in ulcere cir-
„ cumnascitur, ut plurimum evadit:
„ sin vero circumnascitur nihil, post-
„ quam aquam eduxeris, fitis pre-
„ hendit illum, ac tussis, & moritur.
„ Per 12. autem dies semel die aqua
„ educenda: post 12. vero dies, id
„ est, 13. die, tota aqua educen-
„ da est: & reliquo tempore, si ab
„ aqua distensio fiat, exhaurienda,
„ venterque cibis siccis refecan-
„ dus.

„ Hæc autem post sectionem ex-
„ hibenda: succum laseris dragmæ
„ pondere adparatum, & Aristolo-
„ chiæ tali cervini magnitudine fru-
„ stulum derafum, & lentium, er-
„ vique, torrefactorum polentam;
„ utriusque purgatæ chænicis dimi-
„ dium: hæc melle & aceto subigi-

„ to.

„ to. Deinde 60. trochiscis forma-
 „ tis, unum tritum quotidie vini ni-
 „ gri austeri quam suavissimi hemi-
 „ næ dimidio maceratum, mox je-
 „ juno potui exhibeto. Reliquam
 „ vero victus rationem, & exerci-
 „ tationem eandem, quam priore
 „ tempore, habere jubeto. Et si
 „ pudenda, ac femora intumuerint,
 „ audacter scarificato. Hunc si ita
 „ curaveris, certissime sanum red-
 „ des.

Monitos Lectores hic velim me
 1^{mo}. utrosque laudatos *Hippocratis*
 textus dedita opera confudisse, &
 commiscuisse, ut continuata oratio-
 ne integra ejusdem sententia pateret.
 2^{do}. Me *Hippocratis* μότα, & ἔμμοτα,
 eo modo latina reddidisse, quo *Tom.*
 4. cap. 3. necesse esse demonstrave-
 rim.

Haud omnibus æque arrisit hicce curandi modus. *Prosper Martianus Paracentesis Hippocratis* ut primum, ut præstantissimum auxilium, commendavit. *Magnus Boerhaave* Aph. 1219. & 1238. *Hippocratem & Martianum*, presse sequitur. At vero Auctorum plerique hanc eo duntaxat casu laudarunt, quo remedia consueta minime juvarent. Ita *Piso*, *Sennertus*, *Wratislavienses*, *De Gorter*, &c. Imo dantur haud contemnendi in arte Viri, qui hanc operationem, cum bona *Hippocratis* venia, condemnarunt, ut v. g. *Ludovicus Mercatus*, *Petrus Salius Diverfus*, & pene etiam *Sylvius de le Boe*.

Hinc ultimæ penultimæque classis Scriptores, ut quovis passim *Hydropem*, ita & hunc evacuantibus docuere debellandum. Unde purgantia hi leviora, illi drastica, cum
om-

omnis generis diuretica, ac sudatoria, præscribere. Fonticulos quoque, & setacea, vesicantia, sacrficationes, inustionesque crurum, femorum, tumentisque scroti, ad revellendam de pectore lympham, unanimiter commendarunt.

Et sane quoad Paracentesin in genere, in quovis Hydrope, notamus eam ab omni retro ævo male audiisse, & a multis tanquam periculosam, a nonnullis tanquam quosvis indiscriminatim occidentem, proscriptam fuisse. Quos egregie *Cælius Aurelianus*, primi sæculi æræ Christianæ, ut videtur, autor, refutavit; ut & Sæculo 16. finiente *Ambrosius Paré*, aliique. Præcedenti ac præsentī Sæculo frequentiore in usum vocata est. Notabilia exempla *Acad. Reg. Sc. Paris. Theses Parisinæ*, observationes omnium Regionum, multas Hy-

dropis ascitis curationes, ut vocant, radicales, aut semel, aut iterum, aut pluries instituta Paracentesi, referunt: tum & curas plures morbum egregie palliantes.

Numerosi, qui mihi obtigere, casus me docuere, palliantes curas numero plures, quam integras, Paracentesi perfici. Quare examinare confert quandonam integre, & quandonam tantum palliative Hydropici ejus ope curari queant: sponte tunc liquebit quibusnam Paracentesis, & quousque, profit.

A causa quacumque homo potest notabili tempore eam suis in humoribus tenuitatem, eam cutaneis in vasis laxitatem, & anastomosin, habere, ut perpetuo fere fudet, fudorque guttatim defluat, & vestes madefaciat, lectosque. Sed & idem homo, seu bonitate naturæ, seu diætæ

tæ mutatæ, mutatæve athmosphæræ, medicamentorumque, auxilio, ita potest compingi humoribus, vasis ita constringi, ut ultra non fudet, viresque sudore confractas brevi recuperet. Hic homo tunc integre curatus est.

Verum ponamus exhalantium vasorum debilitatem minus ad corporis ambitum peccare, quam ad pleuram, ad peritonæum, ad viscerum in thorace, ac ventre, superficiem; ita ut potissimum per harum partium exhalantia vasa tenuati humores Hydropem transsudendo creent. Ut priori, ita & huic naturæ, regiminis, artis, auxilio, diathesis ita tolli potest, ut internus ille sudor cesset. An autem ita hic, quam ille curatus? Neutiquam. Prior ille vasis roboratis, inspissatisque humoribus, jam curatus erat; posterior cum om-

ni hoc beneficio aquæ dolium manet. Hæc porro aqua si bonitate medelæ, aut maxime Paracentesi, evacuata fuerit, cum mutata in melius jam antea diathesi, perfecta aderit ac firma sanitas.

Etiam hoc in casu contingere potest, ut Paracentesis, nondum mutata diathesi, colluviem aquarum auferat; ac deinde optima roborantia & inspissantia remedia integram efficiant, constantemque salutem.

Si nunc homo a subito, ac copiosiore potu aquoso, post diuturnam sitim hausto, in Hydropem inciderit, quemadmodum olim totus pene exercitus invictissimi Imperatoris *Caroli V.* in expeditione *Tunetana*; utique potus abstinencia, motus, elater conservatus vasorum, ejusmodi innumeros restituere possunt. Sin vero abundantior lymphæ, in corpore effusa

re-

remanerit, homo hic aut aptis medicamentis, aut paracentesi, ab illuvie aquosa liberandus erit: liberatus, recte valebit.

Sed alia longe res est, si dispositio in corpore perseveret, qua sublatiis aquis, perpetuo succedant novæ. Si eductis aquis vasorum humorumque vitia corrigi nequeant, causæ persistentes novas continuo regenerabunt aquas. Si aperta hydatis aquam stillaverit, educta ea, novam abundantius, ablata resistantia, dabit. Ergo paracentesis ad tempus modo levabit; sed & medicamenta belle evacuantia etiam tantum ad tempus proderunt. Igitur cum medicamenta sæpe nihil aut vix agant, prætereaque corpus defatigent; ipsa vero paracentesis vires vix projiciat, nec corpus exagitet, secure autem semper, certoque evacuet; merito *Pro-*

sper

ſper Martianus, & *Boerhaavius*, paracentefin medicamentis prætulērunt. Tandem in aſcite, cui Hydrops cyſticus junctus, etiam ceteris paribus eſt Paracentefis medicamentis anteferenda; quia medicamenta ibi vix unquam efficaciter agunt, & Paracentefis ſemper evacuat.

Diffiteri equidem non poſſumus mortem Paracentefi preſſo pede nonnunquam infequi: cum tamen eo modo in caſu tunc adhibetur, ut vitam lymphæ abundantia jamjam ſufocandam fortassis aliquantisper producat, dubiumque tunc auxilium, quam nullum, adhiberi præſtet; neque etiam hic condemnanda Paracentefis erit. Hujus erat mentis *Hippocrates* Lib. de Loc. in hœm. pag. apud *Foëſ.* 417. τῶν νοσημάτων ὅ, τι ἂν ἐπικινδυνωτάτῳ ἔſιν, ἐν τέτοιοιſι παρακινδυνεύειν χρὴ· ἐπιτυχῶν μὲν γὰρ ὑγιᾶ ποιήσεις,

σεις, ἀτυχήσας δὲ ὅπερ καὶ ὡς ἐμελλε
γίνεσθαι. In morbis, in quibus pe-
riculum ingens adest, aliquid auden-
dum est: si enim successerit, poteris
servare ægrum; si non profeceris,
fit modo id, quod sine tuo molimine
brevis contigisset.

§. IV. Atque hæc de Paracentesi.
Sed quæ commendatur evacuatio in
quacumque Hydropis specie, caute-
riis, ac scarificationibus, peragen-
da, illa etiam, subsequa brevi gan-
græna, discrimine non vacat. Pas-
simque omnes post *Hippocratem* Me-
dici Hydropicorum ulcera curatu dif-
ficillima, ne dicam impossibilia, no-
tarunt. Interim qui hoc primus no-
tavit *Hippocrates*, ille etiam ulcera
Hydropicis arte excitanda esse primus
monuit. Sibine igitur contradixit?
Minime; sed necessariam adhibuit,
quam negligere solemus, cautelam.

Ἀεὶ τὸ ἐχοιγόμενον χρῆσιν θερματηρίῳ φαρμάτῳ. Sicque averruncare gangrænam potuit. Unde bene *Prosper Alpinus*, finiens suum 7. Lib. *de Med. Methodica*. „ Hocque, inquit, præ-
„ fidii genere scimus nos complures
„ Hydrope fuisse sanatos; at quia
„ curationem vulnerum neglexerunt,
„ alio morbo quam Hydrope inter-
„ emti sunt: quippe vulnere in gan-
„ grænam abeunte. „ Quare, dum
in Nosocomio scarificationes, Hydropem palliantes, instituimus, saturato corticis peruviani fomento gangrænam averruncavimus. Ultra nunc progrediemur. Hydropem & ascitem, & intercutem, curatum vidimus in cancrofa femina, cui cortex adversus cancerum dabatur. Cancer quidem non curabatur; sed vasa corporis, cortice roborata, omnem aquarum colluviem alvo & urinis
ex-

expulerunt. Quid ergo impedit, quominus Hydropis, sine viscerum interiorum scirrho obtinentis, curam cortice & assumpto, & sacrificatis admoto locis, tuto tentemus? Duplex sane causa nos eo adigit: altera egregius effectus in ipso morbo; altera ejusdem, ad morbi proegumenam causam haud raro tollendam, exploratissima virtus.

Atque hæc de ejusmodi evacuationibus in genere dicta sunt: superest eam, quæ de ipso thorace directe instituitur, nunc contemplari.

§. V. Dudum quidem accessi ad sententiam *Hippocratis*, *Martiani*, *Boerhaavii*, *Paracentesin* thoracis sive in Hydrope pectoris recentiore, sive viribus utcumque constantibus vetustiore, palmarium auxilium esse statuentium: attamen abstinere nequeo, quin medicum hoc problema proponam;
sci-

scilicet: *Cur ita laudata Paracentesis, sive ut primum, sive saltem ut alterum in hoc morbo adhibendum auxilium, spatio XXIII. Sæculorum theoretice commendetur, & vix unquam instituta legatur?* In Empyemate historiam operationis, fateor, habemus: in Hydrope autem pectoris, forte unus alterve me casus fugit, sed vix illam institutam novi, nisi a *Lowero & Willisio*, idque modo semel. *Willis. op. omn. in fol. tom. 2. Phar. rat. part. 2. sect. 1. cap. 13.* Quid igitur causæ, quod nulla operatio universalius commendata, nulla rarius instituta fuerit?

Si conjecturare liceat, suspicor morbum inchoantem difficulter sæpe ægrorum in vita cognosci; morborumque aliorum, in quibus Paracentesis haud conveniat, sub larva fallere: dumque demum cognoscatur,
adeo

adeo jam provectum esse, ut eandem haud ultra admittat.

§. VI. Morbum apud *Batavos* haud infrequentem sæpius in denatis, quam in vivis, cognovisse me fateor. Quod cum Veteranis in arte quoque contingere cernerem, phænomena observata in illis, quorum me morbus fefellerat, animo volvi, cum phænomenis simili morbo deinceps laborantium sedulo comparavi, atque ita tandem sæpius eundem citius præsentem detexi; haud tamen ita, ut nonnunquam illum non, nisi conjectura assequerer, imo vix rite, nisi desperatis fere ægri rebus, cognoscerem. En igitur quæ attentior observatio me docuit!

I^{mo}. In plena sanitate omnium prima observatur Dyspnœa levis, vix notabilis, ut & vix advertenda Tussicula; quæ a communi Dyspnœa in-

choante nullo signo distinguitur. Ejicitur nihil tussiendo: unde Medici totum incommodum pulmoni utcumque debiliori adscribendum rati, roborantia cum effectu aliquoties bono, sæpe autem nullo, exhibent. Neque tantillo debilior pulsus, aut vix perceptibilis ad motum defatigatio, anhelitusve, aliud suadent. Nulla enim ratio subest vomicas, aut abscessus, suspicandi. Lento interim passu crescit malum, interea dum non raro fallaci curatione Medico imponat. Quippe ficciore dudum tempestate, moderatiore forte motu, curatum, læto ægro, lætis adparet Medicis: quiescente vero ægro, aëreque diu valdeque humido, non curatus morbus, sed auctus adparet. Tussis paulatim increscens, glutinosa pauca ac spumosa producat, cum fonticam causam non agnoscat, prognos-

gnosin vix videtur gravare; quia in debiliore paululum pulmone quid glutinis generatione facilius? Malleoli posthac pedisque œdema levissimum conspicitur, vagum quidem primo, postea autem constantius: sed vix inde augmentum inquietudinis; quid enim in desidiosa vita frequentius? Hic primus mali gradus, diuturno tempore sic in pluribus obtinens.

2^{do}. Interim fiunt ægri corpore haud modo, sed & animo imbecilliores, spasmis flatibusque, ac levioribus anxietatibus magis obnoxii, somnum ægrius capientes, exiguosque, leves, vix inchoantes, Asthmatis spasmodici patientes insultus. Cum hucusque nulla cujuspiam visceris labe se manifestet, persistit nobis imbecillioris pulmonis idea, solidaque roborandi, ac fluida inspissandi indicatio. Si autem gluten paucum pul-

mone ejectionum Medicis eo usque imponat, ut ad attenuandum illud accingant sese, morbi causa facile adaugetur.

3^{tio}. Crescunt mala pedetentim; observantur quidam noctu inquietiores, & conqueruntur quadam anxietate se a prima somni blanditie capta expergefieri, erectos se esse oportere, postea vero nonnihil tranquillitatis se denuo percipere. An id quia jacentibus, truso altius diaphragmate præ mole viscerum abdominis, thorax angustior? An vero iis modo fit, quibus venter effuso intra illum liquore turgidior? Practica observata has rationes omnino non per omnia admittunt. Observavimus has nocturnas anxietates in his, quorum cadavera abdomen aquis inane exhiberent. Observavimus easdem cum *Pisone*, licet ægri illarum evitandarum cau-

causa in sedili obdormivissent. Uti-
que res explicatu difficilis! sed quid
tunc Medici concludunt indicari? Si
gluten aliquid copiosius ad has anxie-
tates exspuatur, Asthma glutinosum;
si vix tale quidquam, spasmodicum
concludunt. Præsertimque dum da-
to paregorico, & antispasmodico ad
noctem remedio, subitaneam mali
furentis remissionem ægri ita lætan-
tur, ut sequenti, altero, tertio ve
die, noctes agant tranquillas; imo
obliti ærumnarum, in publicum pro-
deant, suisque cum amicis se exhila-
rescant. Ergo antispasmodica vel ex-
pectorans medela continuatur; mor-
bus in pejus ruit.

4^{to}. Caducam suam Machinam in-
terea adhuc miseri trahunt, donec ad
tragicas illas noctes deventum sit,
quibus decies minantur suffocatio-
nem; unde tandem leipothymia, syn-

cope, debilitate, vitam ducant ipsa morte miserabiliorem; sicque, quam mortem effugere sæpius visi, tandem subito suffocentur. Lepida catarrhi suffocantis adplicatio Medicorum servat sartum tectumque honorem; & si forsan Medicus affuerit, qui morbi præsentiam ante fata subolfecerat, utique non nisi ut immedicabilem pronunciaret, cognoverat illum.

Hæc nunc historia miserandi morbi, ut plurimum ignoti, quo plures extincti in una, alterave, aut etiam in utraque thoracis camera collectas exhiberent aquas. Unde quidem crebrior nata postliminio ejusdem in vita suspicio, sed sufficientium defectu signorum, quibus a morbis, quos simulabat, quosque ars sæpe feliciter tollit, discriminaretur, nulla certitudo.

Quam-

Quamobrem ad invenienda propria morbi ac pathognomica signa variorum adhibiti animi; eorundemque demum is adornatus catalogus est, cujus cum pag. 75. meminerim, hic non repetam, sed ad singula ejus Capita ordine respondebo.

Ac primo quidem respondeo, subitam a prima somni dulcedine excitationem, cum intentatis suffocationis minis, semel mihi octiduo ante fata quondam apparuisse, & pluries quidem maturius, at vero semper provecto ita morbo, ut omnem respueret curationem. Pathognomicum proinde hoc signum non adpellabo.

Secundo dico Hydropem pectoris aliquoties adesse posse citra hoc signum. En evidens exemplum! Sexagenaria mulier hoc ipso anno, ineunte Majo mense, ad *Pasmannianum*

Nosocomium transferebatur, ascitem habens, tumidisque, atque hinc inde ulcerosis cruribus lympham stilans. Pectoris quidem nonnulla anxietas, ut in ascite consuevit, aderat, sed admodum exigua: quodque in provento ascite mirandum, nulla tussis. Nulla præterea peculiaris de nocte anxietas, aut subitanea e somno excitatio. In dorsum quidem sæpe incumbens visa ægra, frequenter autem etiam utrumvis in latus. Vino herbis amaris medicato, cui Oxym. Squill. Spir. nitr. dulc. Tinct. Millep. &c. adjuncta, tota fere, idque iterata vice, detumuerat, sed aqua fur- tim capta continuo se replens, relapsa est. Tandem manu ac brachio sinistris quatrIduo ante mortem tumentibus, 3. Julii expiravit.

In cadavere invenimus ascitem ventris cysticique principium: scilicet
duas

duas ovarii hydatidas, quarum una pellucens lymphæ ultra libram gerebat. Deinde ovarium dextrum in cellulas cartilagineas degenerans, officulum magnitudine pilulæ duorum granorum, membranula cohærens, suo in fundo continebat. Uterus vix distentus, glabro, carnosoque corpore repletus, quod cum uteri fundo posteriore ita unitum, ut non nisi unam eandemque cum eo formaret substantiam.

Sed quis mortalium credat hanc feminam utrumque pectoris cavum copiosissima lymphæ repletum gessisse, ita ut arcto in spatio compressi pulmones, pluribus in locis aëre vix ultra permeabiles essent, magnisque sui portionibus aquæ, in quam injecti, fundum peterent? Utque Pericardium, undique pressum, cum cordis massa, nullo cavo relicto, in

unum coivisset, albitudine modo sua, duas circiter lineas crassa, a cordis substantia distinguenda? Obiter hic noto Pericardii absentiam, ab Anatomicis notatam, similibus forte causis deberi.

Si ergo nocturna orthopncea omnino deesse in gravissimo pectoris Hydrope potuit; si in aliis paucis modo ante funera diebus adparuit; si denique ubi adest, provectiore adeo morbo patescit, ut quodvis fere respuat auxilium; non videtur illa pathognomici signi nomine venire debere.

2^{dum} Signum, œdema scilicet, aut paralyfis alterutrius, imo etiam utriusque brachii, manusve, priore vix multo certior est. In quo viro dixi nocturnam orthopnceam octiduo priusquam periret, me observasse, in eodem quoque manus non nisi eodem die œdematosa apparuit. In femina,

cu-

cujus historia mox data fuit, quatri-
duo tantum ante obitum. In ea ve-
ro, cujus casus Cap. 2. pag. 44. de-
scriptus fuit, tale œdema adfuit nun-
quam. Caruit quoque eo clarus
Wepferus. Ergo quod vel deest ali-
quando, vel morbo ad interitum
proximo sæpe advertitur, pathogno-
micum non est.

3^{tium} Signum, aquæ nimirum flu-
ctuatio, pluribus defuit meorum.
Adesse tamen sæpe illud, & ratio
suadet, & Hippocrates tradidit, &
nostra femina Cap. 2. pag. 44. exper-
ta est, & plures memorant Autores.
Hippocrates sedentis hominis compre-
hendens humeros, valide ejus corpus
concutiebat, ut audire fluctuationem
posset. Autorum nonnulli corpore
inclinato id explorant; imo ægro to-
to corpore superiore de lecti crepi-
dine deorsum pendulo. Verum vel
non

non adest multis, vel fero tantum adesse percipitur fluctuatio; & in casus *Hippocraticis* similes incidere oportet, ubi auditu percipi possit. Quod ergo sæpe deest, aut fero nimis advertitur, pathognomici morbi signi conditione caret.

4^{um} Signum, Hyponchondriorum, vel alterutrius ejus tumor dicitur; sed cum tumere id variis de causis queat, non est pathognomicus hic tumor. Contingere quidem potest, ut aqua in diaphragma gravans, hepar v. g. premat, trumatque extrorsum; cui signo, si forte fluctuatio simul adest, morbi major certitudo nascitur: sed in multis & tumor deest & fluctuatio. Ergo.

5^{to}. Pulsus debilis, tardus, sæpe intermittens, inter hujus morbi signa recensetur. Erat quidem talis *Wepfieri*, testante *Brunnero*, pulsus; sed
cum

cum *Wepferus* etiam osseam habuerit Aortæ substantiam, pulsus ejus non potest Hydropis pectoris pathognomicus adpellari. Deinde talem pulsum multi Autores non recensuerunt. Tandem pluribus nostrorum defuit. Sane febricula, individua multis comes, pro tarditate celeritatem habet.

6^{to}. Ecetentem animam meorum nemo habuit.

7^{mo}. Urina pauca, crassa, Hydropicorum passim esse solet, sed non immutabili lege. Hydropica Cap. 2. pag. 64. eam reddit pulcre coloratam, limpidam, cum sedimento fere acutorum bonorum. *Wepferus* ideo minus credebat se pectore hydropicum esse, quod *urina copiosa, naturalis; matutinusque adesset sudor*. Descripta *Wratislaviensibus* urina, qualis prope mortem ipsis observata fuit, etiam sic in Nosocomio adparuit: sed
quod

quod lethi instantis, id morbi ipsius signum dici non potest.

Quam parum ergo certi, ut morbum initio præsentem dicamus, ex recensitis nanciscamur! Provoco etiam ad quotidianam Praxin. Quid incertius concilio Medicorum, quos similis convocaverit morbus! Examine per horam producto sæpe uni horum malum asthmaticum audit; alteri dyspnœæ similis; tertio Hypochondriorum affectione natum; quarto peculiari nervorum irritabilitati, cum aliqua acritudine juncta, adscribitur; cuiquam forte etiam Hydropis pectoris suspicio nascitur. Ac profecto si talis revera esse deprehenderetur, idoneum Paracenteseos tempus nunc forsitan esset. Sed suspicio morbi duntaxat est, eaque cum aliorum morborum ita intricata, permistaque, signis, ut certi quid conclu-

cludi nequeat; rarusque fane ille Medicus foret, qui operationem hanc ex mera hac suspicione in se suscipere vellet, rariorque æger, qui incerta de causa permetteret thoracem sibi terebrari. Unde ad maxime verosimile concilium concludit, donec signa evidentiora elucescant; utinam modo, iis elucescentibus, conclamatum non esset!

Nunquam e mente excidet casus viri, quinquagenario majoris, qui spatio quinquennii sæpius meam imploraverat opem. Cardialgiis ab immemorabili pene tempore obnoxius, nullum demum solamen habuit, nisi vel ab opio audacius dato, vel, quando digestionis tempore doloribus ferendis ultra non erat, compresso valide epigastrio. Ita ut aliquoties invenerim eum in terram pronum, substratis soli ventri pulvina-

na-

naribus. Sponte enim noverat vehementiores sopire dolores, nervis abdominis prope ventriculum & pancreas compressis. Semianno ante mortem vespere tempus suaviter cum amicis fallens, crudeli cardialgia afficitur, brevique postea anhelitu, demum aphonia; anhelans autem ac vocis expers, cardialgia liberabatur. Vena secta, immisso enemate, vesicante inter scapulas adhibito, insultus ille mirus tridui tempore integre cessavit; sed quæ eo triduo plane si fuerit cardialgia, mox rediit. Quindecim diebus elapsis idem paroxysmus rediit, ut instar asthmatici respiraret æger; at mistura Neurotica sumta brevi convalesceret. Octiduo post repetens priore sævior insultus, eisdem remedio actutum cessit.

An hic, amabo vos! pectoris hydropem somniare, qui in consilium

vocati, Medici potuere? Quid asthmatico insultui similis? Potissimum si consideremus 1^{mo}. quandam affuisse materiem, quæ in singulo Paroxysmo sedem consuetam reliquisse doloris, & ad thoracem videretur transmigrasse. 2^{do}. Idem ita creditum Asthma consuetis discutientibus & antispasmodicis auscultasse. 3^{tio}. Sed auscultasse nunquam, nisi prius dolor antiquam sedem occuparet. 4^{to}. Per integros quinque deinceps menses pectus nihil simile passum esse. Interea tamen torosus eo usque homo, ac perfecte quadratus, indies collabescere animadvertebatur.

Octiduo tandem ante fata plura subito signa manifestabantur, quibus Hydrops pectoris subdole dudum latuisse, jamque adeo provectus esse videretur, ut immedicabilis esset. Improvisa scilicet e somno excitatio,

orthopnœa, oculorum vultusque livor, ac simul manuum inflatio ambarum: consueti vero in Epigastrio dolores hac vice minime cessarunt. Pridie autem mortis omnibus symptomatibus tam in ventre, quam in pectore, liberatus, pulsum bonum, vultum mire recreatum, ac veluti vegetum, præ se tulit, suaque repetere negotia jam meditabatur. Nocte autem insequente in lecto invenitur cum matula in manu veluti vomiturus, sedens, sed jam mortuus; atro, eoque plurimo cruore, sub utraque albuginea, suffusus.

In cadavere præter ingentem totius pancreatis scirrhum, præter lienis crassam cartilagineam superficiem, invenimus diaphragma utroque in latere abdominis, facci instar, prominens; & lympham enormi copia ex-
plentem sinistrum thoracis cavum;

eo-

eodemque modo, sed paulo parcius, dextrum; costarum denique cartilagine plane osseas factas.

Priorum anamnesis, morbi finis, inspectio cadaveris, videntur demonstrasse colluviem in pectore aquarum diu adfuisse; quæ cum larvata, complurium Medicorum aciem fugerit, simul evicit, quam in proclivi sit hic falli. Præter orthopnoeam nocturnam, œdematosasque manus, etiam convexum versus ventrem diaphragma a gravante lymphâ inveniebatur; sed crassitudo ventris notabilem non exhibuit in vita differentiam. Ita ut hoc signum pag. 108. ex Autoribus recensitum in graciliore ventre evidentius, quam in crasso, adverti possit, debeatque.

His omnibus ita pensitatis, veram capimus, arbitror, causam, cur centeni Scriptores practici Paracentesin

vel in morbi principio, vel saltem post irritum remediorum usum adeo laudantes, eam tamen nunquam instituerint: morbus quippe in principio non manifestus, eam non suavit; cognitus postmodum, eam ultra non admisit. Qui vero illam instituerunt, ut *Hippocrates*, *Lowerus*, *Willisus*, & forte pauci alii, hi censendi sunt in ejusmodi ægros incidisse, in quibus signa morbi oportuno tempore manifesta erant.

Unde ea proficiscitur conclusio, ut
1^{mo}. subdolan hic morbus raro, dum curabilis est, cognoscatur; cognosci incipiat, dum ultra vix admittat medelam. 2^{do}. Ut si cognoscatur mature, nihil sit Paracentesi potentius. 3^{tio}. Ut in posterum, dum ambiguus inchoantis mali se exhibet casus, diureticis, purgantibus, sudatoriis, diaphoreticis remediis minime parcamus;
cum

cum ex effectibus brevi pateſcat ſubſitne , quem ſuſpicemur , an alius morbus?

CAPUT IV.
DE EPILEPSIA
ET
CONVULSIONIBUS.

§. I. *Impoſſibilis alias Epilepſiæ cura non raro obtinetur ſedula cauſarum procatarecticarum expiſcatione , quanvis proegumenæ haud auferantur. Gravidæ Epilepticæ id demonſtrans exemplum. §. II. Multiplices viæ, caſu detectæ, enarrantur, quibus aut ſopitus morbus, aut ſublatus fuerit. Hunc in ſcopum ſimplicia quædam laudantur. §. III. Exemplum mirabile curatæ in Adoleſcente Epilepſiæ. Mors ejusdem alia de cauſa orta; & inſpectio cadaveris. §. IV. Epilepſiam vaſtri homines varias ob rationes plurimum ſimulant. Bina, quæ id oſtendant, exempla enarrantur. §. V. Variæ leges dolos eorum malos expiſcandi, & demonſtrandi. §. VI. De Dæmoniacis fictis, eoſque palam proſtituendi metodo. Magna prudentia Medicis opus eſſe oſtenditur.*

§. I. **E**Pilepsia morbus est omnem artis opem haud raro eludens, sæpius tamen vel curandus integre, vel ita saltem moderandus, ut, causa procatarctica ablata, proegumena veluti sopita maneat, atque ita certo quodam sensu morbus plane abactus esse videatur. Unde plurimum juvat, quæ symptomata aliquandiu, aut mox, ante insultum præsentiat æger, apprime nosse; nota autem tollere, aut saltem suffocare posse. Experimentis enim constitit horum felici ac prompto moderamine, haud raro totum averruncari Paroxysmum. En ex pluribus unum! Inexpugnabilis multis ab annis Epilepsia tandem & ante Paroxysmum nauseas, & in Paraxysmo vomitus, exhibet violentos. Illustrissimus Baro *Van Swieten*, egoque, ad Emeticum ante futurum Paroxysmum, dein-

deinde, ne Emetici turbæ nocerent, ad Paregoricum exhibendum, facile devenissemus, ni graviditas obstitisset. Considerantes tamen postea & prægnantem, & fœtum, Paroxyfmis vehementissimis gravius lædi, quam Emetici actione, Emeticum dedimus, Emeticum repetivimus: idque eo cum successu, ut morbus integro decennio siluerit. Præsentiebat quidem illa aliquoties quasdam veluti futuri insultus inchoamenta, sed & has usu sequentis remedii penitus compescuit. R. Spir. sal. ammon. Tinct. Cast. Suc. Asæ fœt. ā dr. 3. ter, quater, die 60. gtt. cum vino. Exaëto vero decennio, summis animi mœroribus confectam repetens Epilepsia occidit.

§. II. Dum vero aut nihil horum ab ægro præsentitur; aut etiam præsensum auferri nequit; aut denique ablatum, effectum causæ latentis non

fopit: sæpe immedicabilis morbus haberi solet. Attamen ne tunc quidem absolute conclamatum pronunciare oportet. Fuere quibus excitatus ille, & nutritus, opipara ac desidiofa vita, subita fortunarum jactura per omnem vitam, haud contemnenda plane compensatione, filuerit. Alii, quibus casus ab alto in cranium, vulneraque ejusdem, aut contusiones, morbi aut moderamen, aut integram effecerint absentiam. Etiam mutatione domicilii, diuturniore peregrinatione, vitæ genere prorsum permutato, quidam leguntur se etiam ab ipsa gentilitia labe præstitisse immunes. Ars hæc, similiaque, contemplata, ac imitata, stupendas nonnunquam curas perfecit. Sed & simplicia usu detexit, quæ summæ ad hunc morbum refrænandum efficaciam sint. Hæc inter *Pæonia*, *Viscus*
Quer-

Quercinum, & *Radix Pby*, five *Valerianæ*, *foliis omnibus pinnatis dictæ* Botanicis. Vidimus fane rebellem dudum morbum aut hisce mitigatum, aut silentem penitus. Experimenta nostra dudum facta confirmavit nobis Doctissimus Vir J. Scopoli, Physicus *Idriensis*, *Flora sua Carniolica* clarus, qui binis dragmis pulveris *Radicis Valerianæ* quotidie datis, deinde ejusdem decoctæ libra post singulam pulveris dragmam exhibita, Epilepsiam triennem, ex terrore, (pessima fane origine) natam, & quovis fere die adorientem, jam per decem septimanas, dum hæc ad me scriberet, suppresserat.

§. III. Sed præterea dum polymorphus hic morbus nos per hæc omnia tentantes, prorsum eludit, nonnunquam nobis, animo ad cuncta attentis, sui amotionem veluti furtim

indicavit. En notabile ejus, quod habuimus, exemplum!

Sexennis puer, sanissimus, insiliente in se cane molosso ita terretur, ut integro triduo convellatur, horrendosque postmodum Epilepsiæ insultus fere quotidie patiatur. Morbus ad omnia rebellis, ac per sexennii spatium perdurans, ignoto Parentibus remedio paululum mitescebat; sed novo irritatus pavore, nec ultra ignoto remedio moriger, puerum vario modo, quotidie, eodemque die multoties, adoritur. Tandem inter pauperes, qui mane Nosocomium consilii causa petunt, mihi sistitur.

Radicem *Phy* trium septimanarum spatio ipsi dedi, sed ab eadem destitit increscens vis morbi me compulit. Quo autem securior medicina esset, illum in Nosocomio locavi. Sedulo examine constitit vi-

gesies & ultra, die, inchoari Paroxysmos, sed semel tantum, bisve, compleri eosdem; idque hoc modo singulis diebus ac noctibus. Virus *Castorei* copiosioris me explorantem, itidem effectus elusit. Quemadmodum etiam aliorum foetidorum, & acrem spiritum rectorem habentium, usum. Morbus varietate terribilis nunquam graviores suos insultus modo perficiebat eodem. Alio enim tempore totum corpus, medium autem alio, convellebatur, altera sui parte obrigesens. Nunc Opistotonos; Emprostotonos utcumque alio tempore fuit. Jamque una vice vehemens calcitratus, alia vice manuum in proprium pectus, caputve, tanta agitatio, jactatio, vibratio, ut, ni cautum fuisset, sibi nocuisset vehementer. Sudor perquam foetidus insultum comitabatur, copiosus ita, ut
in-

indusium, lectusque, plurimum maderent; tenax itidem adeo, ut corpori, ceu quopiam glutine, adhæreret. Mugitus, ululatus, rugitus, gemitus, vultusque omnem in modum horridus, & urinæ profluvium, Paroxysmum frequenter concomitabantur.

Interim morbo quotidie in pejus verso, nascuntur signa vehementis humorum rarefactionis, quam ipsa natura haud levi narium hæmorrhagia testabatur. Sed sæpius me Mater monuerat, nunquam ipsi graviores fuisse, frequentioresque Paroxysmos, quam qui hæmorrhagiis ejusmodi successissent. Re nihilominus crescente, admodumque urgente, sanguinem pede bis detraximus, diluimus, moderavimus, sed morbum hinc vehementer augeri dolumus.

At vero dies diem docet. Animum quippe quamcumque in partem

tem vertentes, constanter demum observavimus puero jacenti, frequentique somno obrepto, morbum frequentiore esse, quam aut sedenti, aut vigili. Hanc ob causam majore die parte illum in sedili locavimus, vigilemque variis objectis mentem grate occupantibus fervare annisi sumus. Sensim hinc insultus rariores.

Verum soporosus erat. Et tandem somno quidem capto Paroxysmum accedere, nunquam autem vigili, advertimus. Ergone causa tetri mali latens aptiores in somno nervos, ut agigaret, invenit, quam vigiliarum tempore? Utique experientia convincebamus, quo Adolescentem diutius vigilem servabamus, eo rariores contingere Paroxysmos. Sic liberos quidem dies integros nanciscebamur; nocturnos vero insultus, cum tamen dormiendum erat, averruncare non poteramus.

Aliud

Aliud igitur consilium arripuimus. Vigili insultus ultra non fiunt : fiunt autem , dum stertorosus eum somnus capit. Ergo causa latens invenit nervos somni stertorosi , quam vigiliarum tempore , ad Convulsiones , ad Tetanos , ad Spasmos , aptiores. Ipseque ille stertor somnum minime naturalem esse demonstrat. Quid igitur si opio nervos insensiles redderemus , ne causa illa , ignota nobis , irritare eosdem posset ? Sed contra : Nunquid opium in dispositione adeo comatosa somnum non posset æternum facere ? aut per omnem vitam stupiditatem ? Sed periculo saltem vacabit minima dosis. Igitur tentavimus. Jamque minima dosis in corpore , opio neutiquam assueto , nec soporem augebat , & tamen boni præstabat quidquam. Dosin ideo prudenter auximus ; omnem omnino

Pa-

Paroxysmum averruncavimus; pro sopore somnum naturalem produximus; puerum brevi agilem, alacrem, sanum, salutavimus; Matri reddidimus.

Ufus Adolefcens integra per tres menses valetudine, ad Nosocomium rediit; tumorem sponte in inguine natum mihi exhibiturus. Herniosusne esset, an alius generis tumor, ambiguum fuit. Ventre primum liberato, emolliens Cataplasma appositum est. Sed paucis postea diebus nuntiavit Mater Dysenteria, quam mihi non indicaverat, sed commiserat Balneatori, Filium periisse.

Cadaveris examinandi copia fuit. Patuit tumorem in inguine ante aliquot dies exhibitum, ingentem fuisse abscessum. Nodus durus nervo diaphragmatico in medio suo itinere arcte circumcretus inveniebatur; aliusque

que similis illi ejus loco, ubi in diaphragma abiturus erat. Thalami Opticorum emarctidi.

Nunquid vitia enarrata nervorum, medullæque, diu post Epilepsiam nata sunt? An vero dudum præsentia, causam proegumenam posuerunt, cui terror accedens, causam Epilepsiæ proximam cum illis formaverit? Incertum! Saltem aut Idiopathica Epilepsia a terrore genita, excitatave, aut Idiopathica a terrore cum male affecta medulla cerebri orta, aut demum invincibilis Deuteropathica, ex male affecto nervo diaphragmatico & terrore nata, arte medica si non curabilem, sopiri saltem ita, ac si penitus abesset, se posse ostendit.

§. IV. Sed tædiosa causa ingratam observationem, Tyronum in gratiam, adjungere jubet. Quippe nulla re turpius decipimur, quam
Epi-

Epilepsia, aut Convulsione, fictis. Vix morbus datur, quem & frequentius, & artificiosius simulare Mendiciorint, quo transeuntium animos in commiserationem commoveant. Pueri ac puellæ hanc vafram fingendi artem a se mutuo discunt, ne vapulent; vel ut mollius tractentur; vel ut nihil cogantur addiscere: quemadmodum vident cum pueris, quos in Paroxyfinis forte viderint, a parentibus, tutoribusque agi. Maturam Virginem Procorum penuria torquet, angitque. Forte casu audivit a garrientibus inter sese matronis Epilepsiam matrimonio nonnunquam curari. Ergo eam artificiose fingere discit, quo cogat Parentes se viro jungere. Monachus, quo a Choro, a jejuniis, aliaque monasticæ vitæ asperitate se vindicet, se fingit convulsus. Quin & sine peculiari in-

tentione ipse malus animus eo nonnullos seducit. Tandem etiam in scenam diabolus adducitur, quo obsessos se fingunt, intentione fontica varia, etiam, quis credat! superstitionis roborandæ causa. En aliquot, quæ habuimus, exempla!

Adducebatur mihi puella gravi auditu laborans. Quo revellentibus, & factis in aurem injectionibus, restituto, Convulsiones suboriebantur, quas hoc ordine contingere Mater narrabat. Incipiebat tremere puella, angi, anhelare, clamare, brachia agitare, totumque corpus, humi cadere, pollices fortiter intra pugnos firmare, vociferari, cantare, ore tandem producere spumam. Principio bis, ter, die, id contigisse; jam autem quavis ferme hora.

Commodo meo morbum examinaturus, puellam jussi in Nosocomio
fer-

fervari. Vidi illam, eadem die, in lecto decumbentem, convulsam, mediisque in Convulsionibus pollices adeo fortiter intra pugnos firmare, ut maxima vi vix solvere valerem. Oculos horrende agitabat. Attamen dolum subesse suspicabar 1^{mo}. quod oculi durante Paroxysmo non con-
nivendo, sed sano prorsum modo, aperirentur. 2^{do}. Quod pulsus fere naturalis esset. 3^{io}. Quod cortinis lecti clausis pupilla dilataretur, vicissimque apertis iisdem contraheretur. 4^{to}. Quod pupillæ admota candela vividissime se contraherent, & puella quasi nocumentum inde percipiens, caput rotaret. Igitur e lecto statim exemi : minitantem ipsam lapsam Custos ægrorum minis, si caderet, intentatis, erectam servavit, & baculo munitus, eoque veluti vibrans, Convulsionum progressum sti-

tit. Conviſta demum puella, fatebatur & furditatem olim, & nunc Epilepfiam, finxiſſe ſeſe, ne cogere-
tur munus ancillare obire, cui eam Mater deſtinaverat.

Hanc in fingendi fallendique artificio craſſiorem, ſequebatur aſtutior Adoleſcens, quem vaſamento ſuo pluribus me luſiſſe diebus fateor. Mirifice convellebatur toto abdomine, tumque vehementer ſingultiebat. Ortum porro id aſſeverabat Mater, quod Emeticum ipſi datum fuiſſet. Adjungebatque Paroxyſmum non raro etiam invadere dormientem. Deſtentus aliquot diebus in Noſocomio, enemate, epithemate, neuroticis ac paregoricis, ſanitati, ut videbatur, reſtitutus, Parentibus redditur. Vix vero tantisper paternas incoluerat ædes, quin repeteret Paroxyſmos, & a Matre in Noſocomium reduceretur.

Fu-

Fucum suspicatus, privato eum cubiculo inclusi, ubi se solum credens, nobis eum per rimam contemplantibus, tranquille sedebat, nobis intransitibus in Convulsiones Singultusque prorumpebat, nobis egressis iterum sedatus. Imo idem in Paroxysmo contingebat, dum adstantes aliorum cerneret occupatos; nam fictis tandem motibus defatigabatur. Patri accessito veritatem fateri coactus, ideo se simulasse hæc confessus est, ut a Magistro, apud quem carpentariam artem discere cogebatur, dimitteretur, ædibusque reciperetur paternis. Igitur vel Mater cum Filio collusit, dum etiam dormientem malo invadi affirmaret, vel ipse novit se dormientem vaserrime fingere.

§. V. Versati in hisce Practici ea passim experiri solent, quæ jam enarravi, quo doli latentis fiant cer-

tiores: ac præter hæc omnia, bonis unguibus norunt prehenfam cutim rudissime vellicare; imo ignem manui, aliisve corporis partibus admove-
vere, & si ne id quidem juvat, ignem immediate adplicare solent. Exempla docent fictas Epilepsias ejusmodi tentaminibus se prodidisse.

Attamen & morbum fictum esse, & ne igne quidem posse detegi, non caret exemplo. Scelestissima femina 20. annorum, quæ animi gratia vetulam truculenta manu occiderat, facta in carcere est horridam Epilepsiam, qua longo tempore laborasse credita fuerat, se impio animo finxisse; id quod etiam experimento confirmavit. Morbum enim simulare jussa, ita simulavit, ut quivis fere crederent fictum morbum in verum demum abivisse; jussaque medio in Paroxysmo surgere, & tranqui-

quille ambulare, surrexit, ambulavit. Hanc nos, Illustrissimus Præses, Spectabilis Decanus, & Clarissimi Professores, supremo jussu, nomine Inclytæ Facultatis Medicæ examinantes, eadem audacter proferentem, & repetentem audivimus. Et quod res est, ostendit nobis tres fœdas in manu cicatrices, quas ipsi igne Chirurgus, urendo veritatem exploraturus, olim inusserat, quasque inuri sibi adeo tranquille pertulerat, ut ultra nemo de certitudine Epilepsiæ dubium moveret. Quis crederet remedium, adeo ceterum infallibile, quandoque turpiter fallere posse? Melius profecto in hac scelestissima muliere Parisinum successisset experimentum. Cum enim quisquam ad Epilepsiam in platea adstantium fucum subolfecisset, jussit convulso paleam substerni, ne sibi læde-

ret : quo facto , utrumque paleæ extremum flamma incendit , effecitque , ut vaferimus homo fulmine citius fugam capefferet.

§. VI. Sed & aliud Convulsionum genus hic memorandum est , quarum autor , horresco referens , Sathanas dicitur. Utroque in sexu id expertus sum. Plures feminas , quas a diabolo obsessas vulgus non modo , sed & Sacerdotes jurabant , AUGUSTISSIMA IMPERATRIX ad Nosocomium practicum deferri jusserat , examinandas. Examinaui porro easdem eo munitus principio , quod homines a dæmonibus revera obsideri , ut ajunt , queant ; quodque id invictis argumentis tum ex Novo Testamento , tum ex genuina Historia Ecclesiastica , & SS. Patrum Doctrina , petitis , indubitatissimum sit ; ut meridiana luce evidentius Illustrissimus
Præ-

Præses, Cap. de Epilepsia, demonstravit: sed simul eo principio, quod Sæculis posterioribus, præsertimque corruptissimo nostro, millenæ fingantur fallaciæ, quas utinam Simpliciores Monachorum, Sacerdotumque, haud ita foverent! Horum porro principiorum ope fraudem facile detexi, detectam revelavi. Ubi igitur res mihi constabat, sic egi: Custodes ægrorum, singulos bona aquæ amphora munitos in acie collocabam, ut mox, dum ad auditum venerabile DEI Nomen, nominave Sanctorum, rerumque sacrarum, fictus diabolus corpora pro more agitare, integram amphoram unico ictu in faciem, pectusque profunderent; idque ita, ut si ad primam profusam insultus non cessaret, suam ordine omnes evacuarent. Prima utique vice amplo satis aquæ dolio indige-

bam: sed cum intelligerent omnes deinceps Convulsiones hanc sortem habituras esse, non habuerunt postmodum ullas, sed integre sanæ apparuerunt.

Nemo in nos, confido, quod rude adeo & incommum experimentum tentaverimus, tanquam in profanos, indignabitur. Eramus aliis argumentis plane convicti de fraude nefanda; sed ejus fabricatores publice convincendi erant. Ad exhibitam v. g. sanctæ Crucis imaginem, aut ad alias res sacras, quas corpori adplicatas illico diabolum revocare ferebant, videramus quidem statim id, quod prædixerant fieri: sed quando easdem res sacras involveramus, ut, quid essent, non adpareret; involutasque eisdem applicueramus, Convulsio nulla excitabatur. Si quoque rude lignum aqua sacra aspersum esse dice-

ba-

bamus, eoque corpora tangebamus, furebat diabolus; itidemque si ipsa corpora aqua lustrali aspergebamus; sed æque valide etiam, dum aqua mera utentes, tantum fingeremus eam aquam sacram esse. Igitur fraudis certi, reliquum experimentum duntaxat instituimus, ut dolus omnibus patefceret.

Igitur sanctissimæ nostræ Religionis veneratione & amore ducti, debuimus ea confundere, quæ illam adeo dehonestent: & ex corde vovemus, ut ii, quorum est Catholicam Religionem tueri, propagare, & ornare, a depravata aut malitiosa hominum idea fovenda, statuminandaque, abstinerent; & sive per se, sive per alios, eadem, quæ nos, tentamina instituerent. Utique haud tam sæpe res ad Religionem spectantes, ludibrio & irrisioni exponerentur,

tur, nec ipsi illi, fraude postmodum detecta, ignominia confunderentur.

Profecto si ad doctos hominum dolos, eruditamque vafritiam, Medici se non aliquantulum cautos, atque subargutulos præstent, & artem suam, & se ipsos, ludibrio continuo exponunt. Casus quotidiani sunt. Haud ita pridem femina aderat, quam ipse Confessarius, tanta Religione pollere, tanto eminere pietatis exercitio, assererat, ut si Sancti in hac tellure haberentur, hæc saltem Sancta habenda foret. Anxietatibus, & plane singularibus faciei convulsionibus viciniam totam in commiserationem ducebat. Hinc illam in Nosocomio suscepi, & bona fide aliquantisper deceptus, tandem attentior in rem detexi pulsum & ante insultum, & sub insultu, postque eundem, nunquam non optimum esse; dum
de

de prostrato prorsum appetitu conquereretur, eam integram suam portionem avide abligurire; & durante Paroxysmo me manibus meis ita vultum ejus componere posse, ut Convulsiones plane cessarent. Convictus doli ego, turpitudinis eam suæ, suæ hypocriseos, convincere annitebar, sed incassum. Alio ergo modo convincenda erat. Cura per aquam, ut in dæmoniacis fictis instituta, effecit, ut Convulsiones redierint nunquam, licet adhuc per 12. dies in Nosocomio detineretur. Sed ne tunc quidem finis fingendi. Quippe a facie malum in pectus delapsum esse, continuumque creare anhelitum conquirebatur. Fraudem ipsa prodidit, dum liberrima, & longe producta respiratione fruebatur, quando per horæ quadrantem mentem ejus grato, quem cum illa miscebam, sermo-

mo-

mone, a decipiendi studio abduxeram.

CAPUT V.

DE

CALCULO, UVA URSI, LITHONTRIPTICIS

DICTIS, &c.

§. I. *Historia hominis a diuturnis Calculi doloribus Uva ursina liberati; eaque occasione describitur remedium, quo sibi olim multum profuerat.* §. II. *Alius Calculosus, qui quodam remedio multum levatus, deinceps vero minime, ab Uva Ursi juvabatur; viribus autem penitus extenuatis moriebatur. Miranda ejus Anatome. Non curat Uva ursina, quos Lithotomia non curasset. Recensio multorum, quæ vocant, Lithontripticorum; quæ probantur Uvæ Ursi viribus minora.* §. III. *Uva tamen quosdam non nisi tarde admodum juvat, imo nonnunquam Recidivam post se relinquit, si non continuatur: his sectio suadenda, ne degeneratio partium immedicabilis fiat.* §. IV. *Congenitus verosimiliter Calculus felici sectione curatus. Anceps hæc curatio, cum omnibus eam suaden-*

dentibus, dissidentibusque, argumentis enarratur, acutissimusque illi mox subsequens morbus: tum etiam urinæ phænomenon, Uvæ Ursi necessitatem, etiam post sectionem indicans. Subjunguntur, intermiscunturque observata circa Lithotomiam, & incommoda, quæ illa nonnunquam post se relinquit. §. V. Urinam Calculosus reddit, in qua, dum in vitro quiescit, lapilli generantur. Homini huic Uva Ursi mirifice confert. Puer calculosus, quo toto tempore Stepfenianum Remedium sumit, calculosa ramenta cum urina copiosissima emingit; sectione nihilominus liberandus. Non fuere soluti Calculi ramenta, sed corpora genita a materia terrea copiosa, in vesica præsentia. Forsan generalis Calculorum ejusmodi Dispositio est. In contrarium autem affertur Historia Rev. Kirkpatrick, & Quadraginta Calculosorum, in Actis Acad. Reg. Scient. Paris. ex quibus Cl. Morandus concludit id proprie effectum esse remedii Anglicani, viresque ejusdem Lithontripticas hinc demonstrari. Argumenta contra hanc sententiam. §. VI. Novum experimentum ostendens id multiplici observatione constare, quod hæc ipsa Diathesis Calculosis communis sit, quodquæ sincere loquendo Stepfenianum Medicamentum, si forsan sapone, ac calce, quibusdam levamini est, plurimis tamen ita hanc in Calculosis dispositionem augeat, ut id jam fiat in vesica, quod alias in matula. Con-

je-

jecturæ quædam circa Lithiasin, & circa originem copiosæ adeo calcariæ materiæ. §. VII. Binæ nostræ Methodi in Calculo videntur cæteris hucusque cognitis anteponebdæ. Vires horum omnium vere Lithontripticas nulla experimenta adstruunt. Unde cura integra non est, sed egregie adeo pallians, ut homo æque liber sit ab incommodis morbi, ac si Calculum non haberet. Nec Calculus extra corpus humanum in aqua calcis magnam partem solutus, aliud docet. Tandem problemata proponuntur circa causam hujus indolentiæ.

§. I. **S**patio elapsi Academici anni frequentiores quosdam olim morbos, observavimus rariores; Paralyfin nempe, Calculos, ac systematis urinosi alias affectiones: haud tamen ita raros, quin novas observationes colligere potuerimus, quorum præcipua dabo, una cum nondum communicatis antiquioribus.

Vir mediæ ætatis a 14. annis dolores in mittenda urina percipiens, cujusdam consilio usus est quotidie,
spa-

spatio novimestri, septem nucibus Avellanis, & novem Juniperi Baccis. Quo remedio, postquam urinam vini fœcibus similem trimestri tempore minxisset, vitam diu tolerabilem duxit. Tandem tamen dolores redierunt, & urina anni abhinc spatio glutine copioso scatet, validique adeo urgent tenesimi, ut Intestinum Rectum ad pugni molem extrudatur. Remissionis tempora observat nonnunquam. Et quæ utilia quondam remedia fuerant, ea usu nunc cassa experitur. Calculus, Cathetere inducto, manifestus adparuit.

Integris sex mensibus Uva Ursi, & opiato nocturno, usus, fere convaluit, ut leviora, quæ nonnunquam supersunt, incommoda non curet, remediumque, quod ceterum gratis habet, & facile sumit, prorsum negligat. De industria formulam reme-

dii quo malum quondam compeſcuerat, addidi; ut plura in rerum natura exiſtere intelligeremus, quæ hæc ærumnas mitigent. Aliud ſequens hiſtoria dabit.

§. II. Vir 32. annorum a 4. ætatis anno urinæ difficultati obnoxius vixit, variosque excrevit Calculos. Ad vitæ ſuæ annum 24. mulierculæ conſilio, liquore uti cepit, qui odore ac ſapore Therebinthinam referret, eoque integri ſeptennii ſpatio optime ſe habuit. Pauper ipſe, cum liquori ſolvendo ultra non eſſet, ſubſtituit Juniperi Baccas, immenſaque devoravit quotidie copia. Tandem vero redeuntis doloris crudelitate iterum victus, antiquum liquorem repetivit; ſed jam citra levamen. Doctiſſimus *Gleiſner*, qui jam *Græcii*, *Styriæ* Metropolis, praxin magna cum prudentia & laude exercet, miſeri hu-

hujus curam suscepturus mecum consultuit, datisque cum Uva ursina, & Opiato, traumaticis ob puris eminenti copiam Decoctis, ingens solamen homini attulit, & a doloribus per tres septimanas immunem præstitit. Homo tamen labescentibus sensim viribus contabuit, periit.

In cadavere renes magni, sinister præprimis, faccos pure plenos referebant. Ureteres ita amplissimi, ut sinister Intestinum Colon amplitudine superaret. Vesica circum Calculum contracta, ac plane ulcerosa. Calculus uncias quatuor, una dragma minus, pondere pendebat, fuscus uno latere, altero cinereus.

Confirmari dato exemplo cernimus, quod *Tom. 4.* variis anatomicis observationibus posueram; eos nimirum Uva Ursi non curari, quos Lithotomia curare non potuisset.

Calculi quippe sectio degenerationem ureterum, ac vesicæ, renumque, non emendat, non aufert. Deinde ex enarratis patet folamina plura adhiberi posse, quibus longa annorum serie sopiantur hæ calamitates. Occasione liquoris Therebinthinam referentis memini olei dicti *Harlemensis*, apud *Batavos* famigeratissimi, quod Therebinthinam odore ac sapore quoque multum æmulatur. Equidem nocet multis, aucto forte stimulo, aliave ejus qualitate; sed plures tamen novi, qui ejus usu per annos sese præstent doloribus immunes. In Millepedibus cum Oleo Vitrioli Rostochii *Laurenbergius*, in *Dissert. de Lithontrip. ad Hoyerum*; in Olei Vitrioli rectificatissimi usu copiosissimo *Schulzius* (vid. *Disp. Chir. in Collect. Ill. Hall. tom. 4.*) efficax ad Calculum remedium invenisse se

autumarunt. *Uva Ursi* tamen reliquis palmam præripere videtur, quia & pluribus prodest, & constantes curas, Calculo etiam manente, efficit.

§. III. Porro quanvis celer in multis ejus effectus sit, in aliis tamen tardus admodum observatur; id quod in bienni infante, ante triennium mihi exhibito, præprimis observavi. Etenim datum per 4. menses remedium vix juvabat quidquam; deinde inconstanter; jam vero ab anni elapso spatio constantissime: ita tamen, ut si semper bene valentem esse puerum Parentes velint, pulveris usum intermittere nunquam debeant. Asper Calculus ipsi ante triennium deprehensus, similis etiam hoc anno, repetita per Cathererem exploratione, inventus est.

Hic sane puer non eum remedii habuit, quem alii, effectum. Alii

enim post longum ejus usum nesciunt ultra se Calculo laborare, quanvis a longa die remedio carentes; hic si diu intermittat, a redeunte dolore ad idem confugere cogitur. Quare si hoc anno id non emendetur, facile proponemus Parentibus Lithotomiam: cum ab una parte Uva Urfi, magno-
pere licet ipsi proficua, clare tamen innuat aliquam, quanvis forte nondum valde notabilem, urinosi systematis degenerationem; prout observata *Tom. 4.* data docuerunt: ab altera parte metus est, ne a diuturniore medicamenti usu vel abhorrere puerulus, vel desistere Parentes, incipiant, quod remedio dudum non adhibito, malum sensim renasci videatur: quo in casu miserrimum in statum puer dilaberetur, neglectuque auxilii in Vesicæ, Ureterum, Renumve, immedicabilem incideret degene-
ne-

nerationem. Ita simili in casu hoc anno fecimus.

§. IV. Quippe mense Februario anni 1759. Parentes ad me ducunt novennem filium suum, qui ex quo natus erat, perpetuo ipsis visus fuerat in emittenda urina dolere, ejulare, eamque nunquam naturaliter, sed perenni reddere stillicidio. Ærumnis hisce pauperes pedetentim assueti medelam non fecerant; jam vero cum sine commiseratione intolerabiles pueri dolores a 14. diebus adspicere ultra non possent, eum mihi obtulerunt. Immisso Cathetere Calculum manifeste deteximus.

Bimestri spatio incredibile quantum Uva ursina profuerit! Renascente nihilominus posthac dolore, omnem curationis fiduciam deposuerunt Parentes, puerumque omni destitutum reliquere auxilio. Interea

ita crevit crudele malum, ut nunc hunc, nunc illum, levandi causa, adierint. Integro demum anno, ex quo puer ultimo nobis oblatus fuerat, elapso, Pater illum hoc mense Majo iterum adduxit, enixe petens, ut eum sectione liberaremus. Calculi præsentiam exploraturi, Catheterem non nisi cum labore, dolore, hæmorrhagia, inducere valuimus, nec movere inductum: ita ut Calculum ea vice non perciperemus. Digito vero in anum immisso, eundem versus vesicæ collum deprehendere videbamus.

Hic optimus noster Chirurgus *Ferdinandus Leber*, egoque, rem citro, ultroque, versavimus. Repræsentabamus nobis 1^{mo}. Casum ut fere congenitum, forsitan incurabilem fore, & notabiles nonnullas partium degeneraciones jam adesse. 2^{do}. Uvam
Ur-

Ursi initio prodesse visam, reditum calamitatis minime impedivisse, adeoque non juvante ea, nec Lithotomiam, ex factis antea observationibus, futuram. 3^{tio}. Vesicæ ad Calculum contractionem, tum impedimento fore, ne operatio rite peragi posset, tum si adhuc perageretur, vulnus vesicæ densæ, cartilagineæ, imo scirrhosæ, non coaliturum. 4^{to}. Hisce iisdem difficultatibus fortassis etiam alios permotos fuisse, ut operationem prudenter a sese declinarent; ac proinde eadem nobis non succedente, aut justam deprehendendi, aut saltem iniquam calumniandi causam, nos iisdem præbituros.

Sed ab altera parte considerabamus 1^{mo}. Patrem, aliosque, qui nobis puerum commendabant, id ardentè desiderare. 2^{do}. Vires ejus aptas ad subeundam sectionem. 3^{tio}.

Ex reditu doloris ad degenerationem partium paulo forte meticulosius concludi; cum Uva ursina haud sufficienter adhibita fuisset. 4^{to}. Vesicæ validam circum Calculum contractionem, indurationemque, tum operationi, tum vulneris consolidationi, impedimento quidem fore; attamen id nondum certo constare. Cavis namque in visceribus nunc summam observari contractionem, nunc iterum relaxationem; adeoque ad eorum contractionem semel, iterumque, perceptam, velle eandem perpetuam credere, iniquum fore. Argumento esse experientissimi *La Moitte* observationem, qui tertio jam die uterum contractissimum, una cum suo Collega, offendens, partumque lege naturæ impossibilem credens, demum Parturientem DEI solius auxilio commendaturus, abiturusque, ultimo tandem

dem explorare tentabat, jamque mirabundus contractionem ita relaxatam deprehendebat, ut breviorē, commodiorēque partum vix unquam vidisset expertissimus Embryulus. Sed etiam mutuæ nostræ circa vesicam urinariam experientiæ, mutuam nobis memoriam refricabamus. Adeoque nec hoc operationem impedire oportere, si nova exploratione contractionis relaxationem deprehenderemus. 5^{to}. Denique si ad sectionem rationes sufficienter probabiles adessent, quæ fartam nobis testamque conscientiam redderent, famæ detrimentum omnium postremum esse oportere, ad quod ii attenderent, quibus proximi salus unice ante oculos versaretur.

Sectionem igitur concludentes, instituimus eam die 26. Maji, præsentibus Magnifico Archiatro A. Störck,
Cl.

Cl. Viro *J. Gasser*, dignissimo nostro Anatomes Professore, Viro expertissimo *L. Erndl*, Physico in Nosocomio Civico, Medico prudentissimo, optimo Chirurgo Cæsareo *Homburg*, dexterrimo ad S. Marcum Chirurgo *Reigberger*, Nosocomii Assistentibus, aliisque.

Catheterem, Itinerarium in operatione dictum, non nisi magna cum difficultate Operator *D. Leber*, induxit, sanguine denuo ex uretere profluente: eo vero intra vesicam admisso, urina mox jactu valido, & continuato, Catheteris apertura profiliit, ipseque Catheter commode in vesica movebatur. Itinerarii apice oblique ducto, ut fere 15. gradus notasset in quadrante circuli, si angulus rectus a centro Itinerarii & ad medium Perinæi, & ad latus, ductus fuisset, fiebat sectio sufficiens.

Cu-

Cujus longitudinem cernens Operator, eamque Calculi magnitudine, per anum explorata, majorem intelligens, non usus est instrumento famosi Lithotomi *Le Dran*, quo in longitudinali sectione adhuc alia fiat, quæ latus sectionis externum in angulos rectos fecet, ut Calculo majus spatium paretur: eo, inquam, instrumento ob vulneris amplitudinem haud egens, illico Conductorem introduxit, & extracto Itinerario Forcitem. Verum cum simul Calculum digito in vulnere prehenderet, Conductorem, Forcitemque extraxit, ac digitis Calculum prehendit, eduxit. Vix quinque minutis tota operatio durabat. Ejulans eo usque puer, mox ad visum Calculum præ gaudio exclamabat, veluti hoc momento omnium ærumnarum oblitus. Calculus ovalis, asper, sed mollior; ut si for-

fice

fice captus fuisset, exteriore sui parte omnino abiisset in grumos, parvosque lapillos. Erat ponderis unc. i. dr. i. scrup. i. Potuit Chirurgus facile perlustrare vesicam, alium Calculum, grumosve, quærendi causa. Vulnus illico plumaceolo textit, & emplastro; repositoque in lectum puero, ventrem tepido oleo rosaceo totum inunxit, ac mappa lanea textit. Emulsionis leviter paregoricæ, & juris carniū, portio modica dabatur alternatim.

Fortunatissimam sectionem horrida symptomata, a nobis sane non prævisa, sequebantur. Post meridiem quippe febris magna, vespere ad octavam maxima, oriebatur; una cum pessimo Peripneumonicorum roncho, tensoque, & asseris instar duro, abdomine. Quare mox novem uncia sanguinis brachio detractæ, & emolliens

liens cataplasma ventri, oleo bene inuncto, admotum est. Ingravescente autem post mediam noctem febre, roncho, tumore, ac duritie ventris, repetita V. S. fuit. Summe pleuriticus utriusque missionis sanguis fuit. Exinde sensim decrevit febris, ac febricula modo per aliquot dies adfuit; urina per vulnus bene effluxit, pusque quarto die ad bona labia deprehensum est. Eluebatur porro vesica sæpius decocto hordei cum oleo lini, ne quid heterogenei in eadem maneret. Emulsiones paregoricæ diu continuabantur.

Sed de Urethra nunc cogitandum erat. Vulnerata quippe hæc toties per Catheterem, nec amplius stillicidio urinæ consueto aperta, sed collapsa, nunc facile coire, obturarique, poterat, omni urina per vulnus effluente. Cum enim a secto

Cal-

Calculo nonnulli per omnem vitam urinas vulnere stillent, five ob vulneris non coeuntis malignitatem, vel ob Urethræ coalitionem, metuimus molestissimum hoc turpissimumque incommodum a posteriore causa. Unde liquorem in Urethram quotidie injiciendum esse decrevimus. At vero læti advertēbamus maturum urinæ per Urethram stillidium, ideoque destitimus incepto. Tandem hortatu, multisque promissis, puerum deduximus ad consuetudinem urinam in vitrum reddendi: unde clauso penitus exacta septimana tertia vulnere, ac cicatrice obducto, urinam deinde semper debito tempore retinuit, & in vitrum aut matulam reddere consuevit.

Attamen necdum absoluta cura nostra. Glutinis, Calculum vesicæ comitari soliti, & aliquoties puris,
co-

copia notabilis in fœtente urina quotidie adparuit. An id residuum ejus, quod Calculi tempore in vesica præfens, injectionibus ablui, præ tenacitate, non potuerit? Et an vesica hinc inde exulcerata a Calculo fuerit? Igitur mox Uvam ursinam dedimus, qua continuata urinæ fœtor paulatim emendabatur, & pauculum ultra illius materiæ nunc prodit.

Quam pulcre hæc Lithotomia confirmat sententiam, quam supra, de varia amplitudine & contractione viscerum cavorum protulimus! Hinc raro desperandum. Prudentia tamen semper opus est, ne vesicam, quo tempore adeo contracta est, impertune lædamus. Nunquid, si ter, quater, eandem contractam invenimus, ipsam irreparabiliter contractam esse concludemus? Forte sic est: sed si per vices contrahatur, la-

xeturque, fieri id potest, ut sæpius in contractionis tempora incidamus, & ut ea tamen haud perpetuo contracta maneat. Ita ut ne tunc quidem, sine ulteriore examine, animum despondeamus.

§. V. Est hac occasione de alio Calculosorum phænomeno differendum.

13. Julii hujus anni ad me venit Civis *Cremzensis*, vir 34. annorum, qui per 28. annorum spatium verus Lithiascos Martyr, cum ardore nunquam non minxit rubram arenam, Calculos autem nullos. Evacuavit subinde olim, & nunc sæpius ab octo retro annis, copiosissimam albam glutinosam materiem; quæ paululo tempore sibi relicta, friabiles format, albidosque lapillos. Et hæc quidem in quiete. At si corpus itinere, aliove modo, movet, urinam
fu-

fuscam, ac stranguriosam deponere solet. Lapillos hos, quorum copiam habeo, diceret quis cretæ albæ majora esse minoraque frustra, ad figuram demum vasis, in quo urina servatur, formata. Incredibile quantum Miserrimus ille intra mensis spatium Uva Ursi mutetur, idque jam ab ejusdem initio: ut certe spem magnam faciat summi solaminis.

Juvat hic phænomenon referre, quod 20. abhinc annis observavi, una cum celeberrimo Viro W. *Ouwens*, *Franequeræ* Academiæ in Medicina Lumine, ac Celsissimæ Principis *Arausianensis* viduæ Archiatro. Calculosus puer *Hagæ Batavorum* utebatur famoso Anglorum remedio, *Joannæ Stepfens*, dicto; quod constat pulvere, decocto, & pilulis. Pulvis componitur ex putamine ovorum, & limacibus, domiportis dictis,

omnibus vero calcinatis. Decoctum fit ex Sapone Hispanico, seu Veneto, ex calcinata herba dicta Ambrosia campestri, Floribus Chamomillæ, Fol. Fœniculi dulcis, Petroselini & Bardannæ. Pilulæ parantur ex Domiportis calcinatis, semine Pastinacæ sylvestris, seu Elaphobosci, & Lappæ majoris; tum ex Fructibus Fraxini, Rubi Idei, & Oxyacanthæ: horum omnium calcinatorum ā q. s. Cochleare pulveris cum unc. iv. Saponis Hispanici, & Mellis q. s. in pilulas redigitur.

Videbamus porro hunc puerum, magno cum Parentum gaudio, cum urina quotidie emingere fragmenta alba, lapidea, vel calcarea; ejus quidem formæ, ut adparerent veluti excorticantis se Calculi ramenta esse. Quanvis autem longo tempore ejusmodi materiem copiose redderet, Cal-

cu-

culi tamen symptomata ideo non mitigabantur, neque imminutus deprehendebatur Calculus. Ita quidem, ut tandem post collectam magnam ramentis hisce repletam pixidem, puer sectione liberari a magno Calculo debuerit.

An ergo in corpore illius pueri idem a glutine, in vesica Calculosorum contento, productum est, quod in Cive *Cremzensi* ab eadem materia in vitro? aut in matula? Et quidem ita, ut indurefcens, lapidescensve, hoc gluten, primo adhæserit circum Calculum; deinde fragile nimis, per ramenta cum urina prodeuns, exfoliati in dies Calculi specie deceperit? Utique si binos hosce casus inter sese conferamus, videremur ejus fere convicti esse, quod talis sit calculosæ urinæ dispositio, ut quandoque suo in glutine, sive dum intra

vesicam est, five extra eandem, petrificantem, ut ita dicam, hanc materiem gerat. *Cremzensis* enim nihil fumsit, quod ullam habeat cum *Stepfeniano* remedio affinitatem; ut exactissimo examine, iterato instituto, certus novi. Hanc autem sententiam confirmabit afferendum deinceps ex *Clarissimo Adamo* exemplum.

Contrariam tamen conclusionem sequentia videbuntur suadere. Rev. *Jacobus Kirkpatrik*, in edito morbi sui *Diario* narrat se, postquam 17. annorum spatio *Nephritide* calculosa, & vesicæ *Calculo*, laborasset, *Stepfenianis* Medicamentis ab *Octobri* mense 1738. usque ad *Aprillem* 1739. sedulo usum esse, & quod nunquam antea sibi contigerat, jam ab initio curæ se ejusmodi fragmenta cum urina excrevisse, idemque & durante tota cura, & post eandem,
con-

continuasse: ita ut majora minorave
fragmenta numero 1036. eminxerit,
prætereaque quinque parvos lapillos.

Sed secundo idem *Kirkpatrick* sæ-
penumero in matula sua advertit il-
lud ipsum glutinosum urinæ sedimen-
tum, in similem, sed sæpe crassio-
rem, magisque lapideam, abivisse
substantiam. Egregius *Morandus* in
Act. Acad. Reg. Scient. anni 1740. in
sua prima Dissertatione super *Stephe-*
nianis Medicamentis, observationes
nobiscum communicans, quas circa
40. homines, iisdem usos, jussu Aca-
demiæ fecerat, adnotaveratque, af-
ferit illos homines passim omnes so-
lere, *Communement ils ont rendu &c.*
ab ipso remedii principio, cum urina
gluten, albumque deponere sedimen-
tum; quod dum fervaretur, atque
siccesceret, in flavum pulverem ab-
iret; huncque pulverem, dum igni

imponeretur, animale quidquam redolere. Plures porro non nisi hanc solam materiem produxisse; alios autem etiam veluti *crySTALLIZATAS* laminas, talco perquam similes; alios squammas lapideas, easdemque convexas; nonnullos dura fragmata Calculi; quosdam denique lapillulos. Additque eos, qui ante remedii usum rubram mingere arenam confuescerent, eandem sub remedio ultra non reddere.

His ita utrinque positis, qui ab una parte considerat in glutine Calculosorum, qui *Stepfeniana* medela nunquam usi fuerint, hanc calcariae aut lapideae materiae genesin haud ita descriptam esse; & e contrario eandem a glutine urinæ eorum, quibus hæc medela exhibita fuerit, fere inseparabilem esse; in eam facile sententiam abire forsan potest, quod ab eodem remedio miseranda ad Lithia-

fin

sin Diathesis passim generetur, illud-
que ideo augere potius Calculum,
quam solvere, conterereque debeat.
Equidem contrarium laudatus mox
Morandus in altera sua Dissertatione
Act. Academ. Reg. Scient. Paris. anni
1741. evincere conatur; dum Cal-
culum hominis, qui post ejusdem re-
medii usum, crudelitate morbi aucta,
periisset; dum duos alios Calculos
binorum hominum, quos remedio
frustra usos sectione fervare oportu-
isset; plenos invenerit inæqualitatibus,
crenis, foraminibus. Fateor, cum
claro hoc Scriptore in eandem olim
sententiam abiveram, præ argumenti
probabilitate: sed ab eadem disce-
dere observationes postmodum captæ
jubent, cogunt.

Observo enim 1^{mo}. & Civem *Crem-*
zensensem lapideam hanc, aut calcaream
materiem abundanter reddidisse, li-

cet nec hoc famoso olim remedio, nec illi confimili, unquam usus sit; & *Haganum* puerum, post tantam emissæ hujus materiæ copiam, nullam Calculi, sectione educti, solutionem exhibuisse. Considero 2^{do}. præclaram remedii famam velocius forte evanidam, quam natam fuisse; ipsosque *Britannos*, ab octo & pluribus retro annis, in Aqua Calcis cum Sapone, vix ulla *Stepfeniani* remedii facta mentione, omnem fiduciam collocare. Sed dico 3^{io}. ejusmodi Calculos inæquales, ac veluti corrosos, foraminosos, hinc inde pumicosos, frequenter reperiri in his, qui illud remedium non adhibuerint; hasque præterea inæqualitates Calculi æque ab adposita inæqualiter materie, quam ab eadem soluta & ablata, produci posse.

Fuif.

Fuisse tamen, quis oggeret, quos observationes allatæ integre curatos affirmant. Respondeo nondum convincentia, quæ id statuunt, argumenta esse. Equidem copiosior Calcis, Saponisque, usus, multis profuit, ut Nobilissimo *Horatio Walpole*, ut Homini nostro *Tom. 2. Rat. Med.*, ut ibidem *Viro militari*, & ut novum exemplum adhuc præ oculis habeo. An vero ideo, qui remedium *Anglicanum* sine noxa tolerantes, levamen inde experiuntur, curati dici debeant? Et *Kirkpatrick*, & reliqui Angli, Gallicque, quos inde curatos fama ferebat, vix notabili tempore a remedio destiterant, dum promulgarentur eorum curationes. Imo ipse *Kirkpatrick* vix ab illo cessaverat, quin lumborum se vexari dolore denuo conquereretur; quem tamen in gratiam, ut apparet, remedii, Lumbagini, quam

quam Nephritidi, acceptam ferre maluit.

§. VI. Sufficiat porro, occasione experimenti Civis *Cremzensis*, ea argumenta attulisse, quæ *Anglicanum* Medicamentum laudent, vituperentque. Superest meam paucis opinionem dicam, quam novo experimento fundabo.

Urinas enim varias Calculo laborantium collegi, gluten inde separavi, & in aere aperto, limpida urina abjecta, posui. Brevi glutinosum hoc exaruit, & dr. 2. aliquando dr. 3. materiæ lapideæ ad figuram vasis formatæ exhibuit. An autem non detur Calculosus, quin idem phænomenon in ejus urina appareat, nondum assero; sufficiat experimenti demonstrasse frequentiam.

Summa ergo rerum hæc esto: Quivis homo, etiam sanissimus, Calculi
ru-

rudimenta in se habet, eo quod solida corporis continuata vitæ actione deterantur, abradantur, humoribus misceantur, & magnam partem per urinæ vias eliminantur de corpore. Hinc etiam pro magna parte oritur terra illa subtilissima, quam Chemia in urinis invenit. Nullam inde labem sanus homo habet; quia ex alimentis tantum ac tale deperditorum loco adplicat, quantum & quale deperditum fuerat: deinde cum nulla in itinere obstacula terrea hæc materies offendit, innoxie, integreque de corpore eliminatur. Huic nunquam Calculus nascetur. At vero si contingat vel minimum corpusculum alicubi hære, ut v. g. fibrillæ portionem suppurando solutam, aut tantillum puris mora exsiccati, aut grumum sanguinis, &c. id tunc inde proficisci potest, ut terrea materies ad
ejus-

ejusmodi obstaculum retardetur, applicetur, & adhærescat: id quod dum continuo sic pergit, ideam Calculi nobis facile format.

Sed 2^{do}. Experimenta, ut vidimus, docent in urina Calculosorum multorum copiosam materiem terrestrem haberi, quæ in his cito, in illis tardius; in quibusdam ex ipsa urina stagnante, in aliis duntaxat ex aservato post effusam urinam glutine; cretam quandam, lapillosque formet. Quæri hic potest, num omnis illa cretacea materies tantummodo a solidis humani corporis detritis? An vero dentur alimenta, potulentaque, quibus subtilissima hæc terra contineatur; quæ idoneo vehiculo mista, Lacteorum oscula subeat, cum sanguine commisceatur, ab eodem per urinam abluatur? Sane Regiones, in quibus Calculosos vix invenire est,

ut v. g. multi *Lombardiæ* loci, ejusmodi suggerunt suspicionem.

An præterea calculosam Diathesim id demum appellemus, quod efficiat, ut terrestre id, quod in aqua, quod in alimentis, quod in vino est, minus subigatur, ad sanguinem vehatur, cum sanguine commisceatur, iterumque humorum circuitu, ac vi vitæ non mutetur, & in renibus tandem cum urina secernatur?

Nunquid etiam Arthritica materies eidem producendæ apta? Utique, cum Arthritidem ultimæ digestionis defectus efficiat, videntur minima quædam elementa terrestria immutata manere; eaque ut ad juncturarum arteriolas adplicantur, ita etiam ad eas renum adplicari posse, & urinas generare calcareas. Hujus mentis Clarissimus *Adamus* est, in Dissertatione anno 1740. edita, occasione
se-

sexagenarii hominis, qui perpetuo rerum aut saccharo, aut lacte, paratarum, impensus amator, Arthritidi, quosvis occupanti artus, obnoxius ultra 20. annos vixerat; dolorum vero pertæsus, eosdem novem abhinc annis Theriacæ emplastro sopiverat. Unde in periculosum morbum primo prolapsus, dein anomalam prorsus Arthritidem in multis internis corporis partibus per vices expertus erat; a Quinquennio autem acerbos vesicæ urinariæ dolores crebro repetentes, Dysuriam, & varia alia Calculi vesicæ symptomata. Bienium erat, quod ramenta calculosa, nucum putaminum instar concava, copiose emingeret; annus autem, quod his ramentis absentibus mucum cum urina redderet, qui in cretaceam abire materiem soleret. Et quod præprimis notandum, Podagræ accessu
lo-

lotium eo mucro carebat; Podagræ recessu scatebat eodem. Confirmat deinde hanc suam de Materie Arthritica ideam Autor eruditus variorum Scriptorum testimoniis. Quin etiam exemplis demonstrat calcaream Arthriticorum materiem non modo ad vias urinarias, sed quoque ad quævis alia corporis loca concretiones producere lapidosas.

Sane quæ mihi hanc sententiam probabilem reddant, plures habeo rationes. Arthriticum hominem Nosocomium XV. mensium spatio aluit, qui ab annis quindecim tum colli vertebis, tum pedum manuumque ambarum articulis, calcaream materiem excreverat, & etiamnum excernebat. Primo tempore urinam pallidam, & admodum furfuraceam emitte solebat; ultimo autem semianno, multo semper pure, una cum furfu-

ribus, onustam; denique multis ante obitum diebus & limpidam, & paucissimam. In cadavere nullus ullibi puris fomes: verum ipse sanguis, qui incredibiliter paucus in corpore supererat, adeo polyposus fuit, ut vix guttula ejus inter secandum prodierit; quod, ut obiter notem, clare ea confirmat, quæ Tom. 2. Cap. 2. *de Puogenia* scripseram. Quod autem maxime ad rem nostram; Renes ambo in corticali sua substantia crassi & ampli, omnino arenosi erant, ita ut quacumque in parte nitido semper cultro secarentur, novam semper arenam proferrent. Quippe calcarea materies hujus Podagrici partim ad renes delata, videbatur jam urinam calcaream productura fuisse, nisi eadem vasorum urinam fecernentium ora obstruxisset, hincque tum urinæ secretionem fere impedivisset,

tum

tum ipsam corticalem renum substantiam reddidisset arenosam. Calculosus ceterum nunquam fuit.

Præterea relatus a *Sigismundo Koenig* ad Societatem Anglicanam casus Juvenculæ, quæ post enormes artuum dolores demum in plurimorum, eorundemque majorum, Calculorum vomitum inciderat: descripta *Weisman-*
no Historia quinquagenariæ, quæ, crudes Arthritidis dolores perpeffa, tandem tum Intestino Recto, tum ipsa vulva, plurimos excreverat lapillos: notata denique ab ipso *Clar. Adamo* enarratio *Schneideri* de INVICTISSIMO IMPERATORE MAXIMILIANO II., qui Podagra gravissima conflictari solitus, Calculos in corde gessisse post mortem inveniebatur: hæc, inquam, omnia Cl. Viri sententiam mirifice fulciunt.

Porro quod concavas Podagricus ejus reddat has concretiones, id vel ideo est, quod Calculum in vesica habeat, ad quem adplicata hæc materies, hanc formam induat necesse est; vel quod vesicæ ipsi, forte contractæ, qualis Calculosorum frequenter reperitur, se adplicando, eam figuram adipiscatur. Prius tamen enarrata symptomata probabilius reddunt; & Catheteris, quem non adhibuerunt, ope, certum, ni fallor, fieret.

Tandem 3^{tio}. Compertum esse vidimus, calculosos homines ab *Anglicano* Medicamento sic disponi, ut materies illa, toties descripta, jam in ipsa eorum vesica lapidescat. Infauftum ergo remedium hoc tam a priorè dici deberet, quam tale esse experimentis comprobatur.

§. VII. Ex omnibus hucusque dictis evidens demum fit binas nostras in Calculo Methodos ceteris omnibus, hucusque per alios laudatis, tum præstantiores esse, tum constantiores. Curæ enim id mihi fuit, ut, quotquot eorum, qui alterutra curati, indagari potuerant, quærentur, examinarenturque sedulo, utrum ab omnibus symptomatibus immunes esse persisterent, nec ne; ut demum, si relaberentur, genuinam relapsus historiam cum Publico communicarem; at vero curæ perstant. Prima nostra Methodus vere *Brittanica* est: eandem tamen, æquali copia lactis ad aquam Calcis adjecta, promptiorem, felicioremque, invenimus. Unde etiam eandem *Stepfeniana* Methodo, licet nonnulla cum illa communia habeat, tum efficacior, tum humano corpori per omnia tutior, existima-

mus. Altera vero Methodus, quam compendii causa, nostri Nosocomii voco Methodum, Illustrissimo autem Præsidi gratus debeo, numero plurimas constantes curas effecit.

Facile ex his omnibus patet, nec in nostris remediis, nec in omnibus per alios recensitis, vires inesse Lithontripticas, quantumcumque id de suis multi jactitarint. Experientia fane convincere omnes debuit, tum in paucioribus his, quos *Anglicano* Medicamento dudum frustra adhibito, sectione liberare a Calculo oportuit, tum in omnibus, quibus remedia nostra profuere. Quippe fuimus in eo Chirurgis Gallis fortunatiores, qui, teste *Morando*, a nemine eorum, quos *Stepfeniana* remedia juvant, id obtinere potuerint, ut se denuo Cathetere examinandos præberent: dum interea nostri voto mori-

ge-

geri, Calculi, ejusque nonnunquam asperioris, præsentiam, nobis demonstrarint.

Nunquid tamen Calculus vesicæ, longiore tempore in Aqua Calcis maceratus, non solvitur? Solvitur certo multorum mensium spatio, modo Aquæ Calcis aditus detur ad Calculum, auferendo sæpius id, quod in ejus circumferentia pumicosum ab aqua redditum fuerat; ceterum minime. Ita demum trium mensium spatio solvi præcipuam majoris Calculi portionem. Similiter in experimentis suis Calculos in Aqua Calcis solvebat Doctissimus Vir *Carolus Alston*, famosus Professor *Edimburgensis*, scriptis clarus. Videatur in egregia sua *Diff. de Calce viva, & Aqua Calcis*. Verum in vesica humana neque Calculus scalpello abraditur, neque illibata virtus Aquæ Calcis ita ve-

ficam ingreditur, ut in experimentis nostris. Non mirum ergo hominem, qui 1600. libras Aq. Calc. spatio sex mensium biberat, jam post tertium illibatae valetudinis annum adhuc Calculum in vesica gerere, ut exploratione Catheteris constat.

Quærat porro nemo a me, qui fieri id, qui concipi queat, quod homo Calculum in urinario systemate gerens, secernendi tamen, excernendique urinam, perfectam exerceat functionem; & adeo indolens vivat, ac si Calculum non haberet? Sufficiat rem, captu difficilem, observatu constare. Præcedentibus Tomis, maxime tertio, Observationis frequentiam plurimis exemplis demonstravi, quæ exempla ab Autoribus notata, collectaque fuerant, priusquam Quæstio præsens existeret. Nunquid sive in humoribus humanis,
sive

sive in ipso urinario systemate, aliquid existit, quod applicatum Calculo, dolores, spasmosque excitet; quodque ipsum in quibusdam corporibus vel minime, vel haud sufficienter adsit, ut creet dolores? An hinc ratio petenda, cur inter diuturna tormenta Calculosorum nonnulli lucidis fruantur intervallis? An tandem Calx, & potissimum Uva ursina id in humoribus, aut systemate urinario, demant, absorbeant?

CAPUT VI.

DE

ANEURYSMATE.

§. I. Duo Aneurysmata curata, & Tom. 4: descripta, egregie curata manent. §. II. Aneurysmata non raro cognitu difficilia, imo etiam impossibilia. Probatur imo exemplo Aneurismatis ad Poplitem, quod ad vitæ finem usque Chirurgus imposuit. Anatomie. Dis-

quiritur an homo culpa Chirugi periisse credendus sit? Animadversio in Practicos, quibus Collegarum honori detrahere volupe.
 §. III. *Probatur idem 2^{do} exemplo inveni ad pectus Aneurysmatis. Sequuntur ad hos duos casus Corollaria Medico-Chirurgica. Quandonam compressio Aneurysmatis externa prodesse queat, nocere debeat.* §. IV. *Origo, ac celer progressus Aneurysmatis arteriæ popliteæ, & amputatio cruris. Considerationes Medico-Chirurgicæ circa arteriarum interceptiones, ac Fungi Agarici ad abscissas arterias adplicationem. Hæmorrhagia letalis, quamvis tanta adhibita esset in operatione prudentia. Anatome. Problemata circa hoc infortunium.* §. V. *Varia Phænomena Aneurysmatum internorum, eademque palliandi methodus.*

§. I. **D**Edi anno proxime priore duarum feminarum historiam, quarum altera compressione simplici, altera operatione, ab Aneurysmate in brachio curatæ fuerant. Caput præsens compositurus, jussi ambas in urbe quæri, & ad me adduci, quo constantiam curæ, inconstantiamve, cum Publico communi-

carem. Lætus vidi utriusque perfectam curam fuisse, ambas sanissimas esse, omnemque, quem vellent, motum, brachio exercere posse. Unice modo conquerebantur, quod ad mutatas tempestates ingrata titillatio affectam olim arteriam afficeret.

§. II. Cognitio Aneurysmatum utinam certior esset; signisque munita pathognomicis desisteret turpissimis erroribus ansam præbere! Hinc infortunia, quæ vel mihi, vel aliis, defectu horum signorum, contigerint, candidus enarrabo: quo demum aut majorem in Diagnosi certitudinem, aut majorem saltem in pertractando eo prudentiam, omnes adipiscamur.

Homo 37. annorum per omnia sanus, mense Octobri 1759. Erysipelate ad internum sinistri pedis malleolum se laborasse narrabat; eoque

evanido, dolorem se ad ejusdem cru-
ris Poplitem percepisse, deprehendisse
que ibidem tumorem, qui mole ac
dolore indies augesceret. Hisce com-
pescendis Emplastro Oxycroceo ad-
moto, non modo tumorem ac dolo-
rem Poplitis auctos esse, sed integrum
crus, pedemque, occupasse.

Hæc porro narrabat Chirurgo,
quem medio Januario hujus, quem
vivimus anni, ad se vocabat. At-
tente exploratis ille omnibus, dete-
xit ad caput internum ossis tibiæ
quendam veluti materiæ strepitum;
in medio vero ejus, externoque ca-
pitis latere, materiem fluctuantem.
Quantumcunque rem examinabat,
malum a vi quapiam externa origi-
nem ducere deprehendere non potuit.
Itaque crus ac pedem vehementer in-
flammatum esse cernens, cataplasma
emolliens circumposuit illi. Altera
die

die pars affecta abscessus similitudinem hinc inde exhibuit, observatusque antea strepitus, conticuit. Die tertio crure ac pede detumescantibus, maturum fere abscessum Poples referebat. Die 19. Jan. turgens pure tumor, ac veluti pus hinc inde transfudando propellens, levi scalpelli ictu dilatabatur, effundebatque mox purulentam materiem, sed simul 4. vel 5. cochlearia sanguinis. Levamen hinc tantum, ut indies redeuntem sanitatem æger assereret. Nitrosis emulsis interea utebatur. Sexto vero demum ab apertura die, quis crederet unquam! Hæmorrhagiam ad usque animi deliquium passus est. Involvit, ligavitque, quacumque possibili arte, partem. Adveniens mox Chirurgus citra guttulam effusam sanguinis totum abstulit adparatum. Sanguis igitur ultra non effluxit; debili

tamen ægro ronchus in pectore auditur, deficit respiratio, & 12. horis ab Hæmorrhagia elapsis moritur.

Re ego percepta, ad ædes me contuli, & emta examinandi venia, Aneurysmaticum faccum pugni magnitudine inveni, qui ex parva origine, suo in collo vix digitum crassa, in enormem hunc faccum abiverat. De corpore ablatum in liquore fervo.

• Facile prævideo multos his lectis fore, qui suis in arte Collegis condemnandis assueti, in Chirurgi sive ignorantiam, sive imprudentiam, acriter invecturi sint, ac si miserandus ille homo Chirurgi culpa periisset. Verum antequam eo perveniant, rogatos eosdem volo, ut, vacuo a præjudiciis animo, ad sequentia mecum attendere velint.

1^{mo}. Aneurysmati generando nulla causa violenta præcesserat. 2^{do}. Nulla Aneurysmatici tumoris signa ex anxietate ad compressionem, vel ex ejusdem pulsatione, aderant. 3^{tio}. Strepitus quidem percipiebatur; sed cum is & in Aneurysmate aliquando, nonnunquam etiam in tumoribus purulentis & aquosis observatur, ad quos Emphysema sive ob aëris accessum externum, sive ab ejusdem generatione interna, accedit; hinc cum nulla alia Aneurysmatis indicia adessent, strepitus loci ad aliam longe originem, quam ad Aneurysma, referendus videbatur. 4^{to}. Sex diebus continuis apertus tumor pus, nullum vero sanguinem, dedit; id quod alioquin in Aneurysmate, ablata resistantia, impossibile videtur. Equidem in apertura ipsa aliquot effluxere cochlearia sanguinis; sed quis

Chi-

Chirurgorum ignoret expanso vase cutaneo, eoque percisso, quandam Hæmorrhagiam observari oportere? Sex sane dies sine ullo sanguine aperto de vulnere transacti, quamcumque Aneurysmatis suspicionem, si qua nata forte fuisset, dispulissent. 5^{to}. Et qui tum in Aneurysmate, tum variis aliis in tumoribus quandoque adest strepitus, jam pridie aperturæ evanuerat. E contrario 6^{to}. communis inflammationis signa, Erysipelas nempe, aderant. 7^{mo}. Hæc inflammatio primum malleolum internum occupaverat. 8^{vo}. Nil verisimilius, quam quod Erysipelas Metastasin ad Poplitem fecerit, relinquens malleolum. 9^{no}. Inflammatio Erysipelatosa in abscessum abibat. 10^{mo}. Fluctuatio materiæ manifesto percepta est. 11^{mo}. Apertura facta, pus & mox, & sequentibus exivit diebus.

Suam

Suam cuique sententiam integram relinquens, judico inculpatum Chirur-
gum fuisse, & concludo ita per-
sonatum Aneurysma esse posse, ut
decipiat vel oculatissimos. Quo sub-
inde contingente, necesse foret quos-
vis cordatos Chirurgos Medicosque
in defensionem ejus, qui deceptus
fuerit, unitos videri, & probe me-
mores principii tum Naturalis, tum
Evangelici: *Quod tibi non vis fieri,
alteri ne facito.*

§. II. Confirmare idem potest hi-
storia sequens. Femina quadrage-
naria 17. Junii præsentis anni me
accessit, conquærens a 3. vel 4. an-
nis ægram se pectore esse: sputa
quippe purulenta, subinde sanguine
mixta, se reddere, cor sibi palpitare,
difficulter se respirare, vagosque ex-
periri dolores. Lactasse quidem in-
fantem sese, at vero cum indies ema-

ciaretur, pejusque pectore haberet, ablaſtaſſe. Anni ſpatio menſtruis ſe carentem, nempe lactationis tempore, nunc denuo a trimeſtri gaudere. Tandem adjunxit a Feſto Paſchatis, ex nulla nota ſibi cauſa, puſtulam primo animadverſam eſſe ad ſiniſtri lateris thoracis coſtas, & quidem eo a latere ſterni loco, ubi cartilagineſ infimarum coſtarum pene uniuntur, ſterno jamjam inarticulanda. Parvam quidem dudum manſiſſe, a quatuor vero retro ſeptimanis in tuberculum caſtaneæ magnitudinis abiviſſe.

Tumor examinatus, non pulſans, ſed durus & elatiſticus, veram ſui non determinabat naturam. Eo igitur Emplaſtro Diabotanon tantummodo teſto, curam ad Phthiſin Pulmonalem potiffimum direxi. Spatio trium ſeptimanarum nihil in tumore mutabatur; eo vero elapſo ſenſim emolle-

lescebat, ita ut 17. Julii apostema perfectum referret, manifesta que puris fluctuatio genuinam tumoris naturam nunc determinare videretur.

Suspicio itaque indurati, scirrhi, aut cujuscunque alius mali, prorsum evanuerat, certitudo apostematis aderat, adeoque ejusdem apertura vel ideo maxime suadenda erat, quod Pulmo suppuratus fortunato casu viam sibi extrorsum quandoque capebat; qua diu aperta internum ulcus demum evacuetur, & sanescat. Duos ejusmodi casus sub oculis præsentis habebamus; tertium, eumque tristem, lugentes, eo quod, contra monitum nostrum, Balneator salutare hoc incommodum præpostera sua arte delevisset, ægerque jam hæctice consumeretur. Et quantum casum tractabamus, jam vel ideo desperatum, quod tumor a natura extrorsum

sum ductus, sed ruptus necdum, iniqua vero Chirurgi arte retropulsus, evanidusque, nunc eundem in locum a nobis revocari nullatenus posset.

Igitur tumorem aperuimus, pusque & album, & coctum, eduximus. Erat autem pus illud ratione tumoris parcius; in fundo autem durius quidquam supererat. Igitur tumorem partim maturum, partim crudum esse concludentes, digestivum imposuimus, & Empl. Diach. c. gum., scopo maturandi totum teximus. Bihuo elapso rediit. Horrescebamus. Loco expectatæ maturationis pulsus ibidem fortissimus in tota lata basi tumoris, digitumque repellens, observatur: digito vero per aperturam immisso horrendum Aneurysma obstupescimus. Itaque mox consolidandæ aperturæ gratia Emplastrum ad Rupturas Fernellii imposuimus, in-

tegramque fere consolidationem spatio trium septimanarum obtinuimus. Deinde tumor Aneurysmatis sensim est imminutus, & in toto tumoris ambitu sub costis manifestum Aneurysma pulsationis vehementia percipitur. Ita ut quod primo detectum fuerit, id modo veluti appendix sit, quæ a magno sacco orta sese inter costarum cartilagine insinuaverit.

De industria bigam hanc Aneurysmatum communicare volui, ut patefceret 1^{mo}. Nullum fere morbum esse, in quo tum facilius, tum turpius, decipiamur. 2^{do}. Posse Aneurysma gigni sine ullo pulsu externo percepto; idque verosimiliter tunc, quando in eodem nascente, mox laminæ concreti cruoris se ejusdem applicant parietibus. 3^{tio}. Posse in membrana adiposa, nascens Aneurysma tegente, inflammationem, sup-

putationemque, ab affrictu, nasci;
& copiosum pus omnem ita motum
suffocare, ut licet jam forsitan antea
pulsatio quæpiam adverti potuisset,
eadem nunc minime percipi queat.
4^{to}. Posse etiam edueto pure adhuc
veram mali naturam latere, si tumor
residuus, explicata ad n^m. 2. de causa,
non pulset. 5^{to}. Etiam edueto pu-
re fieri posse, ut in uno casu per duos
dies, in altero per sex, copiosior cel-
lulosa substantia, nondum consumpta,
debiliorem Aneurysmatis pulsationem,
si qua adest, adhuc suffocet. 6^{to}.
Posse quoque reliquam hanc adipo-
sam membranam in pus converti, at-
que integris sex diebus omnem Aneu-
rysmatis suspicionem, suo effluxu,
amovere. 7^{mo}. Videri demum ab-
lata resistantia, vel arteriam subito
frangi, vitamque cum sanguine pro-
fundere; vel extendi ita, ut latens
olim,

olim, jam manifesta deprehendatur 8^{vo}. Consultum esse, ut in posterum, dum nobis purulenti tumores exhibebuntur, quibus aut inflammationes, aut tumores duri, atque ambigui, dudum præcesserint, antequam pus adpareat; idque maxime iis in locis, ubi dura tubercula minus frequenter, quam quidem in collo v. g. aliisque glandulosis in locis, purulenta pro parte fieri solent; ut, inquam, hic consideratissime procedamus. 9^{no}. Oportere demum, ut didiscant Chirurghi Medicos laceßere, ut quidem Publicis Actis fecerint, jactando hos circa plurima incerta, intus latentia, versari duntaxat; se autem maxime externis, ideoque certis, occupari.

Cum optimo nostro Chirurgo *Leber* in hunc casum meditatus, cogitavi, num forte compressio externa hic non conducere? Attentior vero

contemplatio nos docuit, vitium in externa arteria locum non habere, neque ejus sedem, præcise determinatam, ibi esse, ubi cartilagines jam junctæ firmam basin præbeant. Verisimile maxime ex figura rotunda esse, quod faccus sit, qui per rimam inter binas cartilagines exurgat, emineatque; quippe propterea vel arteriæ intercostalis, vel cujuspiam alius interioris, degenerationem denotet. Quia nunc egregius *Lancisius* clare demonstravit compressionem simili in casu mortem accelerare, vitalibus quippe hinc angustatis, ab omni externo molimine abstinuimus. Quin & docuit eventus, ut mox monebam, pag. 197. id minime indicari.

§. IV. Arteriæ *Popliteæ* Aneurysmatis novum exemplum habeo. Rarius id descriptum jam ter *Viennæ* vidi. Primum enarravi Tom. 4.

pag.

pag. 11. Alterum mox communicavi. Tertium autem sic se habet.

Lanio quadratus 32. annorum me convenit 10. Junii proxime elapsi, narrans tres modo septimanas esse, quod fura sinistra sibi intumuisset; duas septimanas, quod ad Poplitem tumorem adverterit, dolentem quidem, & mole in gradiendo auctum. Examine patuit Aneurysma arteriæ popliteæ esse, cujus mole venas comprimente, crus ad furam intumesce-
ret, & varicosum fieret. Ab aliis postea relatum est hominem ab alto per multos gradus cecidisse, antequam de crure conqueri cepit.

Vena brachii secta est; serum lactis cum Pulpa Tamarindorum, Rob Sambuci, ac Nitro, copiose datum; Decoctum adstringens cruri circumpositum; Ligatura idonea, quæ ab omni parte saccum arctaret, Spir.

vini rect. intincta, adponebatur; & summa corporis in lecto quies imperata est. Ut autem exactius omnia peragerentur, hominem in No-focomio servavi.

Hac Methodo fura intra quatri-duum egregie curabatur; poplitæus vero tumor indies crevit, & pugni demum magnitudinem mole æquavit; ita ut mense exacto, omnis per compressionem illum curandi spes evanesceret. Unde demum ipsi ferio declaravimus bina modo superesse, quorum alterutrum eligeret: vel certam mortem, sive post calamitosum martyrium, sive inopinatam; vel amputationem ambiguam. Hanc ideo ambiguam diximus, quia & per se gravis ac periculosa est, & nesciebamus, quam alte inciperet dilatatio aneurysmatica; quæ quidem si amputato crure altior, vix con-

strin-

stringi idonea ligatura valeret ; fin autem adhuc ligari posset , tamen impulsu sanguinis novum illico faccum formaret.

Respondit Lanio rem naturæ aliquantisper committere se velle , & Nosocomio valedixit. Interea Balneatoris se curæ commisit. Venam is secuit , multaue adplicuit. Tandem prima Augusti per amicos certiores nos reddidit æger de tumoris incremento , & intolerabilitate dolorum : enixe petens , quo recipi in Nosocomium , amputationemque inibi subire posset. Mox eum recipientes , invenimus tumorem longe extensio-rem , inque latus productum esse ; dolores autem tantos , ut ne opio quidem largiore sopirentur.

Hinc properandum esse rati sumus. Amputationem , præsentibus iisdem fere Medicis atque Chirurgis,
qui

qui Lithotomiæ pag. 156. adstiterant, aliisque, D. *Leber* spatium 7. minutorum absolvit.

Quæsitum fuerat, utrum arteriam majorem, atque unam alteramve minorem, ligatura, an *Fungi Agarici* adplicatione, obturarem? Considerabamus ab una parte ligaturam arteriæ tutissimam quidem semper haberi; non raro tamen intercepto nervo, ejusve ramulis, convulsiones nasci, quibus ars non esset interno externove auxilio compescendis. Ab altera parte *Tom. 2. Acad. Reg. Chir. Par.* tria exempla inveneramus, ab egregio *Morando* relata, felicitis *Agarici* successus in crurum amputatione. Hinc eo fere inclinasset. Attamen *Parisi* exempla *Cruris* referebant, non *Femoris* amputationem. Cum igitur hic de femoris amputatione ageretur, & quidem de eadem
lon-

longe altius, ne quid de facco reliqui faceremus, instituenda, ubi certe arteria longe majoris diametri esset; præterea cum exemplum in iisdem *Actis Parisinis*, in *Dissert. D. Louis*, pag. 395. referretur, quod Agaricum in amputato crure adeo inutilem demonstrasset, ut semihora elapsa totus adparatus auferendus esset, adhibendaque ligatura; rem dubiam experiri nolimus, sed majorem saltem truncum arte ligandum esse, minores vero Agarici fungo obturari posse, unanimi consilio decrevimus. Chirurgus itaque eo modo omnia perfecit, & soliti pulveris adstringentis loco totum vulnus Agarici fungi pulvere crasse textit, Instrumentum tornatile quoque ad arteriam apte comprimendam adposuit.

Hoc pacto nos ab omni Hæmorrhagiæ metu exemptos credentes, turpi-

pitèr tamen nos elufos vidimus; trihorio ab operatione fanguine per univerfum tranfluente adparatum, lætoque toto inde madente. Chirurgus fasciis novis fuper vetera adductis, arctiusque appreffo ftringente Inftrumento, egoque Diacodio largiore, Hæmorrhagiam imminuimus, moderavimus, ftitimus.

Saccus nunc erat amputata in parte examinandus. Arteria fupra faccum naturalis magnitudinis demonftrabat amputationem debito peractam in loco effe. Arteria, non ut in cafu pag. 190. defcripto, uno latere, fed toto fuo ambitu in faccum quaquavorfum extenfum, abiverat, excrefcente fepimento membranofò, fed furfum deorfumque abrupto, illum bifariam dividente. Nervus magnus adjacens tota facci longitudine arctiffime cum eodem coive.

coiverat. Ipsumque Aneurysma cum superiore portione Gastrocnemii inseparabiliter connatum erat. Unde hominem ita a motu minimo doluisse non mirabamur; quia sacculus, nervusque, & musculus, unam exhibebant, eandemque concretam, atque confusam massam. Membrana porro ipsa postica sacculi, laterisque externi, adeo tenuis fuit, ut dum vi minima expandebatur, dilaceraretur. Quapropter id certum, quod, dilata operatione, disrumpi cito, subitamque facere mortem, debuisset.

Interim æger noster una atque altera hora, postquam Hæmorrhagia cessasset, debilitari cepit, brevi dein frigescere, leviozem iterum Hæmorrhagiam pati, continuo vomere, pulmone angi, leviter delirare, tandemque vultu convelli. Horis 25. ab operatione elapsis obiit.

Exa-

Examinavimus tunc serio amputationis locum. Ligatura arteriam majorem apte claudebat; nervum autem minime comprehendebat. Fungus vasis suis per strata adplicatus inventus est. Vulnus integrum pulvere fungi egregie, crassiusque, tectum. Pectore aperto, cor maximum, at pallescens, & vacuum. Vacua etiam omnia vasa majora, arteriosa, venosa; exiguum modo, gracilemque, polypum sua in axi gerentia.

Hæmorrhagia inter operationem, ac trihorio post illam, nata, homo hic tantum amisit cruoris, ut sine vitæ dispendio ultra amittere non potuerit. Levior postea per totum apparatus transfusatio abstulit eum reliquum necessarium sanguinem, vitamque ademit.

Opti-

Optime tamen cum provisum Hæmorrhagiæ videretur, tum Ligatura, tum Fungo, tum Instrumento, quæri potest an Fungi hujus viribus nimium non tribuamus? An vero in posterum forte præstaret majori arteriæ applicare eundem, quia habet compressio suum punctum fixum ad os; reliquas autem duas, tresve arterias, imo etiam venam majorem, quæ, ligata arteria, aliquando vice arteriæ fungens, terribilem Hæmorrhagiam producit, firma interceptione ligare?

§. V. Aneurysmata interna multa *Austria* habet. Plura curavimus Methodo descripta Tom. 4. pag. 29. multa vero incurabilia manent. Habuimus hoc anno horrenda exempla, costarum remotarum, sterni elevati, motus aneurysmatici terribilis supra mammam dextram, sine ullo motu ad regionem cordis, &c. Hos pal-

liatis utcumque ærumnis solamur, omnem vigilantiam adhibitori, ut post facta eosdem examinemus. Mire interim quosdam levare sequentia demonstrant.

Juvenula fortis, torosa, bene menstruens, 24. annos nata, finire Septembri 1759. circa inferiora steri dolere cepit, & quoddam Emplastrum loco admovit. Sed pedetentim aliquid sub cartilagine ensiformi tumere percepit, ad tactum dolere, simulque fortiter pulsare, & somnos valde perturbatos efficere. Cum hæc ingravescerent, venit primo ad me 26. Febr. 1760. Cum Chirurgo & Assistentibus, eam examinans, deprehendi locum pulsan-tem, palmam manus fere æquantem esse, stanti quidem magis, minus vero jacenti, percipiendum. Malum sensim cepit nocte ingravescere, ac tandem gradus conscendenti respi-

spiratio fere omnis deficere. A pafu quoque pejus habuit. Majo menfe minus, Junio parum, Julio nihil ultra femina doluit; pulfatio minime molefta superfuit modo. Ita quidem, ut jam optime comedat, tranquilliffime dormiat, & graves ancillares labores, indefeffa omnino, liberaque pectore, peragat.

Ad inexpectatam hanc mutationem fumfit tota die ferum lactis, cum Nitro, & Cremore Tartari; cubitum vero petens $\frac{1}{2}$ fequentis: R. Pulp. Tamarind. Rob. Samb. Syr. Diacod. \bar{a} unc. 2. Laud. Liq. Syd. dr. $1\frac{1}{2}$. Et quia etiam naufeoso ac debili ventriculo, tum & fegniori alvo, profpiciendum erat, fumfit quovis quarto mane dr. med. Elect. Hieræ picræ. Optime fe nunc habens, pergit fero lactis cum melle quotidie uti, alterno autem die Paregorico.

Dubitabit forte quispiam, utrum hæc femina verum Aneurysma habuerit, an potius Deuteropathicum a Ventriculo, Pyloro, Pancreate? Idque 1^{mo}. quia haud insolitum hic Medicos decipi, ut exemplis patuit, *Tom. 4. cap. de Aneur.* 2^{do}. Quia signa adfuere hærentis cujuspian labis in ventriculo, aut prope illum. 3^{tio}. Quia post multa solventia, & repetitam sæpius quartanam purgationem insigniter lucrata est ægra. Huic respondeo: Etiam si res ita haberet, conferret vidisse, qua demum Methodo ambiguum hoc malum superetur. Attamen longe verosimilius Prothopaticam esse affectionem; cum morbus medium annum jam emensus esset, priusquam inciperet ventriculi incommoda sibi juncta habere; & antea cum optima functione naturali, solo tumore, dolore, ac pulsu consisteret.

Fe-

Femina 26. annorum mense Augusti 1758. brachia in altum, onus grave depositura, extendens, medio in pectore crepitum observabat. Paulo post ædemate totius corporis affecta est; quod copioso Rob Sambuci dispulisse se credit. Tussis inde nata, sputumque sanguinis, vespertini quoque horrores, & pectoris dolores continui. Remediis aptis a Tussi multum, a sputo sanguinis penitus, ubi liberata erat, conquesta est 15. Martii 1759. interna, eaque violenta pulsatione os sterni sibi attolli videri. Examine instituto deprehendimus media, eaque inferiore sterni parte tota, ejusmodi pulsum, ut digiti, vi quasi, repellerentur. Cum adderet vehementius ibidem se ardere ac dolere, nec dorso ultra incumbere posse, suspicari Aneurysma debuimus. Tandem pulsatio, tumorque magnus, col-

